

SAMUEL

1 Im ¹elikin an Saul mij, ke Devid e ar jeblaktok jen an mōn ro dri Amelek, im Devid e ar berwōt ruo ran i Ziklag; **2** ran eo ken ka jilu, lo, juōn eman e ar itok jen kamp eo an Saul, im emwij kekel nuknuk ko an, im brij ion bōran: im ein drein, ke e ar itok nōn iben Devid, e ar buñbero im aber. **3** Im Devid e ar ba nōn e, Kwoj itok jen ia? Im e ar ba nōn e, I ar ko jen kamp in Israel. **4** Im Devid e ar ba nōn e, Ekijkan an kar walok men eo? ij akwelap bwe kwon kennanek iō. Im e ar uak, Armij ro rar ko jen tōrinae eo, im elōñ ian armij re bero im mij; im Saul im Jonetan leo nejin re mij bareinwōt. **5** Im Devid e ar ba nōn likao eo ej kennanek e, Ekijkan am jela bwe e mij Saul im Jonetan nejin? **6** Im likao eo ej kennanek e, e ar ba, Ke I ar etal bōjik i tol Gilboa, lo, Saul ej jurōk e kin mōri eo an; im lo, jariat ko im ro dri uwe ion ors rar kanuij lukworkwore. **7** Im ke e ar reiliklok, e ar lo iō, im kirtok iō. Im I ar ba, Ŋa e. **8** Im e ar ba nōn iō, Wōn kwe? Im I ar uak, Ŋa juōn dri Amelek. **9** Im e ar ba nōn iō, Kwon jutōk ituriō, ij akwelap, im mōn iō; bwe iñtan e ar itok iōō, kin aō mour. **10** Ein drein I ar jutōk iturin, im mōne, bwe I ar kanuij jela e ban mour elañe ej buñ: im I ar bōk bokrōnat eo e ar ber ion bōran, im luko eo ej ion pein, im bōktok nōn iben aō iroi.

11 Inem ²Devid e ar jibwe nuknuk ko an, im kekel; im ein drein armij otemfej iben: **12** im rar liājlol, im jōñ, im jitlok nōn jota, kin Saul, im kin Jonetan nejin, im kin ro dri Israel; kin ke rar buñ kin jāji. **13** Im Devid e ar ba nōn likao eo e ar kennanek e, Kwoj jen ia? im e ar uak,

Ŋa nejin juōn dri itoitōk, dri Amelek. **14** Im Devid e ar ba nōn e, Ekijkan am jab mijōk in kōtellok peōm in mōn eo Jeova e ar kabite? **15** Im Devid e ar kirtok juōn ian likao ro, im ba, Kwon kebake leo im mōn e. Im e ar mōn e bwe en mij. **16** Im Devid ej ba nōn e, Bōtōktōkōm en ber ion bōrōm; bwe loñōm e ar kennan nae yuk, im ba, I ar mōn eo Jeova e ar kabite.

17 Im Devid e ar jōñōt Saul im Jonetan nejin, kin jōñ kiejej in: **18** (im e ar jiroñ ir bwe ren katakin ro nejin Juda, al an libon: lo, emwij jeje ilo buk in Jashar):

19 O Israel, emwij air mōn aibujuij eo am, ilo jikōm re utiej! Yok, re buñ wōt ro re kajur!

20 Komin jab kabuñbuñloke i Gat, komin jab kwaloke ilo ial ko an Ashkilon; ñe ab limaro nejin dri Pilistia ren mōnōnō, ñe ab limaro nejin dri jab mijmij ren kimjāje.

21 Komeo tol ko tol in Gilboa, en ejelok molawi ak wut iomi, ak jikin kallip in jurtak ko: bwe ijo likipijñōk an ro re kajur emwij joloki ilo nana, likipijñōk an Saul, einwōt jab kabite kin oil.

22 Jen bōtōktōkin mijijak ro, jen kioeo an ro re kajur, libon an Jonetan e ar jab oktōklik, im jāji an Saul e ar jab jeblaktok im ejelok kwonōn.

23 Saul im Jonetan rar wolbo im armij in yokwe ke re mour, im ke re mij re jab jibil jen dron: rar mōkōj jen igōl ko, rar kajur jen laion ko.

24 Kom limaro nejin Israel, komin jōñōt Saul, eo e ar nabalimi kin nuknuk ekilmir im emōn wōt, eo e ar kalitlit nuknuk ko ami kin inōk gold.

25 Yok, re buñ wōt, ro re kajur ilukwōn tōrinae! Rar mōn kwe Jonetan ilo jikōm re utiej.

26 Ij iñtan kin kwe, jeiō Jonetan: kwar kanuij wolbo iba: am yokwe iō e ar men in bwilōñ, elaplok jen yokwe an kōra rōn.

27 Yok, re buñ wōt ro re kajur, im ken tōrinae ko re joko otem joko!

2 Im elikin men in, Devid e ar ka-jitōk iben Jeova, im ba, In wōn-liñlok ñōn jabrewōt ian jikin kwelok ko an Juda ke? Im Jeova e ar ba, Kwon wōnliñlok. Im Devid e ar ba, In wōnliñlok ñōn ia? Im E ar ba, Ñōn Hibron. 2 Ein drein e ar wōn-liñlok ñōn ijo, im bareinwōt ¹limaro ruo belen, Ehinoam dri Jezriel, im Abigeil, lio e kar belen dri Karmel. 3 Im e ar āñinliñlok armij ro dron, jabrewōt armij im ro nukin: im rar jokwe ilo jikin kwelok ko i Hibron. 4 Im ro dri Juda rar itok, im ²rar kabit Devid ijo, kiñ ion imōn Juda.

Im rar kennanek Devid, im ba, ³Dri Jebesh-giliad ro rar kalibwin Saul. 5 Im Devid e ar jilkinlok ro dri jilik ñōn iben ro dri Jebesh-giliad, im ba ñōn ir, Emōnōnō kom jen Jeova, kin ami kwalok joij ñōn ami iroi, aet ñōn Saul, im kom ar kalibwin e. 6 Im kiō Jeova en kwalok joij im mol ñōn kom: im ña I naj bareinwōt nawōnami kin joij in, kin ami kar kōmōn men in. 7 Inem peōmi ren kajur, im komin beran; bwe Saul ami iroi e mij, im bareinwōt ro dri Juda rar kabit iō kiñ ioir.

8 Ak ⁴Abner nejin Ner, kapen an jar in tōrinae an Saul, e ar bōk Ishboshet leo nejin Saul, im āñinlok e ñōn Mehaneim; 9 im e ar kōmōne kiñ ion Giliad, im ion ro dri Ashur, im ion Jezriel, im ion Ipreim, im ion Benjamin im ion aolepen Israel. 10 Ishboshet leo nejin Saul, e kar ridtōn eñoul yiō ke e ar jino an kiñ ion Israel, im e ar kiñ iomin ruo yiō. A imōn Juda rar lor Devid. 11 Im toñ an Devid kiñ i Hibron ion imōn Juda, jiljilimjuōn yiō im jiljino aliñ.

12 Im Abner, nejin Ner, im ro dri korijeran Ishboshet, leo nejin Saul, rar ilok jen Mehaneim ñōn Gibeon.

13 Im ¹Joab, leo nejin Ziruaia, im ro dri korijeran Devid rar ilen wōnmae ir i lwe in Gibeon; im rar jijōt iturin lwe eo, ijen im ijen. 14 Im Abner e ar ba ñōn Joab, Likao rōn ren jutōk im kemjenñiñi iman mejer. Im Joab e ar ba, Ren jutōk. 15 Inem rar jutōk im elālōk kin orair: joñoul ruo kin Benjamin im kin Ishboshet, leo nejin Saul, im joñoul ruo ian ro dri korijeran Devid. 16 Im jabrewōt iaire e ar drārebōran dron, im wākari katin kin jāji; ein drein rar jimor buñ: kin men in, etan jikin eo Helkat-hazurim, eo i Gibeon. 17 Im elap air tōrinae ran eo; im ro dron Devid rar bōk anjo ion Abner im ro dri Israel.

18 Im ijo lōmaro jilu nejin Ziruaia, Joab im Ebishai, im Esahel: im Esahel e mōkōj einwōt roe awia. 19 Im Esahel e ar lukworkwore Abner; im ilo an ilok e ar jab jeōr ñōn anbijmaroñ ak anmiñ jen an lor Abner. 20 Inem Abner e reiliklok, im ba, Kwe Esahel ke? Im e ar uak, Ña e. 21 Im Abner e ar ba ñōn e, Kwon jeōrlok ñōn anbijmaroñ ak anmiñ, im jibwe juōn ian likao ro, im bōk ken tōrinae ko an. A Esahel e jab kōnan jeōr jen an lore. 22 Im Abner e ar bar ba ñōn Esahel, Kwon jeōrlok jen an lor iō: etke in mōn yuk ñōn lōl? inem e najkijkan aō maroñ in kwalok meja ñōn Joab jeōm? 23 A e ar abwin jeōr; inem Abner e ar wākari ubōn kin lokōn mōri eo an, im e bijlok; im e ar buñ ijo im mij; im ro otem-jej rar itok ñōn ijo Esahel e ar buñ im mij, re bwijrōk.

24 A Joab im Ebishai rar lukworkwor Abner: im e tulok al ke rar itok ñōn tol Ama, ej ber iman Gia, iturin ial ñōn ene jemaren in Gibeon. 25 Im ro nejin Benjamin rar kweloklok ilo juōn jar, iben Abner, im rar jutōk ion jabōn juōn tol. 26 Inem Abner e ar kir ñōn Joab, im ba, Jāji en mōña in drio ke? kwo jab jela bwe enaj meo ilo jemlokōn ke? inem ietoñ am jab jiroñ armij ro bwe ren jeblak jen air lukworkwori ro jeir im jātir? 27 Im Joab e ar ba, Einwōt Jeova e mour,

¹ 1 Sam. 25. 42, 43. ² Jap. 5. 3, 5. ³ 1 Sam. 31. 11-13.
⁴ 1 Sam. 14. 50.

¹ 1 Kron. 2. 16.

elañe kwar jab konono, inem emol ke ejibon armij re naj kar ilok, im jab lukworkwore jabrewot jein im jatin. 28 Ein drein Joab e ar jilil; im aolepen armij rar bwijrok, im jab bar lukworkwore Israel, im jab bar torinaek ir. 29 Im Abner kab ro dron rar etal aolepen bon eo im driblok Araba; im rar elā jen Jordan, im ilok ilujen aolepen Bitron, im rar itok non Mehaneim.

30 Im Joab e ar jeblak jen an lukworkwore Abner: im ke e ar kweloktok armij otemjej, re joko jen ian ro dron Devid joñoul druatim-juon armij kab Esahel. 31 A ro dron Devid rar mon jen ian dri Benjamin im dron Abner, jilu buki jiljinoñoul armij. 32 Im rar kwotoke Esahel, im kalibwin e ilo lupon jemen, eo i Betleem. Im Joab im ro dron rar etal aolepen bon eo, im e rane ir na i Hibron.

3 Inem ¹eto an imon Saul im imon Devid torinaek dron: im Devid e ar kajurlok, a imon Saul e ar mojinolok wot.

2 Im eor nejin man rar lotak non Devid i Hibron: im manjen Amnon jen Ehinoam dri Jezriel; 3 im eo ken ka ruo, Kileab jen Abigeil lio e kar belen Nebal dri Karmel; im eo ken ka jilu, Absalom nejin Meaka lio nejin Talmai kin in Gishur; 4 im eo ken kemen, Adonaija nejin Hagit; im eo ken ka lailim, Shepetaia nejin Abital; 5 im eo ken ka jiljino, Iream jen Egla, lio belen Devid. Rein ro rar lotak non Devid i Hibron.

6 Im ilo ien torinae eo ikotan imon Saul im imon Devid, Abner e ar moke kakajur e ilo imon Saul. 7 Ak e kar iben Saul juon kora konkubain, etan Rizpa, nejin Eia: im Ishboshet e ar ba non Abner, Etke kwar ilok non iben konkubain eo an jema? 8 Inem Abner e ar kanuij illu kin nan ko an Ishboshet, im e ba, Na boran juon kiru roror an Juda ke? Ranin ij kwalok joiñ non imon Saul jemom, non ro jein im jatin, im non ro jeran, im I ar jab ketoke yuk na ilo pein Devid;

ijoke kwoj kinaklok io kin juon bwir iben lio. 9 Anij en komon ein drein non Abner, im kalaplok, elane, einwot Jeova e ar kanojnij non Devid, I jab komon einwot non e; 10 in kamokit ailiñ eo jen imon Saul, im kajur tron an Devid ion Israel, im ion Juda, jen Dan non Bier-shiba. 11 Im e ban uak Abner kin bar juon nan, bwe e mijok e.

12 Im Abner e ar moke jilkinlok dri jilik non Devid, im ba, An won eneo? im e ar bareinwot ba, Kwon komon bujen iba, im lo, peio e naj ibom in boktok aolepen Israel non yuk. 13 Im e ar ba, Emon; I naj komon bujen ibom; a ij kajitok juon men ibom: enin, kwo jamin lo meja elane kwo jab aaintok mokta non iba Maikal lio nejin Saul, ne kwo naj iten lo meja. 14 Im Devid e ar jilkinlok ro dri jilik non Ishboshet, leo nejin Saul, im ba, Kwon letok lio beliok Maikal, eo I ar wiaik e bwe en beliok kin jibuki kilin man an dri Pilistia. 15 Im Ishboshet e ar jiliklok, im bok e jen iben leo belen, Paltiel nejin Leish. 16 Im leo belen e ar ilok ibenlok, im jon ilo an etetal, im e ar lore non Behurim. Inem Abner e ar ba non e, Kwon ilok, kwon jeblak: inem e ar jeblak.

17 Im Abner e ar komao iben ridto ro an Israel, im ba, Ien ko re motlok kom ar kabukot Devid bwe en kin iomi: 18 inem kiok komin komone; bwe Jeova e ar konono kin Devid im ba, Kin pein korijera Devid I naj lomoren ro droo Israel jen pein ro dri Pilistia, im jen pein ro otemjej dri kijirate ir. 19 Im Abner e ar bareinwot konono i lojiliñin Benjamin: im Abner e ar bareinwot ilen konono i lojiliñin Devid i Hibron, men otemjej Israel im aolepen imon Benjamin rej lemnok emon. 20 Ein drein Abner e ar itok non iben Devid non Hibron, im roñoul eman iben. Im Devid e ar komon kwojkwoj non Abner im ro iben. 21 Im Abner e ar ba non Devid, I naj jutok im kokweloktok dri Israel otemjej non iben ao iroiñ kin ne, bwe ren komon bujen ibom, im bwe kwon

kiñ ion ro otemjej am e kōnan. Inem Devid e ar jilkinlok Abner; im e ar ilok ilo ainemōn.

22 Im lo, ro dri korijeran Devid im Joab, rar jeblak jen juōn tōrinae in rakim, im rar bōktok ibeir men in rakim elap: a Abner e joko iben Devid i Hibron; bwe emwij an jilkinlok e, im e ar ilok ilo ainemōn. 23 Ke Joab im aolepen jar in tōrinae iben rar itok, rar kennanek Joab, im ba, Abner nejin Ner, e ar itok nōn iben kiñ eo, im e ar jilkinlok e, im e ar ilok ilo ainemōn. 24 Inem Joab e ar itok nōn iben kiñ eo, im ba, Kwar it? lo, Abner e ar itok nōn ibōm; etke kwar jilkinlok e, im e ar ilok wōt? 25 Kwo jela kajen Abner nejin Ner, bwe e ar iten mone yuk, im bwe en jela am drioi j dreloñ, im men otemjej kwoj kōmōne. 26 Im ke Joab e ar drioi jlok jen iben Devid, e ar jilkinlok ro dri jilik nōn iben Abner, im rar āñintok e jen aibij Saira: a Devid e ar jab jela kake.

27 Im ke e mottok Abner nōn Hibron, Joab e ar kajeōr e ilo kejem bwe en konono iben ilo etino, im e ar mōn e kin jāji inem e ar mij, bwe en mo kinij kin Esahel jātin. 28 Im tokelik, ke Devid e ar roñjake, e ar ba, En ejelok ruōn nā im ailiñ eo aō iman Jeova in drio, kin bōtōktōkin Abner nejin Ner: 29 a en buñ ion bōran Joab, im ion aolepen nukin jemen; im en jab joko jen imōn Joab, juōn eor an torlok, ak dri leper, ak dri atartar ion jōkwōnōn, ak buñ kin jāji, ak ej aikwij bred. 30 Ein drein Joab im Ebishai jātin rar mōn Abner, kin an kar mōn leo jātir Esahel i Gibeon ilo tōrinae eo.

31 Im Devid e ar ba nōn Joab, im nōn armij otemjej iben, Komin kekel nuknuk ko ami, im kañōrñōr kom kin nuknuk eklep iren, im liājlol iman Abner. Im kiñ Devid e ar lore kōtem eo. 32 Im rar kalibwin Abner i Hibron: im kiñ eo e ar koutiej ainiken im jōñ i lūpōn Abner; im armij otemjej rar jōñ. 33 Im kiñ eo e ar jōñōt Abner, im ba, Abner en mij einwōt

juōn dri bwebwe ke? 34 Ar jab lukwoj peōm, ak likit neōm ilo kworōk ko: einwōt juōn armij ej buñ iman ro nejin nana, ein drein kwar buñ. Im armij otemjej rar iten bar jōñ ion. 35 Im armij otemjej rar iten kōmōn bwe Devid en mōña bred ke ej ran wōt; a Devid e ar kanōjnij, im ba, Anij en kōmōn einwōt, im kalaplok nōn iō, elañe ij erjoñ bred, ak jabrewōt bar mōña mokta jen an tulok al. 36 Im armij otemjej rar kili, im e ar kabuñburueir; einwōt jabrewōt men eo kiñ e ar kōmōne e ar kabuñburuen armij otemjej. 37 Ein drein armij otemjej im dri Israel otemjej rar jela ran eo bwe e ar jab bebe an kiñ eo bwe en mōn Abner nejin Ner. 38 Im kiñ eo e ar ba nōn ro dri korijeran, Kom jab jela bwe e buñ juōn iroi j im armij e utiej ranin ilo Israel ke? 39 Im nā I mōjino ranin meñe emwij kabit iō kiñ; im armij rein ro nejin Ziruaia re bin jen nā: Jeova en nawōnan dri kōmōn nana ekar nōn nana eo an.

4 A ke Ishboshet, leo nejin Saul, e ar roñjake bwe Abner e mij i Hibron, e mōjinolok pein, im dri Israel otemjej re lokjenair. 2 Im iben Ishboshet, leo nejin Saul, ruo man rar kapen in jar ko: etan juōn Beana, im etan eo juōn Rekab, ro nejin Rimon dri Bierot, ian ro nejin Benjamin, (bwe Bierot re watōke an Benjamin: 3 im ro dri Bierot rar ko nōn Giteim, im rar itoitōk ie nōn ranin).

4 A juōn eman nejin Jonetan leo nejin Saul, im e kirro. E kar ridtōn lailim yiō ke nan ko kin Saul im Jonetan rar itok jen Jezriel; im kōra eo dri lale e arkwotōke, im ko: im ke e kijorur in ko, e wutlok ladrik eo, inem e kirro. Im etan Mipiboshet.

5 Im lōmaro nejin Rimon, dri Bierot, Rekab im Beana, rar ilok, im rar itok ke e loliñ al nōn mweo imōn Ishboshet, ke e ar kakije ke e raelip. 6 Im rar itok im dreloñ iolapen mweo einwōt elañe rej bōktok wit; im rar mōn e: im Rekab im Beana jātin rar ko. 7 A ke rar dreloñ iloan mweo, ke e ar babu ion aowej eo iloan rum

eo an, rar jebōke, im mōn e, im jōb-
bare, im bōk bōran, im etal ilo ial in
Araba, aolepen bofi eo. 8 Im rar bōk-
tok bōran Ishboshet nōn Devid, nōn
Hibron, im rar ba nōn kiñ eo, Lo, bō-
ran Ishboshet, leo nejin Saul, eo dri
kijirāte yuk, eo e ar kabukot am-
mour; im Jeova e ar irenwōne nōn aō
iroij kiñ ranin kin Saul, im kin inen.
9 Im Devid e ar uak Rekab im Beana
jātin, ro nejin Rimondri Bierot, im ba
nōn ir, Einwōt Jeova e mour, eo e ar
lomoren aō jen jorran otemfej, 10
1 ke juōn e ar kennanek iō, im ba,
Saul e mij, im ej lemnok e ar bōktok
nan emōn, I ar jibwe, im mōn e i Zik-
lag, eo wōnan I ar lelok nōn e kin nan
eo an. 11 E nañin laplok, ke ro dri
nana rar mōn juōn armij emōn iloan
mweo imōn ion aowej eo an, kiō etke
in jab kabukot bōtōktōkin jen peimi,
im jolok komro jen lōl? 12 Im De-
vid e ar jiroñ likao ro an, im rar mōn
irro, im bukwelok peir im neir, im to-
toik irro iturin lweo eo i Hibron. A
rar bōk bōran Ishboshet im kalibwin
e iben Abner i Hibron.

5 Inem 2 bwij ko otemfej in Israel,
rar itok nōn iben Devid i Hibron,
im konono, im ba, Lo, kim drom im
kōniekōm. 2 Ilo ien ko re motlok,
ke Saul e ar kiñ iom, kwe kwar tel
im kadrioij im kadreloñ Israel: im
Jeova e ar ba nōn yuk, Kwo naj
seperd an ro droō Israel, im kwo naj
iroij ion Israel. 3 Ein drein ridto
rōn otemfej an Israel rar itok nōn
iben kiñ eo nōn Hibron; im kiñ Devid
e ar kōmōn bujen ibeir i Hibron iman
Jeova: im rar kabit Devid kiñ ion
Israel. 4 Devid e ar ridtōn jilñoul
yiō ke e ar jino in kiñ, im e ar kiñ
iomin eñoul yiō. 5 Ilo Hibron e 3 ar
kiñ ion Juda jiljilimjuōn yiō im jiljino
aliñ; im ilo Jerusalem e ar kiñ jilñoul
jilu yiō ion aolepen Israel im Juda.

6 Im kiñ eo im ro dron rar ilok nōn
Jerusalem nae ro dri Jibus, ro dri
eneo, ro rar konono nōn Devid im ba,
Elañe kwo jab bōklok ro dri bilo im ro
dri kirro, kwo ban dreloñtok; rej

lemnok Devid e ban dreloñ ie. 7 Ijoke,
Devid e ar bōk me e bin an Zaion;
eñin jikin kwelok an Devid. 8 Im ran
eo Devid e ar ba, Jabrewōt eo ej mōn
ro dri Jibus, en wōnliñlok nōn wea eo,
im mōn ro dri kirro im ro dri bilo, ro
an Devid ej kijirāte ir. Kin men in
rej ba, Ijo dri bilo im dri kirro; e
ban dreloñ iloan mweo. 9 Im Devid
e ar jokwe iloan me eo e bin, im nae-
tan jikin kwelok in Devid. Im Devid
e ar kalek belakin jen Millo im ebak-
tok. 10 Im Devid e ar kajurlok wōt,
bwe Jeova, Anij in inelip eo, E ar ber
iben.

11 Im 1 Hairam, kiñ in Tair, e ar
jilkinlok ro dri jilik nōn Devid, im
wijki aik, im ro dri kalek kin alal ko,
im ro dri kalek kin dreka ko; im rar
kalek juōn im nōn Devid. 12 Im
Devid e ar kile bwe Jeova e ar kabine
kiñ ion Israel, im bwe E ar koutiej
ailiñ eo an kin ro dron Israel.

13 Im 2 Devid e ar bōk bar jet kōra
konkubain jen Jerusalem, elikin an
itok jen Hibron; im bar jet nejin
man in kōra rar lotak nōn Devid. 14
Im rein etan ro rar lotak nōn e i Jeru-
salem: Shamua, im Shobab, im Netan,
im Solomon, 15 im Ibhar, im Elishua,
im Nipeg, im Jepia, 16 im Elishema,
im Elaida, im Elipelet.

17 Im ke ro dri Pilistia rar roñjake
kin air kabit Devid kiñ ion Israel, dri
Pilistia otemfej rar iten kabukot De-
vid; im Devid e ar roñjake, im wōn-
lōllok nōn me eo e bin. 18 Ak dri
Pilistia rar wōnliñtok im mōke kaje-
rer ir ilo komlōl in Riheim. 19 Im
Devid e ar kajitōk iben Jeova, im ba,
In wōnliñlok nae ro dri Pilistia ke?
Kwo naj ketōk ir na ilo peiō ke? Im
Jeova e ar ba nōn Devid, Kwon wōn-
liñlok; bwe emol I naj ketōk ro dri
Pilistia ilo peōm. 20 Im Devid e ar
itok nōn Beal-perezim, im Devid e ar
mōn ir ijo; im e ar ba, Jeova e ar
ruji ro dri kijirāte iō imaō, einwōt
elañe e jiōblok dren ko. Kin men
in, e ar naetan jikin eo Beal-perezim.
21 Im rar likit ekjōp ko air ijo; im
Devid im ro dron rar item bōkilok.

1 Jap. 1. 2. 4. 15. 2 1 Kron. 11. 1-3. 3 Jap. 2. 11.
4 Josh. 15. 63; 18. 28.

1 1 Kron. 14. 1. 2 Dut. 17. 17.

22 Im ro dri Pilistia rar bar itok, im mōke kajerer ir ilo komlōl Ripeim. 23 Im ke Devid e ar kajitōk iben Jeova, E ar ba, Kwon jab wōnlōllok: kwon kabol ir, im ñe elikir kwon itok nae ir ikijen wijki mōlberi. 24 Im ñe kwoj roñ ainiken etetal i jabōn wijki mōlberi ko, inem kwon kate yuk; bwe ien eo Jeova ej etal imam bwe En mōn jar an ro dri Pilistia. 25 Im Devid e ar kōmōn ein drein, einwōt Jeova e ar jiroñ e, im e ar mōn ro dri Pilistia jen Giba ñōn ijo kwoj tōbar Gizer.

6 Im Devid e ar bar kokweloktok ro otemjej ar kālet ir jen Israel, jilñoul tausan. 2 Im Devid e ar jutōk, im ilok iben ro dron otemjej jen Beale-juda, bwe en bōkliñtok jen ijo dipdip an Anij, eo rej naetan kin At eo, eokwe, etan Jeova an inelip eo, Eo ej jijōt ilōñin kerub ko. 3 Im rar likit dipdip an Anij ion juōn wagon ekāl, im bōktok jen loan imōn Ebinedab, eo ej ion tol eo: im Uzza im Ehaio, ro nejin Ebinedab, rar tel wagon eo ekāl. 4 Im rar¹ bōktok e jen iloan imōn Ebinedab, eo ej ion tol eo, im iben dipdip in Anij: im Ehaio e ar etal iman dipdip eo. 5 Im Devid im aolepen Israel rar kajōñjōñ iman Jeova, kin ken kajōñjōñ wāweir otemjej, kōmōnmōni jen wijki fōr, im kin arp, im kin salteri, im kin timbrel, im kin kastenet, im kin simbal ko.

6 Im ke rar itok ñōn jikin dreñdreñ an Nekon, Uzza e² ar kōtellok pein ñōn dipdip an Anij, im jibwe; bwe e tibñil ox ko. 7 Im ebwil illu an Jeova nae Uzza; im Anij e ar mōn e ijo kin bwir eo an; im e ar mij iturin dipdip in Anij. 8 Im Devid e ar li-man kin an Jeova jōblok nae Uzza; im e ar naetan jikin eo Pirez-uzza, ñōn ranin. 9 Im Devid e ar mijōk Jeova ran eo; im e ar ba, E naj kijkan an dipdip an Jeova itok ñōn iba? 10 Ein drein Devid e ar jab kōnan kamōkit dipdip an Jeova ñōn iben iloan jikin kwelok an Devid; a Devid e ar bōklok e ñōn loan imōn Obed-idom dri Git. 11 Im dipdip an Jeova

e ar berwōt iloan imōn Obed-idom dri Git, iomin jilu aliñ: im Jeova e ar kejerammōn Obed-idom im ro nukin otemjej.

12 Im rar kennanek kiñ Devid, im ba, Jeova e ar kejerammōn imōn Obed-idom im men otemjej iben, kin dipdip an Anij. Inem¹ Devid e ar ilen bōktok dipdip an Anij jen imōn Obed-idom ñōn iloan jikin kwelok an Devid im lōñliñ. 13 Im ein drein, ke ro rar inek dipdip an Jeova rar etal jiljino jetnakin ne, e ar katok kin juōn ox im juōn kon e mātōk. 14 Im Devid e ar eep iman Jeova kin aolepen an maroñ; im emwij kañōr-ñōre kin juōn epod linen. 15 Ein drein Devid im aolepen imōn Israel rar bōkliñtok dipdip an Jeova, kin lamij im uk jilil.

16 Im ke dipdip an Jeova e ar dreloñtok iloan jikin kwelok an Devid, Maikal lio nejin Saul, e ar reilok jen juōn windo, im e ar lo kiñ Devid ke ej kelok im eep iman Jeova; im e ar kejekron e ilo buruen. 17 Im rar bōklok dipdip an Jeova im likite ilo jikin, ilo im nuknuk eo Devid e ar kalek ñōn e; im Devid e ar katok kin men in katok kijeek ko, im men in katok ainemōn ko iman Jeova. 18 Im ke Devid e ar kamwijlok an katok, kin men in katok kijeek ko, im kin men in katok ainemōn ko, e ar kejerammōn armij ro ilo etan Jeova an inelip eo. 19 Im e ar kajulok ñōn armij otemjej, aet, aolepen jar eo an Israel, man im kōra, ñōn jabrewōt iair juōn kek bred, im mōtōn kōniek, im juōn kek grep emōra. Ein drein armij otemjej rar ilok, jabrewōt iair ñōn mweo imōn.

20 Inem Devid e ar jeblak im kejerammōn ro nukin. Im Maikal lio nejin Saul e ar drioiytok im ion Devid, im e ba, E nañin aibujuij kiñ in Israel ranin, eo e ar mōke elōklok e iman mejen ro dri korijeran kōra ro an, einwōt juōn ian armij re wan ej elōk-loke! 21 Im Devid e ar ba ñōn Maikal, E kar iman mejen Jeova, eo e ar kaljiklok iō jen jemōm, im

¹ 1 Sam. 7. 1. ² Bwin. 4. 15, 19, 20.

¹ 1 Kron. 15. 25-16. 3.

jen ro otemjej nukin, bwe En likit iō iroiĵ ion ro dron Jeova, ion Israel: kin men in I naj kuri iman Jeova. 22 Im e naj laplok aō irjikine iō, im I naj etā iman meĵa: a kin ro dri korijera kwar konono kake, re naj nebar iō. 23 Im Maikal iio neĵin Saul e ar jab keutak neĵin nōn ran eo e mij.

7 Im ke kiñ eo e ar jokwe ilo mweo imōn, im Jeova e ar kakijeik e jen aolepen ro dri kijirāte ijoko otemjej, 2 inem kiñ eo e ar ba nōn Netan, dri kanan, Lo, kiō, űa ij jokwe iloan¹ im aik imō, a dipdip an Anij ej jokwe iloan im nuknuk. 3 Im Netan e ar ba, Kwon ilok, im kōmōn aolepen men eo ilo buruōm; bwe Jeova ej ibōm. 4 Im boñ eo, nan jen Jeova e ar itok nōn Netan, im ba, 5 Kwon ilem kennanek korijera Devid, Ein drein Jeova ej ba, Kwe kwo naj kalek nōn Iō juōn im bwe In jokwe ie ke? 6 bwe I ar jab jokwe iloan juōn im elikin ran eo ke I ar āñintok ro neĵin Israel jen Iĵipt, aet, nōn ranin, a I ar etal iloan juōn im nuknuk im iloan imōn kabēr. 7 Ilo jikin otemjej I ar etal ie iben ro neĵin Israel, I ar konono juōn nan nōn jabrewōt ian bwij ko bwijin Israel, eo I ar jiroñ e bwe en sepeṛd ro droō Israel, im ba, Etke kom ar jab kalek nōn Iō mweo imō aik? 8 Inem en ein drein am naj ba nōn korijera Devid, Ein drein Jeova an inelip eo, ej ba, I ar bōk yuk jen imōn jip, jen lore jip ko, bwe kwon iroiĵ ion ro droō, ion Israel; 9 im I ar ber ibōm ijoko otemjej kwar ilok ielok, im I ar bukwelok ro otemjej dri kijirāte yuk iman meĵōm; im I naj kōmōn nōn yuk etōmelap, einwōt etan ro re utiej rej ber i lōl. 10 Im I naj likit juōn jikin nōn ro droō Israel, im I naj kat ir bwe ren jokwe ilo jikir, im ĵamin bar kamōkit ir; im ro neĵin nana re ĵamin bar keĵorran ir, einwōt ien ko mokta, 11 im einwōt jen ran eo ke I ar jiroñ dri ekajet bwe ren lali ro droō Israel; im I naj kakijeik yuk jen ro otemjej dri kijirāte yuk. Bareinwōt Jeova ej ken-

nannek yuk bwe Jeova e naj kōmōn mweo nōn yuk. 12 Nē e jeĵit ran ko am, im kwoj kiki iben ro ĵemōm, I naj kajutōk ineōm elikōm, eo e naj walok jen ibōm, im I naj kabin ailiñ eo an. 13 E¹ naj kalek juōn im nōn eta, im I naj kabin tron in ailiñ eo an nōn in drio. 14 Nā I naj ĵemen, im e naj neĵiō: elañe ej kōmōn nana, I naj kajeik e kin alal in armij, im kin dribitbit ko an ro neĵin armij; 15 a Aō joij elape ĵamin ilok jen iben, einwōt I ar bōke jen Saul, eo I ar ĵolok jen imam. 16 Im mweo imōm, im am ailiñ naj kabine nōn in drio imam: naj kabin tron eo am nōn in drio. 17 Ekar nōn nan kein otemjej, im ekar nōn aolepen viŝōn in, ein drein Netan e ar konono nōn Devid.

18 Inem Devid e ar dreloñ im jijōt iman Jeova; im e ar ba, Wōn űa, O Iroiĵ Jeova, im ta mweo imō, bwe Kwar āñintok iō nōn iĵi? 19 Im eñin men erik iman meĵōm, O Iroiĵ Jeova; a Kwar konono kin imōn űa korijerōm nōn ien eto tokelik; im men in wōt ilo wāwen armij, O Iroiĵ Jeova! 20 Im ta eo elaplok an Devid maroñ in ba nōn Yuk? bwe Kwo ĵela űa korijerōm, O Iroiĵ Jeova! 21 Kin Am in nan, im ekar nōn buruōm, Kwar kōmōn mōn aolepen men in elap, bwe Kwar kajelaik űa korijerōm kake. 22 Kin men in, Kwe kwo utiej, O Jeova Anij: bwe ejelok einwōt Kwe, im ejelok bar juōn anij iĵillokōm, ekar nōn aolepen men eo kim ar roñjake kin lojiliñem. 23 Im ailiñ ōt ilo lōl ej einwōt ro drom, einwōt Jeova, eo Anij e ar ilen lomoren nōn E juōn ailiñ, im bwe En kōmōn nōn E juōn āt, im kōmōn men ko relap nōn Kwe, im men ko men in lelñōñ nōn eneo Am, iman ro drom, ro Kwar lomor ir nōn Yuk jen Iĵipt, jen ailiñ ko kab anij ro air? 24 Im Kwar kabin nōn Kwe ro drom Israel bwe ren juōn ailiñ nōn Kwe in drio; im Kwe, Jeova, kwoj air Anij. 25 Im kiō, O Jeova Anij, nan eo Kwar ba kin űa korijerōm, im kin mweo imōn, Kwon kabine nōn in drio, im kōmōn einwōt

¹ ĵap. 5. 11.¹ 1 Kiñ 6. 12.

Kwar ba. 26 Im ren koutiejlok etōm nōn in drio, im ba, Jeova an inelip eo Ej Anij ion Israel; im mweo imōn nā korijerōm Devid naj kabine imam. 27 Bwe Kwe, O Jeova an inelip eo, Anij in Israel, Kwar kwalok nōn nā korijerōm, im ba, I naj kalek mweo imōm nōn in drio: kin men in, nā korijerōm I ar lo ilo buruō bwe in jar jar in nōn Kwe. 28 Inem kiō, O Iroi Jeova, Kwoj Anij, im nan ko Am remol, im Kwar kalimur kin men in emōn nōn nā korijerōm: 29 kin men in, kiō, en buñburuōm in kejerammōn imōn nā korijerōm, bwe en berwōt in drio imam; bwe Kwe O Iroi Jeova, kwar konono kake: im kin Am kejerammōn, mwin imōn korijerōm en jerammōn nōn in drio.

8 ¹Inem, tokelik Devid e ar mōn ro dri Pilstia, im kōtaik ir: im Devid e ar bōk Meteg-ama jen pein ro dri Pilstia.

2 Im e ar mōn Moab, im joñwe ir kin ken joñōk, ke e ar kababu ir ion lōl; im e ar joñwe ruo ken joñōk bwe ren mij, im juōn ken joñōk bwe ren mour. Im dri Moab rej dri korijeran Devid im bōktok owōj.

3 Bareinwōt Devid e ar mōn Hadadizer, nejin Rihob, kiñ in Zoba, ke e ar ilen bōk ailiñ eo an iturin River eo. 4 Im Devid e ar bōk jen e juōn tausand jiljilimjuōn buki dri uwe ion ors, im roñoul tausand dri tōrinae etetal: im Devid e ar jek iki in neen ors in jariat ko otemjej, a e ar kejbārok jen ir ors ko nōn jibuki jariat. 5 Im ke ro dri Siria jen Damaskōs rar iten rie Hadadizer kiñ in Zoba, Devid e ar mōn roñoul ruo tausand armij ian ro dri Siria. 6 Inem Devid e ar likit ro dri me ilo Siria in Damaskōs; im ro dri Siria rej dri korijeran Devid im bōktok owōj. Im Jeova e ar lelok anjo nōn Devid ijoko jabrewōt e ar ilok ielok. 7 Im Devid e ar bōk likipijñōk ko an ro dron Hadadizer, im bōkitok nōn Jerusalem. 8 Im jen Bitā, im jen Berotai, jikin kwelok ko an Hadadizer, kiñ Devid e ar bōk e kanuij lōñ jinibōrōrō.

9 Im ke Toi kiñ in Hemat, e ar roñjake bwe Devid e ar mōn aolepen jar in tōrinae an Hadadizer, 10 inem Toi e ar jilkinlok Joram leo nejin nōn iben kiñ Devid, bwe en yokyokwe e im kejerammōn e kin an kar tōrinaek Hadadizer im mōne: bwe Hadadizer e ar tōrinaek Toi. Im Joram e ar bōktok iben jābi gold ko, im jābi silver ko, im jābi jinibōrōrō ko: 11 irkein bareinwōt Devid e ar lelok nōn Jeova, iben silver im gold e ar lelok jen ailiñ ko otemjej e kar kōtaik ir; 12 jen Siria, im jen Moab, im jen ro nejin Amon, im jen ro dri Pilstia, im jen Amelek, im jen men in rakim jen Hadadizer, nejin Rihob, kiñ in Zoba.

13 Im Devid e ar buñbuñ ke e ar jeblak jen an mōn ro dri Siria ilo komlōl in Jātōk, aet, joñoul drualitōk tausand armij. 14 Im e ar likit ro dri me ilo Idom; ilujen aolepen Idom e ar likit ro dri me, im dri Idom otemjej rej dri korijeran Devid. Im Jeova e ar lelok anjo nōn Devid ijoko jabrewōt e ar ilok ielok.

15 Im Devid e ar kiñ ion aolepen Israel; im Devid e ar kōmōn jime im wānik nōn armij otemjej dron. 16 Im Joab, leo nejin Ziruaia, e ar iroi in jar in tōrinae eo; im Jihoshapat leo nejin Ehailud, dri jeje bwebwenato ko; 17 im Zedok nejin Ehaitub, im Ehimelek nejin Ebaiatar rejro pris; im Siraia dri jeje; 18 im Beneia leo nejin Jihoada e ar iroi ion ro dri Kiret im ro dri Pilet; im lōmaro nejin Devid bwirōk re utiej.

9 Im Devid e ar ba, Eorke rej berwōt ian ro nukin Saul, ¹bwe in kwalok joij nōn e kin Jonetan? 2 Im ej ber juōn korijeran Saul etan Zaiba, im rar kirtok e nōn iben Devid; im kiñ eo e ar ba, Kwe ne Zaiba ke? Im e ar ba, Nā e, korijerōm. 3 Im kiñ eo e ar ba, Eorke ian wut wuten Saul, bwe in maroñ kwalok joij an Anij nōn e? Im Zaiba e ar ba nōn kiñ eo, Ej berwōt ²juōn eman nejin Jonetan, e kirro. 4 Im kiñ eo e ar ba, Ej ber ia? Im Zaiba e ar ba nōn

kiñ eo, Lo, ej bær ilo imõn Mekir leo nejin Amiel, i Lo-dibar. 5 Inem kiñ Devid e ar jiliklok im añintok e jen imõn Mekir nejin Amiel, jen Lo-dibar. 6 Im Mipiboshet, leo nejin Jonetan, leo nejin Saul, e ar itok ñõn iben Devid, im buñbero im aber ñõn e. Im Devid e ar ba, Mipiboshet. Im e ar uak, Lo, ña e, korijerõm. 7 Im Devid e ar ba ñõn e, Kwon jab mijõk; bwe emol I naj kwalok joij ñõn yuk kin Jonetan jemõm, im I naj lewoj aolepen enen Saul jemõm; im kwo naj mõña ekõn ilo tebel eo aõ ien otemjej. 8 Im e ar barikrik, im ba, Ta ña korijerõm bwe kwon lale juõn kiru roror e mij einwõt ña?

9 Im kiñ eo ar kir ñõn Zaiba, leo korijeran Saul, im ba ñõn e, ¹Men ko otemjej an Saul im mweo imõn, I ar lelok ñõn leo nejin karo eo am. 10 Im kwo naj tõblõle brij ñõn e, kwe im lõmaro nejõm, im ro dri korijerõm; im kwo naj aini leen ko bwe leo nejin karo eo am en lo kijen: a Mipiboshet nejin karo eo am e naj mõña ien otemjej ilo tebel eo aõ. A iben Zaiba joñoul lailim nejin man im roñoul dri korijeran. 11 Inem Zaiba e ar ba ñõn kiñ eo, Einwõt men otemjej aõ iroiñ kiñ kwar jiroñ iõ, ein drein I naj kõmõne. Kin Mipiboshet, kiñ ej ba, e naj mõña ilo tebel eo aõ einwõt juõn ian lõmaro nejin kiñ. 12 Im juõn ladrik nejin Mipiboshet, etan Maika. Im ro otemjej rej jokwe iloan imõn Zaiba rej korijer ñõn Mipiboshet. 13 Ein drein Mipiboshet e ar jokwe i Jerusalem; bwe e ar mõña ien otemjej ilo tebel an kiñ eo. Im e ar kirro aolepen neen.

10 Im ²tokelik kiñ an ro nejin Amon e ar mij, im Henun nejin e ar kiñ im binej jenkwõn. 2 Im Devid e ar ba, I naj kwalok joij ñõn Henun nejin Nehash einwõt jemen e ar kwalok joij ñõn iõ. Ein drein Devid e ar jiliklok kin ro dri korijeran, bwe en kalul e kin jemen. Im ro dri korijeran Devid rar dreloñ ilo enen ro nejin Amon. 3 A iroiñ ro an ro nejin Amon rar ba ñõn Henun kiñ

eo air, Kwoj lemnok bwe Devid ej koutiej jemõm ilo an jilkintok dri kainemõn ñõn ibõm ke? e ar jab jilkintok ro dri korijeran bwe ren wat jikin kwelok in, im kejar e, im kejebeplik e ke? 4 Ein drein Henun e ar jibwe lõmaro korijeran Devid, im eal jimõtõn kworeak ko air, im bukwelok nuknuk ko air ilukwõn, aet, i lomiar, im jilkinlok ir. 5 Ke rar kennanek Devid, e ar jilkinlok in wõnmae ir; im lõmaro re kanuij jok. Im kiñ eo e ar ba, Komin berwõt i Jeriko mae ien kworeak ko ami rej bar edrek, inem jeblaktok.

6 Im ke ro nejin Amon rar lo bwe re meo iben Devid, ro nejin Amon rar jiliklok im kajerbal ro dri Siria an Bet-rihob, im ro dri Siria an Zoba, roñoul tausan dri tõrinae etetal, im kiñ in Meaka iben juõn tausan armij, im ro dri Tob joñoul ruo tausan armij. 7 Im ke Devid e ar roñjake e ar jilkinlok Joab, im aolepen jar an armij ro re kajur. 8 Im ro nejin Amon rar drioiñtok im kalejar iman kejem: im ro dri Siria jen Zoba, im jen Rihob, im ro dri Tob im ro dri Meaka, rar mõkelok iair ilo melaj.

9 A ke Joab e ar lo air kalejar nae e elikin im iman, e ar kãlet ro remõn tata ian ro dri Israel, im e ar kalejar ir mae dri Siria: 10 im ro jet e ar likit ir ilo pein Ebishai leo jatin; im e ar kalejar ir mae ro nejin Amon. 11 Im e ar ba, Elañe ro dri Siria re kajur jen ña, inem kwon jibõñ iõ; a elañe ro nejin Amon re kajur jen kwe, inem I naj iwij im jibõñ yuk. 12 Kwon beran wõt, im jen kwalok kij man ro kin ailiñ eo ar, im kin jikin kwelok ko an ar Anij: im Jeova en kõmõn men eo emõn iben. 13 Ein drein Joab im ro iben rar druaklok bwe ren tõrinaek ro dri Siria: im re ko jen e. 14 Im ke ro nejin Amon rar lo bwe e ko ro dri Siria, rej bar-einwõt ko jen iman Ebishai, im dreloñ iloan jikin kwelok eo. Inem Joab e ar jeblak jen ro nejin Amon, im itok ñõn Jerusalem.

15 Im ke ro dri Siria rar lo bwe dri Israel rar bõk anjo ioir, rar kwelok-

tok. 16 Im Hadarizer e ar jilkinlok im ānintok ro dri Siria i River jab-ueo: im rar itok nōn Hilam, im Shobak kapen in jar in tōrinae an Hadarizer e ar tel ir. 17 Im ar kennanek Devid; im e ar kokweloktok aolepen Israel, im elā jen Jordan im itok nōn Hilam. Im ro dri Siria rar kalejar nae Devid im tōrinaek e. 18 Im dri Siria rar ko jen iman Israel; im Devid e ar mōn ian ro dri Siria dri uwe ion jiljilimjuōn buki jariot, im eñoul tausand dri uwe ion ors, im e ar mōn Shobak, kapen in jar in tōrinae eo, inem e ar mij. 19 Im ke kiñ ro otemjej dri korijeran Hadarizer rar lo bwe ro dri Israel re bōk anjo jen ir, rar kōmōn ainemōn iben Israel, im korijer nōn ir. Ein drein ro dri Siria rar mijōk in bar jibōñ ro nejin Amon.

11 Im ilo¹ bar yiō eo juōn, ien eo ke kiñ ro rej ilen tōrinae, Devid e ar jilkinlok Joab, im ro dron iben, im aolepen Israel; im rej mōn ro nejin Amon im nitbwile Rabba. A Devid ej berwōt i Jerusalem.

2 Im juōn ran ke ejota, Devid e ar jerkak jen aowej eo an, im e ar etetal ion kejenwan mweo imōn kiñ eo: im jen kejenwan eo e ar lo juōn kōra ej tutu; im kōra eo e kanuij dreo. 3 Im Devid e ar jiliklok im kajitōk kin lio. Im juōn e ar ba, Lio e jab Bat-shiba, nejin Ilaam, belen Uraia dri Het ke? 4 Im Devid e ar jilkinlok ro dri jilik, im bōke; im lio ar dreloñ nōn iben, im e ar babu iben lio, (ak emwij karreoik e jen an jab erreo); inem lio e ar jeblak nōn mweo imōn. 5 Im kōra eo e ar etta, im e ar jiliklok im kennanek Devid im ba, Na I bōro.

6 Inem Devid e ar jiliklok nōn Joab, im ba, Kwon jilkintok nōn iba Uraia dri Het. Im Joab e ar jilkinlok Uraia nōn iben Devid. 7 Im ke Uraia e ar itok nōn iben, Devid e ar kajitōk iben ekijkan Joab, im ekijkan armij ro, im ekijkan an tōrinae eo jerammōn. 8 Im Devid e ar ba nōn Uraia, Kwon wonlōlok nōn mweo imōm, im katutu neōm. Inem Uraia

e ar ilok jen mweo imōn kiñ eo, im juōn mōtōn ekōn jen kiñ eo e ar lorelok. 9 A Uraia e ar kiki iturin kejem in mweo imōn kiñ eo iben ro dron otemjej an iroijs eo an, im e ar jab wōnlōlok nōn mweo imōn. 10 Im ke rar kennanek Devid, im ba, Uraia e ar jab wōnlōlok nōn mweo imōn, Devid e ar ba nōn Uraia, Kwar jab itok ke jen etetal? inem etke kwar jab wōnlōlok nōn mweo imōm? 11 Im Uraia e ar ba nōn Devid, Dipdip eo, im Israel, im Juda, rej jokwe ilo imōn kabere ko; im aō iroijs Joab, im ro dron aō iroijs, rej berwōt ilo me:aj; inem nā in dreloñ ilo mweo imō, im mōña im irak, im babu iben lio beliō ke? einwōt kwojs mour, im am ej mour, I jamin kōmōn men in. 12 Im Devid e ar ba nōn Uraia, Kwon berwōt iji ranin bareinwōt, im ilju I naj kōtlok yuk bwe kwon ilok. Ein drein Uraia e ar berwōt i Jerusalem ran eo, im ilju. 13 Im ke Devid e ar kirtok e, e ar mōña im irak iman; im e ar kakarek e: im ke ejota e ar drioijslok bwe en babu ion kinien iben ro dron iroijs eo an, a e ar jab wōnlōlok nōn mweo imōn.

14 Im ke ejiboñ, Devid e ar jeje juōn letter nōn Joab, im jilkinlok e kin pein Uraia. 15 Im e ar jeje ilo letter eo, im ba, Kwon likit Uraia ilo jino, ijo elap tōrinae ie, im komin ewilik jen e, bwe ren mōn e im er mij. 16 Im ke Joab e ar jurake jilkin kwelok eo, e ar likit Uraia ijo e jela bwe ro dri tōrinae re beran rej ber ie. 17 Im ro dri jikin kwelok eo rar drioijslok in iri iben Joab: im jet ian armij ro re bero, aet, jet ian ro dron Devid; im Uraia dri Het e ar bareinwōt mij. 18 Inem Joab e ar jiliklok im kennanek Devid men otemjej kin tōrinae eo; 19 im e ar jiroñ dri jilik eo, im ba, Ne emwij am kennanek kiñ eo men otemjej kin tōrinae eo, 20 elañe kiñ eo ej illu, im ej ba nōn yuk, Etke ein drein ami kebaklok nōn worwor eo? kom ar jab jela bwe re naj libon jen worwor eo ke? 21 wōn eo e ar mōn Abimelek leo nejin Jerubeshet? juōn kōra e ar jab jo-

lilok juōn dreka irir jabeo ilōn jen worwor eo na ion ke, inem e ar mij i Tibež? etke ein drein ami kebaklok worwor eo? inem kwo naj ba, Dri korijerōm, Uraia dri Het, e bareinwōt mij.

22 Ein drein dri jilik eo e ar ilok, im item kwalok ñōn Devid men otemjej Joab e ar jilkinlok e kake. 23 Im dri jilik eo e ar ba ñōn Devid, Armij ro rar bōk anjo jen kim, im drioielok ñōn kim ilo melaj, im kim ar iun ir ñōn kejem eo. 24 Im dri libon rar libone kim jen ion worwor eo; im jet ian ro dron kiñ eo re mij, im korijerōm Uraia dri Het, e bareinwōt mij. 25 Inem Devid e ar ba ñōn dri jilik eo, Ein drein am naj ba ñōn Joab, Men in en jab kaburomōj yuk, bwe jāji ej kōñ juōn einwōt bar juōn; kwon kabinlok am tōrinaek jikin kwelok eo, im kajebeplik e: im kwe kwon rojōñe.

26 Im ke lio belen Uraia e ar roñ bwe e mij leo belen, e ar jōñōt leo belen. 27 Im ke e jemlok an liāj-lol, Devid e ar jiliklok im āñintok e ñōn loan mweo imōn, im ej belen, im e ar keutak ñōn e nejin man. A¹ men in Devid e ar kōmōne e ar kaillu Jeova.

12 Im Jeova e ar jilkinlok² Netan ñōn iben Devid. Im e ar itok ñōn iben, im ba ñōn e, Ruo armij rar jokwe ilo juōn jikin kwelok; juōn e mweie im eo juōn e jeramel. 2 Iben dri mweie e kanuij lōñ bwijin jip, im got, im kau; 3 a iben dri jeramel eo, ejelok, a juōn wōt lam kokōra erik, eo e ar wiaik im lale: im e ar ridtolok iben, im iben ajiri ro nejin; e ar mōña men ko kijen, im irak jen kōp eo an, im babu i ubōn, im ej ñōn e einwōt nejin. 4 Im juōn dri itoitōk e ar itok ñōn iben dri mweie eo, im e ar makoko in bōk juōn ian jip, ak got, ak kau ko an, im kapoje kijen dri itoitōk eo e ar itok ñōn iben, a e ar bōk lam eo an dri jeramel eo, im kapoje ñōn leo e ar itok ñōn iben. 5 Im e kanuij bwil illu an Devid nae armij eo; im e ar ba ñōn Netan, Einwōt

Jeova ej mour, leo e ar kōmōn men in, ej drien mij: 6 im en bar lelok lam eo emen alen, kin ke e ar kōmōn men in, im bwe ejelok an tiriamo.

7 Im Netan e ar ba ñōn Devid, Kwe, armij eo. Ein drein Jeova Anij an Israel ej ba, I ar kabit yuk kiñ ien Israel, im I ar lomoren yuk jen pein Saul; 8 im I ar lewoj mweo imōn iroi j eo am, im limaro belen iroi j eo na ilo ubōm, im I ar lewoj imōn Israel im Juda; im elañe e jab bwe men kein, I naj kar lewoj men ko jet. 9 Etke kwar kejekron nan ko an Jeova, im kōmōn nana iman mejen? kwar mōn Uraia dri Het kin jāji, im kwar bōk lio belen, bwe en beleōm, im kwar mōn leo kin jāji an ro nejin Amon. 10 Kin men in, jāji e jamin ilok jen mweo imōm, kin ke kwar kejekron Iō, im kwar bōk lio belen Uraia dri Het bwe en beleōm. 11 Ein drein Jeova ej ba, Lo, I naj kajutōk nana nae yuk jen mweo imōm; im I naj bōk limaro beleōm iman mejōm, im lilok ñōn dri turōm, im e naj babu iben limaro beleōm iman mejen al eo. 12 Bwe kwar kōmōne ilo etino: a I naj komōn men in iman dri Israel otemjej, im iomin al eo. 13 Im Devid e ar ba ñōn Netan, I ar jerawiwi nae Jeova. Im Netan e ar ba ñōn Devid, Jeova e ar bareinwōt jolok bwir eo am; kwo jamin mij. 14 Ijoke, kin am kōmōn men in, kwar lelok ñōn ro rej kijirāte Jeova unin kajirere elap, emol ajiri in e ar lotak ñōn yuk e naj mij. 15 Inem Netan e ar ilok ñōn mweo imōn.

Im Jeova e ar ubrare ajiri eo lio belen Uraia e ar keutak e ñōn Devid, im e kanuij nañinmij. 16 Kin men in Devid e ar akwelap ñōn Anij kin ajiri eo; im Devid e ar jitlok, im drelōñlok, im babu aolepen boñ ion brij. 17 Im ridto ro in mweo imōn rar jerkak, im jutōk iturin, bwe ren kwotōke jen brij; a e jab kōnan, im e ar jab mōña bred ibeir. 18 Im ke ran eo ken ka jiljilimjuōn e mij ajiri eo. Im dri korijeran Devid rar mijōk in kennanek e bwe ajiri eo e mij; bwe

re ba, Lo, ke e mour ajiri eo, kim ar konono iben, im e jab eoroñ ainiker: e jamin mōke kaiñtan e elañe kimij kennanek e bwe e mij ajiri eo ke? 19 Im ke Devid e ar lo bwe dri korijeran rej unojrikrik iben dron, Devid e ar kile bwe e mij ajiri eo; im Devid e ar ba ñōn ro dri korijeran, Ajiri eo e mij ke? Im re ba, E mij. 20 Inem Devid e ar jerkak jen brij, im tutu, im mōke kabit e im kōnōk nuknuk ko jet; im e ar dreloñtok ilo imōn Jeova, im kabuñ: inem e ar itok ñōn mweo imōn; im ke e ar kajitōk, rar likit bred iman, im e ar mōña. 21 Inem dri korijeran rar ba ñōn e, Ta men in kwar kōmōne? kwar jitlok im jōñōt ajiri eo ke e ar mour; a ke e mij ajiri eo, kwar jerkak im mōña bred. 22 Im e ar ba, Ke ajiri e ar mour, I ar jitlok im jōñ: bwe I ar ba, Wōn e jela elañe Jeova e naj joij ñōn iō bwe ajiri eo en mour? 23 A kiō e mij, ewi unin aō jitlok? I maroñ in bar bōktok e ke? I naj ilok ñōn iben, a e jamin jeblaktok ñōn iba.

24 Im Devid e ar kainemōne Batshiba lio belen, im dreloñlok ñōn e, im babu iben: im e ar keutak nejin man, im e ar naetan Solomon. Im Jeova e ar yokwe; 25 im e ar jilkinlok kin pein Netan, dri kanan; im e ar naetan Jedidaia, jen pein Jeova.

26 Ak Joab e ar tōrinaek Rabba an ro nejin Amon, im e ar bōk jikin kwelok eo an kiñ. 27 Im Joab e ar jilkinlok ro dri jilik ñōn iben Devid, im ba, Emwij aō tōrinaek Rabba; aet, I ar bōk jikin kwelok an dren ko. 28 Inem kwon kokweloktok bween armij rōn, im nitbwili jikin kwelok eo, im bōke; ñe I ab bōk jikin kwelok eo, im rej naetan kin eta. 29 Im Devid ej kokweloktok armij otemjej, im ilok ñōn Rabba, im tōrinaek e, im bōke. 30 Im e ar bōk bokrōnat jen kiñ eo air; im erron juōn tausan talent gold, im iben, dreka raurōk; im rar likite ion bōran Devid. Im e ar kadrioijsok men in rakim an jikin kwelok eo e kanuij lōñ. 31 Im

e ar kadrioijsok armij ro rej ber ie, im likiti iomin jirben ko, im iomin harro māl ko, im iomin māl ilil, im kaetetal ir ilujen jikin kōmāt brik: ein drein an kōmōn ñōn jikin kwelok otemjej an ro nejin Amon. Im Devid im aolepen armij rar jeblak ñōn Jerusalem.

13 Im elikin men in, juōn kōra jātin ¹Absalom, nejin Devid, e dreo, etan Temar; im Amnon leo nejin Devid e ar yokwe e. 2 Im ²Amnon, ke e mij ilokōn jātin, Temar, e nañinmij; bwe virjin lio; im leo e ar lemnok e bin an kōmōn jabrewōt ñōn e. 3 A juōn jeran Amnon etan Jonedab, nejin Shimia, leo jein Devid: im Jonedab juōn armij e kanuij jela mon. 4 Im e ar ba ñōn e, O nejin kiñ, etke ein drein am bini ran otemjej? kwo jab kōnan kennanek iō ke? Im Amnon e ar ba ñōn e, I mij ilokōn Temar, lio jātin Absalom, jeiō. 5 Im Jonedab e ar ba ñōn e, Kwon babu ion kiniōm, im kajelamon am nañinmij: im ñe jemōm ej iten lo yuk, kwon ba ñōn e, Jatiō Temar en itok, ij akwelap, im letok bred bwe in mōña, im kapojōk kijiō iman meja, bwe in loe, im mōña jen pein. 6 Inem Amnon e ar babu, im kajelamon an nañinmij: im ke kiñ eo e ar iten loe, Amnon e ar ba ñōn kiñ eo, Jatiō Temar en itok, ij akwelap, im iōk ruo kek iman meja, bwe in mōña jen pein.

7 Inem Devid e ar jiliklok ñōn kabijuknen Temar, im ba, Kwon ilok ñōn mweo imōn Amnon jeiōm, im kapojōk kijan ñōn e. 8 Ein drein Temar e ar ilok ñōn mweo imōn Amnon jein; im ej babu wōt. Im lio e ar bōk flauo, im iōki, im e ar kōmōn kek ko iman mejen, im e ar kōmāt kek ko. 9 Im e ar bōk jābi eo, im katorloki iman; a e abwin mōña. Inem Amnon e ar ba, Armij otemjej ren drioijsok jen iba. Im armij otemjej rar drioijsok jen iben. 10 Im Amnon e ar ba ñōn Temar, Kwon bōktok men eo kijiō ñōn loan rum in, bwe in mōña jen peōm. Im Temar e ar bōk kek ko e ar kōmōni, im bōkilok ñōn loan rum

eo, ñon iben Amnon jein. 11 Im ke e ar bōkitok ebak ñon e bwe en mōña, leo e ar jibwe, im ba ñon e, Kwon babu iba, jātiō. 12 Im e ar uak e, Jab, jeiō, kwon jab kamakokoik iō; bwe e jab emōn kōmōn men rōt in ilo Israel: kwon jab kōmōn men in bwebwe in. 13 Im ña, in bōklok aō jok ñon ia? im kin kwe, kwo naj einwōt juōn ian dri bwibwi ilo Israel. Inem ij akwelap, kwon konono iben kiñ eo; bwe e jamin drebij iō jen kwe. 14 Ijoke, e abwin bokake ainiken; im kin an kajur jen lio, e ar kamakokoik e, im babu iben.

15 Inem Amnon e ar kanuij dike lio; im an dike elaplok jen an kar mij ilokōn. Im Amnon e ar ba ñon e, Kwon jerkak, im etal. 16 Im lio e ar ba ñon e, En jab ein drein, bwe elaplok nana in ilo am kadrioijslok iō, jen nana eo juōn emwij am kōmōn ñon iō. A e jab kōnan eoroñ e. 17 Inem e ar kirtok leo korijeran im ej jeralb ñon e, im ba, Kwon kadrioijslok jen iba kōra in, im kabin aor elikin. 18 Im nuknuk eo an ekārere; bwe nuknuk einwōt ballin limaro nejin kiñ eo, rej virjin. Inem leo korijeran e ar kadrioijslok e im kabin aor eo elikin. 19 Im Tamar e ar likit brij in ubaj ion bōran, im kekel nuknuk ekārere e ar kōnōke; im e ar likit pein ion bōran, im etal, im jōñ ke ej etal.

20 Im Absalom jein e ar ba ñon e, Amnon jeōm e ar ber ibōm ke? a kiō kwon ikōñ, jātiō: e jeōm; kwon jab kanuij buromōj kake. Ein drein Tamar e ar lijnono ilo mweo imōn Absalom. 21 A ke kiñ Devid e ar roñjake men kein otemjej, e kanuij illu. 22 Im Absalom e ar jab konono iben Amnon emōn ak e nana; bwe Absalom e ar kijirāte Amnon, kin an kamakokoik Tamar jātin.

23 Im elikin ruo yiō reyu, eor dri mijbar jip iben Absalom i Beal-hezor, eo iturin Ipream: im Absalom e ar kirtok aolepen lōmaro nejin kiñ eo. 24 Im Absalom e ar itok ñon iben kiñ eo, im ba, Lo, kiō, dri mijbar jip rej iba, korijerōm; ij akwelap bwe kiñ eo im ro dri korijeran ren ilok iba, kori-

jerōm. 25 Im kiñ eo e ar ba ñon Absalom, Jab, nejiō, kim otemjej kimin jab ilok, ñe ab kimin kaiñtan yuk. Im e ar akwelap ñon e, ijoke, e jab kōnan ilok, a e ar jare. 26 Inem Absalom e ar ba, Elañe jab, ij akwelap, Amnon, jātiō en ilok ib ilok. Im kiñ eo ej ba, Etke en ilok ibōmlok? 27 A Absalom e ar akwelap ñon e, im e ar kōtlok Amnon, im lōmaro otemjej nejin kiñ eo, bwe ren ilok iben. 28 Im Absalom e ar kwonkwon ñon ro dri korijeran, im ba, Komin ekil ñe buruen Amnon ej mōnōnō kin wain; inem ñe ij ba ñon kom, Komin mōn Amnon, inem komin mōn e; komin jab mijōk; I ar jab jiroñ kom ke? komin beran im jab eāliklik. 29 Im ro dri korijeran Absalom rar kōmōn ñon Amnon einwōt Absalom e ar jiroñ ir. Inem aolepen ro nejin kiñ eo rar jerkak, im jabrewōt iair e ar uwe ion¹ mul eo an, im ko.

30 Im ke rar ilok, nan e ar itok ñon iben Devid, im re ba, Absalom e ar mōn lōmaro otemjej nejin kiñ eo, im ejelok juōn ej berwōt. 31 Im kiñ eo e ar jutōk im kekel nuknuk ko an, im babu ion lōl; im dri korijeran otemjej rar jutōk iturin, emwij kekel nuknuk ko air. 32 Im Jonedab, nejin Shimea, jein Devid, e ar uak im ba, Aō iroijs en jab lemnok rar mōn likao ro otemjej nejin kiñ eo; bwe Amnon wōt e mij: bwe ilo bebe an Absalom ar kabin men in jen ran eo ke e ar kamakokoik Tamar jātin. 33 Inem aō iroijs, kiñ, kwon jab likit men in ilo buruōm, im lemnok bwe ro otemjej nejin kiñ eo remij; bwe Amnon wōt e mij.

34 A Absalom e ar ko, Im likao eo dri kajere e ar bōk mejen, im lo, elōñ armij rar itok ilo ial in tol elikin. 35 Im Jonedab e ar ba ñon kiñ eo, Lo, ro nejin kiñ eo re mottok: einwōt ña korijerōm I ar ba, ej ein drein. 36 Im ke e ar kamwijlok an konono, lo, ro nejin kiñ eo rar itok, im rar koutiej ainikeir, im jōñ: im kiñ eo bareinwōt kab ro dri korijeran otemjej rar kanuij jōñ.

37 A Absalom e ar ko, im ilok ññn iben Talmai, nejin Amaihur, kiñ in Gishur. Im Devid e ar jññt leo nejin ran otemjej. 38 Ein drein Absalom e ar ko, im ilok ññn Gishur, im e ar berwõt ije iomin jilu yið. 39 Im an Devid e ar oñkake Absalom: bwe ¹elul kin Amnon, kin ke e mij.

14 Ak Joab nejin Ziruaia e ar kile bwe ²buruen kiñ ej oñkake Absalom. 2 Im Joab e ar jilkinlok ññn Tikoa, im añintok jen ije juññ kōra e meletlet, im ba ññn e, Ij akwelap bwe kwon mōke etao einwõt dri liājlol, im kōñk nuknuk ko in liājlol, ij akwelap, im kwon kabit yuk kin oil, a kwon einwõt juññ kōra eto an jññt ro remij: 3 im kwon ilok ññn iben kiñ eo, im en ein drein am konono iben. Ein drein Joab e ar likit nan kein i loñin.

4 Im ke lio dri Tikoa, ej konono iben kiñ eo, e ar buñbero, im aber ññn e, im ba, Kwon jibōñ, O kiñ. 5 Im kiñ eo e ar ba ññn e, Kwo baj it? Inem e ar uak, Emol ña juññ kōra e joko belið, im leo e mij. 6 Im ña korijerōm e kar ruo nejið man, im irro rar iri iben dron ilo jikin kallip, im ejelok juññ bwe en kijbil ir, inem eo juññ e ar mōn eo juññ, im e mij. 7 Im lo, ro nukið otemjej rar jutōk nae ið korijerōm, im re ba, Kwon ketōk eo e ar mōn leo jātīn, bwe kimin mōn e, kin mour an jātīn ke e ar mōn e, im ³ein drein mōn dri jolit bareinwõt. Ein drein re kōnan kwune mōtōn ki-jeek eo að ej berwõt, im re naj likit ññn leo belið ejelok etan ak mōtōn ion mejen lōl.

8 Im kiñ eo e ar ba ññn lio, Kwon ilok ññn mweo imōm, im I naj kennan kin kwe. 9 Im lio dri Tikoa, e ar ba ññn kiñ eo, Að iroi, O kiñ, bwir eo en ioð, im ion nukin jema; im en ejelok ruññ kiñ eo kab tron eo an. 10 Im kiñ e ar ba, Jabrewõt eo ej konono ññn yuk, kwon añintok e ññn iba, im e jamin bar uñir yuk. 11 Inem lio e ar ba, Ij akwelap bwe kiñ eo en kememej Jeova am Anij,

bwe dri kwi kin bōtōktōk en jab bar kokkure, ñe rab mōn nejið man. Im e ar ba, Einwõt Jeova e mour, ejelok juññ kol jen bōran leo nejið e naj buñ ion lōl.

12 Inem kōra eo e ar ba, Ij akwelap bwe ña korijerōm in konono juññ nan ññn að iroi kiñ eo. Im e ar ba, Kwon konono wõt. 13 Im lio e ar ba, Inem etke kwar kine men eo einwõt nae ro dron Anij? bwe ilo am konono nan in, kwe kiñ, kwoj einwõt juññ eor ruññ, bwe kwe, kiñ, kwo jab bar añintok ññn kabijuknen eo kwar jolok e. 14 Bwe emol je naj mij, im jej einwõt dren lutōklok ion brij, re ban bar itōke; ak Anij e jab jolok mour, a Ej naialin eo emwij joloke, bwe en jab joko in drio. 15 Inem bwe emwij að iten konono nan in ññn að iroi kiñ, men in kin ke armij rar kemjōk ið: im ña, korijerōm, I ar ba, Kið I naj konono iben kiñ eo; bwelen kiñ eo e naj kōmōn men in kajitōk jen ña, korijerōm. 16 Bwe kiñ eo e naj eoroñ, in lomo- ren korijerōm jen armij eo e kōnan kokkure kimro nejið jen jolit an Anij. 17 Inem ña, korijerōm, I ar ba, Ij akwelap bwe nan an að iroi kiñ en nan in kainemōn; bwe einwõt enjel òn Anij, ein drein að iroi kiñ, ilo an kile emōn im nana: im Jeova am Anij en ber ibōm.

18 Inem kiñ eo e ar uak im ba ññn lio, Kwon jab noj jen ña, ij akwelap, jabrewõt I naj kajitōk ibōm kake. Im lio e ar ba, Að iroi kiñ en ba kið. 19 Im kiñ eo e ar ba, Pein Joab ej ibōm ilo aolepen men in ke? Im lio e ar uak im ba, Einwõt kwoj mour, ejelok e maroñ in jeorlok ññn ambijmaroñ ak anmiñ jen jabrewõt að iroi kiñ e ar ba; bwe korijerōm ¹Joab e ar jiroñ ið, im e ar likit nan kein otemjej i loñin ña, korijerōm; 20 Joab e ar kōmōn men in bwe en ukot wāwen men eo: im að iroi e meletlet, einwõt meletlet an juññ enjel òn Anij, bwe en jela men ko rej kōmōne i lōl.

21 Im kiñ eo e ar ba ññn Joab, Lo, kið emwij kōmōn men in: inem kwon

ilen bar āñintok likao eo Absalom. 22 Im Joab e ar buñbero, im aber, im jare kiñ eo; im Joab e ar ba, Rannin ña, korijerōm, I jela bwe I ar lo joiɿ iman mejōm, aō iroiɿ, O kiñ, bwe kiñ eo e ar kōmōn men in kajitōk an korijerōm. 23 Ein drein Joab e ar jutōk im ilok ñōn Gishur, im āñintok Absalom ñōn Jerusalem. 24 Im kiñ eo e ar ba, En jeblak ñōn mwēo imōn, a en jab lo meja. Ein drein Absalom e ar jeblak ñōn mwēo imōn, im e ar jab lo mejen kiñ eo.

25 Ak ilo aolepen Israel ejelok armij eo rar nebar e kin an wulio einwōt Absalom: jen lobiren neen ñōn moñen ejelok menoknok iloan. 26 Im ke rar mijbar kolan bōran, (ak ilo jemlokōn jabrewōt yiō e ar mijbare; kin an bane e ar mijbare); e ar lo kolan bōran rubuki shekel, ekar ñōn paun an kiñ eo. 27 Im rar lotak ñōn Absalom jilu nejin man, im juōn nejin kōra, etan Tamar: lio juōn kōra e dreo.

28 Im Absalom e ar jokwe i Jerusalem iomin ruo yiō reyu; im e ar jab lo mejen kiñ eo. 29 Inem Absalom e ar jiliklok ñōn Joab, bwe en jilkinlok e ñōn iben kiñ; a e jab kōnan itok ñōn iben: im e ar jiliklok ñōn e alen ken ka ruo, a e abwin itok. 30 Kin men in, e ar ba ñōn ro dri korijeran, Lo, bukwōnōn Joab ebak ñōn bukwōn eo aō, im eor an barli ie; komin ilen tile. Im ro dri korijeran Absalom rar tile jikin kallip eo. 31 Inem Joab e ar jutōk im itok ñōn iben Absalom i mwēo imōn, im e ar ba ñōn e, Etke ro dri korijerōm rar tile jikin kallip eo aō? 32 Im Absalom e ar uak Joab, Lo, I ar jiliklok ñōn yuk, im ba, Kwon itok ñōn iba, bwe in jilkinlok yuk ñōn iben kiñ eo, im ba, Etke I ar itok jen Gishur? e naj kar emōnlok elañe I ar berwōt. Inem kwon kōmōn bwe in lo mejen kiñ eo; im elañe eor nana iba, en mōn iō. 33 Ein drein Joab e ar itok ñōn iben kiñ eo, im kenannek e; im ke kiñ eo e ar kirtok Absalom, e ar itok ñōn iben kiñ eo, im e ar buñbero iman kiñ eo: im kiñ eo e ar mejenmaik Absalom.

15 Im elikin men in, ¹Absalom e ar kapojōk ñōn e jariot im ors ko, im limñoul armij bwe ren etōr imanlok. 2 Im Absalom ej jerkak ke ejiboñ wōt, im jutōk iturin ial in kejem: im ke eor men in ekajet iben jabrewōt armij ej walok iman kiñ eo bwe en ekajete, inem Absalom ej kirtoke, im ba, Dri ia kwe? Im e ar ba, Ña korijerōm jen juōn ian bwij ko bwijin Israel. 3 Im Absalom e ar ba ñōn e, Lo, men ko am remōn im rejime; a ejelok armij kiñ e ar kalikar e bwe en eoroñ yuk. 4 Absalom e ar bareinwōt ba, O e nañin emōn elañe emwij kōmōn iō dri ekajet in enin, bwe jabrewōt armij eor men in ekajet iben, ak men in kajitōk iben, e maroñ in itok ñōn iba, inem I naj kar kōmōn jime ñōn e! 5 Im ein drein ke jabrewōt armij ej kebaktok bwe en aber ñōn e, e ar erlokwe pein, im kapjere, im mejenmaik e. 6 Im ein drein an Absalom kōmōn ñōn dri Israel otemjej rar itok ñōn iben kiñ eo kin ekajet: ein drein Absalom e ar kwoti buruen ro dri Israel.

7 Im ke e jemlok eñoul yiō, Absalom e ar ba ñōn kiñ eo, Ij akwelap bwe kwon likit iō bwe in ilok im kamoli Hibron kanōjniɿ eo I ar kanōjniɿ ñōn Jeova. 8 Bwe ña korijerōm I ar kanōjniɿ juōn kanōjniɿ ke I ar jokwe i Gishur i Siria, im ba, Elañe Jeova e naj bar āñintok iō ñōn Jerusalem, inem I naj kabuñ ñōn Jeova. 9 Im kiñ eo e ar ba, Kwon ilok ilo aine-mōn. Ein drein e ar jutōk im ilok ñōn Hibron. 10 A Absalom e ar jilkinlok dri aleko ilujen bwij otemjej bwijin Israel, im ba, Ñe komij roñ ainiken jilil, inem komin ba, ²Absalom ej kiñ i Hibron. 11 Im rar ilok iben Absalom rubuki armij jen Jerusalem, ro emwij an jiroñ ir, im rar ilok ilo air jaje; im rar jab jela jabrewōt. 12 Im Absalom e ar āñintok ³Ehitopel dri Gilo, dri bebe an Devid, aet jen Gilo, jikin kwelok eo an, ke e ar katok kin men in katok ko. Im e bin bata eo; bwe eorlok wōt ro rejber iben Absalom.

¹ I Kiñ 1. 5. ² I Kiñ 1. 34. ³ eon 31.

13 Im juōn dri jilik e ar itok nōn iben Devid, im ba, Buruen ro dri Israel rej buñōt Absalom. 14 Im Devid e ar ba nōn ro dron otemjej iben i Jerusalem, ¹ Komin jutōk im jen ko; elañe jab, ejelok juōn iar e naj dreor jen Absalom: komin jarōpmōkōjlok, ñe ab mōkōj an jibwe kij, im kejjoran kij, im mōn jikin kwelok in kin mejen jāji. 15 Im ro dron kiñ eo rar ba nōn kiñ, Lo, kim kri korijerōm, kim pojōk nōn men eo jabrewōt aō iroi j kiñ e naj kālet e. 16 Im kiñ eo e ar drioi jlok, im ro dri mweo imōn otemjej rar lore. Im kiñ eo e ar likit joñoul kōra, limaro konkubain ro an, bwe ren lale mweo. 17 Im kiñ eo e ar drioi jlok, im armij otemjej rej lore; im rar ber i Bet-merhak. 18 Im ro dron otemjej rar etallok iben; im ro dri Kiret otemjej, im ro dri Pilet otemjej, im ro dri Gat otemjej jiljino buki armij, ro rar lore jen Gat, rar etal iman kiñ eo.

19 Inem kiñ eo e ar ba nōn ² Ittai dri Gat, Etke kwoj bareinwōt ilok ibemlok? kwon jeblak, im jokwe iben kiñ eo: bwe kwe juōn drua maijet, im bareinwōt juōn dri joko jen eneōm; kwon jeblak nōn jikōm. 20 Kin ke kwar itok einwōt inne, emōn ke bwe ña ranin in kōmōn am itoitōk ibem, ke ij etetal einwōt aō maroñ? kwon jeblak im kajeblok ro nukōm; joij im mol ren ber ibōm. 21 Im Ittai e ar uak kiñ eo, im ba, ³ Einwōt Jeova e mour, im einwōt aō iroi j kiñ kwoj mour, emōn ilo jabrewōt jikin ijo aō iroi j kiñ kwo naj ber ie, kin mij ak kin mour, ijo ña korijerōm I naj ber ie. 22 Im Devid e ar ba nōn Ittai, Kwon etal im elālok. Im Ittai dri Gat e ar elālok, im ro dron otemjej, im ajiri ro otemjej iben. 23 Im dri eneo otemjej rar jōñ im elap ainikeir, im armij otemjej rar elālok: kiñ eo bareinwōt e ar elā jen wea Kidron, im armij otemjej rar elā ilo ial eo nōn ene jemaren.

24 Im lo, Zedok e ar bareinwōt itok im dri Livai otemjej iben, im rej inek dipdip in kalimur an Anij; im

rar dror dipdip in Anij; im Ebaiatar e ar wōnliñlok, mae ien armij otemjej re mat im drioi j jen jikin kwelok eo. 25 Im kiñ eo e ar ba nōn Zedok, Kwon kajeblok dipdip in Anij nōn jikin kwelok eo: elañe ij lo joij iman mejen Jeova, E naj bar āñintok iō, im kwalok nōn iō men eo kab mweo imōn: 26 a elañe Ej ba, E jab buñburuō kin yuk; lo, ña iji, En kōmōn nōn iō einwōt emōn iben. 27 Kiñ eo e ar bareinwōt ba nōn Zedok pris eo, Kwe kwo jab dri lolo ke? kwon jeblak nōn jikin kwelok eo ilo ainemōn, kwe im lōmaro ruo nejōm, Ehimeaz nejōm, im Jonetan nejin Ebaiatar. 28 Lo, I naj kōtar i jikin kabātīt e ene jemaren, mae ien eor nan in kajelaik iō jen kwe. 29 Inem Zedok im Ebaiatar rar bar ineklok dipdip in Anij nōn Jerusalem; im rar berwōt ijo.

30 Im Devid e ar wōnliñlok ilo ial nōn tol Olivet, im ej jōñ ke ej etal; e libubu bōran, im ejelok ballin neen: im ro otemjej iben rar kalibubu bōrair, im rar wōnliñlok, im jōñ ke rej etal. 31 Im juōn e ar kennanek Devid, im ba, Ehitopel juōn ian dri kabata iben Absalom. Im Devid e ar ba, O Jeova, ij akwelap bwe Kwon ukot bebe an Ehitopel nōn bwebwe. 32 Im ke Devid e ar tōbar ijo e utiej ial eo, ijo rej kabuñ nōn Anij, lo, Hushai, dri Ark, e ar iten wōnmae e im emwij kekel kobe eo an, im briji on bōran. 33 Im Devid e ar ba nōn e, Elañe kwoj etal ibalok, inem kwo naj luklukwoj iō: 34 a elañe kwoj jeblak nōn jikin kwelok eo, im ba nōn Absalom, I naj korijerōm, O kiñ; einwōt I kar korijeran jemōm ilo ien ko re motlok, ein drein I naj korijerōm kiō; inem kwo naj dremōk nōn iō bebe an Ehitopel. 35 Im Zedok im Ebaiatar pris ro re jab ijo ibōm ke? inem e naj ein drein, jabrewōt men eo kwoj roñjake jen mweo imōn kiñ eo, kwo naj kennaneklok Zedok im Ebaiatar pris ro. 36 Lo, ibeirro, ruo nejir eman, Ehimeaz, nejin Zedok, im Jonetan nejin Ebaiatar; im kin irro kwo naj jilkintok nōn iba men

otemjej komij roñjake. 37 Ein drein¹ Hushai, jeran Devid, e ar dreloñ ilo jikin kwelok eo; im Absalom e ar dreloñlok ilo Jerusalem.

16 Im ke Devid e motmanlok jirik jen jabōn tol eo, lo,² Zaiba, korijeran Mipiboshet e ar ion e, im iben ruo ass eor wan ebōk ioir, im ioir rubuki ion bred, im jibuki urur in grep re mōra, im jibuki ian leen rōk, im juōn botto in wain. 2 Im kiñ eo e ar ba ñōn Zaiba, Kwoj it kin men kein? Im Zaiba e ar ba, Ass ko, bwe ro nukin kiñ ren uwe ioir; im bred im leen rōk kijen likao ro; im wain eo limen ro rej kijelok i ene jemaren. 3 Im kiñ eo e ar ba, Im nejin karo eo am ej ber ia? Im Zaiba e ar ba ñōn kiñ eo, Lo, ej berwōt i Jerusalem; bwe e ar ba, Ranin dri Israel re naj bar letok ñōn iō ailiñ eo an jema. 4 Inem kiñ eo e ar ba ñōn Zaiba, Lo, am men ko otemjej an Mipiboshet. Im Zaiba e ba, Ij aber; in lo loi iman mejom, aō iroi, O kiñ.

5 Im ke Devid e ar itok ñōn Behurim, lo, e ar itok jen ijo juōn armij ian nukin Saul, etan³ Shimeai, nejin Gira; e ar drioijtōk, im ej kebele wōt ilo an itok. 6 Im e ar ajekare Devid, im aolepen ro dron Devid, im armij otemjej, im ro re kajur otemjej rar ber i anbijmaroñ ira i anmiñ iturin. 7 Im ein drein Shimeai e ar ba ilo an kebel, Kwon ilok, kwon ilok, kwe armij dri bōtōktōk, im armij bata: 8 Jeova e ar kamo kinij ibōm kin aolepen nukin Saul, eo kwar binej jenkwoñ im kiñ; im Jeova e ar lelok ailiñ eo ilo pein nejōm Absalom; im lo, emwij jibwe yuk ilo am kōmōn nana, bwe kwe armij dri bōtōktōk.

9 Inem Ebishai nejin Ziruaia e ar ba ñōn kiñ eo, Etke kiru roror in e mij ej kebel aō iroi kiñ? ij akwelap bwe in ilok im jōbbare. 10 Im kiñ eo e ar ba, Etke kom iltok iba, kom ro nejin Ziruaia? kin an kebele, im kin an Jeova ba ñōn e, Kwon kebele Devid, inem wōn eo en ba, Etke kwar kōmōn ein drein? 11 Im Devid e ba

ñōn Ebishai im ñōn ro dron otemjej, Lo, nejiō eo e ar walok jen ibiō, e ar bukot aō mour: e jab nañin laplok an dri Benjamin en maroñ kōmōne ke? komin jab kamōkit e, im en ekebel wōt; bwe Jeova e ar jiroñ e. 12 Bwelen Jeova e naj lale nana eo emwij kōmōn ñōn iō, im Jeova e naj nawōnaō emōn kin an kebel iō ranin. 13 Ein drein Devid im ro dron rar etal ilo ial eo; im Shimeai e ar etal ion tol ikijeir, im kebele ke ej etetal, im ajekare, im jolok brij. 14 Im kiñ eo im armij otemjej rar mōk; im e ar kaki-jeike ijo.

15 Im¹ Absalom, im armij otemjej dri Israel, rar itok ñōn Jerusalem, im Ehitopel e ar ber ibeir. 16 Im ke Hushai dri Ark, jeran Devid, e ar itok ñōn iben Absalom, Hushai e ar ba ñōn Absalom, Kiñ en mour, Kiñ en mour. 17 Im Absalom e ar ba ñōn Hushai, Eñin am joiy ñōn leo jerōm ke? etk, kwar jab ilok iben leo jerōm? 18 Im Hushai e ar ba ñōn Absalom, Jab; a eo Jeova, im armij rein, im aolepen dri Israel rar kålet e, I naj dron, im I naj ber iben. 19 Im bar juōn, Wōn eo in jermal ñōn e? etke in jab korijer iman mejen leo nejin? einwōt I ar korijer iman mejen jemōm, ein drein I naj korijer iman mejōm.

20 Inem Absalom e ar ba ñōn Ehitopel, Kwon kwalok am bebe ta eo jen kōmōne. 21 Im Ehitopel e ar ba ñōn Absalom,² Kwon babu iben limaro konkubain ro an jemōm, ro e ar likiti bwe ren lale mweo imōn; inem dri Israel otemjej re naj roñjake kin an jemōm jōjōik yuk: inem pein armij otemjej ibōm re naj kajur. 22 Ein drein rar erlokwe juōn im nuknuk na ion mweo; im Absalom e ar dreloñ im babu iben limaro konkubain ro an jemen, iman mejen dri Israel otemjej. 23 Im bebe an Ehitopel, eo ej lelok ran ko, ej einwōt elañe juōn armij e ar kajitōk nan jen Anij: ein drein aolepen bebe an Ehitopel iben Devid im iben Absalom.

17 Bar juōn, Ehitopel e ar ba ñōn Absalom, In kålet kiō joñoul

¹ jap. 16. 16. ² jap. 9. 2-13. ³ jap. 19. 16-23; 1 Kiñ 2. 8, 9, 44.

¹ jap. 15. 12, 37. ² jap. 15. 16.

ruo tausan armij, inem I naj jutōk im lukworkwore Devid boñin in : 2 im I naj ion e ñe e mōk im mōjino pein, im I naj kaleññoñ e; im ro otemjej iben re naj ko; im kiñ eo wōt I naj mōn e; 3 im I naj bar āñintok armij otemjej ññ ibōm : armij eo kwoj bukot e ej einwōt elañe ro otemjej rej jeblaktok : ein drein armij otemjej re naj ainemōn. 4 Im nan in e ar kabuñburuen Absalom, im ridto ro otemjej an Israel.

5 Inem Absalom e ar ba, Kiō komin kirtok¹ Hushai, dri Ark, bareinwōt, im jen roñjake nan eo e naj ba. 6 Im ke Hushai e ar itok ññ iben Absalom, Absalom e ar konono iben, im ba, Ein drein an Ehitopel ba: jen kōmōn einwōt an in nan ke? elañe jab, kwon ba wōt. 7 Im Hushai e ar ba ññ Absalom, Bebe eo Ehitopel e ar kwaloke ien in e jab emōn. 8 Hushai ej bareinwōt ba, Kwo jela jemōm im armij ro iben, bwe re kajur wōt, im etokokok burueir² einwōt juōn kiru baer ke rar bōk jen nejin ilo melaj; im jemōm juōn dri tōrinae, im e jamin jibōññ iben armij ro. 9 Lo, kiō, emwij an tilekek ilo juōn roñ, ak ilo bar juōn jikin : im ñe jet rej bero mokta, jabrewōt eo ej roñjake e naj ba, Rej mōn armij ro rej lor Absalom. 10 Inem eo ej beran, buruen einwōt buruen laion, e naj kubarbar wōt; bwe dri Israel otemjej, re jela bwe jemōm juōn dri kajur, im ro iben rej armij beran im kajur. 11 A aō bebe bwe ren kokweloktok ññ ibōm dri Israel otemjej, jen Dan ññ Bier-shiba, einwōt oran wōt bok i barijit; im kwe mōke kwon tel ir ññ tōrinae. 12 Ein drein je naj ion e ilo juōn jikin ijo je naj loe ie, im je naj buñ ion einwōt molawi ej wutlok ion lōl; im je jamin likit juōn iair, e im armij otemjej iben. 13 Bar juōn, elañe e ar dreloñ ilo juōn jikin kwelok, inem dri Israel otemjej re naj bōktok to ko ññ jikin kwelok eo, im je naj ibere na iloan river eo, mae ien ejelok juōn dreka ej berwōt. 14 Im Absalom im ro dri Israel otem-

jej re ba, Bebe an Hushai, dri Ark emōn jen bebe an Ehitopel. Bwe Jeova e ar bebe bwe En dremōke bebe emōn an Ehitopel, bwe Jeova en bōktok nana ion Absalom.

15 Inem¹ Hushai e ar ba ññ Zedok, im ññ Ebaiatar, pris ro, Ein drein Ehitopel e ar bebe ññ Absalom im ridto ro an Israel, im ein drein I ar bebe kake. 16 Inem komin jiliklok mōkōj, im kennanek Devid, im ba, En jab ber boñin in iturin jikin kabātit ko i ene jemaren, a en etal wōt, ñe ab joko kiñ eo im ro otemjej iben. 17 Ak Jonetan im Ehimeaz rar ber iturin En-rogel; im juōn korijer kōra e kin ilen kennanek ir; im irro rar ilen kennanek kiñ Devid: bwe emōn ren jab lo air dreloñ ilo jikin kwelok eo. 18 A juōn ladrik e ar lo ir, im ej kennanek Absalom : im irro rar mōkōjlok, im itok ññ mweo imōn juōr armij i Behurim, im juōn aibij iloan worwor eo; im rar tolōllok iloan. 19 Im juōn kōra e ar erlokwe nuknuk ion mejen aibij eo, im likit korn emwij nowe ion; inem ejelok air jela kake. 20 Im ro dron Absalom rar itok ññ iben lio ññ mweo imōn; im re ba, Ewi Ehimeaz im Jonetan? Im lio e ar ba ññ ir, Emwij air elā jen wea eo. Im ke rar kabukot im ban lo irro, rar jeblak ññ Jerusalem.

21 Im elikin air ilok, rejro wōñliñlok jen loan aibij eo, im ilem kennanek kiñ Devid; im rar ba ññ Devid, Komin jerkak, im en mōkōj ami elā jen dren eo; bwe ein drein Ehitopel e ar bebe nae kom. 22 Inem Devid e ar jerkak, im ro otemjej iben, im rar elā jen Jordan : ke e rantak ejelok juōn iair e jañin elā jen Jordan. 23 Im ke Ehitopel e ar lo bwe re jab etal ilo bebe eo an, e ar likit eran jijōt ion ass eo an, im jutōk, im ilok ññ kabijuknen, ññ jikin kwelok eo an, im kebobo mweo imōn, im² mōke totoik e; im e ar mij, im rar kalibwin e iloan lūp eo lūpōn jemen.

24 Inem Devid e ar ilok ññ Mehaneim. Im Absalom e ar elā jen Jordan, e im dri Israel otemjej iben.

¹ ap. 15. 32-34. ² Ken. 17. 12.

¹ jap. 15. 35. 36. ² Matu 27. 5.

25 Im Absalom e ar koutiej Amasia ion jar in tōrinae, bwe en binej jenk-wōn Joab. Ak Amasa nejin juōn eman, etan Itra dri Israel, eo e ar dreloñ ñōn iben Abigal lio nejin Nehash, jātin Ziruaia, jinen Joab. 26 Im dri Israel kab Absalom rar kajur air kamp i enen Giliad.

27 Im ke Devid e ar itok ñōn Mehaneim, Shobai nejin Nehash jen Rabba ian ro nejin Amon, im Mekir nejin Amaiel jen Lo-dibar, im Barzilai, dri Giliad jen Rogilim, 28 rar bōktok kineir, im jābi ko, im jābi brij ko, im wit, im barli, im flauo, im korn jinmelle, im binij, im lentil, 29 im hōnni, im bōtter, im jip ko, im jij jen kau ko, ñōn Devid, im ñōn armij ro iben, bwe ren, mōña: bwe rar ba, Armij re kwuli, im mōk, im maro, ilo ene jemaren.

18 Im Devid e ar bwini armij ro iben, im likit ioir kapen in taus-san ko, im kapen in buki ko. 2 Im Devid e ar jilkinlok armij ro, juōn mōtōn jilu iomin pein Joab, im juōn mōtōn jilu iomin pein Ebishai nejin Ziruaia, im juōn mōtōn jilu iomin pein Ittai dri Gat. Im kiñ eo e ar ba ñōn armij ro, Emol I naj drioij ibemi bareinwōt. 3 A armij ro rar ba, ¹Kwo jamin drioijlok: bwe elañe kimij ko, re naj kejekron kim; a elañe jibilkwōn iam re mij, e naj men in jekron ibeir: a kwe emōn jen joñoul taus-an iam; kin men in, emōnlok kwon pojōk in jibōñ kim jen jikin kwelok in. 4 Im kiñ eo e ar ba ñōn ir, I naj kōmōn men eo emōn ibemi. Im kiñ eo e ar jutōk iturin kejem, ke armij otemjej rar drioijlok kin buki ko im taus-an ko. 5 Im kiñ eo e ar jiroñ Joab im Ebishai im Ittai, im ba, Komin kōmōn joiñ ñōn likao eo, Absalom, kin ña. Im armij otemjej rar roñjake kien eo kiñ e ar jiroñ kapen ro kin Absalom.

6 Ein drein armij ro rar drioijlok ilo melaj nae dri Israel: im tōrinae ilo bukwōn wijki in Ipreim. 7 Im e jorran ro dri Israel ijo iman ro dron Devid, im juōn im elap an roñoul tau-

san armij ran eo. 8 Bwe rar kajerer tōrinae eo ilo mejen aolepen eneo; im bukwōn wijki e ar kōñ elōñlok armij jen jāji ran eo.

9 Im Absalom e ar jebwābwe im wōnmae ro dron Devid. Im e ar uwe ion kiru mul eo an, im mul eo e ar etal iomin ra re kut an juōn wijki ok e killip, im ¹bōran e ar lorōk ilo ok eo, im e ar toto ikōtan lōñ im lōl; im mul eo iomin ej etal wōt. 10 Im juōn eman e ar loe, im ej kennanek Joab, im ba, Lo, I ar lo Absalom ej toto ilo juōn wijki ok. 11 Im Joab e ar ba ñōn leo e ar kennanek e, Im lo, kwar loe, im etke kwar jab mōn e ijo bwe en mij? inem I naj kar lewoj joñoul mōtōn silver, im juōn kōñōr. 12 Im leo e ar ba ñōn Joab, Meñe ij bōk juōn taus-an mōtōn silver ilo peiō, I jamin kar kōtellok peiō nae leo nejin kiñ eo: bwe ke kim ar roñjake, kiñ eo e ar jiroñ komjil Ebishai im Ittai, im ba, Komin lale bwe ejelok juōn en uñir likao eo, Absalom. 13 Ein drein, elañe I ar kōmōn ilo mon nae mour eo an, (im ejelok men eo e nojōk jen kiñ eo), inem kwe mōke kwo naj kar jumae iō. 14 Inem Joab e ar ba, I ban mar ein drein ibōm. Im e ar bōk jilu mōri ilo pein, im e ar wākare ubōn Absalom, ke ej mour wōt ilujen wijki ok eo. 15 Im joñoul likao ro rar inek ken tōrinae ko an Joab rar kabol im jebōke Absalom im mōn e.

16 Im ²Joab e ar jilil im armij ro rar jeblak jen air lukworkwor Israel; bwe Joab e ar drebij armij ro. 17 Im rar bōk Absalom, im jolok e na ilo juōn roñ elap ilo bukwōn wijki ko, im rar ejak juōn be elap ion: im dri Israel otemjej rar ko, jabrewōt iair ñōn im nuknuk eo an. 18 Ak Absalom ke e ar mour, e ar bōk im kajur ñōn e mōke jur eo ej ilo komlōl in kiñ; bwe e ar ba, Ejelok nejō man bwe en kejbārok eta: im e ar naetan jur eo kin etan; im rej naetan jurōn keme-mej Absalom, ñōn ranin.

19 Inem Ehimeaz, nejin Zedok, e ar ba, In etōrlok kiō im bōktok nan

nōn kiñ eo, ekijkan Jeova e ar kwi kin ro dri kijirāte. 20 Im Joab e ar ba nōn e, Kwo jamin bōklok nan ranin, a kwo naj bōklok nan bar juōn ran; a ranin kwo jamin bōklok nan, kin ke emij nejin kiñ eo. 21 Inem Joab e ar ba nōn dri Kush eo, Kwon ilok, im kennanek kiñ eo men ko kwar loi. Im dri Kush e ar barikrik jen Joab im etōrlōk. 22 Inem Ehimeaz nejin Zedok e ar ba nōn Joab, Jekron men eo ej walok, in bareinwōt etōrlōk, ij akwelap, ilokōn dri Kush eo. Im Joab e ar ba, Etke kwo kōnan etōr, nejiō, bwe kwo jamin bōk wōnan nan ko. 23 A jekron men eo ej walok, e ba, ij etōr. Inem e ar ba nōn e, Kwon etōr. Inem Ehimeaz e ar etōrlōk ilo ial in ene emōn biken, im e ar mōkōj jen dri Kush.

24 Ak ¹Devid e ar jijōt ikōtan kejem ko ruo: im dri kajere e ar wōnliñlok nōn ion worwor eo, im ej bōk mejen, im lale, im lo, juōn armij ej etōr mōke ian. 25 Im dri kajere e ar lamij im kennanek kiñ eo. Im kiñ eo e ar ba, Elañe e mōke ian, eor nan i loñin. Im e ar itok mōkōj im druaktok. 26 Im dri kajere e ar lo bar juōn armij ej etōr; im dri kajere e ar kir nōn dri lale kejem eo, im e ba, Lo, bar juōn armij ej etōr mōke ian. Im kiñ eo e ar ba, Ej bareinwōt bōktok nan. 27 Im dri kajere e ar ba, Ij lemnok etōr an eo mokta einwōt etōr an Ehimeaz nejin Zedok. Im kiñ eo e ba, E armij emōn, im ej bōktok nan emōn.

28 Im Ehimeaz e ar kir im ba nōn kiñ eo, Ainemōn. Im e ar buñbero iman kiñ, im ba, Emōnōnō Jeova am Anij, eo e ar ketōke armij ro rar kwo-tōke peir nae aō iroi, kiñ. 29 Im kiñ eo e ar ba, Emōn ke iben likao eo Absalom? Im Ehimeaz e ar uak, Ke Joab e ar jilkintok iō, korijerōm, I ar lo iruij elap, a I ar jab jela ta eo. 30 Im kiñ eo e ar ba, Kwon jeōrlōk, im jutōk ijin. Inem e ar jeōrlōk, im jutōk wōt.

31 Im lo, dri Kush eo e ar itok; im

e ar ba, Eor nan nōn aō iroi, kiñ; bwe Jeova e ar irenwōne kin ro otemjej rar jutōk nae yuk. 32 Im kiñ eo e ar ba nōn dri Kush eo, Emōn ke iben likao eo Absalom? Im dri Kush eo e ar uak, Ro dri kijirāte aō iroi, kiñ, im ro otemjej rej jutōk nae yuk bwe ren kokkure yuk, ren einwōt likao eo. 33 Im kiñ eo e ar kanuij liman, im e ar wōnliñlok nōn bo eo ilōñin kejem, im ej jōñ: im ke e ar ilok ein drein an ba, O nejiō Absalom, nejiō, nejiō Absalom! emōn ña in kar mij kin kwe, O Absalom, nejiō, nejiō!

19 Im rar kennanek Joab, Lo, kiñ eo ej jōñ im liājlo kin Absalom. 2 Im anjo ran eo emwij ukot e nōn liājlo nōn armij otemjej; bwe armij rar roñjake air ba ran eo, Kiñ eo ej tokokok kin leo nejin. 3 Im ran eo armij rar kōnan noj air dreloñtok ilo jikin kwelok eo einwōt armij ro re jok ñe rej ko jen tōrinae. 4 Im kiñ eo e ar kalibubu mejen, im kiñ ej lamij im elap ainiken, O nejiō, Absalom, O Absalom, nejiō, nejiō! 5 Im Joab e ar dreloñ ilo mwēo nōn iben kiñ eo, im ba, Kwar kajok ranin mejen ro drom otemjej, ro rar lomoren am mour ranin, im mour an ro nejōm man im kōra, im mour an limaro beleōm otemjej; 6 kin am yokwe ro rej kijirāte yuk, im kijirāte ro rej yokwe yuk. Bwe kwar kalikar ranin bwe ejelok tokjen iroi, ro im ro dri korijerōm ibōm: bwe ranin ij lo, bwe elañe Absalom e ar mour wōt, im kim otemjej ar mij ranin, men in e naj kar kabuñburuōm wōt. 7 Inem kiō, kwon jerkak, kwon drioi, lok, im konono nan in kainemōn ro drom; bwe ij kanōjnij kin Jeova, elañe kwo jab drioi, lok, ejelok juōn eman e naj ber ibōm boñin in; im men eo e naj laplok an nana nōn yuk jen aolepen nana e ar walok nōn kwe jen ien am inono nōn kiō. 8 Inem kiñ eo e ar jerkak, im jijōt ilo kejem. Im rar kennanek armij ro otemjej, im ba, Lo, kiñ eo ej jijōt ilo kejem: im armij otemjej rar itok iman kiñ eo.

Ak ¹dri Israel rar ko, jabrewōt ar-

mij ñõn im nuknuk eo an. 9 Im armij otemjej ilo bwijin Israel, rar akwaile dron, im ba, Kiñ eoe ar lomorer jen pein ro dri kijiräte kij, im e ar lomorer jen pein ro dri Pilistia; a kiõ emwij an ko jen enin jen Absalom. 10 Im Absalom, eo jar kabite ioer, e mij ilo törinae. Inem kiõ etke ejelok nan ibemi kin kajebłaktok kiñ eo?

11 Im ¹kiñ Devid e ar jiliklok ñõn iben Zedok, im ñõn Ebaiatar, pris ro, im ba, Kominro konono ñõn ridto ro in Juda im ba, Etke kom rumij jen aolep in kajebłak kiñ eo ñõn mweo imõn? bwe eor nane ar walok jen dri Israel otemjej in kajebłak kiñ eo ñõn mweo imõn. 12 Kom ro jeiõ im jätio, kom driõ im kõniekiõ: inem etke kom rumij in kajebłak kiñ eo? 13 Im komin ba ñõn Amasa, Kwe kwo jab driõ im kõniekiõ ke? Anij en kõmõn ein drein ñõn iõ im kalaplok, elañe kwo jamin iroi j ion jar in törinae ien otemjej im binej jenkwõn Joab. 14 Im e ar kañõl buruen dri Juda otemjej einwõt buruen juõn wõt armij; inem rar jiliklok ñõn kiñ eo im ba, Komin jeblaktok, kwe im ro drom otemjej. 15 Ein drein kiñ eo e ar jeblak im itok ñõn Jordan. Im dri Juda rar itok ñõn Gilgal bwe ren elällok im wõnmae kiñ eo, bwe ren karwontok jen Jordan.

16 Im ²Shimeai, nejin Gira, dri Benjamin, jen Behurim, e ar jarõplõltok iben dri Juda bwe en wõnmae kiñ Devid. 17 Im iben juõn tausan dri Benjamin, im Zaiba korijeran nukin Saul, im iben lõmaro joñoul lailim nejin, im dri korijeran roñoul; im rar tuak im elä jen Jordan iman mejen kiñ eo. 18 Im juõn wa e ar elällok in liklikittok ro nukin kiñ eo, im kõtatar ankil an. Im Shimeai nejin Gira e ar buñbero iman kiñ eo, ke e ar elätok jen Jordan. 19 Im e ar ba ñõn kiñ eo, Aõ iroi j en jab watõk nana ñõn ña, im kwon jab kememej ta eo ña korijerõm I ar kõmõn ilo bõt, ran eo ke aõ iroi j e ar ilok jen Jerusalem, im drebij e ilo buruõm. 20 Bwe ña korijerõm I jela bwe I ar

bwir; kin men in, lo, I mottok ranin mokta ian aolepen ro nukin Josep in wõnlõltok bwe in ion aõ iroi j kiñ eo.

21 A Ebishai nejin Ziruaia e ar uak im ba, Ren jab mõn Shimeai kin men in, kin ke e ar kebele eo Jeova e ar kabite ke? 22 Im Devid e ar ba, Etke kom iltok iba, kom ro nejin Ziruaia, bwe komin jumae iõ ranin? ren mõn jabrewõt armij ranin ilo Israel ke? bwe I jab jela bwe ña kiñ ion Israel ranin ke? 23 Im kiñ eo e ar ba ñõn Shimeai, Kwo jamin mij. Im kiñ e ar kanõnjij ñõn e.

24 Im ¹Mipiboshet nejin Saul e ar wõnlõltok in wõnmae kiñ eo; im e ar jab kõkäl tirokõn neen ak bukwe kworeak ko an, ak kwol an nuknuk, jen ran eo ke kiñ eo e ar ilok, ñõn ran eo ke e ar jeblak ñõn jikin ilo ainemõn. 25 Im ke e ar itok ñõn Jerusalem in wõnmae kiñ eo, kiñ eo e ar ba ñõn e, Etke kwar jab ilok ibalok, Mipiboshet? 26 Im e ar uak, Aõ iroi j, O kiñ, dri korijera e ar mon iõ: bwe ña korijerõm I ar ba, I naj kapojõk juõn ass, bwe in uwe ion, im ilok iben kiñ eo; bwe ña korijerõm I kirro. 27 Im e ar konono riõp nae iõ korijerõm ñõn aõ iroi j, kiñ; a aõ iroi j, kiñ, ej einwõt enjel õn Anij: inem kwon kõmõn jabrewõt eo emõn ibõm. 28 Bwe ro otemjej nukin jema rar einwõt armij remij iman aõ iroi j kiñ; mekarta, kwar likit ña korijerõm iben ro rar mõña ilo tebel eo am. Inem ewi unin aõ bar kajitõk jabrewõt iben kiñ eo? 29 Im kiñ eo e ar ba ñõn e, Etke kwój bar konono kin men ko am? ij ba, Komro Zaiba, komin ajej wäto eo ñõn dron. 30 Im Mipiboshet e ar ba ñõn kiñ eo, Eokwe, en aolep im bõke, bwe aõ iroi j kiñ e mottok ilo ainemõn ñõn mweo imõn.

31 Im Barzillai, dri Giliad, e ar wõnlõltok jen Rogilim; im e ar elä jen Jordan iben kiñ eo, im karwontok jen Jordan. 32 Ak Barzillai e lõlap, aet, ridtõn drualitõkñoul yiõ: im e ar najirik kiñ eo ke e ar ber i Mehaneim;

bwe e juōn armij e utiej im mweie. 33 Im kiñ eo e ar ba ñōn Barzillai, Kwon elālok iba, im I naj jibōñ yuk i Jerusalem. 34 Im Barzillai e ar ba ñōn kiñ eo, Jete ran ko im yiō in aō mour, bwe in wōnlñlok iben kiñ eo ñōn Jerusalem? 35 Ranin ridtō dualitōkñoul yiō: I maroñ kile ikōtan emōn im nana ke? ña korijerōm I maroñ nemak men ko ij irak ak mōña ke? I maroñ in roñjake ainiken ro rej al man ak kōra ke? inem etke ña korijerōm in kabelo aō iroi j kiñ? 36 Ña korijerōm I jab tolmake aō elā jen Jordan iben kiñ eo: im etke kiñ en nawōnaō einwōt? 37 Ij akwelap bwe ña korijerōm in jeblak, bwe in mij ilo jikin kwelok eo aō, iturin lūpōn jema im jinō. A lo, korijerōm Kimham; enilok iben aō iroi j; im kwon kōmōn ñōn e men eo emōn ibōm. 38 Im kiñ eo e ar uak, Kimham e naj elā ibalok, im I naj kōmōn ñōn e men eo ej emōn ibōm: im jabrewōt men eo kwo naj kajitōk iba, I naj kōmōne ñōn yuk. 39 Im armij otemjej rar elā jen Jordan, im kiñ eo e ar elālok: im kiñ eo e ar mejenmaik Barzillai, im jare: im e ar jeblaklok ñōn jikin.

40 Ein drein kiñ eo e ar elālok ñōn Gilgal, im Kimham e ar ilok iben: im dri Juda otemjej rar āñintok kiñ eo, im bareinwōt jibilkwon ro dri Israel. 41 Im lo, dri Israel otemjej rar itok ñōn iben kiñ eo, im ba ñōn kiñ eo, Etke ro jeim im jātim rar kwote yuk, im āñintok kiñ im ro nukin jen Jordan, im ro otemjej dron Devid iben? 42 Im aolepen dri Juda rar uak dri Israel, Kin ke kiñ eo ermem: inem etke komij illu kin men in? kim ar mōña jabrewōt kijan kiñ ke? ak e ar letok jabrewōt men ke? 43 Im ro dri Israel rar uak dri Juda, im ba, Ibem joñoul mōtōn ilo kiñ eo, im kij eo am ilo Devid elaplok jen eo ami: inem etke kom ar kejekron kim, im jab bebe ibem mokta, kin kajeb-laktok kiñ eo? Im elaplok an lej nan ko an dri Juda jen nan ko an dri Israel.

20 Im ijo juōn armij bata etan Shiba, nejin Bikrai, dri Benja-

min: im e ar jilil, im ba, Ejelok kij ibem ilo Devid, im ejelok am jolit ilo leo nejin Jesse: komeo, jabrewōt iami ñōn moko imwemi, O Israel. 2 Ein drein dri Israel otemjej rar wōn-lñlok jen air lor Devid, im rar lor Shiba, nejin Bikrai; a ro dri Juda rar edrep ñōn kiñ eo air, jen Jordan im ñōn Jerusalem.

3 Im Devid e ar itok ñōn mweo imōn i Jerusalem; im kiñ eo e ar bōk limaro konkubain ro joñoul, ro e ar likit ir in lale mweo, im kil ir, im lale ir, a e ar jab bar dreloñ ñōn ibeir. Ein drein air kil ir ñōn ien re mij, im rej berwōt einwōt ro e joko beleir.

4 Inem kiñ eo e ar ba ñōn Amasa, Kwon kokweloktok ro dri Juda iomin jilu ran, im kwe kwon ber iji. 5 Ein drein Amasa e ar ilen kokweloktok ro dri Juda; a e ar kaitoklok ien jen men eo e ar jiroñ e kake. 6 Im Devid e ar ba ñōn Ebishai, A kiō, Shiba nejin Bikrai, e naj kōmōn ñōn kij nana elaplok jen men eo Absalom e ar kōmōne: kwon bōk ro dron am iroi j, im lukworkwore, ñe e ab dreloñ ilo jikin kwelok ko eor air worwor, im ko jen mejer. 7 Im ro rar drioi jlok bwe ren lore, ro dron Joab, im ro dri Kiret, im ro dri Pilet, im aolepen armij ro re kajur; im rar drioi jlok jen Jerusalem, bwe ren lukworkwore Shiba, nejin Bikrai. 8 A ke rar ebake dreka eo elap i Gibeon, Amasa e ar iten wōnmae ir. Im Joab e ar kañōrñōr kin ken tōrinae ko an, ko e ar kōnōki, im ion juōn kōñōr, im juōn jāji ilo nien ion ibin; im ke ej ilok e wutlok jāji eo. 9 Im Joab e ar ba ñōn Amasa, Emōn ke ibōm jātiō? Im Joab e ar jibwe kworeak ko an Amasa kin pein anbijmaroñōn bwe en mejenmaik e. 10 A Amasa e ar jab kalimjek jāji eo i anmiñin Joab: ein drein Joab e ar wākari enbwinin kake, im katorlok mōjñōl ko an ion lōl, im e ar jab karuale; inem leo emij.

Im Joab im Ebishai, jātin, rar lukworkwore Shiba, nejin Bikrai. 11 Im juōn ian likao ro dron Joab e ar jutōk iturin leo, im ba, Eo ej rie Joab, im eo ej dron Devid, en lor Joab. 12 Im

Amasa e ar babu im drabilbil ilo bōtōktōkin ilo ial. Im ke likao eo e ar lo bwe armij otemjej rar bwijrōk ijo, e ar bōklok Amasa jen ial eo nōn melaj, im e ar jolok juōn nuknuk ion, ke ej lo bwe armij otemjej rej itok rej bwijrōk iben. 13 Ke emwij an kamčkit e jen ial eo, armij otemjej rar etal lor Joab, bwe ren lukworkwor Shiber nejin Bikrai.

14 Im e ar driblok aolepen bwijin Israel nōn Ebel, im nōn Bet-meaka, im dri Ber otemjej: im rar kweloktok im bareinwōt etal lore. 15 Im rar itok im nitbwile i Betel im Bet-meaka, im rare je juōn be nae jikin kwelok eo, im e ar jutōk nae worwor eo an; im armij otemjej iben Joab rar rupe worwor eo bwe ren jolōllok e. 16 Inem juōn kōra dri meletlet e ar kir jen jikin kwelok eo, Komin roñjake, komin roñjake; ij akwelap bwe komin ba nōn Joab, Kwon druaktok iji, bwe in maroñ konono ibōm. 17 Im e ar druaktok nōn iturin; im lio e ar ba, Kwe ne Joab ke? Im e ar uak, Ña e. Inem e ar ba nōn e, Kwon roñjake nan ko aō, korijerōm. Im e ar uak, Ij roñjake wōt. 18 Inem lio e ar konono, im ba, Juōn jabōn kennan, rar konono ilo ien ko re motlok im ba, Emol re naj kajitōk bebe i Ebel: ein drein rej kajemlok men eo. 19 Ña juōn ian ro rej ainemōn im tiljek ilo Israel: kwoj kajeoñ in kokkure juōn jikin kwelok im juōn jinen ilo Israel: etke kwo kōnan warōñlok men in jolit an Jeova? 20 Im Joab e ar uak im ba, En etolok jen iō, en etolok jen iō, bwe in warōñlok ak kokkure. 21 Men eo e jab ein drein: a juōn eman jen ene utiej i Ipreim, Shiba nejin Bikrai etan, e ar kwotōke pein nae kiñ eo, aet, nae Devid; kwon ketōk e wōt, inem I naj ilok jen jikin kwelok in. Im kōra eo e ar ba nōn e, Lo, re naj jolok bōran nōn yuk jen worwor in. 22 Inem lio e ar ilok nōn armij otemjej ilo an meletlet. Im rar jōb-bare Shiba nejin Bikrai, im jolōllok bōran nōn Joab. Inem e ar jilil, im rar jibiliklok jen jikin kwelok eo, jabrewōt armij nōn mweo imōn. Im Jo-

ab e ar jeblak nōn Jerusalem, nōn iben kiñ eo.

23 Ak ¹Joab ej iroi j ion aolepen jar in tōrinae in Israel; im Beneia nejin Jihoiada ej iroi j ion ro dri Kiret im ro dri Pilet; 24 im Adoram ej iroi j ion dri jerbal ro; im Jihoshapat nejin Ehailud ej dri jeje bwebwenato ko; 25 im Shiva ej dri jeje; im Zedok im Ebaiatar rej pris; 26 im bareinwōt Aira, dri Jeir, ej dri jibōñ eutiejtata, nōn Devid.

21 Im e kar juōn fiita, ilo ran ko an Devid, iomin jiljilimjuōn yīō; im Devid e ar kabukot mejen Jeova. Im Jeova e ar ba, Eñin kin Saul im kin imōn e bōtōktōk, bwe e ar mōn ro dri Gibeon. 2 Im kiñ eo e ar kirtok ro dri Gibeon, im ba nōn ir, (ak ro dri Gibeon re jab ian ro nejin Israel, a ian mōtōn ro dri Amon; im ro nejin Israel rar kanōjni j nōn ir: im Saul e ar kōnan mōn ir ilo an kijejeto nōn ro nejin Israel im Juda); 3 im Devid e ar ba nōn ro dri Gibeon, In it nōn kom? im kin ta in kōmōn kilajrōk, bwe komin kamōnōñik jolit an Jeova? 4 Im ro dri Gibeon rar ba nōn e, Men eo ikōtam im Saul kab ro nukin, e jab wōnan silver ak gold; im e jab kwonam in mōn jabrewōt armij ilo Israel. Im e ar ba, Jabrewōt eo komij ba, I naj kōmōn nōn kom. 5 Im rar ba nōn kiñ eo, Armij eo e ar kokkure kim, im e ar bebe nae kim, bwe ren mōn kim jen am berwōt ilo jabrewōt ene ko an Israel, 6 ren ketōk nōn kin jiljilimjuōn ian ro nejin eman, inem kim naj totoik ir nōn Jeova ilo Gibia an Saul, ro Jeova e ar kālet ir. Im kiñ eo e ar ba, I naj lewoj.

7 A kiñ eo e ar kejbārok Mipiboshet, nejin Jonetan, nejin Saul, ²kin ke kanōjni j an Jeova ej ikōtairro, iben Devid im Jonetan nejin Saul. 8 A kiñ eo e ar bōk ruo man nejin Rizpa, lio nejin Aia, eo e ar keutake nōn Saul, Armonai im Mipiboshet; im lōmaro lailim nejin Maikal lio nejin Saul, ro e ar keutak nōn Edriel nejin Barzillai dri Miholat: 9 im e ar

ketōk ir na ilo pein ro dri Gibeon, im rar totoik ir ilo tol eo iman Jeova, im ro otemjej jiljilimjuōn rar mij ilo juōn wōt ien. Im rar mōn ir ilo ran ko ran in marmir, ran ko mokta, ilo jinoin marmir barli.

10 Im Rizpa, lio nejin Aia, e ar bōk nuknuk eklep iren, im e ar erlokwe ion dreka eo nōn e, jen jinoin marmir eo nōn ien e ar lutōklok dren ioir jen lōñ; im e ar jab kōtlok bao ko jen lōñ in ber ioir ilo ran, ak kiru rawia ilo boñ. 11 Im rar kennanek Devid ta eo Rizpa lio nejin Aia, lio konkubain an Saul, e ar kōmōne.

12 Im Devid e ar ilok im bōk ¹dri ko drin Saul, im drin Jonetan leo nejin, jen ro dri Jebesh-giliad, ro rar kwot ir jen ial ilo Bet-shan, ijo ro dri Pilistia rar totoik ir ilo ran eo ke ro dri Pilistia rar mōn Saul i Gilboa; 13 im e ar bōktok jen ijo dri ko drin Saul, im drin Jonetan nejin: im rar aini dri ko drin ro emwij totoik ir. 14 Im rar kalibwin dri ko drin Saul im drin Jonetan nejin ilo enen Benjamin i Zila, ilo lūp eo lūpōn Kish jemen: im rar kōmōn men ko otemjej kiñ eo e ar jiroñ kake. Im elikin men in, ke eor air akwelap nōn Anij, e ar kejeram-mōn eneo.

15 Im ro dri Pilistia rar bar tōrinaek Israel; im Devid e ar wōnlōllok, im ro dron iben, im rar tōrinae iben ro dri Pilistia. Im Devid e ar kijelok; 16 im Ishbai-binob, eo ian ro nejin inea eo, im erron mōri eo an jibuki shekel jinibōrōrō, im ej kañōrñōr e kin juōn jāji ekāl, e ar kajeon in mōn Devid. 17 Im Ebi-shai, nejin Ziruaia, e ar jibōñ e, im jebōk dri Pilistia, im mōn e. Inem ro dron Devid rar kanōjniñ nōn e, im ba, Kwo jamin bar drioijlok ibemlok nōn tōrinae ñe kwo ab kwuni lamp eo an Israel.

18 Im elikin men in rar bar tōrinaek ro dri Pilistia i Gob: ien eo Sibbekai dri Hushat e ar mōn Sap, eo ian ro nejin inea eo. 19 Im bar juōn tōrinae iben ro dri Pilistia i Gob; im

Elhenan nejin Jeare-origim dri Betleem, e ar mōn Golaia dri Gat, jurōn mōri eo an einwōt alal an dri ej nuknuk. 20 Im bar juōn ien rar tōrinae i Gat, ijo juōn eman e kanuij aitok, im pein im neen otemjej kajiljino ar-rin, aolepeir roñoul emen; im e ar bareinwōt lotak nōn inea eo. 21 Im ke e ar kejeiokiok Israel, Jonetan nejin Shimeai, jein Devid, e ar mōn e. 22 Rein emen rar lotak nōn inea eo i Gat; im rar mij kin pein Devid, im kin pein ro dron Devid.

22 Im ¹Devid e ar konono nōn Jeova nan ko an al in ilo ran eo ke Jeova e ar lomoren e jen pein ro otemjej dri kijirāte, im jen pein Saul: 2 im e ar ba,

Jeova aō ejman im aō me, im aō Dri lomor, aet aō;

3 Anij, aō ejman, I naj kone; aō likipijñōk, im drunen lomor iō, aō imōn bar eutie, im aō jikin tilekek; aō Dri lomor, Kwoj lomor iō jen men in kokkure.

4 I naj kir nōn Jeova, eo ej tellokōn bwe ren nebar E: ein drein naj lomor iō jen ro rej kijirāte iō.

5 Bwe no ko in mij rar kabol iō; im ibij ko in nana rar kemjōk iō:

6 To ko in Hedis rar kalorōk iō; alukin mij rar itok iō.

7 Ilo aō jorran I ar kir nōn Jeova; aet, I ar lamij nōn aō Anij: im E ar roñjake ainikiō jen tempel eo An, im aō kir e ar dreloñ i lojiliñin.

8 Inem e makōtkit lōl in im bañij-ñij, im loñtōn lōñ rar makōtkit kin ke Ej illu.

9 E ar wōnliñlok bat jen bodin, im kijeek jen loñin e ar kokkure: melle ko rar urur kake.

10 E ar kōtaik lōñ ko, im tolōllok; im kabin marok iomin neen.

11 Im E ar uwe ion kerub, im E a kākī; aet, ar lo E ion pā ko pein kōto.

12 Im E ar likit marok moko imōn kabol E, kobaik in dren ko, kōro ko re mijil in lōñ ko.

13 Kin romak eo iman, emwij kejo melle in kijeek ko.

14 Jeova e ar jorur jen lõñ ko, im Eo eutiejtata e ar kwalok ainiken.

15 Im E ar jilkinlok mõri ko, im kijibliklok ir; jarom, im kokkure ir.

16 Inem tor ko in lometo rar wallok, emwij kalikar loñtõk ko in lõl, kin an Jeova enoik ir, kin menono in kõto jen bodin.

17 E ar jilkintok jen lõñ, E ar bõk iõ; E ar kekake iõ jen dren ko relõñ;

18 E ar lomor iõ jen dri jumae iõ e kajur, jen ro rar kijiräte iõ; bwe rar kajur wõt jen ña.

19 Rar itok iõ ilo ran in aõ jorran; a Jeova e kar aõ jokwõn.

20 E ar bareinwõt tel iõ iloan juõn jikin e rabõkbõk; E ar lomor iõ kin ke E mõnõnõ kake iõ.

21 Jeova e ar nawõnaõ ekar ñõn aõ wānik; ekar ñõn peiõ erreõ E ar nawõnaõ.

22 Bwe I ar kejbārok ial ko an Jeova, im I ar jab bwir im illok jen aõ Anij.

23 Bwe nan in kaiñi otemjej An rar imaõ; im kin kien ko An, I ar jab illok jeni.

24 Bareinwõt I ar wāppen iben; im I ar kejbārok iõ jen aõ bwir.

25 Kin men in, Jeova e ar nawõnaõ ekar ñõn aõ wānik, ekar ñõn aõ erreõ iman mejen.

26 Kwo naj kwalok Yuk im joi jiben ro re joi j; Kwo naj kwalok Yuk im wāppen iben ro re wāppen.

27 Kwo naj kwalok Yuk im kwojarjar iben ro re kwojarjar; im Kwo naj kwalok Yuk im makoko iben ro re ankeke.

28 Im Kwo naj lomoren armij ro re jorran; a mejõm naj ion ro eutie jburueir, bwe Kwon jolõllok ir.

29 Bwe Kwe aõ maram, O Jeova; im Jeova e naj kamramlok aõ marok.

30 Bwe kin Kwe ij etõr ion juõn jar in armij; im kin aõ Anij ij uwe ion juõn worwor.

31 Kin Anij, ial eo An e wāppen: nan eo an Jeova emwij melejoñ e; E juõn likipijñõk ñõn ro otemjej rej kone.

32 Bwe wõn Anij, a Jeova wõt? im wõn ejman, elañe jab am Anij?

33 Anij ej aõ me ekajur; im Ej tel dri wāppen ilo ial eo an.

34 Ej kõmõn neen einwõt neen kiru hañd, im Ej likit iõ ilo jikiõ reutiej.

35 Ej katakin peiõ bwe ren iri, inem peiõ rej kiele juõn libon jini-bõrõrõ.

36 Kwar bareinwõt letok likipijñõk eo an. Am lomor; im Am joi j e ar koutiej iõ.

37 Kwar kalaplok jetñakin neiõ imaõ, im neiõ rar jab jir.

38 I ar lukworkwor ro dri kijiräte iõ, im I ar kokkure ir; im I ar jab bar oktõk mae ien air joko.

39 Im I ar kokkure ir, im I ar jebõk ir, inem re ban jerkak: aet, emwij air buñ iomin neiõ.

40 Bwe Kwar kañõrñõr iõ kin kajur ñõn keitak eo; Kwar kõtaik ñõn iõ ro rar jerkak jumae iõ.

41 Kwar bareinwõt kajeblaklok ro dri kijirät jen ña, bwe in maroñ in mõn ro rej kijiräte iõ.

42 Rar rei bõjik, a ejelok air dri lomor; aet, ñõn Jeova, a E ar jab uak ir.

43 Inem I ar nowe ir einwõt bõñõl-ñõl in bri j, I ar joniõk ir einwõt biri-kõt in ial ko, im I ar kijibliklik ir.

44 Kwar bareinwõt lomor iõ jen kabata ko an armij ro droõ; Kwar kejbārok iõ bwe in bõran dri ailiñ ko: juõn ailiñ I ar jab jela, e naj jerbal ñõn iõ.

45 Ro drua maijet re naj mōke kõtaik ir ñõn ña: ñe emwij air roñ kin ña, re naj bokake iõ.

46 Ro drua maijet re naj monlok. im re naj itok im wuririr jen jikin tilekek ko air.

47 Jeova ej mour wõt; im emõnõnõ aõ ejman; im en utiej Anij, ejman in aõ lomor,

48 Aet, Anij eo ej irenwõne kin ña, im Ej kõtaik dri ailiñ ko jen iõ,

49 Im Ej kadrioijlok iõ jen ro dri kijiräte io: aet, Kwo j koutiej iõ ilõñin ro rej jutõk mae iõ; Kwo j lomor iõ jen armij eo e lej.

50 Kin men in, I naj kamolol Yuk. O Jeova, i bwiljin dri ailiñ ko, im I naj al im nebar etõm.

51 Ej letok lomor elap ñôn kiñ eo An, im Ej kwalok joij ñôn eo Kwar kabite, ñôn Devid im ñôn ro inen, ñôn in drio.

23 Ir kein nan ko reliktata an Devid. Devid leo nejin Jesse ej ba, im armij eo emwij koutiej e, ej ba, Eo Anij an Jakob e ar kabite, im dri kômôn al emôn an Israel:

2 Jitōb ñn Jeova e ar konono ilo ña, im An in nan e ar ber ion loō.

3 Anij in Israel e ar ba, Ejman in Israel e ar ba ñôn ña: eo ej iroiñ ion armij ilo wānik, eo ej iroiñ ilo mijōk Anij,

4 E naj einwōt maram in jiboñ ke al ej tak, juōn rantak im ejelok kōro, ke ujoij e ub ej walok jen brij ilo maram emōn ke emwij an wut.

5 Emol, mweo imō e jab einwōt iben Anij; mekarta, E ar kômôn iba juōn bujen in drio, e lajrōk ilo men otemjej, im e bin: bwe ej aolepen aō lomor, im aolepen aō kōnan, meñe E jab kadreklok e.

6 A ro dri nana, ir otemjej re naj einwōt kaliklik ko men in jolok, bwe re ban kapjere kin peir;

7 A eo ej uñiri, emōn en bōk ken tōrinae ko, māl, im buñōn mōri; im re naj tile wōt kin kijeek ilo jikir.

8 ¹Rein etan man ro re kajur re kar dron Devid: Josheb-beshibet juōn dri Takmon, eutiej ian kapen ro; eñeo Adino dri Eznait, nae drualitōk buki mijijak juōn wōt ien.

9 Im ijiltokin, Iliezar, nejin Dodai nejin juōn dri Ahohit, juōn ian jilu eman re kajur iben Devid, ke rar kejeiokiok ro dri Pilistia, ro rar kwelok ñôn tōrinae, im ro dri Israel rar ilok jen ir. 10 E ar jutōk im mōn ro dri Pilistia mae ien e mōk pein, im pein edrep ñôn jāji eo an; im Jeova e ar kômôn juōn anjo elap ran eo; im armij ro rar jeblak im lore bwe ren rakim wōt.

11 Im ijiltokin, Shamma nejin Agi juōn dri Hera. Im dri Pilistia rar kwelok ilo juōn jar, ijo juōn jikin kal-lip ijo elōñ lentil; im e ko armij ro jen ro dri Pilistia. 12 A e ar jutōk

iolapen melaj eo, im iri kake, im mōn ro dri Pilistia; im Jeova e ar kômôn anjo elap.

13 Im jilu ian jilñoul, armij re utiej rar wōnlōllok, im itok ñôn iben Devid ilo ien marmir ñôn roñ eo Adulam; im jar an dri Pilistia rar kamp i kom-lōl Ripeim. 14 Im Devid, ien eo, e ar ber ilo jikin eo ebin; im ro dri me an dri Pilistia rar ber ilo Betleem. 15 Im Devid e ar oñkake, im e ba, O I kōnan bwe juōn en letok limō dren jen aibij in Betleem, eo ej iturin kejem! 16 Im lōmaro jilu re kajur rar driblok jar an dri Pilistia, im itōk dren jen aibij in Betleem, eo ej iturin kejem, im bōktok ñôn iben Devid: a e jab kōnan ilimi, a e ar lutōklok e ñôn Jeova. 17 Im e ar ba, En etelok jen ña, O Jeova, bwe in kômôn men in: in irak bōtōktōkin armij ro rar ilok ilo uota kin air mour ke? kin men in, e jab kōnan ilimi. Men kein lōmaro jilu rar kōmōni.

18 Im Ebishai, jātīn Joab, nejin Ziruia, e kar lejokmen ian ro jilu. Im e ar kwotōke mōri eo an nae jilu buki im mōn ir, im eor bwinbwinin iben ro jilu. 19 E ar jab utiejtata ian ro jilu ke? inem ar kōmōne kapen eo air: ijoke, e ar etā jen ro jilu mokta.

20 Im Beneia, nejin Jihoiada, nejin juōn armij e beran jen Kabziel, eo e ar kômôn jerbak ko re kajur, e ar mōn lōmaro ruo nejin Eriel dri Moab: e ar bareinwōt wōnlōllok im mōn juōn lai-on ilo juōn roñ ilo ien sno. 21 Im e ar mōn juōn dri Ijpt, juōn armij e bōñbōñ: im dri Ijpt eo e ar kapjere juōn mōri ilo pein; a e ar wōnlōllok ñôn e im juōn jokwōn iben, im e ar jibwe mōri jen pein dri Ijpt, im mōn e kin mōri eo an. 22 Men kein Beneia nejin Jihoiada e ar kōmōni, im eor bwinbwinin iben jilu ro re kajur. 23 E utiej jen lōmaro jilñoul, a e ar etā jen ro jilu mokta. Im Devid e ar kairoij e ion ro dri jurake kiñ eo.

24 Esahel jātīn Joab e kar juōn ian lōmaro jilñoul; Elhenan nejin Dodo jen Betleem, 25 Shamma dri Herod, Elika dri Herod, 26 Hilez dri Pal, Aira nejin Ikesh dri Tiko, 27 Ebaiizer

dri Anaton, Mibunai dri Hushat, 28 Zalmon dri Aho, Meharai dri Nitopat, 29 Hileb nejin Beana dri Nitopat, Ittai nejin Ribat jen Gibia ian ro nejin Benjamin, 30 Beneia juōn dri Paireton, Hiddai jen wea ko i Geash, 31 Ebai-albon dri Arbat, Azmevet dri Barhum, 32 Ilaiaba dri Shealbon, ro nejin Jeshen, Jonetan, 33 Shamma dri Herar, Ehaia nejin Sherar dri Arar, 34 Elipelet nejin Ahasbai, nejin dri Meakat, Ilaiam nejin Ehitopel dri Gilon, 35 Hezro dri Karmel, Perai dri Arb, 36 Igal nejin Netan jen Zoba, Benai dri Gad, 37 Zilek dri Amon, Neharai dri Bierot, ro rar inek ken tōrinae ko an Joab nejin Ziruaia, 38 Aira dri Itrai, Gereb dri Itrai, 39 Uraia dri Het: jilñoul jiljilimjuōn aolepeir.

24 A ¹e ar bar bwil illu an Jeova nae Israel, im E ar biuktōk Devid nae ir, im ba, Kwon bwini ro dri Israel im dri Juda. 2 Im kiñ eo e ar ba ñōn Joab, kapen jar in tōrinae eo, eo e ar ber iben, Kwon itoitōk ilo bwiljin ro bwijin Israel, jen Dan ñōn Bier-shiba, im komin bwini armij ro, bwe in jela oran armij ro. 3 Im Joab e ar ba ñōn kiñ eo, Kiō Jeova am Anij, en kobaik ñōn armij ro, jabrewōt orair kiō, alen jibuki; im mejen aō iroiñ kiñ ren loi; a etke aō iroiñ ej mōnōnō kin men in? 4 Ijoke, nan an kiñ eo e ar anjo jen Joab im jen kapen ro, iroiñ in jar in tōrinae. Im Joab im kapen ro an jar in tōrinae eo rar drioiñlok jen mejen kiñ eo, bwe ren bwini ro dri Israel. 5 Im rar elā jen Jordan, im rar kamp i Aroer, i anbij-marōñōn jikin kwelok eo ej ilujen komlōl in Gad, im ñōn Jezer: 6 inem rar itok ñōn Giliad, im ñōn enen Tattim-hodshai; im rar itok ñōn Danjean, im ilo belakin ñōn Saidon, 7 im rar itok ñōn me e kajur an Tair, im ñōn jikin kwelok ko otemjej an dri Hiv, im an ro dri Kenean; im rar driblok ñōn Juda irōk, i Bier-shiba. 8 Ein drein ke emwij air itoitōk ilujen aolepen eneo im rar itok ñōn Jerusalem e jemlok druatimjuōn aliñ im ruo

ran. 9 Im Joab e ar lelok ñōn kiñ eo oran armij ro e ar bwini ir: im ilo Israel dualitōk buki tausan ro re beran rar nure jāji; im man ro an Juda lai-lim buki tausan armij.

10 Im e bōklikōt Devid, elikin an bwini armij ro, im Devid e ar ba ñōn Jeova, Elap aō jerawiwi ilo men eo I ar kōmōne: a kiō, O Jeova, ij akwelap bwe Kwon jolok nana an dri kori-jerōm; bwe e kanuij bwebwe aō kōmōn. 11 Im ke Devid e ar jerkak ke ejiboñ, nan in Jeova e ar itok ñōn dri kanan Gad, eo dri lolo an Devid, im ba, 12 Kwon ilen konono ñōn Devid, Ein drein an Jeova ba, Ij kwalok men kein jilu: kwon kālet juōn iair, bwe In kōmōne ñōn yuk. 13 Inem Gad e ar itok ñōn iben Devid, im ken-nanek e, im ba ñōn e, Jiljilimjuōn yiō in ñita ren itok ñōn yuk ilo eneo am ke? ak kwon ko iomin jilu aliñ, iman ro dri kijirāte yuk, im rej lukworkwor yuk wōt ke? ak e naj jilu ran in mij ilo eneo am ke? inem kwon bebe kake, im kalomōnlokjen nan ōt in bōklok ñōn Eo e ar jilkinwoj iō. 14 Im Devid e ar ba ñōn Gad, I jaje kake: kiō jen buñ na ilo pein Jeova, bwe tiriamokake ko An relap; im in jab buñ ilo pein armij ro.

15 Ein drein ¹ Jeova e ar jilkinlok juōn mij ion Israel, jen jiboñ ñōn ien eo E ar konono kake; im ian armij ro rar mij jen Dan ñōn Bier-shiba jiljilimjuōnñoul tausan armij. 16 Im ke enjel eo e ar erlokwe pein ñōn Jerusalem bwe en kokkure, Jeova e ar ukwelok iben kin nana eo, im E ar ba ñōn enjel eo ej kokkure armij ro, E bwe; kiō, kwon drebij peōm. Im enjel ōn Jeova e ar ber iturin jikin dreñdreñ an Arauna dri Jibus. 17 Im Devid e ar konono ñōn Jeova ke e ar lo enjel eo e ar mōn armij ro, im ba, Lo, I ar jerawiwi, im I ar bōt; a jip rein ta eo rar kōmōne? ij kajitōk bwe peōm en nae iō, im nae nukin jema.

18 Im Gad e ar itok ran eo ñōn iben Devid, im ba ñōn e, Kwon wōn-liñlok im kalek juōn lokatok ñōn Jeova, ilo jikin dreñdreñ an Arauna dri

Jibus. 19 Im Devid e ar wōnliñlok, ekar ñōn nan an Gad, einwōt Jeova e ar jiroñ. 20 Im Arauna e ar reilok, im lo kiñ eo im ro dri korijeran ke rej itok ñōn iben: im Arauna e ar drioiñlok, im buñbero iman kiñ eo. 21 Im Arauna e ar ba, Etke aō iroiñ kiñ e ar itok ñōn iba korijeran? Im Devid e ar ba, In wiaik jikin drefñdreñ in jen kwe, bwe in kalek juōn lokatok ñōn Jeova, bwe En bōprae mij in jen armij ro. 22 Im Arauna e ar ba ñōn Devid, Aō iroiñ kiñ, en bōk im katok kin jabrewōt eo ej emōn iben: lo, ox ko ñōn men in katok kijeek, im ken drefñdreñ ko, im ine ko an ox ko ñōn kane: 23 men kein otemjej

Arauna ej lewoj ñōn kiñ. Im Arauna e ar ba ñōn kiñ eo, Jeova am Anij en wut buruen kin kwe. 24 Im kiñ eo e ar ba ñōn Arauna, Jab; a emol I naj wiaike jen kwe kin juōn wōnan; I jab kōnan katok kin men in katok kijeek ñōn Jeova aō Anij ñe I jab kōla. Ein drein Devid e ar wiaik jikin drefñdreñ eo, im ox ko, kin lim-ñoul shekel silver. 25 Im Devid e ar kalek juōn lokatok ñōn Jeova ijo, im e ar katok kin men in katok kijeek ko, im kin men in katok aine-mōn ko. ¹Ein drein emwij mirik Jeova kin eneo, im ar drebij mij eo jen Israel.

KIŊ RO

1 Ak Devid kiŋ e kanuij ridto im bwijwōlā; im rar kalibubu e kin koj ko, a e jab mǎnǎn. **2** Kin men in, ro dri korijeran rar ba ñōn e, Ren kabukot ñōn aō iroiŋ kiŋ, juōn virjin emōn drer: im en jutōk iman kiŋ, im lale; im en babu ilo ubōn bwe aō iroiŋ kiŋ en mǎnǎn. **3** Ein drein rar kabukot juōn jiroñ emōn ridtōn im edreo ilo aolepen enen Israel, im rar lo Abishag dri Shunem, im rar āñin-tok e ñōn iben kiŋ eo. **4** Im lio e kanuij dreo; im e ar lale kiŋ eo, im jerbāl ñōn e; a kiŋ eo e ar jab jela e.

5 Ilo ien eo ¹Adonaija nejin Hagit, e ar mōke koutiej e, im ba, I naj kiŋ: im ²e ar kapoj jariot ko, im dri uwe ion ors ko, im limñoul armij bwe ren etōr imanlok. **6** Im jemen e jañin kaillu e jabrewōt ien im ba, Etke ein drein am kōmōn? im e juōn armij e wulio; im e ar lotak elikin Absalom. **7** Im e ar bebe iben Joab nejin Ziruāia, im iben Ebaatar pris: im ilo air lor Adonaija, rar jibōñ e. **8** A Zedok pris, im Beneia nejin Jihoiada, im Netan dri kanan eo, im Shimeai, im Riai, im armij ro re kajur dron Devid, rar jab ber iben Adonaija. **9** Im Adonaija e ar mōn jip ko, im ox ko, im kiru ko re mātōk iturin dreka Zohilet, eo ej iturin En-rogel; im e ar kirtok ro jein im jātin otemjej, ro nejin kiŋ eo, im aolepen ro dri Juda, dron kiŋ eo: **10** a Netan dri kanan eo, im Beneia, im armij ro re kajur, im ³Solomon jātin, e ar jab kirtok ir.

11 Inem Netan e ar konono ñōn Bat-shiba jinen Solomon, im ba, Kwar jab roñ bwe Adonaija nejin Hagit ej kiŋ, im Devid ar iroiŋ e jab jela ke? **12** Inem ij akwelap ñōn yuk, in kwalok bebe ñōn yuk bwe kwon lomoren am

mour, im mour an Solomon leo nejōm. **13** Kwon ilen dreloñ ñōn iben kiŋ Devid, im kwon ba ñōn e, Aō iroiŋ, O kiŋ, kwar jab kanōjniŋ ñōn ña korijerōm, im ba, ¹Emol Solomon nejōm e naj kiŋ elikiō, im e naj jijōt ion tron eo aō ke? inem etke Adonaija ej kiŋ? **14** Lo, ñe kwoj konono wōt iben kiŋ eo, I naj bareinwōt dreloñwoj, im I naj kamol am in nan.

15 Im Bat-shiba e ar dreloñlok ñōn iben kiŋ eo, ilo rum eo: im kiŋ e bwijwōlā; im Abishag dri Shunem e ar lale kiŋ eo. **16** Im Bat-shiba e ar barikrik, im aber ñōn kiŋ eo. Im kiŋ e ar ba, Ta eo kwoj kōnan? **17** Im e ar ba ñōn e, Aō iroiŋ, kwar kanōjniŋ kin Jeova am Anij ñōn ña korijerōm, im ba, Emol Solomon nejōm e naj kiŋ elikiō, im e naj jijōt ion tron eo aō. **18** Im kiō, lo, Adonaija ej kiŋ; im kwe, aō iroiŋ kiŋ, kwo jaje kake: **19** im e ar mōn ox ko, im kiru ko re mātōk, im jip ko relōñ, im e ar kirtok ro otemjej nukin kiŋ, im Ebaatar pris, im Joab kapen an jar in tōrinae; ak e ar jab kirtok Solomon korijerōm. **20** Im kwe, aō iroiŋ kiŋ, mejen dri Israel rej ñōn kwe, bwe kwon kennanek ir wōn eo e naj jijōt ion tron eo an aō iroiŋ, im binej jenkwōm. **21** Elañe ein juōn, ñe aō iroiŋ kiŋ ej kiki iben ro jiman, ña im nejiō Solomon, re naj watōk kim dri bwir.

22 Im lo, ke ej konono iben kiŋ eo, Netan dri kanan e ar dreloñtok. **23** Im rar kennanek kiŋ eo, im ba, Lo, Netan dri kanan. Im ke e ar dreloñtok iman kiŋ eo, e ar buñbero iman kiŋ eo. **24** Im Netan e ar ba, Aō iroiŋ, O kiŋ, kwar ba ke, Adonaija e naj kiŋ elikiō, im e naj jijōt ion tron eo aō? **25** Bwe e ar wōnlōllok ranin, im e ar mōn ox ko, im kiru ko re mā-

tōk, im jip ko relōn, im e ar kirtok ro otemjej nejin kiñ eo, im kapen ro an jar in tōrinae, im Ebaiatar pris; im lo, rej mōña im irak, im ba, En mour Adonaija. 26 A ña, aet ña korijerōm, im Zedok pris eo, im Beneia nejin Jihoiada, im korijerōm Solomon, e ar jab kirtok kim. 27 Rar kōmōn men in kin aō iroiñ kiñ, im kwar jab kwalok ñōn kim korijerōm wōn eo e naj jijōt ion tron eo an aō iroiñ kiñ elikin De?

28 Inem kiñ Devid e ar uak im ba, Kwon kirtok Bat-shiba. Im e ar itok ñōn iben kiñ eo, im jutōk iman. 29 Im kiñ eo e ar kanōjniñ im ba, Einwōt Jeova e mour, Eo e ar lomoren aō jen jorran, 30 emol, einwōt I ar kanōjniñ ñōn yuk kin Jeova, Anij in Israel, im ba, Emol Solomon nejōm e naj kiñ elikiō, im e naj jijōt ion tron eo aō, im binej jenkwōa, emol ein drein I naj kōmōn ranin. 31 Inem Bat-shiba e ar buñbero, im aber ñōn kiñ eo, im ba, Aō iroiñ kiñ Devid en mour ñōn in drio.

32 Inem kiñ Devid e ar ba, Kwon kirtok Zedok pris eo, im Netan dri kanan, im Beneia nejin Jihoiada. Im rar itok ñōn iman kiñ eo. 33 Im kiñ e ar ba ñōn ir, Komin āninlok ibemilok ro dron ami iroiñ, im kōmōn bwe Solomon nejō en uwe ion mul eo aō, im āninlok e ñōn Gaihon: 34 im Zedok pris eo, im Netan dri kanan ren kabit e ijo kiñ in Israel; im komin jilil im ba, En mour kiñ Solomon. 35 Inem komin wōnliñtok im lore, im e naj itok im jijōt ion tron eo aō; bwe e naj kiñ im binej jenkwōa; im I ar kālet e iroiñ ion Israel im Juda. 36 Im Beneia nejin Jihoiada e ar uak kiñ eo im ba, Amen: Jeova, Anij an aō iroiñ kiñ, en ein drein An ba bareinwōt. 37 Einwōt Jeova e ar ber iben aō iroiñ kiñ, ein drein En ber iben Solomon, im kalaplok tron eo an jen tron eo an aō iroiñ kiñ Devid.

38 Inem Zedok pris eo, im Netan dri kanan, im Beneia nejin Jihoiada, im ro dri Kiret im ro dri Pilet, rar wōnlōllok, im rar likit bwe Solomon

en uwe ion mul eo an kiñ Devid, im rar āninlok e ñōn Gaihon. 39 Im Zedok pris eo, e ar bōk drun in oil eo jen iloan imōn kabir eo, im e arkabit Solomon. Im rar jilil; im armij otemjej rar ba, En mour kiñ Solomon. 40 Im armij otemjej rar wōnliñtok im lore, im armij rar kajōñjōñ kin paip ko, im rar lōñliñ kin mōnōnō elap, inem lōl e ar bañijñij kin ainikeir.

41 Im Adonaija, im ro otemjej e ar jiroñ ir rar roñjake ke ej kab mwij air mōña. Im ke Joab e ar roñ ainiken jilil eo, e ar ba, Ewi unin keroro in im jikin kwelok ej iruij bata? 42 Ke ej konono wōt, lo, Jonetan nejin Ebaiatar pris, e ar itok: im Adonaija e ar ba, Kwon dreloñtok; bwe kwe armij emōn, im kwoj bōktok nan emōn. 43 Im Jonetan e ar uak im ba ñōn Adonaija, Emol ar iroiñ kiñ Devid e ar kairoij Solomon kiñ: 44 im kiñ eo e ar jilkinlok ibenlok Zedok pris eo, im Netan dri kanan, im Beneia nejin Jihoiada, im ro dri Kiret, im ro dri Pilet; im rar kōmōn bwe en uwe ion mul eo an kiñ eo; 45 im Zedok pris eo, im Netan dri kanan rar kabit e kiñ i Gaihon; im rej wōnliñtok jen ijo kin lōñliñ, bwe jikin kwelok ej bañijñij. Eñin ainiken eo kom ar roñjake. 46 Im bareinwōt Solomon ej jijōt ion tron eo an ailiñ in. 47 Im bar juōn, ro dron kiñ eo rar iten kejerammōn ar iroiñ kiñ Devid, im ba, Am Anij en kōmōn bwe en mejajalok etan Solomon jen etōm, im koutiejlok tron eo an jen tron eo am: im kiñ eo e ar jirlok ion aowej eo an. 48 Im bareinwōt ein drein kiñ eo ej ba, Emōnōnō Anij in Israel, eo e ar letok juōn bwe en jijōt ion tron eo aō ranin, im meja rar loe.

49 Im ro otemjej Adonaija e ar jiroñ ir re mijōk, im rej jutōk, im kajulok air ial. 50 Im Adonaija e mijōk Solomon; im e ar jutōk, im ilok, im jibwe drunen lokatok eo. 51 Im rar kennanek Solomon, im ba, Adonaija e mijōk kiñ Solomon; bwe, lo, ej drebij drunen lokatok eo, im e ba, Kiñ Solomon en kanōjniñ ñōn iō mokta bwe e jamin mōn ña korijeran kin

jāji. 52 Im Solomon e ba, Elaŋe ej mōke kwalok e juōn armij e tellokōn, ejelok juōn kolan bōran e naj wutlok nōn lōl; a elaŋe rej lo nana iben, e naj mij. 53 Ein drein kiŋ Solomon e ar jiliklok, im rar āñinlōltok e jen lokatōk eo. Im e ar iten aber nōn kiŋ Solomon; im Solomon e ba nōn e, Kwon ilok nōn mweo imōm.

2 Ak ¹ran in mij an Devid ebak-tok; im e ar jiroñ Solomon nejin, im e ba, 2 Ij ilok ilo ial an ro otemjej dri lōl: inem kwon kajur, im kwalok yuk juōn eman; 3 im kwon kejbārok nan in jiroñ an Jeova am Anij, bwe kwon etal ilo ial ko An, im bokake kien ko an, im nan in kaiñi kc An, im nan in jiroñ ko An, im nan in kennan ko An, ekar nōn men ko ar je ilo kien Moses, bwe kwon jerammōn ilo men ko otemjej kwoj kōmōni, im ijoko jabrewōt kwoj oktōk nōn e; 4 bwe Jeova en kamol nan eo E ar konono kin nā, im ba, Elaŋe ro nejōm rej lale ial eo air, bwe ren etal imaō kin aolepen burueir, im aolepen air, kwo jamin aikwij juōn eman ion tron in Israel, (E ar ba). 5 Bareinwōt kwo jela ta Joab ²nejin Ziruaia e ar kōmōn nōn iō, aet, ta eo e ar kōmōn nōn kapen ro ruo an jar in tōrinae an Israel, nōn Abner nejin Ner, im nōn Amasa nejin Jiter, ro e ar mōn ir, im katorlok bōtōktōk in tōrinae ilo ien ainemōn, im likit bōtōktōk in tōrinae ion kōñōr eo e ar lukwoj ibin, im ilo juj ko rej ber i neen. 6 Kwon kōmōn ekar nōn am meletlet, im bōran e bwiljere en jab wōnlōllok nōn Hedis ilo ainemōn. 7 A kwon ³kwalok joij nōn ro nejin Barzilai dri Giliad, im ren jet ian ro rej mōña ilo tebel eo am; bwe ein drein rar itok nōn iba ke I ar ko jen Absalom jeōm. 8 Im, lo, ibōm Shimeai nejin Gira, dri Benjamin an Behurim, eo e ar kebele iō kin jerata e kanuij bin ke I ar ilok nōn Mehaneim; a e ar iten wōnmae iō i Jordan, im I ar kanōjnij nōn e kin Jeova, im ba, I jamin mōn yuk kin jāji. 9 Inem kwon jab likit e ejelok ruōn, bwe kwe dri meletlet;

im kwo naj jela men eo ekar bwe kwon kōmōn nōn e, im kwo naj āñinlok bōran e bwiljere nōn Hedis ilo bōtōktōk.

10 Im ¹Devid e ar kiki iben ro jiman, im rar kalibwin e ilo jikin kwelok an Devid. 11 Im ran ko Devid e ar kiŋ ion Israel eñoul yiō. ²jil-jilimjuōn yiō e ar kiŋ i Hibron, im jilñoul jilu yiō e ar kiŋ i Jerusalem. 12 Im Solomon e ar jijōt ion tron an Devid jemen; im ar kanuij kabin ailiñ eo an.

13 Ien eo Adonaija nejin Hagit e ar itok nōn iben Bat-shiba, jinen Solomon. Im lio e ar ba, Kwoj itok ilo ainemōn ke? Im e ar ba, Ilo ainemōn. 14 Leo e ar ba bareinwōt, Eor iba I kōnan konono ibōm. Im lio e ar ba, Kwon konono wōt. 15 Im e ar ba, Kwo jela bwe ailiñ eo e kar aō, im dri Israel otemjej rar reitok nōn iō, bwe in kiŋ: ijoke, emwij ukōt ailiñ eo, im an jatiō; bwe an jen Jeova. 16 Im kiō ij kajitōk ibōm juōn nan; lale kwar ba jab. Im lio e ar ba nōn e, Kwon ba wōt. 17 Im e ar ba, Ij akwelap bwe kwon konono nōn Solomon kiŋ eo, (bwe e jamin ba jab nōn yuk), bwe ³en letok Abishag dri Shunem beliō. 18 Im Bat-shiba e ar ba, Eokwe, I naj konono kin kwe nōn kiŋ eo.

19 Inem Bat-shiba e ar ilok nōn iben Solomon kiŋ, bwe en konono iben kin Adonaija. Im kiŋ e ar jutōk bwe en wōnmae e, im barikrik jen e, im jijōt ion tron eo an, im kōmōn bwe ren bōktok juōn tron nōn jinen kiŋ eo; im lio e ar jijōt i anbijmaroñōn. 20 Inem lio e ar ba, Juōn aō kajitōk erik ibōm; kwon jab abwin iō. Im e ar ba, Kwon kajitōk wōt jinō; bwe I jamin karmijete yuk. 21 Im lio e ar ba, Ren lelok Abishag dri Shunem nōn Adonaija jeōm bwe en belen. 22 Im kiŋ Solomon e ar uak im ba nōn jinen, Im etke kwoj kajitōk kin Abishag dri Shunem nōn Adonaija? kwon kajitōk nōn e ailiñ in bareinwōt; bwe e jeiō, aet, nōn e im nōn Ebaia-tar pris, im nōn Joab nejin Ziruaia

23 Inem kiñ Solomon e ar kanōjnij kin Jeova, im ba, En ein drein an Anij kōmōn nōn iō, im kalaplok, elañe Adonaija e ar jab konono nan in nae an mour. 24 Inem einwōt Jeova e mour, Eo e ar kabit iō, im kajijōt iō ion tron an Devid jema, im Eo e ar kōmōn nōn iō juōn im einwōt E ar kalimur kake, emol re naj mōn Adonaija ranin. 25 Im kiñ Solomon e ar jiliklok kin Beneia, nejin Jihoiada; im e ar mōn e, bwe en mij.

26 Im kiñ e ar ba nōn Ebaiatar pris, Kwon ilok nōn Anatot, nōn jikin kallip ko am; bwe drien mij kwe: a I jamin mōn yuk ien in, kin ke kwar ineklok dipdip an Iroi Jeova iman Devid jema, im kin ke kwar jorran ilo jabrewōt einwōt jema e ar jorran. 27 Ein drein Solomon e ar jolok Ebaiatar jen an pris nōn Jeova, bwe en kamol nan jen Jeova, eo E ar konono kin ro nukin Ilai i Shailo.

28 Im nan kin men in e ar itok nōn Joab; bwe Joab e ar oktōk nōn Adonaija, meñe e ar jab oktōk nōn Absalom. Im Joab e ar ko nōn Mweo imōn Jeova, im e ar kapjere drunen lokatok eo. 29 Im rar kennanek kiñ Solomon, Joab e ar ko nōn Mweo imōn Jeova, im lo, ej ber iturin lokatok eo. Inem Solomon e ar jilkinlok Beneia nejin Jihoiada, im ba, Kwon ilem mōn e. 30 Im Beneia e ar itok nōn Mweo imōn Jeova, im e ba nōn e, Ein drein kiñ eo ej ba, Kwon drioijsok. Im e ar ba, Jab; a I naj mij iji. Im Beneia e ar bar kennanek kiñ eo, im ba, Ein drein an Joab ba, im ein drein an uak iō. 31 Im kiñ eo e ar ba nōn e, Kwon kōmōn nōn e einwōt an in nan, im kalibwin e; bwe kwon kamo kini iben Joab kin bōtōktōk eo e ar katorlok im ejelok unin, jen ña im jen nukin jema. 32 Im Jeova e naj kajeblak ion bōran bōtōktōk eo an, bwe e ar mōn ruo armij re wāppen im remōn jen e, im mōn ir kin mejen jāji, im jema Devid e ar jaje kake, Abner nejin Ner, kapen jar an tōrinae in Israel, im Amasa nejin Jiter, kapen jar an tōrinae in Juda. 33 Ein drein bōtōktōk ir e naj jeblak

ion bōran Joab, im ion bōran ro inen nōn in drio: a nōn Devid, im nōn ro inen, im nōn mweo imōn, im nōn tron eo an, e naj ainemōn in drio jen Jeova. 34 Inem Beneia nejin Jihoiada e ar wōnliñlok, im mōn e; im ar kalibwin e ilo mweo imōn i ene jemaren. 35 Im kiñ eo e ar likit Beneia nejin Jihoiada, bwe en binej jenkwōn ion jar in tōrinae; im kiñ e ar kōmōn bwe Zedok pris eo en binej jenkwōn Ebaiatar.

36 Im kiñ eo e ar jiliklok im kirtok Shimeai, im ba nōn e, Kwon kalek nōn yuk juōn im i Jerusalem, im kwon jokwe ie, im kwon jab drioijsok nōn jirik. 37 Bwe ran eo ñe kwoj drioijsok, im elā jen wea Kidron, kwon kanuij jela bwe kwo naj mij: bōtōktōkōm e naj ion bōrōm. 38 Im Shimeai e ar ba nōn kiñ eo, Emōn nan in: einwōt aō iroi kiñ e ar ba, ein drein ña korijerōm I naj kōmōne. Im Shimeai e ar jokwe i Jerusalem elōñ ran.

39 Im elikin jilu yiō, ruo ian dri korijeran Shimeai rar kolok nōn iben Ekish, nejin Meaka, kiñ in Gat. Im rar kennanek Shimeai, im ba, Lo, ro dri korijerōm rej ber i Gat. 40 Im Shimeai e ar jutōk, im kapoj ass eo an, im ilok nōn Gat, nōn iben Ekish, bwe en kabukot lōmaro dri korijeran; im Shimeai e ar ilok, im añintok ro dri korijeran jen Gat. 41 Im rar kennanek Solomon bwe Shimeai e ar ilok jen Jerusalem nōn Gat, im e ar bar itok. 42 Im kiñ eo e ar jiliklok im kirtok Shimeai, im ba nōn e, Ña I ar jab kanōjnij nōn yuk kin Jeova, im kabin aō in nan nōn yuk ke, im ba, Kwon kanuij jela bwe ilo ran eo kwoj drioijsok im etal ijoko jabrewōt, emol kwo naj mij? im kwar ba nōn iō, Emōn aō roñjake nan ko. 43 Inem etke kwar jab kejbārok kanōjnij eo kin Jeova, im kien eo I ar jiroñ yuk kake? 44 Bareinwōt kiñ eo e ar ba nōn Shimeai, Kwo jela aolepen nana ej ber ilo buruōm, ta eo kwar kōmōne nōn Devid: kin men in Jeova e naj kajeblak am nana ion bōrōm.

45 A kiñ Solomon e naj jerammōn, im naj kabin tron an Devid iman Jeova nōn in drio. 46 Ein drein kiñ eo e ar jiroñ Beneia nejin Jihoiada; im e ar drioijlok, im mōn e, inem e mij. Im emwij kabin ailiñ eo ilo pein Solomon.

3 Im Solomon e ar ¹kōmōn bujen iben Pero kiñ in Ijipt, im e ar bōk lio nejin Pero bwe en belen, im āñintok e iloan jikin kwelok an Devid, mae ien an kamwijlok an kalek mweo imōn, im imōn Jeova, im worwor an Jerusalem i belakin. 2 Men in wōt, armij rar katok ilo jikin ko re utiej, kin ke ejelok im emwij kalek e nōn etan Jeova nōn ran ko. 3 Im Solomon e ar yokwe Jeova, im e ar etetal ilo kien ko an Devid jemen: men in wōt, e ar katok im kōkaijurjur ilo jikin ko re utiej.

4 Im kiñ eo e ar ilok nōn Gibeon bwe en katok ijo: bwe e jikin e utiej im buñbuñ: juōn tausan men in katok kijeek Solomon e ar katok kake ion lokatok eo. 5 I Gibeon Jeova e ar weaktok nōn Solomon ilo juōn tōnak ilo boñ; im Anij e ar ba, Kwon kajitōk ta I naj lewoj. 6 Im Solomon e ar ba, Kwar kwalok nōn korijerōm Devid joiy elap, ekar nōn an etetal imam ilo mol, im ilo wānik, im ilo buru e jime ibōm; im Kwar kejbārok nōn e joiy in elap, im Kwar lelok nōn e juōn nejin bwe en jijōt ion tron eo an, einwōt ranin. 7 Inem kiō, O Jeova aō Anij, Kwar kairoi jō dri korijerōm kiñ, bwe in binej jenkwōn Devid jema: im ña ij ajiri jeraō; I jab jela ekijkan aō drioij drelōñ. 8 Im ña korijerōm ij i bwiljin dri ailiñ ro Am, ro Kwar kālet ir, juōn ailiñ elap, re ban bwini ak lo oran kin air lōñ. 9 Inem Kwon letok nōn ña korijerōm buru e jelalokjen bwe in ekajet dri ailiñ ro Am, bwe in maroñ kili emōn im nana; bwe wōn eo e maroñ in ekajet ailiñ in Am elap?

10 Im nan eo e ar kabuñburuen Iroi j, bwe Solomon e ar kajitōk men in. 11 Im Anij e ar ba nōn e, Kin am kar kajitōk men in, im kwar jab

kajitōk nōn yuk mour e aitok, ak mweiu k ko nōn yuk, ak bwe ro dri kiji rāte yuk ren mij, a kwar kajitōk nōn yuk jelalokjen bwe kwon kile wānik; 12 lo, emwij Aō kōmōn ekar nōn am in nan; lo, I ar lewoj buru e meletlet im jelalokjen; ein drein mokta jen yuk ejelok einwōt kwe, im elikōm, e naj walok ejelok im einwōt kwe. 13 Im bareinwōt I ar lewoj men ko kwar jab kajitōk kake, mweiu k im ñiājo, ein drein e naj ejelok ian kiñ ro einwōt kwe, aolepen ran ko am. 14 Im elañe kwoj etetal ilo ial ko Aō, bwe kwon bokake kien ko im nan in kaiñi ko Aō, einwōt jemōm Devid e kin etetal, inem I naj kaitoklok ran ko am. 15 Im Solomon e ar ruj; im, lo, e juōn tōnak: im e ar itok nōn Jerusalem, im e ar katok kin men in katok ainemōn ko, im e ar kōmōn kwojkwoj nōn aolepen ro dron.

16 Ien eo ruo kōra, rekijoñ, rar itok nōn iben kiñ eo, im rej jutōk iman. 17 Im lio juōn e ar ba, O, aō iroi j, ña im kōra in kimij jokwe ilo juōn wōt im; im I ar keutak juōn niñniñ iben iloan mweo. 18 Im jilu ran elikin aō keutak, kōra in e ar bareinwōt keutak; ejelok bar juōn ibemro iloan mweo: kimro wōt. 19 Im niñniñ eo nejin kōra in e mij ilo boñ, kin an jone. 20 Inem e ar jerkak ilukwōn boñ eo, im e ar bōk ladrik eo nejiō jen ituriō, ke ña korijerōm I ar kiki, im e ar likit e ilo ubōn, im e ar likit niñniñ eo nejin e mij ilo ubō. 21 Im ke I ar jerkak ilo jiboñ bwe in kinnin niñniñ eo nejiō, lo, e mij; a ke I ar kalimjeke ilo jiboñ, lo, e jab ladrik eo nejiō, eo I ar keutak e. 22 Im lio juōn e ar ba, Jab; a eo e mour ladrik eo nejiō, im eo e mij ladrik eo nejōm. Im eo juōn e ar ba, Jab; a ladrik eo e mij nejōm, im ladrik eo e mour nejiō. Ein drein air ba iman kiñ eo.

23 Inem kiñ eo e ar ba, Juōn ej ba, Eñin nejiō ladrik eo e mour, im nejōm ladrik eo e mij: im eo juōn ej ba, Jab; a nejōm ladrik eo e mij, im nejiō ladrik eo e mour. 24 Im kiñ eo ej ba, Komin bōktok juōn jāji. Inem

rar bōktok juōn jāji iman kiñ eo. 25 Im kiñ eo e ba, Komin karājete niñ-niñ eo e mour, im lelok juōn mōtōn nōn juōn, im juōn mōtōn nōn eo juōn. 26 Im kōra eo jinen niñniñ eo e mour, e ar konono nōn kiñ eo, bwe buruen e tokokok kin ladrik eo nejin, im e ar ba, O, aō iroi, kwon lelok nōn lio niñniñ eo e mour, im lale kwar mōn e nōn jirik. A eo juōn e ar ba, E jamin nejerro otemjej; komin karājete. 27 Inem kiñ eo e ar uak im ba, komin lelok nōn lio niñniñ e mour, im jab mōn e nōn jirik: eo jinen ne. 28 Im dri Israel otemjej rar roñjake ekajet eo kiñ e ar ekajet kake: im rar mijōk kiñ eo: bwe rar lo bwe meletlet an Anij ej iben, bwe en kōmōn wānik.

4 Im kiñ Solomon e ar iroi ion aolepen Israel. 2 Im rein iroi ro iben, Azeraia nejin Zedok pris eo; 3 Elaihorep im Ehaija, ro nejin Shasha, ro dri jeje; Jihoshapat nejin Ehailud, dri jeje bwebwenato ko; 4 im Beneia nejin Jihoiada ej ion jar in tōrinae; im Zedok im Ebaatar pris ro; 5 im Azeraia nejin Netan ej ion dri kabwijrok ro; im Zebud nejin Netan ej dri jibōn e utiejtata, im jeran kiñ eo; 6 im Ehaishar ej ion ro dri mweo imōn; im Adonairam nejin Abda ej ion ro dri jermal.

7 Im iben Solomon joñoul ruo dri kabwijrok ion aolepen Israel, ro rej ekōn nōn kiñ eo im ro nukin: kwanan juōn iair ainitok kijeir ilo juōn aliñ ilo yiō eo. 8 Im rein etair: Ben-hur, ilo ene utiej in Ipreim; 9 Ben-deker, ilo Mekaz, im ilo Shalbim, im Betshimesh, im Ilon-bet-henan; 10 Benhised, ilo Arubot, (ilo Soko, im aolepen ene Hiper); 11 Ben-abinedab, ilo aolepen ene eutiej Dor, (Tepat lio nejin Solomon belen); 12 Beana nejin Ehailud, ilo Teanak im Megido, im aolepen Bet-shian eo ej iturin Zaretan, iomin Jezriel, jen Bet-shian nōn Ebel-mihola, nōn ijo etolok jen Jokmiam; 13 Ben-giber, ilo Remot-giliad (im ijo kwanan jikin kwelok an Jeir nejin Menassa, ko ilo Giliad; aet ene Argob, eo ej i Beshan, jiljino-

ñoul jikin kwelok ko relap im eor air worwor im alal jinibōrōrō); 14 Ehinedab nejin Iddo, ilo Mehaneim; 15 Ehimeaz, ilo Naptalai, (e bareinwōt ar bōk Besimat lio nejin Solomon belen); 16 Beana nejin Hushai, ilo Asher im Bielot; 17 Jihoshapat nejin Parua, ilo Issakar; 18 Shimeai nejin Ila, ilo Benjamin; 19 Giber nejin Urai, ilo ene Giliad, enen Saihon kiñ an dri Amor, im an Og kiñ in Beshan; im e juōn wōt dri kabwijrōk ilo eneo.

20 Im dri Juda im Israel relōn einwōt bok i barijit kin orair, im rar mōña im irak im mōnōnō kake. 21 Im Solomon e ar kiñ ion ailiñ ko otemjej jen River eo nōn enen dri Pilistia, im nōn tōreran Ijpt; rar owōjlok, im jermal nōn Solomon ran otemjej in an mour. 22 Im ekōn ko an Solomon ilo juōn ran, jilñoul joñōn flauo kwerik, im jiljinoñoul joñōn flauo kwelip, 23 joñoul ox remātōk, im roñoul ox jen melaj ko, im jibuki sip, im bareinwōt hart ko, im gezel ko, im roebōk ko, im bao ko remātōk. 24 Bwe e ar kiñ ion aolepen ene nōn River eo, jen Tip-sa nōn Geza, ion kiñ ro otemjej jen River eo im itok: im eor an ainemōn ilo tōreran ko otemjej iturin. 25 Im dri Juda im Israel rar jokwe im jab uota, jabrewōt armij iomin vain im wijki fig eo an, jen Dan nōn Bier-shiba, ran ko otemjej an Solomon. 26 Im iben Solomon eñoul tausan jikin ors nōn jariot ko an, im joñoul ruo tausan dri uwe ion ors. 27 Im dri kabwijrōk rein rar aini ekōn nōn kiñ Solomon, im nōn ro otemjej rar itok nōn tebel an Solomon, ejeju wōt air aliñ; rar lale bwe ejelok an aikwij. 28 Rar bōktok barli bareinwōt im kã an ors ko, nōn jikin eo ro dri kabwijrōk rar ber ie, jabrewōt armij ekar nōn kwanan.

29 Im Anij e ar lelok nōn Solomon meletlet im jelalokjen e kanuij lap im buruen elap, einwōt bok eo i barijit. 30 Im meletlet an Solomon elap jen meletlet an aolepen ro nejin dri rear otemjej, im jen aolepen meletlet an Ijpt. 31 Bwe e ar meletlet jen armij otemjej; jen Itan dri Ezra, im

Himan, im Kalkol, im Darda, ro nejin Mehol: im buñbuñ kin e ej ber ilo aliñ ko otemjej iturin. 32 Im e ar ba jilu tausan jabōn kennan; im al ko an juōn tausan im lailim. 33 Im e ar konono kin wijki ko, jen wijki aik eo i Lebanon nōn hissōp eo ej edrek jen worwor: e ar bareinwōt konono kin kiru ko, im kin bao ko, im kin men ko re tōbōlbōl, im kin iik ko. 34 Im rar itok armij jen aliñ otemjej bwe ren roñjake meletlet an Solomon, jen kiñ ro otemjej ilo lōl, ro rar roñ kin meletlet eo an.

5 Im¹ Hiram kiñ in Tair e ar jilkinlok ro dri korijeran nōn iben Solomon: bwe e ar roñjake bwe rar kabit e kiñ in binej jenkwōn jemen: bwe Hiram e kin yokwe Devid ien otemjej. 2 Im Solomon e ar jiliklok nōn Hiram, im ba, 3 Kwo jela ekijkan Devid, jema, e ban kalek juōn im nōn etan Jeova an Anij, kin tōrinae ko rar kabol e, mae ien Jeova e ar likiti iomin lobiren neen. 4 A kiō Jeova aō Anij e ar letok kakije ijoko otemjej ituriō; ejelok dri kijirāt ak nana ej walok. 5 Im lo, ij lemnok bwe in kalek juōn im nōn etan Jeova, aō Anij, einwōt Jeova e ar konono nōn Devid jema, im ba, Nejōm man eo I naj likit e ion tron eo am bwe en binej jenkwōm, e naj kalek mweo nōn eta. 6 Inem kwon jiroñ bwe ren jekjek nōn iō wijki aik jen Lebanon; im ro dri korijera re naj ber iben ro dri korijerōm; im I naj lewoj wōnan jerbal kin ro dri korijerōm ekar nōn men otemjej kwo naj ba kake: bwe kwo jela ejelok juōn iamuij e jela jekjek wijki einwōt dri Saidon.

7 Im ke Hiram e ar roñjake nan ko an Solomon, e kanuij mōnōnō, im e ba, Emōnōnō wōt Jeova ranin, Eo e ar lelok nōn Devid juōn nejin e meletlet ion armij rein relōñ. 8 Im Hiram e ar jiliklok nōn Solomon, im ba, Emwij aō roñ nan eo kwar jilkinlok nōn iba: I naj kōmōn aolepen am kōnan kin wijki aik, im kin wijki fōr. 9 Ro dri korijera re naj bōkilok jen Lebanon nōn lojit; im I naj kōmōni

ilo tōra in wijki ko bwe ren aiki nōn jikin eo kwo naj ba nōn iō, im I naj jelati ijo, im kwo naj bōki; im kwo naj kōmōn men eo I kōnan kin am letok ekōn nōn ro dri mweo imō. 10 Ein drein Hiram e ar lelok nōn Solomon wijki aik im wijki fōr ekar nōn aolepen an kōnan. 11 Im Solomon e ar lelok nōn Hiram roñoul tausan joñōk in wit, kijen ro dri mweo imōn, im roñoul joñōk in oil erreo: ein drein Solomon e ar lelok nōn Hiram, yiō ko otemjej. 12 Im Jeova e ar lelok nōn Solomon meletlet, einwōt E ar kalimur nōn e; im eor ainemōn ikōtan Hiram im Solomon; im irro rar kōmōn juōn bujen iben dron.

13 Im kiñ Solomon e ar kokweloktok jar an dri jerbal jen aolepen Israel; im jar eo jilñoul tausan eman. 14 Im e ar jilkinlok ir nōn Lebanon, joñoul tausan ilo juōn aliñ ilo lajrōk; juōn aliñ rar ber i Lebanon, im ruo aliñ rar ber i kabujukneir: Adonairam e ar iroi ion ro dri jerbal. 15 Im¹ iben kiñ Solomon jiljilimjuōnñoul tausan dri inene, im dualitōkñoul tausan dri jekjek ion tol ko; 16 bareinwōt ro dri kabwijrōk reutiej an Solomon rar lale jerbal eo, jilu tausan jilu buki, rar iroi ion ro rej kōmōn jerbal eo. 17 Im kiñ e ar jiroñ, inem rar jekjek dreka ko relap, im elap wōnair, nōn kōmōn loñtōn mweo kin dreka jekjek. 18 Im ro dri kalek an Solomon, im ro dri kalek an Hiram, im ro dri Gibal rar jeki, im rar kapoji wijki im dreka ko nōn kalek mweo.

6 Im ilo² yiō eo ken ka ābuki drualitōkñoul elikin an ro nejin Israel drioiytok jen ene Ijpt, ilo yiō eo ken kemen an Solomon kiñ ion Israel, ilo aliñ Ziv, aliñ eo ken ka ruo, e ar jino an kalek mweo imōn Jeova. 2 Im mweo Solomon e ar kalek e nōn Jeova, aitokōn jiljinoñoul kubit, im drilpen roñoul kubit, im utiej jilñoul kubit. 3 Im portiko eo iman tempel an mweo, aitokōn roñoul kubit ekar nōn drilpen mweo; im dril-

pen joñoul kubit iman mweo. 4 Im ññon mweo e ar kōmōnmōn windo ko kin kājōjō rebin. 5 Im ññon turin mweo e ar kōmōn bōdti ko rej kabol e, ññon turin ko turin mweo, aet tempel eo kab jikin kwojarjar otem kwojarjar; im e ar kōmōn bo ko iturin i belakin. 6 Bōdti eo etātata drilpen lailim kubit, eo iolapin drilpen jiljino kubit, im eo ken ka jilu, jiljilimjuōn kubit drilpen; bwe elikin e ar kōmōn beninōt ko ilo turin mweo bwe alal ko ren jab kij worwor in mweo. 7 Im mweo, ke rar kōmōne, ar karōk e jen dreka, ko rar kapoji ijo rar kōbiji ie, im rar jab roñ ainiken hammer ak ilil, ak jabrewōt ken jerbal māl, i mweo, ien air kalek e. 8 Aur in bo ko iolap e ar ber i anbijmaroññon mweo: im rar wōnliñlok kin ken uwe ko ardrebolul ññon bōdti iolap, im jen eo iolap ññon eo ken ka jilu. 9 Ein drein e ar kalek mweo im kamwijlok e; im e ar kalibubu mweo kin alal ko im rā aik. 10 Im e ar kalek bōdti ko ññon aolepen mweo, utiejen jabrewōt iair lailim kubit: im rar ber ion mweo kin alal aik ko.

11 Im nan jen Jeova e ar itok ññon Solomon, im ba, 12 Kin mweo kwoj kalek e, ¹elañe kwoj etetal ilo nan in kaiñi ko Aō, im bokake kabuñjar ko Aō, im kejbārok aolepen kien ko Aō bwe kwon etal ie; inem I naj kabin Aō in nan ibōm, eo I ar konono ññon Devid jemōm. 13 Im I naj jokwe iben ro nejin Israel, im I jamin illok jen Aō ailiñ Israel.

14 ²Ein drein Solomon e ar kalek mweo im kamwij e. 15 Im e ar kōmōnmōn turin mweo iloan jen rā aik ko: jen lōl ññon ion mweo, e ar aniloaik kin rā, im e ar kōmōn eran mweo kin rā fōr. 16 Im e ar kalek roñoul kubit in mweo elikin kin rā aik jen lōl ññon ion: e ar kaleke ññon mweo iloan, bwe en juōn bwinimjar, aet jikin kwojarjar otem kwojarjar. 17 Im mweo, eñin tempel, eo iman jikin eo e kwojarjar otem kwojarjar, aitokōn eñoul kubit. 18 Im eor aik iloan mweo, emwij bukwe kwolliñ ni ko, im

inōk ko rebul: aik wōt; ejelok dreka e ar walok. 19 Im e ar kōmōnmōn juōn bwinimjar iloan mweo, bwe en likit dipdip in kalimur an Jeova. 20 Im ilo bwinimjar eo, aitokōn roñoul kubit, im drilpen roñoul kubit, im utiejen roñoul kubit; im e ar nakilin kin gold erre: im e ar nakilin lokatok eo kōmōne jen aik. 21 Ein drein Solomon e ar nakilin mweo iloan kin gold erre: im e ar kōnōke to ninir gold iman bwinimjar eo; im e ar nakilin e kin gold. 22 Im e ar nakilin aolepen mweo kin gold, mae ien kamwij e: bareinwōt e ar nakilin aolepen lokatok in bwinimjar eo kin gold.

23 Im ilo¹ bwinimjar eo e ar kōmōnmōn ruo kerub jen wijki oliv, kaju iair utiejen joñoul kubit. 24 Im lailim kubit juōn pein kerub wāwen pein bao, im lailim kubit pein kerub eo juōn: jen jabōn juōn pein ññon jabōn pein eo juōn joñoul kubit. 25 Im kerub eo juōn e ar joñoul kubit: kerub ko ruo dritair wōt juōn, im juōn wōt wāweir. 26 Utiejen juōn kerub joñoul kubit, im bareinwōt kerub eo juōn. 27 Im e ar likit kerub ko ilo mweo eolap: im emwij erlokwe pein kerub ko, inem pein juōn iair e ar tōbar juōn turin, im pein kerub eo juōn e ar tōbar turin ikijen; im pā ko peir rar tōbar drōn ilukwōn mweo. 28 Im e ar nakilin kerub ko kin gold.

29 Im e ar bukwe ilo turin ko otemjej men in e ko ein kerub, im wijki pam, im inōk rebul, iloan im elikin. 30 Im e ar nakilin eran mweo kin gold, iloan im elikin. 31 Im ññon kejem in bwinimjar eo e ar kōmōnmōn aur ko jen wijki oliv; tur in jur ko juōn mōtōn lailim in mijilin worwor eo. 32 Ein drein e ar kōmōnmōn ruo aur jen wijki oliv; im e ar bukwe ioir men in e ein kerub ko, im wijki pam ko, im inōk rebul, im e ar nakilir kin gold; im e ar erōke gold eo ion kerub ko, im ion wijki pam ko. 33 Ein drein bareinwōt e ar kōmōnmōn ññon kejem in tempel eo jur ko jen wijki oliv, juōn mōtōn emen in mijilin worwor eo; 34 im ruo aur jen

wijki fōr: mōtōn ko ruo ilo juōn aur rar limlim iben dron, im mōtōn ko ruo ilo aur eo juōn rar limlim iben dron. 35 Im e ar bukwe ioir kerub ko im wijki pam ko, im inōk ko rebul; im e ar nakilir kin gold e kwun na ion men in e emwij jeki. 36 Im e ar kalek worwor eo iloan kin jilu lajrōk in dreka ko jekjek, im juōn lajrōk im wijki aik.

37 Ilo ¹yiō eo ken kemen emwij kōmōn loñtōn imōn Jeova, ilo aliñ Ziv. 38 Im ilo yiō eo ken ka joñoul juōn, ilo aliñ Bul, aliñ eo ken ka dualitōk rar kamwijlok mweo, ilo aoepen kabwebwen, im ekar ñōn aoepen wāwen. Ein drein ar kalek e iomin jiljilimjuōn yiō.

7 Im Solomon e ar ²kalek mweo imōn iomin joñoul jilu yiō, im e ar kamwijlok aoepen mweo imōn. 2 Bwe e ar kalek mweo jen wijki ko in Lebanon; aitokōn jibuki kubit, im drilpen limñoul kubit, im utiejen jilñoul kubit ion emen lajrōk in jur aik, im drilip aik ion jur ko. 3 Im rar kalibubu kin aik ion drilip ko eoñoul lailim rar ber ion jur ko; joñoul lailim ilo juōn lajrōk. 4 Im eor alal ilo jilu lajrōk, im windo ikijen windo ilo jilu lajrōk. 5 Im aur otemjej im jur otemjej rar kōmōnmōni im eonbili alal ko: im windo ko ikijen dron ilo jilu lajrōk. 6 Im e ar kōmōnmōn portiko kin jur ko; aitokōn limñoul kubit, im drilpen jilñoul; im juōn tōñak imair; im jur ko im bit in kejem imair. 7 Im e ar kōmōnmōn portiko in tron ijo e naj ekajet, aet, portiko in ekajet: im rar kalibubu e kin aik jen eran ñōn ion. 8 Im mweo imōn ijo e naj jokwe, worwor eo juōn iolap in portikoeo, rar kōmōnmōne einwōt. E ar bareinwōt kōmōnmōn juōn im ñōn lio nejin Pero, (eo Solomon e ar belek e), einwōt portiko in.

9 Ir kein otemjej jen dreka ko elap wōnair, aet, dreka jekjek ekar ñōn joñōk, emwij jirbeni kin jirben ko, iloan im elikin, jen loñtōn ñōn ijo ilōñtata, im ein drein elikin ñōn worwor eo elap. 10 Im loñtōn mweo jen

dreka ko elap wōnair, aet dreka ko relap, dreka ko joñoul kubit, im dreka ko dualitōk kubit. 11 Im ion, dreka ko elap wōnair, aet dreka jekjek, ekar ñōn joñōk, im alal aik. 12 Im ilo worwor eo elap ej kabole, jilu lajrōk in dreka jekjek, im juōn alen alal aik; einwōt worwor eo iloan mweo imōn Jeova, im portiko in mweo.

13 Im ¹kiñ Solomon e ar jiliklok im āñintok Hairam jen Tair. 14 E nejin juōn kōra e joko belen, dri Nap-talai, im jemen eman in Tair, dri jerbale jinibōrōrō; im eke kin meletlet, im jelalokjen, im mejerik in kōmōnmōn jerbale otemjej kin jinibōrōrō. Im e ar itok ñōn iben kiñ Solomon, im e ar kōmōnmōn aoepen jerbale eo an. 15 Bwe e ar kōmōnmōn ruo jur jinibōrōrō, utiejeir joñoul dualitōk kubit: im juōn to aitokōn joñoul ruo kubit e ar kabol jabrewōt iair. 16 Im e ar kōmōnmōn ruo eoñlok jinibōrōrō unlok bwe en likiti ion jabōn jur ko: utiejen juōn eoñlok lailim kubit, im utiejen eoñlok eo juōn lailim kubit. 17 Im eor ok einwōt taul, im to ninir inōkōn eoñlok ko ion jabōn jur ko ilōñ; jiljilimjuōn ñōn juōn eoñlok im jiljilimjuōn ñōn eoñlok eo juōn. 18 Ein drein e ar kōmōnmōn jur ko; im e kar ruo alen i belakin ion juōn, kōmōne kin ok ko in kalibubu eoñlok ko ion jabōn jur ko: ein drein an kōmōn ñōn eoñlok eo juōn. 19 Im eoñlok ko ion jabōn jur ko ilo portiko eo, rar kōmōne ilo wāwen kiōp ko, emen kubit. 20 Im ruo eoñlok ilōñ re bareinwōt ber ion jur ko ruo, im rebak ñōn ijo rar kōmōne kin ok ko: im pōmgranet ko rubuki, ilo alen ko i belakin ion eoñlok eo juōn. 21 Im e ar kajutōk jur ko ilo portiko in tempel eo: im e ar kajutōk jur eo i anbijmaron, im naetan Jekin; im e ar kajutōk jur eo i anmiñ, im naetan Boaz. 22 Im ion jabōn jur ko e ar kōmōn wāwen kiōp ko: ein drein e ar kamwijlok jerbale in jur ko.

23 Im e ar kōmōnmōn ²lometo un-

lok eo, joñoul kubit jen tōrerēn ñōn tōrerēn, e rolul wāwen, im utiejen lailim kubit; im juōn to aitokōn jilñoul kubit ej kabol e. 24 Im ilōlin i tōrerēn i belakin eor kwolin ni rar kabol e: joñoul ilo juōn kubit, im rar kabole i belakin kwolin ni ko, ruo lajrōk, rar unlok ke e ar unlok lometo eo. 25 E ar ber ion joñoul ruo ox, jilu rar jelniñalok, im jilu rar jelto- lok, im jilu rar jelruñalok, im jilu rar jeltalok; im lometo eo ej ber ioir, im lōkair rar ber iolap. 26 Im mijilin, drilpen pā; im rar kōmōnmōn tōrerēn einwōt tōrerēn kōp, einwōt bul in ki- ōp: im kobōn ruo tausān bath.

27 Im e ar ¹kōmōnmōn joñoul loñ- tōk jinibōrōrō; emen kubit aitokōn juōn loñtōk, im emen kubit drilpen, im jilu kubit utiejen. 28 Im ein drein air kōmōnmōn loñtōk ko: eor air likabroror; im eor likabroror ikō- tan tōrerēn ko air; 29 im ion likabro- ror ko iturin tōrerēn ko eor laion, im ox ko, im kerub ko; im ion tōrerēn ko juōn jikin jutōk ilōñ; im iomin lai- on im ox ko eor inōkōn toto ie. 30 Im iben jabrewōt loñtōk emen whil jinibōrōrō, im axel ko jinibōrōrō; im iben ne ko an emen eor aierair: iomin jikin amin eor aierair, im inōk ko itu- rin jabrewōt iair. 31 Im mejen iloan eoñlok eo juōn kubit: im e rolul me- jen einwōt men in kōmōn an loñtōk, juōn im jibilkwōn kubit; im ion mejen eor men in bukwe, im emen tōrerēn likabroror ko air im re jab rolul. 32 Im whil ko emen rar ber iomin lika- broror ko; im axel ko im whil ko rar ber iloan loñtōk ko tuilōl: im utiejen juōn whil juōn im jibilkwōn kubit. 33 Im wāwen kōmōn juōn whil ein- wōt whil in jariot: axel ko air, im apo ko, im jur ko, men kein men in unlok. 34 Im emen aierair i bōul ko emen in jabrewōt loñtōk: aierair ko mōtōn wōt loñtōk. 35 Im ion loñtōk eo juōn men e rolul, utiejen jibilkwōn kubit; im ion loñtōk eo ~~ken~~ drebij ko an: im likabroror ko ~~rej~~ mōtōn wōt. 36 Im ilo plet in ken drebij ko, im li- kabroror ko an, e ar bukwe kerub

ko, laion ko, im wijki pam ko, ekar ñōn jikir, im inōk ko iturir. 37 Ilo wāwen in e ar kōmōnmōn loñtōk ko joñoul: ñōn jabrewōt iair juōn wōt joñōk, im wāweir wōt juōn

38 Im e ar ¹kōmōnmōn joñoul ken amin jinibōrōrō: ilo juōn ken amin eoñoul bath; im jabrewōt ken amin emen kubit; im ion jabrewōt ian loñ- tōk ko joñoul, juōn ken amin. 39 Im e ar likit loñtōk ko lailim i anbij- maroñōn mwēo, im lailim i anmiñin mwēo: im e ar likit lometo eo i anbij- maroñōn mwēo tu i rear im irōk.

40 Im Hairam e ar kōmōnmōn ken amin ko: im shovel ko, im jābi ko. Ein drein Hairam: e ar kamwijlok ao- lepen jerbal eo e ar kōmōne ñōn kiñ Solomon ilo imōn Jeova: 41 jur ko ruo, im jābi in eoñlok ko rar ber ion jur ko; im ok ko ruo in kalibubu jābi ko ruo in eoñlok ko rar ber ion jur ko; 42 im pōmgranet ko ābuki ñōn ok ko ruo; ruo lajrōk ñōn jabrewōt ok, in kalibubu ok ko ruo in eoñlok ko rar ber ion jur ko; 43 im loñtōk ko joñ- oul, im ken amin ko joñoul ion loñ- tōk ko; 44 im lometo eo, im ox ko joñ- oul ruo iomin lometo; 45 im pot ko, im shovel ko, im jābi ko: jābi kein otemjej Hairam e ar kōmōnmōni ñōn kiñ Solomon, ilo imōn Jeova, jen jini- bōrōrō e jatōlti. 46 Kiñ eo e ar ka- unloki ilo ene emōn biken in Jordan, ilo brij kle ikōtan Sōkkot im Zaretan. 47 Im Solomon e ar jab bukot erroōn jābi ko otemjej, bwe rar kanuij lōñ: re ban bukot erroōn jinibōrōrō eo.

48 Im Solomon e ar kōmōnmōn jā- bi otemjej rar ber ilo imōn Jeova; lo- katok gold eo, im tebel eo bred in ka- likar ej ber ie, jen gold; 49 im jikin lamp ko, lailim i anbijmaroñ, im lai- lim i anmiñ, iman bwinimjar eo, jen gold erroo; im inōk ko, im lamp ko, im jabōnpi ko, jen gold; 50 im kōp ko, im ken jojen melle ko, im jābi, im jibun ko, im jābi kijeek, jen gold er- reo; im hinjej ko ñōn aur ko in mwēo iloan, jikin e kwojarjar otem kwojar- jar, im ñōn aur ko in mwēo, eoñin tem- pel eo, jen gold.

51 Ein drein air kamwijlok aolepen jerbal eo Solomon kiñ e ar kōmōn-mōne ilo imōn Jeova. Im Solomon e ar kadreloñtok men ko otemjej jemen, Devid, e ar aje, aet silver, im gold, im jābi ko, im likiti ilo jikin mweiuk ko in imōn Jeova.

8 Inem ¹Solomon e ar kokweloktok riddoro in Israel, im jiōbōn bwij ko otemjej, iroi ro an nukin jemeir an ro nejin Israel, ñōn iben Solomon ilo Jerusalem, bwe ren bōkliñtok dipdip in kalimur an Jeova jen jikin kwelok in Devid, etan Zaion. 2 Im man otemjej dri Israel rar kweloktok ñōn iben kiñ Solomon, ilo kwojkwōj eo, ilo aliñ Etanim, eo aliñ ken ka jiljilimjuōn. 3 Im riddoro otemjej in Israel, rar itok, im pris ro rar kwotōke dipdip eo. 4 Im rar bōkliñtok dipdip an Jeova, kab im nuknuk, imōn kwelok eo, im jābi otemjej rokwōjarjar rar ber ilo Im nuknuk eo; irkein pris ro im dri Livaì rar bōkliñtok. 5 Im kiñ Solomon im aolepen jar an Israel, ro rar kweloktok ñōn iben, rar ber iben iman dipdip eo, im rar katok kin sip ko im ox ko, elōñ jen air maroñ in bwini ak kabukot orair. 6 Im pris ro rar kadreloñ dipdip in kalimur an Jeova ñōn jikin, ilo bwinimjar in mweo, aet ñōn jikin kwojarjar otem kwojarjar, iomin pā ko pein kerub ko. 7 Bwe kerub ko rar erlokwe peir ion jikin dipdip eo, im kerub ko rar kalibubu dipdip eo im ine ko an ilōñin. 8 Im ine ko re aitok, inem jebair rar walok ilo jikin kwojarjar eo iman bwinimjar eo; a re jab lo ir inabij: im rej ber ie ñōn ranin. 9 Ejelok kobōn dipdip eo, a tebel dreka ko ruo wōt, ko Moses e ar likiti na ie i Horeb ke Jeova e ar kōmōn juōn bujen iben ro nejin Israel, ke rar drioiytok jen ene Ijpt. 10 Im ke pris ro rar drioiytok jen jikin kwojarjar eo, inem kōro eo e ar kobrōk mweo imōn Jeova, 11 ein drein pris ro re ban jutōk in jerbal kin kōro eo; bwe aibujuij an Jeova e ar kobrōk imōn Jeova.

12 Ien eo ²Solomon e ar ba, Jeova

va e ar ba E naj jokwe ilo marok e mijil. 13 Emol I ar kalek ñōn Kwe mwin imōn jokwe, juōn jikin Am berwōt ñōn in drio. 14 Im kiñ eo e ar oktōk, im e ar kejerammōn aolepen jar in Israel: im aolepen jar in Israel rar jutōk. 15 Im e ar ba, Emōnōnō Jeova, Anij in Israel, eo e ar konono kin loñin ñōn jema Devid, im E ar kamole kin pein, im E ba, 16 Elikin ran eo ke I ar kadrioiytok ro droō Israel jen Ijpt, I ar kālet ejelok jikin kwelok jen bwij otemjej bwijin Israel, bwe In kalek juōn im, bwe eta en ber ie; a I ar kālet Devid bwe en iroi ion ro droō Israel. 17 Ak e kar ilo buruen Devid jema bwe en kalek juōn im ñōn etan Jeova, Anij in Israel. 18 A Jeova e ar ba ñōn Devid jema, Ke e kar ilo buruōm bwe kwon kalek juōn im ñōn eta, emōn am kōmōn bwe e kar ilo buruōm: 19 ijoke, kwon jab kalek mweo; a nejōm eman eo e naj walok jen ibim, e naj kalek mweo ñōn eta. 20 Im Jeova e ar kabin nan eo E ar ba; bwe I ar jutōk in binej jenkwōn Devid, im jijōt ion tron in Israel, einwōt Jeova e ar kalimur, im I ar kalek mweo ñōn etan Jeova, Anij in Israel. 21 Im I ar likit ie juōn jikin ñōn dipdip eo, im iloan bujen Jeova, eo E ar kōmōn iben ro jimar, ke E ar kadrioiytok ir jen Ijpt.

22 Im Solomon e ar jutōk ikōtan lokatok an Jeova im aolepen jar an Israel, im e ar erlokwe pein ñōn lōñ; 23 im e ar ba, O Jeova, Anij in Israel, ejelok anij einwōt Kwe ilo lōñ ko, ak ilo lōl iomin; Eo ej kejbārok bujen im joiy iben ro dri korijerōm, ro rej etetal iman kin aolepen burueir; 24 Eo e ar kejbārok iben korijerōm Devid, jema, men eo Kwar kalimur ñōn e: aet, Kwar konono kin loñōm, im Kwar kamol e kin peōm, einwōt ranin. 25 Inem kiō, O Jeova, Anij in Israel, Kwon kejbārok iben korijerōm Devid, jema, men eo Kwar kalimur ñōn e, im Kwar ba, Kwo jamin aikwij juōn eman iman meja bwe en jijōt ion tron in Israel, men in wōt, elañe ro nejōm rej lale ial eo air, im etal imaō einwōt

kwar etetal imaō. 26 Inem kiō, O Anij in Israel, nan eo Am, ij akwelap, en mol wōt, eo Kwar ba ñōn korijerōm Devid, jema.

27 A emol otem mol bwe Anij e naj jokwe ion lōl ke? lo, lōñin lōñ ko re jab bwe ñōn Am ber; e nañin riklok mwin emwij aō kaleke! 28 Ijoke, Kwon lale jar eo aō, korijerōm, im aō akwelap, O Jeova aō Anij, im eoroñ aō lamiy im jar in, eo ña korijerōm ij jar kake imam ranin; 29 bwe mejōm ren bellok ñōn mwin boñ im ran, aet, ñōn jikin eo Kwar ba kake, Eta e naj ie, in eoroñ jar eo dri korijerōm e naj jare ñōn jikin in. 30 Im Kwon eoroñ akwelap an dri korijerōm, im an ro drom Israel, ñe re naj jar ñōn jikin in: aet, Kwon eoroñ ilo lōñ ko jikōm; im ñe Kwoj roñjake, Kwon jolok bwir.

31 ¹Elañe juōn armij ej bwir nae dri turin, im rej likit ion juōn kanōjnij bwe en kanōjnij kake, im e naj item kanōjnij iman lokatok eo Am iloan mwin; 32 inem Kwon eoroñ ilo lōñ ko, im kōmōn, im ekajete ro dri korijerōm, im liakelok armij eo e nana, im bōktok ial eo an ion bōran, im kowānik armij eo e jime, im lelok ñōn e ekar ñōn wānik eo an.

33 ²Ñe ro drom Israel rej buñlōllok iman ro rej kijirāte ir, kin air jerawiwi nae Yuk; elañe rej bar oktōk ñōn Kwe, im kwalok etōm, im jar im akwelap ñōn Kwe ilo mwin; 34 inem Kwon eoroñ ilo lōñ ko, im jolok bwir an ro drom Israel, im bar āñintok ir iloan eneo Kwar letok ñōn ro jimair.

35 ³Ñe e kilik lōñ ko, im ejelok wut, kin air bwir nae Yuk, elañe rej jujeltok ñōn jikin in im jar, im kwalok etōm, im ukwelok jen air bwir, ñe Kwoj kejjorran ir; 36 inem Kwon eoroñ ilo lōñ ko, im jeorlok bwir an ro dri korijerōm, im an ro drom Israel, ñe Kwoj katakin ir ial eo emōn ren etal iloan; im Kwon jilkintok wut ion eneo Am, eo Kwar letok ñōn ro drom bwe en air jolit.

37 ⁴Elañe ilo eneo eor ñita, elañe

eor nañinmij elap, elañe eor ken kamōnōknōk ak li, lokōs ak likakrōk; elañe ro dri kijirāte ir re naj nitbwili jikin kwelok ko in eneo air; ak jabrewōt nañinmij ie; 38 jar im akwelap eo jabrewōt armij e naj kōmōne, ak armij otemjej dri Israel, eo e jela nañinmij in buruen, im ej erlokwe pein ñōn mwin: 39 inem Kwon eoroñ ilo lōñ ko jikōm, im jeorlok, im kōmōn, im lelok ñōn jabrewōt armij ekar ñōn ial ko an otemjej, Kwo jela kake buruen; (bwe Kwe, Kwe wōt, Kwo jela buruen armij otemjej); 40 bwe ren mijōk Yuk ran ko otemjej rej mour ilo eneo Kwar letok ñōn ro jimam.

41 Bareinwōt kin drua maijet, eo e jab ian ro drom dri Israel, ñe ej itok jen juōn ene etolok kin etōm, 42 (bwe re naj roñjake etōm elap, im peōm e kajur, im kin peōm erlokwe); ñe e naj item jar ñōn mwin; 43 Kwon eoroñ ilo lōñ ko jikōm, im Kwon kōmōn ekar ñōn men otemjej drua maijet eo ej jar kake ñōn Kwe; bwe dri ailiñ otemjej ilo lōl ren jela etōm, im mijōk Yuk einwōt ro dri Israel, im bwe ren jela bwe mwin emwij aō kalek e, ej naetan kin etōm.

44 Elañe ro drom rej ilen tōrinaek ro dri kijirāte ir, ilo jabrewōt ial Kwoj jilkinlok ir ie, im rej jar ñōn Jeova jujeltok ñōn jikin kwelok in Kwar kālete, im ñōn mwin I ar kalek ñōn etōm; 45 inem Kwon eoroñ ilo lōñ ko, air jar im air akwelap, im Kwon jibōñ ir wōt.

46 Elañe rej bwir nae Yuk, (bwe ¹ejelok armij e jab bwir), im Kwoj illu ibeir, im ketōk ir ñōn ro dri kijirāte ir, inem rej kajebokweik ir im āñinlok ir ñōn enen ro dri kijirāt, etolok ak ebak; 47 ijoke, elañe rej kalomōnlokjen ilo eneo emwij āñinlok ir dri jebokwe ie, im rej ukwelok ibeir, im akwelap ñōn Yuk ilo enen ro dri kajebokweik ir, im ba, Kim ar jerawiwi, im kim ar kōmōn bōt im nana; 48 elañe rej jeblakwoj ñōn Yuk kin aolepen burueir, im aolepen air ilo enen ro dri kijirāte ir, ro rar āñinlok ir dri jebokwe, im rej jar

¹ Ex. 22, 8-11. ² Liv. 26, 17. ³ Liv. 26, 19. ⁴ Liv. 26, 16.

¹ 1 Jon 1, 8-10.

nōn Yuk nōn eneo Kwar lelok nōn ro jīmair, im nōn jikin kwelok in, emwij Am kālete, im nōn mwin I ar kaleke nōn etōm: 49 inem Kwon eoroñ air jar im air akwelap ilo lōñ ko jikōm, im jibōñ ir wōt; 50 im jolok nana an ro drom ro rar jerawiwi nae Yuk, im jolok jerawiwi ko air otemjej rar bwir nae Yuk kake; im lelok nōn ir tiriamo iman ro rar āninlok ir dri jebokwe, bwe ren tiriamokake ir, 51 (bwe rej dri ailiñ Am, Am jolit, ro Kwar kadrioihtok ir jen Ijpt, jen ilo ubaj māl eo); 52 bwe mejōm ren bellok wōt nōn akwelap an dri kori- jerōm, im nōn akwelap an ro dri ailiñ Am, dri Israel, bwe Kwon eoroñ ir jabrewōt ien re naj kir nōn Kwe. 53 Bwe Kwar kijbil ir jen ilo bwiljin ro dri ailiñ otemjej, bwe ren Am jolit, einwōt Kwar ba nōn Moses dri kori- jerōm, ke Kwar kadrioihtok ro jemeir jen Ijpt, O Iroi Jeova.

54 Im ¹ein drein ke Solomon e ar kajemlok jar in an im akwelap in an nōn Jeova, e ar jerkak jen iman loka- tok an Jeova, jen an bukwelōlō im erlokwe pein nōn lōñ. 55 Im e ar ju- tōk, im jare aolepen jar in Israel kin ainiken elap, im ba, 56 Emōnōnō Je- ova, eo ej letok kakije nōn ro dri ailiñ in Israel, ekar nōn aolepen men eo E ar kalimur kake: e jañin ir juōn nan jen kalimur emōn, eo E ar kalimur kake kin Moses dri korijeran. 57 Jeova aruij Anij en ber iber, einwōt E ar ber iben ro jimar: En jab likit kij ak illok jen kij; 58 bwe En karel buruer nōn E, bwe jen etal ilo aolep- en ial ko An, im bwe jen kejbārok kien ko An, ko E ar jiroñ ro jimar. 59 Im nan kein aō, emwij aō akwe- lap kake iman Jeova, ren ebak nōn Jeova aruij Anij ran im boñ, bwe En jibōñ wōt dri korijeran im ro dron, dri Israel, einwōt aikwij an jabrewōt ran; 60 bwe ro dri ailiñ otemjej in lōl ren jela bwe Jeova ej Anij; ejelok ijillokōn. 61 Kin men in, buruōmi ren wāppen iben Jeova aruij Anij, bwe komin etal ilo kien ko An im kejbārok nan in kaiñi ko An, einwōt ranin.

62 Im ¹kīñ eo, im aolepen ro dri Israel rar katok men in katok iman Jeova. 63 Im Solomon e ar katok nōn men in katok ainemōn ko, ko e ar katok nōn Jeova, roñoul ruo tau- san ox, im jibuki roñoul tausan sip. Ein drein kīñ eo im ro nejin Israel otemjej rar aje mweo imōn Jeova. 64 Ran eo wōt kīñ e ar kokwojarjar mōtōn eo eolap, mōtōn worwor eo ej iman imōn Jeova; bwe ijo e ar katok kin katok kijeek, im katok flauo, im kioeo an katok ainemōn ko. 65 Ein drein Solomon e ar kōmōn kwojkwōj ien eo, im ro dri Israel otemjej iben, juōn jar elap, jen mejāti in Hemat nōn wea in Ijpt, iman Jeova aruij Anij, jiljilimjuōn ran im jiljilimjuōn ran, aet joñoul emen ran. 66 Ran eo ken ka drualitōk e ar jilkinlok armij rōn; im rar jare kīñ eo, im jeblak nōn moko imweir, rej lōñliñ im mōnōnō ilo burueir kin aolepen joij eo Jeova e ar kwalok nōn Devid dri korijeran, im nōn dri Israel, dri ailiñ eo An.

9 Im ²ke Solomon e ar kamwijlok an kalek mweo imōn Jeova, im imōn kīñ, im aolepen an kōnan eo e ar buñburuen im kōmōn, 2 inem Jeova e ar weaktok nōn e alen ken ka ruo, einwōt E ar weaktok nōn e i Gibeon. 3 Im Jeova e ar ba nōn e, I ar roñ- jake am jar, im am akwelap, kwar konono imaō: I ar kokwojarjar mwin kwar kaleke, im likit eta ie nōn in drio; im meja kab buruō re naj ber ie ien otemjej. 4 A kin kwe, ³elañe kwoj etal imao einwōt Devid jemōm e ar etetal, ilo buru e jime im wānik, bwe kwon kōmōn ekar nōn men otemjej emwij Aō jiroñ yuk, im kwoj kejbārok kien ko Aō im nan in kaiñi ko Aō; 5 inem I naj kabin tron eo am ion Israel nōn in drio, einwōt I ar kalimur nōn Devid jemōm, im ba, Kwo jamin aikwij juōn eman ion tron in Israel. 6 ⁴A elañe komij jeorlok jen ami lor Iō, kom ak ro nejōmi, im jab kejbārok kien ko Aō, im nan in kaiñi ko Aō, ko emwij Aō kwaloki nōn kom, a komij ilem jerbal nōn anij

¹ 2 Kron. 7. 1.

¹ 2 Kron. 7. 4-10.
² 2 Sam. 7. 14-16.

² 2 Kron. 7. 11.

³ 2 Sam. 7. 14.

ro jet im kabuñ ñõn ir; 7 inem I naj bukvelok Israel jen enin I ar lelok ñõn ir; im mwin, eo I ar kokwojarjar ñõn eta, I naj jolok e jen iman meja; im Israel e naj juõñ jabõñ kennan im nanin kajirere iben dri ailiñ otemjej. 8 Im meñe mwin ein drein an utiej, jabrewõt eo ej elã jen e, e naj bwilõñ, im e naj teor; im re naj ba, Etke Jeova e ar kõmõñ einwõt ñõn enin, im ñõn mwin? 9 Im re naj uak, Kin ke rar illok jen Jeova air Anij, Eo e ar kadriojtok ro jimair jen ene Ijpt, im rar bõk anij ro jet, im kabuñ ñõn ir: im jermal ñõn ir: kin men in, Jeova e ar bõktok aolepen nana in ioir.

10 Im ¹ilo jemlokõñ roñoul yiõ, ilo-ir Solomon e ar kalek moko ruo, imõn Jeova im imõn kiñ eo, 11 (ak Hairam kiñ in Tair e ar lelok ñõn Solomon wijki aik im wijki fõr, im gold, ekar ñõn aolepen an kõnan), inem Solomon e ar lelok ñõn Hairam roñoul jikin kwelok ilo ene Galili. 12 Im Hairam e ar driojtok jen Tair in aluij jikin kwelok kein Solomon e ar lelok ñõn e, im e jab wut buruen. 13 Im e ar ba, Ie wāwen jikin kwelok kein kwar letok ñõn iõ, jatiõ? Im e ar naetair enen Kebul ñõn ranin. 14 Im Hairam e ar jilkinlok ñõn kiñ eo, jibuki roñoul talent gold.

15 Im eñin unin an kiñ Solomon kokweloktok ro dri kamakoko in kalek imõn Jeova, mweo imõn, im Milo, im worwor in Jerusalem, im Hezor, im Megido, im Gizer. 16 Pero kiñ in Ijpt e kar wõnliñlok, im bõk Gizer, im tile kin kijeek, im mõn ro dri Keinan rar jokwe ilo jikin kwelok eo, im e ar lelok kitri ñõn ilo nejin, belen kiñ Solomon. 17 Im Solomon e ar kalek Gizer, im Bet-horon eo ilõl, 18 im Bealat, im Temar ilo ene jemaren, ilo eneo, 19 im jikin kwelok otemjej in mweiuk an Solomon, im jikin kwelok ko ñõn jariat ko an, im jikin kwelok ko ñõn ro dri uwe ion ors ko, im men ko Solomen e ar kõnan kalek kin an buñburuen, ilo Jerusalem, im i Lebanon, im ilo aolepen eneo e ar iroiñ ion. 20 Im kiñ ro dri ailiñ

ko rar berwõt jen ro dri Amor, im ro dri Het, im ro dri Periz, im ro dri Hiv, im ro dri Jibus, ro re jab ian ro nejin Israel; 21 ro nejir rar berwõt elikir ilo eneo, im ro nejin Israel rar ban mõn ir, jen ir Solomon e ar kokweloktok ro dri kamakoko ñõn ranin. 22 A jen ro nejin Israel, Solomon e ar jab kõmõñ jabrewõt iair dri kamakoko; a ir dri tõrinae, im ro dri korijer, im iroiñ ro, im kapen ro, im ro dri lale jariat ko, im dri uwe ion ors ko.

23 Rein, ro dri lale jermal an Solomon, limabuki limñoul, ro rar iroiñ ion ro dri kõmõne jermal eo.

24 A lio nejin Pero e ar wõnliñlok jen jikin kwelok an Devid ñõn mweo imõn, eo Solomon e ar kalek ñõn e: inem e ar kalek Milo.

25 Im jilu alen ilo juõñ yiõ Solomon e ar katok kin men in katok kijeek, im kin men in katok ainemõn ko ion lokatok eo e ar kalek ñõn Jeova, im ibeir e ar tile kajjurjur, ion lokatok eo e kar iman Jeova. Ein drein e ar kamwijlok mweo.

26 Im ¹kiñ Solomon e ar jekjek inej i Izaion-giber, eo ej iturin Ilot, iturin lomalo Ekilmir, ilo ene Idom. 27 Im Hairam e ar jilkinlok ilo wa ko, ro dri korijeran, dri jerõkrik re jela meto, iben ro dri korijeran Solomon. 28 Im rar ilok ñõn Opir, im ektõktok jen ijo gold, ãbuki roñoul talent, im bõktok ñõn iben kiñ Solomon.

10 Im ²ke liroiñ in Shiba e ar roñlok buñbuñ an Solomon kin etan Jeova, e ar itok ñõn iben bwe en melejoñ e kin kajitõk ko rebin. 2 Im e ar itok ñõn Jerusalem, im elõñ armij iben, eor kamel rar inektok spais ko, im elõñ gold, im dreka ko raurõk, im ke e ar itok ñõn iben Solomon, e ar kõmao iben kin men ko otemjej ilo buruen. 3 Im Solomon e ar kemeleleik ñõn e aolepen kajitõk ko an: ejelok men e nojõk jen kiñ eo im e ar jab kwalok e. 4 Im ke liroiñ in Shiba e ar lo aolepen meletlet an Solomon, im mweo e ar kalek e, 5 im kijan ilo tebel eo an, im an ro dri korijeran ji-

jōt, im an ro dri jibōñ e ber iben, im nuknuk ko air, im ro dri bōktok kōp ko an, im ken uwe eo e ar wōnliñlok kake ñōn imōn Jeova; ej lok-jenan wōt. 6 Im e ar ba ñōn kiñ eo, Emol nan eo I ar roñjake ilo eneo aō kin kōmōn ko am, im meletlet eo am. 7 Ijoke, I ar jab tōmak nan ko, mae ien I ar itok, im meja e ar loe; im lo, rar jab kennanek iō jibilkwon; am meletlet im am jeban relap jen buñbuñ eo I ar roñjake. 8 Emōnōnō ro drom, emōnōnō ro korijerōm, ro rej jutōk imam ien otemjej, im roñjake am meletlet. 9 Emōnōnō am Anij, eo e ar buñburuen kin kwe, im likit yuk ion tron in Israel: bwe Jeova e ar yokwe Israel ñōn in drio, kin men in E ar likit yuk kiñ, bwe kwon kōmōn ekajet im wānik. 10 Im e ar lelok ñōn kiñ eo jibuki roñoul talent gold, im spais e kanuij lōñ, im dreka raurōk: e ar jab bar itok elōñ spais, ko einwōt irkein liroi in Shiba e ar lilok ñōn kiñ Solomon.

11 Im¹ wa ko an Hiram bareinwōt, ko rar ektōktok gold jen Opir, rar ektōktok jen Opir elōñ wijki almug, im dreka raurōk. 12 Im kiñ eo e ar kōmōnmōn jen wijki almug ko jur ko ñōn imōn Jeova im ñōn imōn kin eo, arp ko bareinwōt im salteri ko ñōn ro dri al: e ar jab bar itok wijki almug einwōt irkein, im rar jab bar loi, ñōn ranin.

13 Im kiñ Solomon e ar lelok ñōn liroi in Shiba aolepen an kōnan, jabrewōt eo ej kajitōk kake, elap jen men ko e ar lelok ñōn e jen joij in an kiñ. Ein drein lio e ar oktōk, im ilok ñōn eneo an, e im ro dri korijeran.

14 Erroñ gold eo e ar itok ñōn Solomon ilo juōn yiō, jiljino buki jiljinoñoul jiljino talent, 15 eor jen men ko dru wia rar bōkitok, im men in wia an ro dri wiakake, im an kiñ ro otemjej ion dri ailiñ ko jabrewōt, im an iroi ro ion eneo. 16 Im kiñ Solomon e ar kōmōnmōn rubuki ken tōrak jen gold nowe; jiljino buki shekel gold ilo juōn ken tōrak. 17 Im e ar

kōmōnmōn jilubuki likipijñōk jen gold nowe; jilu paun in gold ilo juōn likipijñōk: im kiñ eo e ar likiti ilo imōn wijki ko jen Lebanon. 18 Bareinwōt kiñ eo e ar kōmōnmōn juōn tron elap jen aivori, im e ar inimi kin gold erre. 19 Jiljino jekairo lok ñōn tron eo, im tu ilōñin tron eo e rolul elikin; im eor jikin pā iturin jikin jijōt eo, im ruo laion re jutōk iturin jikin pā ko. 20 Im joñoul ruo laion rej jutōk im kejōbe jekairo ko jiljino: ar kōmōnmōn ejelok juōn einwōt ilo jabrewōt ailiñ. 21 Im aolepen ken irak ko an kiñ Solomon gold wōt, im jābi ko otemjej ilo imōn wijki ko jen Lebanon jen gold erre: ejelok iair jen silver: ej men in jekron ilo ran ko an Solomon. 22 Bwe eor inejin Tarshish, an kiñ eo, i lometo iben inej an Hiram; juōn alen ilo juōn yiō inej an Tarshish rar itok im ektōktok gold, im silver, im aivori, im eip ko, im bao pikok ko.

23¹ Ein drein kiñ Solomon e ar mweielok im meletletlok jen kiñ ro otemjej ilo lōl. 24 Im ro dri lōl otemjej rar kōnan ber iben Solomon, bwe ren roñjake an meletlet, eo Anij e ar likit ilo buruen. 25 Im jabrewōt iair e ar bōktok owōj, men in lelok eo an, jābi ko silver, jābi ko gold, nuknuk ko, ken tōrinae ko, spais ko, ors ko, mul ko, juōn joñōk yiō otemjej.

26 Im Solomon e ar kokweloklok jariat ko, im ro dri uwe ion ors; im iben juōn tausan ābuki jariat, im joñoul ruo tausan dri uwe ion ors, ko e ar likiti ilo jikin kwelok ko an jariat, im iben kiñ eo i Jerusalem. 27 Im kiñ eo e ar kōmōn bwe silver ilo Jerusalem en einwōt dreka ko, im wijki aik ko e ar kōmōni bwe ren lōñ einwōt wijki sikomor ko ilo ene etā. 28 Im ors ko iben Solomon rar bōktok jen Ijpt; im ro dri wia an Solomon rar bōki ilo bwij ko, jabrewōt bwij kin juōn wōnan. 29 Im juōn jariat e ar wōnliñtok jen Ijpt kin jiljino buki shekel silver, im juōn ors kin jibuki limñoul; im ein drein ñōn kiñ ro an

dri Het, im kiñ ro an Siria, rar bōkitok einwōt air maroñ.

11 Kiñ Solomon e ar¹ yokwe elōñ kōra ro drua, kab lio nejin Pero, kōra ro dri Moab, dri Amon, dri Idom, dri Saidon, im dri Het; **2** rein jen ailiñ ko Jeova e ar ba ñōn ro nejin Israel, Komin jab ilok ñōn ibeir, im ren jab itok ñōn ibemi; bwe emol re naj kajeorlok buruemi ñōn anij ro air: Solomon e ar edrep ñōn rein ilo yokwe. **3** Im iben jiljilimjuōn buki belen, liroi, im jilubuki limaro konkubain: im limaro belen rar kajeorlok buruen. **4** Bwe ke Solomon e lōlap, limaro belen rar karel buruen ñōn anij ro jet; inem buruen e jab wāppen iben Jeova an Anij, einwōt buruen Devid jemen. **5** Bwe Solomon e ar lor Ashterot, anij kōra an ro dri Saidon, im lor Milkōm, men in jōjōik eo an ro dri Amon. **6** Im Solomon e ar kōmōn nana iman mejen Jeova, im e ar jab kanuij lor Jeova, einwōt Devid jemen. **7** Inem Solomon e ar kōmōnmōn jikin eutie j ñōn Kimosh, men in jōjōik eo an Moab, ilo tol eo iman Jerusalem, im bar juōn ñōn Molek, men in jōjōik an ro nejin Amon. **8** Im ein drein an kōmōn ñōn limaro belen otemjej ro drua, rar kokaijurjur im katok ñōn anij ro air.

9 Im Jeova e ar illu iben Solomon, bwe emwij kajeorlok buruen jen Jeova, Anij in Israel, eo e ar weaktok ñōn e alen ruo, **10** im E ar jiroñ e kin men in, bwe en jab lor anij ro jet: a e ar jab kejbārok nan in kaiñi eo an Jeova. **11** Kin men in, Jeova e ar ba ñōn Solomon, Kin am kōmōn men in, im kwar jab kejbārok Aō bujen, im kien ko Aō, ko I ar jiroñ yuk, emol I naj kekel am ailiñ jen kwe, im I naj lelok ñōn leo korijerōm. **12** Ijoke, I jamin kōmōne ilo ran ko am, kin Aō lale Devid jemōm: a I naj kekele jen pein leo nejōm. **13** Ijoke, I jamin kekel aolepen ailiñ eo; a I naj lelok juōn bwij ñōn leo nejōm, kin Devid korijera, im kin Jerusalem eo I ar kālete.

14 Im Jeova e ar kajerkek juōn dri jumae Solomon, Hedad dri Idom: e

nejin kiñ in idom. **15** Bwe ke Devid e ar ber i Idom, im Joab kapen in jar in tōrinae e ar wōnliñlok in kalibwin ro mijjak, im e kar mōn man otemjej i Idom, **16** (bwe Joab im aolepen Israel rar ber ie iomin jiljino aliñ, mae ien e ar bukwe lok jabrewōt eman i Idom); **17** inem Hedad e ar ko, e im jet dri Idom dron jemen iben, im ilok ñōn Ijipt, im Hedad ajiri wōt. **18** Im rar drioi tok jen Midian, im itok ñōn Peran; im rar āñinlok armij ibeir jen Peran, im rar itok ñōn Ijipt, ñōn iben Pero kiñ in Ijipt, eo e ar lelok ñōn e juōn im, im kijen, im lelok ñōn e wāto. **19** Im Hedad e ar kanuij kabuñburuen Pero, ein drein e ar lelok ñōn e belen, jātīn lio belen, jātīn Tapenis liroi eo. **20** Im lio jātīn Tapenis e ar keutak ñōn e Genubat, nejin eman, eo Tapenis e ar kalikitit ilo mweo imōn Pero; im Genubat e ar ber ilo imōn Pero iben lōmaro nejin Pero. **21** Im ke Hedad e ar roñ i Ijipt kin an Devid kiki iben ro jiman, im kin an Joab, kapen in jar in tōrinae, mij, Hedad e ar ba ñōn Pero, Kwon kōtlok iō bwe in ilok ñōn eneo aō. **22** Inem Pero e ar ba ñōn e, A ta am aikwij iba, bwe, lo, kwoj bukot in ilok ñōn eneo am? Im e ar uak, Ejelok: ijoke, kwon kōtlok wōt iō.

23 Im Anij e ar kajerkek bar juōn dri jumae e, Rizon nejin Ilaiada, eo e ar ko jen iroi eo an, Hadadizer kiñ in Zoba. **24** Im e ar kokwelok tok armij ñōn iben, im e kapen an jar eo, ke Devid e ar mōn ro dri Zoba: im rar ilok ñōn Damaskōs, im jokwe ijo, im e ar kiñ ilo Damaskōs. **25** Im e dri jumae Israel ran ko otemjej an Solomon, elaplok jen nana eo Hedad e ar kōmōne: im e ar jōjōik Israel, im e ar kiñ ion Siria.

26 Im Jeroboam nejin Nibat, juōn dri Ipreim jen Zerida, korijeran Solomon, etan jinen Zirua, e joko leo belen, e ar bareinwōt kwotōke pein nae kiñ eo. **27** Im eñin unin an kwotōke pein nae kiñ eo: Solomon e ar kalek Milo, im kōkal worwor in jikin kwe lok an Devid jemen ijo e kar rup. **28** Im leo Jeroboam e ar kajur im be-

¹ Dut. 17. 17.

ran; im Solomon e ar lo likao eo, bwe e owōn, im e ar likite ion jerbal otemjej an bwijin Josep. 29 Im ien eo ke Jeroboam e ar drioiylok jen Jerusalem, dri kanan eo Ehaija dri Shailon, e ar loe ilo ial; ak Ehaija e ar kōnōk nuknuk ko rekāl; im irro mōke iair ilo jikin kallip. 30 Im Ehaija e ar jibwe nuknuk eo e ar ber ion, im kekele ilo joñoul ruo mōtōn. 31 Im e ar ba ñōn Jeroboam, Kwon bōk joñoul mōtōn; bwe ein drein Jeova, Anij in Israel, ej ba, Lo, I naj kekel ailiñ eo jen pein Solomon, im I naj lewoj joñoul bwij, 32 (a e naj an juōn bwij, kin korijera Devid, im kin Jerusalem, jikin kwelok eo emwij Aō kālete jen bwij otemjej bwijin Israel); 33 kin ke rar illok jen Ña, im rar kabuñ ñōn Ashterot, anij kōra an ro dri Saidon, Kimosh anij in Moab, im Milkōm anij an ro nejin Amon; im rar jab etetal ilo ial ko Aō, bwe ren kōmōn men eo emōn iman meja, im bwe ren kejbārok kien ko Aō, im nan in kaiñi ko Aō, einwōt Devid jemen e ar kōmōn. 34 Ijoke, I jamin bōk aolepen ailiñ eo jen pein; a I naj kōmōne juōn iroi ran ko otemjej in an mour, kin Devid korijera eo I ar kālete, im e ar kejbārok kien ko Aō, im nan in kaiñi ko Aō; 35 a I naj bōk ailiñ eo jen pein leo nejin, im I naj lewoj, aet joñoul bwij. 36 Im ñōn leo nejin I naj lelok juōn bwij, bwe en iben Devid korijera juōn lamp ien otemjej imaō ilo Jerusalem, jikin kwelok eo emwij Aō kālete bwe In likit eta ie. 37 Im I naj bōk yuk, im kwo naj kiñ ekar ñōn men ko otemjej buruōm e kōnan, im kwo naj kiñ ion Israel. 38 Im e naj ein drein, elañe kwoj eorōñ men otemjej Ij jiroñ yuk, im etetal ilo ial ko Aō, im kōmōn men ko re jime iman meja, im bokake kien ko Aō, im nan in kaiñi ko Aō, einwōt Devid korijera e ar kōmōne; inem I naj ber ibōm, im I naj kalek ñōn kwe juōn im e kajur, einwōt I ar kalek ñōn Devid, im I naj lewoj Israel ñōn yuk. 39 Im kin men in, I naj kaiñtan inen Devid, a e jab ñōn in drio. 40 Kin men in,

Solomon e ar kajeoñ in mōn Jeroboam; a Jeroboam e ar jutōk, im ko ñōn Ijpt, ñōn Shaishak kiñ in Ijpt, im e ar ber i Ijpt mae ien Solomon e mij.

41 ¹ A jerbal ko jet an Solomon, im men otemjej e ar kōmōni, im meletlet eo an, rar jab jeje ilo buk eo buk in jerbal ko an Solomon ke? 42 Im ien an Solomon kiñ i Jerusalem ion aolepen Israel e kar eñoul yiō. 43 Im Solomon e ar kiki iben ro jiman, im rar kalibwin e ilo jikin kwelok an Devid jemen: im Rihoboam nejin e ar binej jenkwon im kiñ.

12 Im ² Rihoboam e ar ilok ñōn Shikem: bwe aolepen Israel rar itok ñōn Shikem bwe ren kairoij e. 2 Im ke Jeroboam nejin Nibat, e ar roñjake, (bwe e ar berwōt i Ijpt, ijo e ar kone jen mejen kiñ Solomon, im Jeroboam e ar jokwe i Ijpt, 3 im rar jiliklok im kirtok e), inem Jeroboam im aolepen jar an Israel rar konono ñōn Rihoboam, im ba, 4 Jemōm e ar kōmōn amuij ine e kanuij erro: kin men in, kwe kwon kōmōn bwe am korijer elap ñōn jemōm, im ine erro e ar likit iom, en meralok, inem kim naj jerbal ñōn yuk. 5 Im e ar ba ñōn ir, Komin ilok im ñe e motlok jilu ran komin bar itok. Im armij rar ilok.

6 Im kiñ Rihoboam e ar bebe iben ridto rōn, ro rar jutōk iman Solomon jemen ke ej mour wōt, im ba, Ta bebe eo komij kwalok ñōn iō, bwe in uak armij rein? 7 Im rar konono ñōn e, im ba, Elañe kwo kōnan korijer ñōn armij rein ranin, im kwoj kōnan jerbal ñōn ir, im kwoj konono nan ko remōn ñōn ir, inem re naj ro dri korijerōm ñōn in drio. 8 A e ar jolok bebe an ridto rōn eo rar kwalok e, im e ar bebe iben likao rōn, ro rar ridtolok iben, ro rar jutōk iman. 9 Im e ar ba ñōn ir, Ta bebe eo komij kwalok ñōn iō, bwe jen uak armij rein, ro rar konono ñōn iō im ba, Kwon kōmōn bwe ine eo jemōm e ar likit iom en meralok? 10 Im likao rōn ro rar ridtolok iben, rar konono

nōn e, im ba, En ein drein am ba nōn armij rein, ro rar konono nōn yuk, im ba, Jemōm e ar kōmōn bwe am ine en erro wōt, a kwon kameralok e nōn kim; ein drein am naj ba nōn ir, Arririk in peiō e mijil jen ibin jema. 11 Im kiō, elañe jema e ar likit iomi ine erro, I naj kalaplok ami ine: jema e ar dreñlokwe kom kin ken dreñdreñ ko, a I naj dreñlokwe kom kin marebep ko.

12 Ein drein Jeroboam im armij otemjej rar itok nōn iben Rihoboam ran eo ken ka jilu, einwōt kiñ e ar jiroñ ir, im ba, Komir bar itok nōn iba ran eo ken ka jilu. 13 Im kiñ e ar uak im buroñe armij ro, im e ar jolok bebe eo ridto ro rar kwalok nōn e, 14 im e ar konono nōn ir ekar nōn bebe an likao ro, im ba, Jema e ar kaerro ine eo ami, a I naj kalaplok ine eo ami: jema e ar dreñlokwe kom kin ken dreñdreñ ko, a I naj dreñlokwe kom kin marebep ko. 15 Ein drein kiñ e ar jab eoroñ armij ro; bwe e juōn men Jeova e ar kōmōne bwe En kamol an in nan, eo Jeova e ar konono kin Ehaija, dri Shailon nōn Jeroboam nejin Nibat.

16 Im ke ro dri Israel otemjej rar lo bwe kiñ eo e ar jab eoroñ ir, armij ro rar uak kiñ eo, im ba, Ewi amuij kij ilo Devid? im ejelok amuij jolit ilo nejin Jesse: nōn moko imwemi, O dri Israel: im kiō Devid, kwon mōke lale mweo imōm. Ein drein ro dri Israel rar ilok nōn moko imweir. 17 A kin ro nejin Israel ro rar jokwe ilo jikin kwelok ko an Juda, Rihoboam e ar iroi jioir. 18 Inem kiñ Rihoboam e ar jilkinlok Adoram, eo e ar lale armij ro dri kamakoko; im dri Israel otemjej rar kare kin dreka bwe en mij. Im kiñ Rihoboam e ar jarōpmōkōj in uwe ion jariat eo an bwe en ko nōn Jerusalem. 19 Ein drein ro dri Israel rar kabata nae imōn Devid nōn ranin. 20 Im ke ro dri Israel otemjej rar roñ kin an Jeroboam jeblaktok, rar jiliklok in kirtok e nōn jar eo, im rar kairoi e ion Israel: ejelok e ar lor imōn Devid, a bwijin Juda wōt.

21 Im 'ke Rihoboam e ar itok nōn Jerusalem, e ar kokweloktok aolepen imōn Juda, im bwijin Benjamin, jibu-ki dualitōkñoul tausan armij, ro ar kålet ir, bwe en tōrinaek imōn Israel, bwe en kajeblaktok ailiñ eo nōn Rihoboam, nejin Solomon. 22 A nan jen Anij e ar itok nōn Shemeaia, armij ōn Anij, im ba, 23 Kwon konono nōn Rihoboam nejin Solomon, kiñ in Juda, im nōn aolepen mweo imōn Juda im Benjamin, im nōn aolepen armij ro jet, im ba, 24 Ein drein Jeova ej ba, Komin jab wōññlok ak tōrinaek ro jeōmi im jātōmi ro nejin Israel: komin jeblak jabrewōt armij nōn mweo imōn; bwe men in jen Ōa. Ein drein rar eoroñ nan jen Jeova, im rar jeblak im etal ilo ial ko air, ekar nōn nan jen Jeova.

25 Inem Jeroboam e ar kalek Shikem ilo ene utiej in Ipreim, im jokwe ie; im e ar drioielok jen e, im kalek Penuel. 26 Im Jeroboam e ar ba ilo buruen, Kiō ailiñ eo e naj jeblak nōn imōn Devid: 27 elañe armij rein rej wōññlok in katok men in katok ko ilo imōn Jeova i Jerusalem, inem buruen armij rein e naj bar oktōk nōn air iroi, aet nōn Rihoboam kiñ in Juda; im re naj mōn iō, im jeblak nōn iben Rihoboam kiñ in Juda. 28 Kin men in, kiñ eo e ar bebe kake, im e ar kōmōnmōn ruo kon in kau jen gold; im e ar ba nōn ir, Elap ami jerbal im wōññlok nōn Jerusalem: lo, ami anij, O Israel, ro rar āñintok kom jen Ijpt. 29 Im e ar likit juōn i Betel, im eo juōn e ar likite i Dan. 30 Im men in e kar juōn jerawiwi; bwe armij ro rar ilen kabuñ imairro, aet nōn Dan. 31 Im e ar kōmōn moko in jikin ko re utiej, im e ar kōmōn pris ro jen armij bōjik, ro re jab nejin Livai. 32 Im Jeroboam e ar kōtellok juōn kwojkwoj, ilo aliñ eo ken ka dualitōk, ilo ran eo ken ka joñoul lailim in aliñ eo, einwōt kwojkwoj eo ilo Juda, im e ar wōññlok nōn lokatok eo; ein drein an kōmōn i Betel, im e ar katok nōn kon in kau ko e ar kōmōni: im e ar likit i Betel

pris ro an jikin ko re utiej e ar kōmōni. 33 Im e ar wōnliñlok ñōn lokatok eo e ar kōmōne i Betel ilo ran eo ken ka joñoul lailim ilo aliñ ken ka drualitōk, aet, ilo aliñ eo e ar kine ilo buruen : im e ar kōtellok juōn kwoj-kwoj ñōn ro nejin Israel, im wōnliñlok ñōn lokatok eo bwe en kokaijurjur.

13 Im lo, e ar itok ¹juōn armij ōn Anij jen Juda, kin nan an Jeova, ñōn Betel, im Jeroboame ar jutōk iturin lokatok eo bwe en kokaijurjur. 2 Im e ar lamij nae lokatok eo kin nan in Jeova, im ba, O lokatok, lokatok, ein drein Jeova ej ba; Lo, juōn nejin man e naj lotak ñōn imōn Devid, etan Josaia; im iom e naj katok kin pris ro an jikin ko reutiej rej kokaijurjur iom, im re naj tile dri ko drin armij iom. 3 Im e ar lelok juōn kakōle ran eo, im ba, Eñin kakōle eo Jeova e ar konono kake: Lo, naj rupe lokatok eo, im naj lutōklok brij in ubaj jen ion. 4 Im ke kiñ eo e ar roñjake nan ko jen armij eo ōn Anij, eo e ar lamij nae lokatok eo i Betel, Jeroboam e ar erlokwe pein jen lokatok eo, im ba, Komin jibwe leo. Im pein eo emwij an kōtellok e nae leo, e mōralok, inem e ban nukije. 5 Im lokatok eo e bareinwōt rup, im e lutōklok brij in ubaj jen lokatok eo, ekar ñōn kakōle eo armij ōn Anij eo e ar lelok kin nan jen Jeova. 6 Im kiñ eo e ar uak im ba ñōn armij eo ōn Anij, Kwon akwelap ñōn Jeova am Anij kin joi, im jar kin iō, bwe En bar kemour peiō. Im armij eo ōn Anij e ar akwelap ñōn Jeova, im E ar bar kemour pein kiñ eo ñōn e, im ej einwōt mokta. 7 Im kiñ eo e ar ba ñōn armij eo ōn Anij, Kwon itok iba ñōn kabijukniō, im kaki, im I naj lewoj ajenkij. 8 Im armij ōn Anij e ar ba ñōn kiñ eo, Elañe kwoj letok jibilkwon mweo imōm. I jamin dreloñwoj, im I jamin mōña bred ak irak dren ilo jikin in; 9 bwe ein drein nan jen Jeova e ar jiroñ iō, im ba, Kwon jab mōña bred ak irak dren, im jab jeblaklok ilo ial eo kwar itok

ie. 10 Ein drein e ar ilok ilo bar juōn ial, im jab jeblak ilo ial eo e ar itok ñōn Betel ie.

11 Im juōn dri kanan e lōlap, e ar jokwei Betel; im juōn ian lōmaro nejin e ar item kennanek e men ko otem-jej armij ōn Anij e ar kōmōni ran eo i Betel: im nan ko e ar konono ñōn kiñ eo, rar bareinwōt kennanek jemeir. 12 Im jemeir e ar ba ñōn ir, Ial ōt e ar ilok ielok? A lōmaro nejin rar lo ial eo armij ōn Anij e ar ilok ielok, leo e ar itok jen Juda. 13 Im e ar ba ñōn lōmaro nejin, Komin kapoje ass eo. Inem rar kapoj ass eo; im e ar uwe ion. 14 Im e ar etal lor armij eo ōn Anij, im e ar loe ke ej jijōt iomin juōn wijki ok; im e ar ba ñōn e, Kwe armij eo ōn Anij eo e ar itok jen Juda ke? Im e ar ba, Ña e. 15 Inem e ar ba ñōn e, Kwon itok iba ñōn kabijukniō im mōña bred. 16 Im e ar ba ñōn e, I ban jeblak ibōm, ak dreloñ ibōm; im I jamin mōña bred ak irak dren ibōm ilo jikin in: 17 bwe emwij ba ñōn iō kin nan in Jeova, Kwon jab mōña bred ak irak dren ie, im jab rollok ilo ial eo kwar itok ie. 18 Im e ar ba ñōn e, Ña bareinwōt dri kanan einwōt kwe; im juōn enjel e ar konono ñōn iō kin nan an Jeova, im ba, Kwon kajeblaktok e ibōm ñōn mweo imōm, bwe en mōña bred im irak dren. A e ar riōp ñōn e. 19 Ein drein e ar jeblak iben, im e ar mōña bred ilo mweo imōn, im e ar irak dren.

20 Im ke rar jijōt iturin tebel eo, nan an Jeova e ar itok ñōn dri kanan eo e ar kajeblaktok e; 21 im e ar kir ñōn armij ōn Anij eo e ar itok jen Juda, im ba, Ein drein Jeova ej ba, Kin am kibia ñōn loñin Jeova, im kwar jab bokake kien eo Jeova am Anij e ar jiroñ yuk, 22 a kwar jeblaktok, im kwar mōña bred im irak dren ilo jikin eo E ar ba ñōn yuk kake, Kwon jab mōña bred ak irak dren ie; ubōm e jamin itok ñōn wuliej an ro jimam. 23 Im ke emwij an mōña bred, im emwij an irak, e ar kapoje ass eo ñōn dri kanan eo e ar kajeblaktok e. 24 Im ke e ar ilok, juōn laion e ar

wōnmae e ilo ial, im mōn e: im emwij jolok ubōn ilo ial, im ass eo e ar jutōk iturin; laion eo bareinwōt e ar jutōk iturin ubōn. 25 Im lo, eor armij rar elālok, im lo ubōn eo ej babu ilo ial, im laion eo ej jutōk iturin ubōn; im rar itok im kennan kake ilo jikin kwelok eo ijo dri kanan lōlap e ar jokwe ie.

26 Im ke dri kanan eo e ar kajeb-laktok e jen ial e ar roñjake, e ar ba, Ej armij ōn Anij, eo e ar kiblia nōn loñin Jeova: kin men in E ar lelōk e nōn laion, eo e ar kekel e, im mōn e, ekar nōn nan an Jeova, eo E ar ba nōn e. 27 Im e ar ba nōn lōmaro nejin, Komin kapoje ass eo. Im rar kapoje. 28 Im e ar ilok im lo ubōn e babu ilo ial, im ass im laion rej jimor jutōk iturin ubōn: laion e ar jab mōña ubōn, ak kekel ass eo. 29 Im dri kanan eo e ar kwotōke ubōn armij eo ōn Anij, im likite ion ass eo, im bōktok; im e ar itok nōn jikin kwelok an dri kanan eo e lōlap, bwe en jōñōt e im kalibwin e. 30 Im e ar likit ubōn ilo lūp eo an; im rar jōñōt e, im ba, Yok, jātiō! 31 Im elikin an kalibwin e, e ar konono nōn lōmaro nejin, im ba, Ñe ij mij, komin kalibwin iō ilo lūp eo, ijo emwij likit ubōn armij ōn Anij ie: komin likit dri ko driō iturin drin. 32 Bwe nan eo e ar kir kin nan in Jeova nae lokatok eo i Betel, im nae moko otemjej an jikin ko reutiej rej ilo jikin kwelok ko in Sameria, re naj jejit.

33 Elikin men in Jeroboam e ar jab jeblak jen ial eo e nana, a e ar bar kōmōn ian armij otemjej pris ro nōn jikin ko reutiej: jabrewōt eo e kōnan, e ar likit e, bwe en or pris an jikin ko reutiej. 34 Im men in juōn jerawiwi nōn imōn Jeroboam, aet nōn bukwelok e, im nōn kokkure jen mejen lōl.

14 Im ien eo Ehaija, nejin Jeroboam e nañinmij. 2 Im Jeroboam e ar ba nōn lio belen, Kwon jutōk, ij akwelap, im mōke kejakilkil yuk, bwe ren jab kile bwe kwe lio belen Jeroboam; im kwon ilok nōn Shailo: lo, ijo dri kanan Ehaija, eo e ar

konono kin nā bwe in kiñ ion armij rein. 3 Im kwon bōklok ibōm jilñoul eon bred, im kek ko, im juōn botto in hōnni, im ilok nōn iben: e naj ken-nanek yuk ta eo e naj walok nōn lad-rik eo. 4 Im lio belen Jeroboam e ar kōmōn einwōt, im jutōk, im ilok nōn Shailo, im itok nōn mweo imōn Ehaija. Im Ehaija e ban lolokjen; bwe e bilo kin an lōlap. 5 Im Jeova e ar ba nōn Ehaija, Lo, lio belen Jeroboam ej iten kajitōk ibōm kin ladrik eo nejin; bwe e nañinmij: ein drein am naj ba nōn e; bwe ñe ej dreloñtok, e naj ukot mōren nōn mōren juōn kōra.

6 Im ein drein ke Ehaija e ar roñ-jake buñten neen, ke e ar dreloñtok ilo kejem, e ar ba, Kwon dreloñtok, kwe lio belen Jeroboam; etke kwoj ukot mōrōm? bwe emwij jilkinwoj iō im nan erro iba. 7 Kwon ilem ken-nanek Jeroboam, Ein drein Jeova, Anij in Israel ej ba: Ke I ar koutiej yuk jen iben armij ro, im kairoi yuk ion dri ailiñ Aō, Israel, 8 im I ar kekel ailiñ eo jen imōn Devid, im lewoj; ijoke, kwar jab einwōt korijera Devid, eo e ar bokake kien ko Aō, im e ar lōr Iō kin aolepen buruen, im kōmōn men eo wōt e jime iman meja, 9 a kwar kōmōn nana elap jen ro otem-jej mokta jen kwe, im kwar ilem kōmōn nōn yuk anij ro jet, im men in e ko unlok, bwe kwon kakitōtōik Iō nōn illu, im kwar joliklok Iō: 10 kin men in, lo, I naj bōktok nana ion imōn Jeroboam, im I naj bukwelok jen iben Jeroboam jabrewōt nejin eman, eo emwij kili, im eo likite ina-bij ilo Israel, im I naj kanuij bukwelok imōn Jeroboam, einwōt armij ej bioklok toeōk, mae ien e aolep im joko. 11 Eo an Jeroboam ej mij ilo jikin kwelok, kiru roror re naj kōñe; im eo ej mij ilo melaj, bao in meja-toto re naj kōñe: bwe Jeova e ar ba men in. 12 Inem kwon jutōk, im ilok nōn mweo imōm, im ñe neōmñrej dreloñ ilōan jikin kwelok eo, ajiri eo e naj mij. 13 Im aolepen ro dri Israel re naj jōñōt e im kalibwin e; bwe e wōt ian nukin Jeroboam e naj

mij in atabuñ, kin ke ilo e emwij lo jabrewõt men eo emõn ñõn Jeova, Anij in Israel, ilo imõn Jeroboam. 14 Bareinwõt Jeova e naj kairoij ñõn E juõn kiñ ion Israel, eo e naj bukwelok imõn Jeroboam ilo ran eo: a ta? kiõ wõt. 15 Bwe Jeova e naj mõn Israel, einwõt e makõtkit koba ilo dren; im E naj kõtep Israel jen enin emõn E ar lelok ñõn ro jímair, im E naj kejbliklok ir etelok jen River eo, kin ke rar kõmõnmõn air Ashira, im kaillu Jeova kake. 16 Im E naj illok jen Israel kin jerawiwi ko an Jeroboam, ko e ar bwir kake, im e ar kabwir Israel kake.

17 Im lio belen Jeroboam e ar jutõk, im ilok, im itok ñõn Tirza: im ke e ar itok ñõn bit in kejem ilo mweo imõn, ajiri eo e mij. 18 Im ro dri Israel otemjej rar kalibwin e, im jõñõt e, ekar ñõn nan in Jeova, eo E ar konono kin korijeran, Ehaija, dri kanan eo.

19 Im jerbal ko jet an Jeroboam, ekijkan e ar tõrinae, im ekijkan e ar iroi, lo, emwij jeje ilo buk in bwebwenato ko an kiñ ro an Israel. 20 Im ran ko an Jeroboam iroi jofõoul ruo yiõ: im e ar kiki iben ro jiman, im Nedab leo nejin e ar kiñ im binej jenkwon.

21 Im ¹Rihoboam nejin Solomon e ar kiñ i Juda. Ridtõn Rihoboam ke e ar jino in kiñ eñoul juõn yiõ, im e ar kiñ jofõoul jiljilimjuõn yiõ i Jerusalem, jikin kwelok eo Jeova e ar kãlete jen bwij otemjej bwijin Israel, bwe En likit etan ie: im etan jinen Neama dri Amon. 22 Im Juda e ar kõmõn nana iman mejen Jeova, im rar kakitõktõik E bwe en kamo kin jerawiwi ko rar kõmõni, e laplok jen ro jímair otemjej rar kõmõni. 23 Bwe rar bareinwõt kalek ñõn ir jikin ko reutiej, im jur dreka ko, im Ashira, ion jabrewõt tol, im iomin jabrewõt wijki e māroro; 24 im bareinwõt eor dri Sodom ilo eneo: rar kõmõn ekar ñõn aolepen men in jõjõik ko an dri ailiñ ko Jeova e ar kadrioi, lok jen iman ro nejin Israel.

25 Im ¹ilo yiõ eo ken ka lailim an kiñ Rihoboam, Shaishak kiñ in Ijpt e ar wõnliñlok nae Jerusalem; 26 im e ar bõklok mweiuk ko an imõn Jeova, im mweiuk ko an imõn kiñ; aet, e ar bõklok aolep: im e ar bõklok aolepen ken tõrak gold ko Solomon e ar kõmõni. 27 Im kiñ Rihoboam e ar kõmõnmõn im binej jenkwair kin ken tõrak ko jen jinibõrõrõ, im lilok ñõn pein kapen ro dri lale, ro rar lale aur in imõn kiñ eo. 28 Im ein drein, jabrewõt ien ke kiñ eo e ar dreloñlok ilo imõn Jeova, ro jurõn kiñ eo rar ineki, im bar bõktok illoan rum eo an ro dri lale.

29 Ak jerbal ko jet an Rihoboam, im men otemjej e ar kõmõni, ar jab jeje ilo buk in bwebwenato ko an kiñ ro in Juda ke? 30 Im Rihoboam im Jeroboam rar tõrinaek dron ien otemjej. 31 Im Rihoboam e ar kiki iben ro jiman, im rar kalibwin e iben ro jiman ilo jikin kwelok an Devid: im etan jinen, Neama dri Amon. Im Ebaijam leo nejin e ar kiñ im binej jenkwon.

15 Im ²ilo yiõ eo ken ka jofõoul drualitõk an kiñ Jeroboam, nejin Nibat, Ebaijam e ar jino in kiñ ion Juda. 2 E ar kiñ i Jerusalem iomin jilu yiõ: im etan jinen, Meaka nejin Ebishalom. 3 Im e ar etetal ilo jerawiwi otemjej an jemen, ko e ar kõmõni iman; im buruen e ar jab wäppen iman Jeova an Anij, einwõt buruen Devid jemen. 4 Ijoke, kin Devid, Jeova an Anij e ar lelok ñõn e juõn lamp i Jerusalem in kairoij nejin elikin, im bwe en kakajur Jerusalem; 5 kin ke Devid e ar kõmõn men eo emõn iman mejen Jeova, im e ar jab jeorlok jen jabrewõt nan in kaifi ko An, ran ko otemjej in an mour, a ilo men in wõt an Uraia dri Het. 6 Im Rihoboam e ar tõrinaek Jeroboam ran ko otemjej in an mour.

7 Im jerbal ko jet an Ebaijam, im men ko otemjej e ar kõmõni ar jab jeje ilo buk in bwebwenato ko an kiñ ro an Juda ke? Im e kar or tõrinae ikõt an Ebaijam im Jeroboam. 8 Im

Ebaijam e ar kiki iben ro jiman; im rar kalibwin e ilo jikin kwelok an Devid: im Esa nejin e ar kiñ im binej jenkwon.

9 Im ilo yiō eo ken ka roñoul an Jeroboam iroiñ in Israel, Esa e ar jino an kiñ ion Juda. 10 Im iomin eñoul juōn yiō e ar kiñ i Jerusalem; im etan jinen Meaka lio nejin Ebi-shalom. 11 Im Esa e ar kōmōn men eō emōn iman mejen Jeova, einwōt Devid jemen. 12 Im e ar jolok jen eneo ro dri Sodom, im e ar kamōkitlok ekjōp otemjej ro jemen rar kōmōnmōni. 13 Bareinwōt e ar jolok jen an liroiñ, Meaka jinen, kin ke e ar kōmōn men in e jōjōik bwe en Ashira: im Esa e ar juokwe men in e eo an, im tile i wea Kidron. 14 A rar jab jolok jikin ko reutiej: ijoke, buruen Esa e ar wāppen iben Jeova ran ko otemjej an. 15 Im e ar bōkitok ilo imōn Jeova men ko jemen e ar aje, im men ko e ar mōke aje, silver, im gold, im jābi ko.

16 Im eor tōrinae ikōtan Esa im Beasha, kiñ in Israel, ran ko otemjej air. 17 Im Beasha e ar wōnliflok nae Juda im kalek Rema, bwe en bōpraek jabrewōt jen an drioiñ dreloñ ñōn iben Esa kiñ in Juda. 18 Inem Esa e ar bōk aolepen silver im gold e ar berwōt ilo jikin mweiuk ko an imōn Jeova, im mweiuk ko an imōn kiñ, im e ar likiti ilo pein ro dri korijeran; im kiñ Esa e ar jilkinloki ñōn Ben-hedad, nejin Tabrimon, nejin Hiziōn, kiñ in Siria, eo e ar jokwe i Damas-kōs, im ba, 19 Eor bujen ikōtarro, ikōtan jema im jemōm: lo, I ar jilkinwoj juōn men in lelok, silver im gold; kwon ilok, im jolok am bujen iben Beasha kiñ in Israel, bwe en ilok jen ña. 20 Im Ben-hedad e ar eorōñ kiñ Esa, im e ar jilkinlok kapen an jar in tōrinae ko an nae jikin kwelok ko an Israel, im e ar mōn Aijon, im Dan, im Ebel-beth-meaka, im aolepen Kinnerot, im aolepen enen Naptalai. 21 Im ke Beasha e ar roñjake, e ar ikōñ jen an kalek Rema, im e ar jokwe i Tirza. 22 Inem kiñ Esa e ar kwalok juōn nan ñōn aolepen Juda,

ejelok juōn e ar kānloke: im rar bōklok dreka ko an Rema, im alal ko an, ko Beasha e kar kalek kake: im kiñ Esa e ar kalek kaki Giba in Benjamin, im Mizpa.

23 Ak jermal ko jet an Esa im aolepen an kajur, im men ko otemjej e ar kōmōni, im jikin kwelok ko e ar kaleki, ar jab jeje ilo buk in bwebwenato ko an kiñ ro in Juda ke? A ke e ar lōlap e ar nañinmij kin neen. 24 Im Esa e ar kiki iben ro jiman, im rar kalibwin e iben ro jiman ilo jikin kwelok an Devid jemen; im Jihoshapat e ar kiñ im binej jenkwon.

25 Im Nedab nejin Jeroboam e ar jino an kiñ ion Israel ilo yiō eo ken ka ruo an Esa kiñ in Juda; im e ar kiñ ion Israel iomin ruo yiō. 26 Im e ar kōmōn nana iman mejen Jeova, im e ar etetal ilo ial an jemen, im ilo jerawiwi eo an e ar kabwir Israel kake. 27 Im Beasha, nejin Ehaija, jen imōn Issakar e ar kabata nae e; im Beasha e ar mōn e i Gibbeton, ec e kar an ro dri Pilistia; bwe Nedab im dri Israel otemjej rar nitbwile Gibbeton. 28 Aet, ilo yiō eo ken ka jilu an Esa kiñ in Juda, Beasha e ar mōne, im e ar kiñ im binej jenkwon. 29 Im ke e ar kiñ, e mōkōj an mōn aolepen imōn Jeroboam: e ar jab likit ñōn Jeroboam jabrewōt eo e menono, mae ien re mat; ekar ñōn nan jen Jeova, eo e ar konono kin dri korijeran, Ehaija dri Shailon; 30 kin jerawiwi ko an Jeroboam e ar bwir kake, im e ar kabwir Israel kake, kin kakitōtō eo e ar kalitōtōik Jeova, Anij in Israel, ñōn illu.

31 Ak jermal ko jet an Nedab, im men otemjej e ar kōmōni, ar jab jeje ilo buk in bwebwenato ko an kiñ ro in Israel ke? 32 Im eor tōrinae ikōtan Esa im Beasha aolepen ran ko air.

33 Ilo yiō eo ken ka jilu an Esa kiñ in Juda, Beasha e ar jino kiñ ion aolepen Israel i Tirza, im e ar kiñ iomin roñoul emen yiō. 34 Im e ar kōmōn nana iman mejen Jeova, im e ar etetal ilo ial an Jeroboam, im ilo jerawiwi eo an e ar kabwir Israel

16 kake. 1 Im nan jen Jeova e ar itok n̄on Jihu nejin Hanenai nae Beasha, im ba, 2 Ke I ar koutiej yuk jen brij, im kairoij yuk ion ailiñ eo aō, Israel, im kwar etetal ilo ial eo an Jeroboam, im kwar kabwir dri ailiñ eo Aō, Israel, im kaillu Iō kin bwir ko air; 3 lo, I naj rakijlok wōt Beasha im mweo imōn; im I naj kōmōn mweo imōn einwōt imōn Jeroboam nejin Nibat. 4 Eo jen Beasha ej mij ilo jikin kwelok, kiru roror re naj kōñe; im eo jen e im ej mij ilo jikin kallip, bao in mejatoto re naj kōñe.

5 A jerbal ko jet an Beasha, im men ko e ar kōmōni, im kajur eo an, re jab jeje ilo buk in bwebwenato ko an kiñ ro in Israel ke? 6 Im Beasha e ar kiki iben ro jiman, im ar kalibwin e i Tirza; im Ila nejin e ar kiñ im binej jenkwon. 7 Im bareinwōt kin dri kanan Jihu nejin Hanenai, nan jen Jeova e ar itok nae Beasha, im nae mweo imōn, kin nana eo e ar kōmōne iman mejen Jeova, bwe en kaillu E kin jerbal an pein, im bwe e ar einwōt imōn Jeroboam, im kin an mōne.

8 Ilo yiō eo ken ka roñoul jiljino an Esa kiñ in Juda, Ila nejin Beasha e ar jino kiñ ion Israel i Tirza, im e ar kiñ iomin ruo yiō. 9 Im leo korijeran, Zimrai, kapen an jibilkwon jariat ko an, e ar kabata nae e. A e ar ber i Tirza im e ar irak n̄on karek ilo imōn Arza, eo ej ion ro dron i Tirza: 10 Im Zimrai e ar dreloñlok, im mōn e bwe en mij, ilo yiō eo ken ka roñoul jiljilimjuōn an Esa kiñ in Juda, im e ar kiñ im binej jenkwon. 11 Im ke e ar jino an kiñ, kiō kiō ke ej jijōt ion tron eo an, e ar mōn aolepen imōn Beasha: e ar jab likit n̄on e juōn nejin eman, jab jen ro nukin ak ro jeran. 12 Ein drein Zimrai e ar mōn aolepen imōn Beasha, ekar n̄on nan eo jen Jeova, eo E ar konono nae Beasha kin Jihu dri kanan eo, 13 kin jerawiwi ko otemjej an Beasha, im jerawiwi ko an Ila nejin, ko rar bwir kake, im rar kabwir Israel kake, in kaillu Jeova, Anij in Is-

rael, kin men ko air rewan. 14 A jerbal ko jet an Ila, im men ko otemjej e ar kōmōn, ar jab jeje ilo buk in bwebwenato ko an kiñ ro in Israel ke?

15 Ilo yiō eo ken ka roñoul jiljilimjuōn an Esa kiñ in Juda, Zimrai e ar kiñ iomin jiljilimjuōn ran i Tirza. Armij ro rar kamp nae Gibbeton eo e kar an ro dri Pilistia. 16 Im armij ro rar ber im kamp rar roñjake airba, Zimrai e ar kabata, im bareinwōt e ar mōn kiñ eo: kin men in, dri Israel otemjej rar kōmōn Omrai, kapen an jar in tōrinae, kiñ ion Israel ran eo wōtilo kamp eo. 17 Im Omrai e ar wōnliñlok jen Gibbeton, im dri Israel otemjej iben, im rar nitbwile Tirza. 18 Im ke Zimrai e ar lo bwe rej bōk jlkin kwelok eo, e ar dreloñlok ilo me in imōn kiñ eo, im e ar tile imōn kiñ eo ion, kin kijeek, im e mij, 19 kin jerawiwi ko an e ar bwir kake, ke ej kōmōn nana iman mejen Jeova, im etetal ilo ial eo an Jeroboam, im ilo jerawiwi eo e ar kōmōne in kabwir Israel. 20 A jerbal ko jet an Zimrai, im kabata eo e ar kōmōne, ar jab jeje ilo buk in bwebwenato ko an kiñ ro in Israel ke?

21 Inem ro dri Israel rar jibil ilo ruo jar: jibilkwon iair rar lor Tibnai nejin Gainat, bwe ren kōmōn e kiñ; im jibilkwon iair rar lor Omrai. 22 A ro rar lor Omrai rar bōk anjo jen ro dron Tibnai nejin Gainat: ein drein Tibnai e ar mij, im Omrai e ar kiñ. 23 Ilo yiō eo ken ka jilñoul juōn an Esa kiñ in Juda, Omrai e ar jino in kiñ ion Israel, im e ar kiñ iomin joñoul ruo yiō: e ar kiñ jiljino yiō i Tirza. 24 Im e ar wiaik tol Sameria jen Shimer kin ruo talent silver; im e ar kalek ion tol eo, im e ar naetan jikin kwelok eo e ar kaleke, Sameria, jen etan Shimer, eo e kar an tol eo. 25 Im Omrai e ar kōmōn nana iman mejen Jeova, im e drorlōllok an kōmōn jerawiwi jen ro otemjej mokta jen e. 26 Bwe e ar etetal ilo aolepen ial an Jeroboam, nejin Nibat, im ilo jerawiwi ko an e ar kabwir Israel kake, bwe en kaillu Jeova, Anij in Israel,

kin air jerbal ko rewan. 27 A jerbal ko jet an Omrai ko e ar kōmōni, im kajur eo an e ar kwaloke, ar jab jeje ilo buk in bwebwenato ko an kiñ ro in Israel ke? 28 Ein drein Omrai e ar kiki iben ro jiman, im ar kalibwin e ilo Sameria; im Ehab nejin e ar kiñ im binej jenkwon.

29 Im ilo yiō eo ken ka jilñoul druaitōk an Esa kiñ in Juda, Ehab nejin Omrai e ar jino kiñ ion Israel: im Ehab nejin Omrai e ar kiñ ion Israel ilo Sameria roñoul ruo yiō. 30 Im Ehab nejin Omrai e drorlōllok an kōmōn nana iman mejen Jeova jen ro otemjej mokta jen e. 31 Im einwōt elañe an etetal ilo jerawiwi ko an Jeroboam nejin Nibat, men in jekron, e ar bōk nōn e belen, Jezebel lio nejin Ethbeal, kiñ an ro dri Saidon, im e ar ilem korijer nōn Beal, im kabuñ nōn e. 32 Im e ar kalek juōn lokatok nōn Beal ilo imōn Beal, eo e ar kaleke i Sameria. 33 Im Ehab e ar kōmōnmōn Ashira ko; im Ehab e ar drorlōllok jen kiñ ro otemjej in Israel mokta jen e, in kaillu Jeova, Anij in Israel. 34 Ilo ran ko an, Haiel dri Betel e ar kalek Jeriko: ke e ar likit loñtōk ko an, e joko Ebairam manjien, im ke e ar kajur aur ko an, inem e mij Sigōb eo nejin man erikata, ekar nōn nan an Jeova, eo E ar konono kin Joshua nejin Nōn.

17 Im Ilaija, dri Tishba, eo e kar juōn ian ro dri itoitōk in Giliad, e ar ba nōn Ehab, Einwōt Jeova Anij in Israel e mour, eo ña ij jutōk iman, e naj ejelok molawi ak wut iomin yiō kein, a ekar nōn nan ko aō. 2 Im nan an Jeova e ar itok nōn e, im ba, 3 Kwon ilok jen ijin, im jujeltalok, im tilekek iturin wea Kirit, eo ej iman Jordan. 4 Im e naj ein drein, kwo naj irak jen dren ilo wea eo; im I ar jiroñ bao reven ko bwe ren najirik yuk ijo. 5 Ein drein e ar ilok im kōmōn ekar nōn nan in Jeova; bwe e ar ilok im jokwe iturin wea Kirit, eo iman Jordan. 6 Im bao reven ko rar bōktok nōn e bred im kōniek ke ejiboñ, im bred im kōniek ke ejota; im e ar irak jen wea eo. 7 Im toke-

lik, wea eo e ar roj, bwe ejelok wut ilo eneo.

8 Im nan an Jeova e ar itok nōn e, im ba, 9 Kwon jerkak, im ilok nōn Zarepat, eo an Saidon, im jokwe ijo: lo, emwij Aō jiroñ juōn kōra e joko belen bwe en najirik yuk ijo. 10 Ein drein e ar jerkak im ilok nōn Zarepat; im ke e ar itok nōn kejem in jikin kwelok eo, lo, juōn kōra e joko belen, e ar ber ijo im ae kani: im e ar kir nōn lio, im ba, Kwon bōktok, ij akwelap, jirik dren ilo juōn jābi bwe in irak. 11 Im ke ej ilen bōktok, e ar kir nōn e, im ba, Kwon bōktok nōn iō ij akwelap, jirik mōtōn bred ilo peōm. 12 Im lio e ar ba, Einwōt Jeova am Anij e mour, ejelok juōn kek iba, a flauo ilo jābi eo itōkin wōt juōn pā, im jirik oil ilo botto eo: im lo, ij aini ruo alal bwe in dreloñ im kōmāte nōn kimro ladrik eo nejio bwe kimin kōñe, inem mij. 13 Im Ilaija e ar ba nōn e, Kwon jab mijōk; kwon ilen kōmōn einwōt am ba; a kwon kōmōn jen e juōn aō kek erik mokta, im bōktok nōn iō, im tokelik kwon kōmōn nōn kwe im ladrik eo nejōm. 14 Bwe ein drein an Jeova, Anij in Israel ba, Flauo e jamin riklok ilo jābi eo, im e jamin joko oil jen botto eo, mae ran eo ñe Jeova ej jilkinlok wut ion eneo. 15 Im e ar ilem kōmōn ekar nōn nan eo an Ilaija: im leo, im lio, im dri mweo imōn, rar mōña elōñ ran. 16 Flauo e ar jab riklok ilo jābi eo, im oil e ar jab joko jen botto eo, ekar nōn nan an Jeova, eo e ar ba kin Ilaija.

17 Im elikin men kein, ladrik eo nejin kōra liroi in mweo e ar nañinmij; im kin an kanuij drorlōllok e joko an menono. 18 Im lio e ar ba nōn Ilaija, Ta ibōm im iba, O kwe armij ōn Anij? kwar itok nōn iba bwe kwon kakememej iō kin aō bwir, im mōn ladrik eo nejio ke? 19 Im e ar ba nōn lio, Kwon letok nejōm. Im e ar bōke jen ubōn lio, im bōkliñlok e na ilo bo eo, ijo e ar ber ie, im likite ion aowej eo an. 20 Im e ar kir nōn Jeova, im ba, O Jeova aō Anij, Kwar bōktok nana ion lio e joko belen, kin

Am mōn ladrik eo nejin ke? 21 Im e ar beroane ladrik eo jilu alen, im e ar kir ñōn Jeova, im ba, O Jeova aō Anij, ij akwelap, an ladrik in en bar dreloñtok iben. 22 Im Jeova e ar eoroñ ainiken Ilaija; im ¹ an ladrik eo e ar bar dreloñtok, im ej mour. 23 Im Ilaija e ar bōk ladrik eo im bōklōllok jen bo eo ñōn loan mweo, im lelok e ñōn jinen: im Ilaija e ar ba, Lo, nejōm ej mour. 24 Im kōra eo e ar ba ñōn Ilaija, Kiō I jela bwe kwe juōn armij ñōn Anij, im nan an Jeova i loñōm e mol.

18 Im elikin elōñ ran, nan in Jeova e ar itok ñōn Ilaija ilo yiō eo ken ka jilu, im ba, Kwon ilok, kwon mōke kwalok yuk ñōn Ehab; im I naj jilkinlok wut ion eneo. 2 Im Ilaija e ar ilen mōke kwalok e ñōn Ehab. Im ñita eo e kanuij nana ilo Sameria. 3 Im Ehab e ar kir Obedaia eo e ar iroijs ion mweo imōn. (A Obedaia ej kanuij mijōk Jeova: 4 bwe ein drein, ke Jezebel e ar bukwelok ro dri kanan an Jeova, Obedaia e ar bōk jibuki dri kanan im e ar noj ir ka limñoul ilo juōn roñ, im e ar najirik ir kin bred im dren.) 5 Im Ehab e ar ba ñōn Obedaia, Kwon driblok aolepen eneo, ñōn unin dren ko otemjej, im ñōn wea ko otemjej: bwelen je naj maroñ lo ujoij im lomoren mour an ors ko im mul ko, bwe en jab joko aolepen kiru ko. 6 Ein drein rar ajej eneo ñōn irro, bwe ren etale: Ehab e ar ilok ilo juōn ial mōke ian, im Obedaia e ar ilok ilo bar juōn ial mōke ian.

7 Im ke Obedaia e ar ber ilo ial, lo, Ilaija e ar ion e: im e ar kile, im e ar buñbero, im ba, Kwe ne aō iroijs Ilaija ke? 8 Im e ar uak, Ña e: kwon ilok, kennanek am iroijs, Lo, Ilaija ijin. 9 Im e ar ba, Ewi aō jerawiwi, bwe kwo kōnan ketōk iō korijerōm na ilo pein Ehab bwe en mōn iō? 10 Einwōt Jeova am Anij e mour, ejelok ailiñ ak enen kiñ, ijo aō iroijs e ar jab jiliklok in kabukot yuk: im ke rar ba, E joko ijin, e ar kabinbin iben enen kiñ eo ak ailiñ eo, bwe rar jab lo

yuk. 11 Im kiō kwoj ba, Kwon ilem kennanek am iroijs, Lo Ilaija ijin. 12 Im kiō kiō ñe I motlok, Jitōb òn Jeova e naj bōklok yuk ñōn ijo I jaje kake; im ein drein ñe ij iten kennanek Ehab, im e ban lo yuk, e naj mōn iō: a ña korijerōm ij mijōk Jeova jen ke I ar inono. 13 Rar jab kennanek aō iroijs ta eo I ar kōmōne ke Jezebel e ar mōn ro dri kanan an Jeova, ekijkan I ar noj jibuki man rōn ian ro dri kanan an Jeova, ka limñoul, ilo juōn roñ, im najirik ir kin bred im dren ke? 14 Im kiō kwoj ba, Kwon kennanek am iroijs, Lo, Ilaija ijin; inem e naj mōn iō. 15 Im Ilaija e ar ba, Einwōt Jeova an inelipe eo e mour, Eo ij jutōk iman, emol I naj mōke kwalok iō ñōn e ranin.

16 Ein drein Obedaia e ar ilen wōnmae Ehab, im kennanek e; im Ehab e ar ilen wōnmae Ilaija. 17 Im ke Ehab e ar lo Ilaija, Ehab e ar ba ñōn e, Kwe eo kwoj kejjoran Israel ke? 18 Im e ar uak, Ña I ar jab kejjoran Israel; a kwe, im imōn jemōm, kin ami illok jen kien ko an Jeova, im kwar lor Beal. 19 Inem kiō, kwon jilkinlok, im kokweloktok ñōn iba dri Israel otemjej ñōn tol Karmel, im ro dri kanan an Beal, ābuki limñoul, im ro dri kanan an Ashira, ābuki ro rej mōña ilo tebel an Jezebel.

20 Ein drein Ehab e ar jiliklok ñōn ro dri Israel otemjej, im kokweloktok ro dri kanan ñōn tol Karmel. 21 Im Ilaija e ar druaklok ñōn iben aolepen armij ro, im ba, Ietoñ ami ajkub ikōtan ruo lemnok? elañe Jeova ej Anij, komin lor E: a elañe Beal, inem komin lor e. Im armij ro re jab uak ñōn jirik. 22 Inem Ilaija e ar ba ñōn armij ro, Ña, aet, ña wōt, ij ber, dri kanan an Jeova; a ro dri kanan an Beal ābuki limñoul armij. 23 Inem ren letok ñōn kim ruo kau koman; im ren kālet juōn kau koman ñōn ir mōke, im wojiblokloke, im likite ion kani, im jab likit kijeek iomin. 24 Im komin kir etan anij eo emi, im ña I naj kir etan Jeova, im

Anij eo ej uak kin kijeek, eñeo en Anij. Im armij otemjej rar uak im ba, Emōn am roñ.

25 Im Ilaija e ar ba ñōn ro dri kanan an Beal, Komin kālet juōn kau koman ñōn kom mōke, im kapoje mokta; bwe kom lōñ, im komin kir etan ami anij, a komin jab likit kijeek iomin. 26 Im rar bōk kau koman eo ar lelok ñōn ir, im rar kapoje, im rar kir etan Beal jen jiboñ ñōn raelip, im re ba, O Beal, kwon eoroñ kim. A ejelok ainiken, ak jabrewōt eo ej uak. Im rar kelok iturin lokatok eo emwij kōmōnmōne. 27 Im ke e raelip, Ilaija e ar kajirere kake ir, im ba, Komin kanuij lamij; bwe e juōn anij, ej kalomōnlokjen, ak e ar ilok, ak ej etetal ijo etolok, ak bwelen ej kiki, im emōn kworuj e. 28 Im rar kanuij lamij, im bukwe enbwinir, einwōt mōnit eo air, kin bōkbōk im jāji ko, inem bōtōktōk e ar torlok na ioir. 29 Im jen jebelin al rar drikanij ñōn ien katok in jota; a ejelok ainiken, ak jabrewōt eo ej uak, ak eoroñ ir.

30 Inem Ilaija e ar ba ñōn armij otemjej, Komin druaktok; im armij otemjej rar druaktok ñōn iben. Im e ar kōkal lokatok eo an Jeova, eo e ar jorran. 31 Im Ilaija e ar bōk joñoul ruo dreka, ekar ñōn oran bwijin ro nejin Jakob, ro nan in Jeova e ar itok ñōn ir im ba, Israel e naj etōm. 32 Im kin dreka ko e ar kalek juōn lokatok ilo etan Jeova; im e ar kōbij juōn jukur im kabol lokatok eo, e bwe ñōn ruo joñōk in ine. 33 Im e ar kilajrōk kani, im wojibloklok kau koman eo, im likite na ion kani. Inem e ar ba, Komin teñ emen jābi relap kin dren, im lutōkloke ion men in katok kijeek eo, im ion kani. 34 Im e ar ba, Komin kōmōne alen ken ka ruo; im rar kōmōne alen eo ken ka ruo. Im e ar ba, Komin kōmōne alen ken ka jilu; im rar kōmōne alen eo ken ka jilu. 35 Im dren eo e ar torlok im kabol lokatok eo; im e ar bar-einwōt kalōñ jukur eo kin dren. 36 Im ilo ien katok in jota, Ilaija dri kanan eo, e ar druaktok, im ba, O Jeova,

Anij an Ebream, an Aisak, im an Israel, ren jela ranin, bwe Kwe Anij ilo Israel, im ña dri korijerōm, im bwe I ar kōmōn men kein otemjej kin Am in nan. 37 Kwon eoroñ iō, O Jeova, Kwon eoroñ iō, bwe armij rein ren jela bwe Kwe, Jeova, Kwoj Anij, im bwe Kwar bar ukōttok burueir. 38 Inem kijeek jen Jeova e ar buñ im tili men in katok kijeek eo, im kani, im dreka ko, im bōñlōñlōñ, im jorme dren ilo jukur eo. 39 Im ke armij otemjej rar loe, rar buñbero: im re ba, Jeova, ej Anij; Jeova, ej Anij. 40 Im Ilaija e ar ba ñōn ir, Komin jibwe ro dri kanan an Beal, ejelok juōn en dreor. Inem rar jibwe ir: im Ilaija e ar āñirlok ir ñōn wea Kaishon im mōn ir ijo.

41 Im Ilaija e ar ba ñōn Ehab, Kwon wōnliñlok, kwon mōña im irak; bwe eor ainiken elōñ wut. 42 Ein drein Ehab e ar wōnliñlen mōña im irak. Im Ilaija e ar wōnliñlok ñōn jabōn Karmel; im e ar bukwe lōlō im lōrōk ikōtan buken. 43 Im e ar ba ñōn leo korijeran, Kwon wōnliñlok kiō, im reimetolok. Im e ar wōnliñlok im reilok, im ba, Ejelok. Im e ar ba, Kwon bar ilok alen jiljilimjuōn. 44 Im ilo alen eo ken ka jiljilimjuōn, e ar ba, Lo, ej wōnliñlok jen lojit juōn kōro, biren pā. Im e ar ba, Kwon wōnliñlok, kwon ba ñōn Ehab, Kwon kapoje jariot eo am, im wōnlōllok, bwe en jab wuten kabojōk yvk. 45 Im kiōlok jirik e kilmej lōñ kin kōro im kōto, im e wut mejiljil. Im Ehab e ar uwe im ilok ñōn Jezriel: 46 im pein Jeova e ar ber ion Ilaija; im e ar kañōrñōr, im etōr iman Ehab ñōn kejem in Jezriel.

19 Im Ehab e ar kennanek Jezebel men ko otemjej Ilaija e ar kōmōni, im ekijkan e ar mōn dri kanan otemjej an Beal kin jāji. 2 Inem Jezebel e ar jilkinlok juōn dri jilik ñōn iben Ilaija, im ba, Ein drein anij ro ren kōmōn ñōn ña, im kalaplok, elañe I jab kōmōn bwe am mour en einwōt mour an juōn iair, mae ien in ilju. 3 Im ke leo e ar lo men in, e ar jutōk, im ko kin an mour, im itok ñōn

Bier-shiba, eo an Juda, im e ar likit leo korijeran ijo. 4 A e ar ilok ilo ial iomin juōn ran ilo ene jemaren, im e ar item jijōt iomin juōn wijki juniper: im e ar kajitōk kin e mōke bwe en mij, im e ar ba, Ebwe; kiō, O Jeova, kwon bōk ao mour; bwe I jab emōn jen ro jimaō. 5 Im e ar babu im kiki iomin wijki juniper eo; im lo, juōn enjel e ar uñire, im ba ñōn e, Kwon jerkak im mōña. 6 Im e ar lale, im lo, i jabbōran juōn kek emwij kōmate ion melle ko, im juōn bōkā in dren. Im e ar mōña im irak, im bar babu. 7 Im enjel ōn Jeova e ar bar itok alen ken ka ruo, im uñire, im ba, Kwon jerkak im kabije, bwe kwo bane ial eo. 8 Im e ar jerkak, im mōña im irak, im e ar etetal ilo kajur in ekōn eo, eñoul ran im eñoul boñ ñōn Horeb, tol in Anij.

9 Im e ar itok ñōn ijo, ñōn juōn roñ, im e ar jokwe ie; im lo, nan an Jeova e ar itok ñōn e, im e ar ba ñōn e, Kwoj it ijin, Ilaija? 10 Im e ar ba, Ña I ar kanuij kamo kin Jeova, Anij in inelip eo; bwe ro nejin Israel rar illok jen bujen eo Am, rar jolōllok lokatok ko Am, im rar mōn dri kanan ro Am kin jāji: im ña, aet, ña wōt juōn, ij berwōt; im rej bukot aō mour bwe ren bōke. 11 Inem E ar ba, Kwon drioijslok, im jutōk ion tol iman Jeova. Im lo, Jeova e ar elā jen e, im juōn kōto elap im e kajur e ar ukjelli tol ko, im rupe dreka ko iman Jeova; a Jeova e ar jab ber ilo kōto eo: im elikin kōto eo, e makōtkit lōl; a Jeova e ar jab ber ilo an lōl makōtkit: 12 im elikin an makōtkit lōl, juōn kijeek; a Jeova e ar jab ber ilo kijeek eo: im elikin kijeek eo, juōn ainiken erik im emera. 13 Im ein drein ke Ilaija e ar roñjake, e ar binej mejen kin liboror eo an, im e ar drioijslok im jutōk iman mejen roñ eo. Im lo, juōn ainiken e ar itok ñōn e, im ba, Kwoj it ijin, Ilaija? 14 Inem e ar ba, Ña I kar kanuij kamo kin Jeova, Anij in inelip eo; bwe ro nejin Israel rar illok jen bujen eo Am, rar jolōllok lokatok ko Am, im mōn dri kanan ro Am kin

jāji; im ña, aet, ña wōt juōn, ij berwōt; im rej bukot aō mour bwe ren bōke.

15 Im Jeova e ar ba ñōn e, Kwon ilok, jeblaklok ilo ial eo am ñōn ene jemaren an Damaskōs: im ñe kwoj tōkāk kwon kabit Hazael bwe en kiñ ion Siria; 16 im Jihu nejin Nimshai kwon kabite bwe en kiñ ion Israel; im Ilaija nejin Shepat dri Ebel-mihola kwon kabit e bwe en dri kanan im binej jenkwōm. 17 Im e naj ein drein, eo ej ko jen jāji eo an Hazael, Jihu e naj mōne, im eo ej ko jen jāji an Jihu, Ilaija e naj mōne. 18 Mekarta, I naj likit ñōn lō jiljilimjuōn tausan ilo Israel, bukeir otemjej rar jab bukwelōlō ñōn Beal, im loñir otemjej rar jab mejenmaik e.

19 Ein drein e ar ilok jen ijo, im e ar lo Ilaija nejin Shepat, eo e ar tōblōl kin roñoul emen ox karuolok iman, im e iben ko eliktata; im Ilaija e ar ilok ñōn iben, im jolok kobe eo an ion. 20 Im e ar likit ox ko, im etōrlōk ñōn iben Ilaija, im ba, Ij akwelap bwe in mejenmaik jema im jinō, inem I naj lor yuk. Im e ar ba ñōn e, Kwon bar jeblak; bwe ta eo I ar kōmōne ñōn yuk? 21 Im e ar jeblak jen an lore, im e ar bōk ox ko ruo, im mōni, im kōmāt kōniekir kin ken jermal ko an ox ko, im e ar lelok ñōn armij ro, im rar mōña. Inem e ar jutōk im etal lore Ilaija, im korijer ñōn e.

20 Im Ben-hedad, kiñ in Siria, e ar kokweloktok aolepen jar in tōrinae eo an; im iben jilñoul ruo kiñ, kab ors ko im jariot ko: im e ar wōn-liñlok im nitbwil Sameria, im tōrinaek e. 2 Im e ar jilkinlok ro dri jilik ñōn iben Ehab kiñ in Israel, iloan jikin kwelok eo, im re ba ñōn e, Ein drein Ben-hedad ej ba, 3 Am silver im gold aō; limaro beleōm bareinwōt im ajiri ro nejōm, aet, ro remōntata iair aō. 4 Im kiñ in Israel e ar uak, im ba, Ekar ñōn am in nan, aō iroijs, O kiñ; ña am, im men otemjej iba. 5 Inem ro dri jilik re bar itok, im re ba, Ein drein Ben-hedad ej ba, Emwij

aō jilkinwoj im ba, Kwo naj litok am silver, im am gold, im limaro beleōm, kab ajiri ro nejōm; 6 a I naj jilkinwoj ro dri korijera ilju e nañin ien in, im re naj okbij ilo mweo imōm im moko imōn ro drom; inem e naj ein drein, jabrewōt men eo emōn ilo mejeir, re naj jibwe im bōkilok.

7 Inem kiñ in Israel e ar kirtok ridto ro otemjej in eneo, im ba, Komin lale, ij kajitōk, im lo ekijkan armij in ej bukot jarkōn nana: bwe e ar jiliktok ñōn iō kin limaro beliō, im ro nejō, im aō silver, im aō gold; im I ar jab abwin e. 8 Im ridto ro otemjej im armij otemjej rar ba ñōn e, Kwon jab eoroñ e, im jab bōk ñōn buruen. 9 Kin men in, e ar ba ñōn ro dri jilik an Ben-hedad, Komin kennanek aō iroiñ kiñ eo, Men otemjej kwar jiliktok ñōn iō kake mokta, I naj kōmōne; a men in I ban kōmōne. Im ro dri jilik rar ilem bar bōklok nan ñōn iben. 10 Im Ben-hedad e ar jiliktok ñōn e, im ba, Anij ro ren kōmōn ein drein ñōn iō, im kalaplok, elañe bōñōlñōl an Sameria e bwe ñōn iōtkin pā iben ro rej lor iō. 11 Im kiñ in Israel e ar uak im ba, Komin kennanek e, Eo ej kañōrñōr ken tōrinae ko, en jab kimjāje einwōt eo ej wutiki. 12 Im Ben-hedad e ar roñjake nan in ke e ar irak bwe en karek, e im kiñ ro, ilo im nuknuk ko, im e ar ba ñōn ro dri korijeran, Komin kalejar. Im rar kalejar nae jikin kwelok eo.

13 Im lo, juōn dri kanan e ar druaktok ñōn iben Ehab kiñ in Israel, im ba, Ein drein Jeova ej ba, Kwar lo jar in elap ke? lo, I naj ketōk e na ilo peōm ranin; im kwo naj jela bwe Ña Jeova. 14 Im Ehab e ar ba, Kin wōn? Inem e ar ba, Ein drein Jeova ej ba, Kin likao in iroiñ ro jen bukwōn ko. Inem e ba, Wōn eo en jino tōrinae eo? Im e ar uak, Kwe. 15 Inem e ar tiltil likao in iroiñ ro jen bukwōn ko, im rubuki jilñoul ruo: im elikir e ar tiltil armij otemjej, aet ro nejin Israel otemjej, jiljilimjuōn taus-san.

16 Im rar drioijlok ke e raelip. A Ben-hedad e ar irak im e karek ilo mo-

ko im nuknuk, e kab kiñ ro, kiñ ro jilñoul ruo ro rar jibōñ e. 17 Im likao in iroiñ ro an bukwōn ko rar drioijlok mokta; im Ben-hedad e ar jiliklok, im rar kenannek e im ba, Eor eman rar drioijtok jen Sameria. 18 Inem e ar ba, Elañe rej drioijtok kin ainemōn, komin jibwe ir, a elañe rej drioijtok kin tōrinae, komin bareinwōt jibwe ir. 19 Ein drein rein rar drioijtok jen jikin kwelok eo, likao in iroiñ ro an bukwōn ko, im jar in tōrinae eo e ar lor ir. 20 Im rar mōn jabrewōt iair, armij eo kajan; im ro dri Siria rar ko, im dri Israel rar lukworkwor ir; im Ben-hedad kiñ in Siria e ar ko ion juōn ors iben ro dri uwe ion ors ko. 21 Im kiñ in Israel e ar drioijlok im jebōke ors ko im jariot ko, im rar mōn ro dri Siria kin im elap.

22 Im dri kanan eo e ar druaktok ñōn iben kiñ in Israel, im e ar ba, Kwon ilok, kwon manjabbobo, im lale ta eo rej kōmōne; bwe ilo yiō ej itok, kiñ in Siria e naj wōnliñlok nae yuk. 23 Im ro dri korijeran kiñ in Siria rar ba ñōn e, Air anij ej anij in tol ko, kin men in rar kajur jen kij: a jen tōrinaek ir ijo ej biken wōt juōn, im emol je naj kajur jen ir. 24 Im kwon kōmōn men in, kwon bōk kiñ ro, jabrewōt eman jen jikin, im binej jenkwair kin kapen ro; 25 im kwon bwini ñōn yuk jar in tōrinae, bar oran wōt jar in tōrinae eo am e joko, ors kin ors, im jariot kin jariot; inem je naj tōrinaek ir ijo biken wōt juōn, im emol je naj anjo jen ir. Im e ar eoroñ ainikeir, im ein drein an kōmōn.

26 Inem ilo yiō eo ej itok, Ben-hedad e ar tiltil ro dri Siria, im rar wōnliñlok ñōn Epek bwe ren tōrinaek Israel. 27 Im rar tiltil ro nejin Israel, im na air jotal im rar drioijlok nae ir, im ro nejin Israel rar kamp imair einwōt ruo bwij erik bwijin kon in got ko; a ro dri Siria rar kobrōk eneo. 28 Im armij òn Anij e ar druaklok im konono ñōn kiñ in Israel, im ba, Ein drein Jeova ej ba, Kin an ro dri Siria ba, Jeova ej anij in tol ko, a e jab anij in komlōl ko, inem I

naj ketōk aolepen jar eo elap na ilo peōm, im kom naj jela bwe Ña Jeova. 29 Im rar kamp jelmae dron jiljilimjuōn ran. Im ein drein ilo ran eo ken ka jiljilimjuōn rar kobep; im ro nejin Israel rar mōn ian ro dri Siria jibuki tausan dri etetal ilo juōn ran. 30 A ro mātōn iri rar ko ñōn Epek, im worwor eo e ar eolok im buñōt roñoul jiljilimjuōn tausan ian ro rej berwōt. Im Ben-hedad e ar ko, im dreloñ ilo jikin kwelok eo, ilo juōn bo etino.

31 Im ro dri korijeran rar ba ñōn e, Lo kiō, jar roñjake bwe kiñ ro an imōn Israel re joij: kim akwelap bwe jen kōnōk nuknuk eklep iren ion ibēr, im to ko ion bōrer, im drioiĵlok ñōn iben kiñ in Israel: bwelen e naj lomoren mour eo am. 32 Ein drein rar kañōrñōr ir kin nuknuk eklep iren, im likit to ko ion bōrair, im rar itok ñōn iben kiñ in Israel, im ba, Dri korijerōm Ben-hedad ej ba, Ij akwelap bwe kwon kejbārok aō mour. Im e ar ba, Ej mour wōt ke? e jātīō. 33 Ak lōmaro rar kanuij kalimjeke, im kijorur in jela elañe ej ber ilo buruen; im re ba, Jātōm Ben-hedad. Inem e ar ba, Komin ilen āñintok e. Inem Ben-hedad e ar drioiĵtok ñōn iben; im e ar ektōk e ilo jariot eo. 34 Im Ben-hedad e ar ba ñōn e, Jikin kwelok ko jema e ar bōk jen jemōm, I naj bar liwoj; im kwo naj kōmōn ial ko ñōn kwe ilo Damaskōs, einwōt jema e ar kōmōn ilo Sameria. Im ña, Ehab ej ba, I naj kōtlok yuk kin bujen in. Ein drein e ar kōmōn bujen iben, im kōtlok e.

35 Im juōn eman ian ro nejin dri kanan ro e ar ba ñōn leo jeran kin nan jen Jeova, Kwon mōn iō, ij akwelap. Im armij eo e ar abwin mōn e. 36 Inem e ar ba ñōn e, Kin am jab bokake ainiken Jeova, lo, ñe kwoj ilok jen iba, e naj mōkōj an juōn laion mōn yuk. Im kiōkiō ke e motlok, e mōkōj an juōn laion lo e im mōn e. 37 Inem e ar lo bar juōn eman, im e ba, Kwon mōn iō, ij akwelap. Im armij eo e ar mōn e, im ĳakinijnij e. 38 Ein drein dri kanan

eo e ar ilok, im kōtar kiñ eo ilo ial, im mōke keĵakilkil e kin ken kitimi bōran ion mejen. 39 Im ke kiñ eo ej elā, e ar kir ñōn kiñ eo; im e ba, Ña korijerōm I ar drioiĵlok ilo tōrinae eo, im lo, juōn eman e ar jeortok, im āñintok juōn eman ñōn iba, im e ar ba, Kwon kejbārok lein: elañe leo e joko ilo jabrewōt wāwen, inem am mour e naj wōnan an mour, a elañe jab kwo naj kōlla juōn talent in silver. 40 Im ke ña korijerōm ij jerbal bōjik iji im ijueo, e joko. Im kiñ in Israel e ar ba ñōn e, Ein drein ekajet eo am; kwe wōt kwar beike. 41 Im e ar mōkōj im bōk nuknuk eo jen mejen; im kiñ in Israel e ar kile bwe e juōn ian ro dri kanan. 42 Im e ar ba ñōn e, Ein drein Jeova ej ba, Kin am kōtlok jen peōm armij eo I ar likite drien mij, inem am mour e naj joko kin mour eo an, im ro drom kin ro dron. 43 Im kiñ in Israel e ar ilok ñōn mwēo imōn, erro buruen im illu, im itok ñōn Sameria.

21 Elikin men kein, iben Nebot dri Jezriel, juōn bwil in grep, eo ilo Jezriel, im e ar atartar i mwēo imōn Ehab kiñ, in Sameria. 2 Im Ehab e ar konono ñōn Nebot, im ba, Kwon letok am bwil in grep bwe en aō jikin kallip ñōn ine ko, bwe ebak mwēo imō: im I naj lewoj juōn bwil in grep emōn jen e: ak, elañe emōn ibōm, I naj lewoj wōnan mōnni. 3 Im Nebot e ar ba ñōn Ehab, Jeova en bōprae aō lewoj ñōn yuk lāmōren jen ro jimaō. 4 Im Ehab e ar dreloñ ilo mwēo imōn, erro buruen im illu kin nan eo Nebot dri Jezriel e ar ba ñōn e; bwe emwij an ba, I jamin lewoj lāmōren jen ro jimaō. Inem e ar babu ion aowej eo an, im e ar illok mejen, im e ar makoko in mōña bred.

5 A Jezebel, lio belen, e ar itok ñōn iben, im e ba ñōn e, Etke am ej buromōj, inem kwo jab mōña bred? 6 Im e ar ba ñōn lio, Kin ke I ar konono ñōn Nebot dri Jezriel, im ba ñōn e, Kwon letok bwil in grep eo am kin mōnni; a elañe ein juōn, ñe emōn ibōm, I naj lewoj bar juōn bwil in

grep kin e : im e ar aak, I jamin lewoj aō bwil in grep. 7 Im Jezebel, lio belen, e ar ba ñōn e, Kweo kwoj kiñ ion ailiñ in Israel ke? kwon jerkak, im mōña bred, im buruōm en mōñōñō: ña, I naj lewoj bwil in grep an Nebot dri Jezriel. 8 Ein drein lio e ar jeje letter ko ilo etan Ehab, im e ar sile kin sil eo an, im e ar jilkinlok letter ko ñōn ridto ro im iroi ro ilo jikin kwelok eo an, im rar jokwe iben Nebot. 9 Im e ar je ilo letter ko, im ba, Komin kwalok juōn jītlok, im likit Nebot eutie ilo bwilñin armij rōn : 10 im komin likit ruo eman, rewan, iman, im ren kennan nae e, im ren ba, Kwar kebele Anij im kiñ eo. Inem komin kadrioielok e, im kare kin dreka bwe en mij.

11 Im man ro an jikin kwelok eo an, aet, ridto ro, im iroi ro rar jokwe ilo jikin kwelok eo, rar kōmōn einwōt Jezebel e ar jiliklok ñōn ir, ekar ñōn nan eo emwij jeje ilo letter ko e ar jilkinlok ñōn ir. 12 Rar kwalok juōn jītlok, im rar koutiej Nebot i bwilñir. 13 Im lōmaro ruo rewan, rar dreloñlok im jijōt iman : im ro rewan rar kennan nae e, aet, nae Nebot, iman armij ro, im ba, Nebot e ar kebele Anij im kiñ eo. Inem rar kadrioielok e jen jikin kwelok eo, im rar kare kin dreka, ñōn ien e mij. 14 Inem rar jiliklok ñōn Jezebel, im ba, Emwij kare Nebot kin dreka, im e mij. 15 Im ke Jezebel e ar roñjake bwe emwij kare Nebot kin dreka, inem e mij, Jezebel e ar ba ñōn Ehab, Kwon jerkak im bōk am bwil in grep an Nebot dri Jezriel, eo e ar abwin lewoj kin mōñni : bwe Nebot e jab mour, a e mij. 16 A ke Ehab e ar roñjake bwe Nebot e mij, e ar jerkak im wōñliñlok ñōn bwil in grep an Nebot, dri Jezriel, bwe en bōke.

17 Im nan an Anij e ar itok ñōn Ilaija dri Tishba, im ba, 18 Kwon jutōk, kwon wōñlōllok in wōñmae Ehab kiñ in Israel, eo ej jokwe ilo Sameria; lo, ej ilo bwil in grep an Nebot, ijo e ar wōñlōllok bwe en bōke. 19 Im kwon konono ñōn e, im ba, Ein drein Jeova ej ba, Emwij am mōn ke, im

kwar bareinwōt bōke ke? Im kwo naj konono ñōn e im ba, Ein drein Jeova ej ba, Ilo jikin eo kiru roror rar drōmije bōtōktōkin Nebot, kiru roror re naj drōmije bōtōktōkōm, aet am. 20 Im Ehab e ar ba ñōn Ilaija, Kwar lo iō ke, O kwe dri kijirāte iō? Im e ar uak, Emwij aō lo yuk, kin ke kwar mōke wiakake yuk bwe kwon kōmōn nana iman mejen Jeova. 21 Lo, I naj bōktok nana iom, im I naj kanuij bioklok yuk, im I naj bukwelok jen Ehab, jabrewōt nejin man, im eo emwij kile im eo ej inabij ilo Israel: 22 im I naj kōmōn mweo imōm einwōt mweo imōn Jeroboam nejin Nibat, im einwōt mweo imōn Beasha nejin Ehaija, kin nana eo kwar kaillu Iō kake, im eo kwar kabwir Israel kake. 23 Im kin Jezebel bareinwōt, Jeova e ar konono im ba, Kiru roror re naj kōñe Jezebel iturin worwor in Jezriel. 24 Eo an Ehab ej mij ilo jikin kwelok, kiru roror re naj kōñe; im eo ej mij ilo melaj, bao in meja-toto re naj kōñe. 25 (A ejelok juōn einwōt Ehab, eo e ar mōke wiakake bwe en kōmōn nana iman mejen Jeova, eo Jezebel lio belen e ar karel e. 26 Im e ar kōmōn men in jōjōik ko kin an lor ekjōp ko, ekar ñōn men ko otemjej ro dri Amor rar kōmōni, ro Jeova e ar lelok ir jen iman ro nejin Israel.)

27 Im ke Ehab e ar roñjake nan kein, e ar kekel nuknuk ko an, im kōñōk nuknuk eklep iren, im jītlok, im babu ilo nuknuk eklep iren, im jokmera. 28 Im nan an Jeova e ar itok ñōn Ilaija dri Tishba, im ba, 29 Kwoj lo ekijkan Ehab ej kōtaik e imaō ke? kin an mōke kōtaik e imaō, I jamin bōktok nana eo ilo ran ko an; a ilo ran ko an leo nejin I nej bōktok nana eo ion mweo imōn.

22 Im iomin jilu yiō ejelok tōrinae ikōtan Siria im Israel. 2 Im ilo yiō eo ken ka jilu, Jihoshapat kiñ in Juda e ar wōñlōltok ñōn iben kiñ in Israel. 3 Im kiñ in Israel e ar ba ñōn ro dron, Komij jela bwe Remot-giliad ej ar, im jej ikōñ, im jab bōk e jen pein kiñ in Siria ke?

4 Im e ar ba ñōn Jihoshapat, Kwo kōnan ilok ibalok ñōn tōrinae i Remot-giliad ke? Im Jihoshapat e ar ba ñōn kiñ in Israel, Ña einwōt kwe, ro droō rej einwōt ro drom, im ors ko aō einwōt bar ors ko am.

5 Im Jihoshapat e ar ba ñōn kiñ in Israel, Kwon kajitōk mokta, ij akwelap, kin nan in Jeova. 6 Inen ¹kiñ in Israel e ar kokweloktok ro dri kanan, e nañin ābuki armij, im e ba ñōn ir, In ilok mae Remot-giliad im tōrinae ke, jab ke? Im re ba, Kwon wōnliflok; bwe Iroi j e naj ketōk e na ilo pein kiñ ne. 7 A Jihoshapat e ar ba, E bar or dri kanan an Jeova ijin ke, bwe jen kajitōk iben? 8 Im kiñ in Israel e ar ba ñōn Jihoshapat, bar mātōn juōn eman je maroñ in kajitōk iben Jeova kake, Maikeia nejin Imla: a ij dike; bwe e jab drikanij emōn kin ña, a nana. Im Jihoshapat e ar ba, En jab ein drein an kiñ ba. 9 Inem kiñ in Israel e ar kirtok juōn dri kabwiyrōk, im ba, Kwon āñintok mōkōj Maikeia nejin Imla. 10 Ak kiñ in Israel im Jihoshapat kiñ in Juda rej jimor jijōt ion tron ko air, im rar kōnōk liboror ko air, liboror in kiñ, ilo juōn jikin e alikar iman kejem in Sameria; im dri kanan ro otemjej rej drikanij imairro. 11 Im Zedekaia nejin Keneana, e ar kōmōnmōn ñōn e drun māl ko, im e ba, Ein drein Jeova ej ba, Kin men kein kwo naj iunlok ro dri Siria mae ien re joko otem joko. 12 Im dri kanan ro otemjej rar drikanij einwōt, im re ba, Kwon wōnliflok ñōn Remot-giliad im jerammōn; bwe Jeova e naj ketōk e na ilo pein kiñ ne.

13 Im dri jilik eo e ar ilen kirtok Maikeia e ar konono ñōn e, im ba, Lo, kiō nan ko an dri kanan rej kwalok emōn ñōn kiñ eo kin loñir wōt juōn: am in nan, ij akwelap, en einwōt nan an juōn iair, im kwon konono emōn. 14 Im Maikeia e ar ba, Einwōt Jeova e mour, men eo Jeova ej ba ñōn iō, nan eo I naj kwalok e. 15 Im ke e ar itok ñōn iben kiñ eo, kiñ eo e ar ba ñōn e, Maikeia, jen ilok

ñōn Remot-giliad ñōn tōrinae ke, jab ke? Im e ar uak e, Kwon ilok im jerammōn; im Jeova e naj ketōke na ilo pein kiñ ne. 16 Im kiñ eo e ar ba ñōn e, Jete alen aō naj kanōjni j ñōn yuk, bwe kwon kwalok ñōn iō ejelok, a mol wōt ilo etan Jeova? 17 Im e ar ba, I ar lo aolepen dri Israel re jibliklik ion tol ko, einwōt sip ko ejelok air seperd: im Jeova e ba, Rein ejelok air iroi j; ren jeblaklok, jabrewōt iair ñōn mw eo imōn, ilo ainemōn. 18 Im kiñ in Israel e ar ba ñōn Jihoshapat, I ar jab kennanek yuk bwe e jamin drikanij emōn kin ña, a nana ke? 19 Im Maikeia e ar ba, Inem kwon roñjake nan an Jeova: Ña I ar lo Jeova ej jijōt ion tron eo An, im dri lōñ otemjej rej jutōk iturin i anbijmaroñōn im i anmiñin. 20 Im Jeova e ar ba, Wōn e naj mone Ehab, bwe en wōnliflok im buñ i Remot-giliad? Im juōn e ar konono ilo juōn wāwen; im bar juōn e ar ba ilo wāwen juōn. 21 Im e ar drioi jtok juōn jitōb, im ej jutōk iman Jeova, im e ba, Ña I naj mone. 22 Im Jeova e ar ba ñōn e, Kin ta? Im e ba, I naj drioi jtok im I naj juōn jitōb in riōp ilo loñin dri kanan ro an otemjej. Im E ar ba, Kwo naj karel e, im kwo naj bareinwōt anjo: kwon drioi jtok, im kōmōn einwōt. 23 Inem kiō, lo, emwij an Jeova likit juōn jitōb in riōp ilo loñin dri kanan rein otemjej am; im Jeova ej konono jerata kin kwe.

24 Inem Zedekaia nejin Keneana e ar druaktok im ubrare Maikeia ion jeben, im ba, Ilo ial ōt Jitōb ōn Jeova e ar ilok jen ña bwe en konono ñōn yuk? 25 Im Maikeia e ar ba, Lo, kwo naj lo ilo ran eo, ñe kwoj dreloñ ilo juōn rum etino bwe kwon tilekek. 26 Im kiñ in Israel e ba, Komin bōk Maikeia, im kajeblak e ñōn iben Amon, iroi j in jikin kwelok eo, im ñōn Joash leo nejin kiñ; 27 im komin ba, Ein drein kiñ eo ej ba, Komin likit kijōk in ilo prison eo, im najirik e kin bred in iñtan im dren in iñtan, mae ien aō itok ilo ainemōn. 28 Im Maikeia e ba, Elañe kwoj jeblak wōt ilo ainemōn, Jeova e ar jab konon i kin ña.

Im e ba, Komin roñjake, kom dri ailñ ko otemjej.

29 Ein drein kiñ in Israel im Jihoshapat kiñ in Juda rar wōnliñlok ñōn Remot-giliad. 30 Im kiñ in Israel e ar ba ñōn Jihoshapat, I naj mōke kejakilkil iō, im ilok ilo tōrinae eo; a kwon kōnōk am nuknuk in kiñ. Im kiñ in Israel e ar mōke kejakilkil e, im ilok ñōn tōrinae eo. 31 Ak kiñ in Siria e ar jiroñ kapen ro jilñoul ruo in jariat ko an, im ba, Komin jab tōrinaek ro redrik ak ro relap, kiñ in Israel wōt. 32 Im ke kapen ro an jariat ko rar lo Jihoshapat, rar ba, Emol e kiñ in Israel; im rar jeorlok in tōrinaek e: im Jihoshapat e ar lamij. 33 Im ke kapen ro an jariat ko rar lo bwe e jab kiñ in Israel, rar ok-tōklik jen air lukworkwore. 34 Im juōn eman e ar kiele libon eo an ñōn jabrewōt, im e ar lil kiñ in Israel ikōtan mōtōn ko mōtōn ken tōrak eo an, kin men in e ar ba ñōn eo e ar lale jariat eo an, Kwon ukōt peōm, im bōklok iō jen jar in tōrinae; bwe I kanuij kwōt. 35 Im tōrinae eo e ar laplok ran eo: im rar jibōñ kiñ eo ilo jariat eo an nae ro dri Siria, im e mij ke ejota; im bōtōktōkin e ar torlok jen kinej eo kinjen ilo kabin jariat eo. 36 Im ke e nañin tulok al juōn lamij e ar driblok jar in tōrinae eo, im ba, Jabrewōt armij ñōn jikin kwelok eo an, im jabrewōt armij ñōn enen.

37 Ein drein kiñ eo e ar mij, im rar bōktok e ñōn Sameria; im rar kalibwin kiñ eo i Sameria. 38 Im rar kwole jariat eo iturin lwe in Sameria; im kiru roror rar drōmije bōtōktōkin, (ak kōra rekijoñ re kin tutu ijo); ekar ñōn nan an Jeova eo e ar konono kake. 39 Ak jermal ko jet an Ehab, im men otemjej e ar kōmōni, im mwēo imōn aivori e ar kaleke, im jikin kwelok otemjej e ar kaleki, ar jab jeje kake ilo buk in bwebwenato ko an kiñ ro in Israel ke? 40 Ein drein Ehab e ar kiki iben ro jiman;

im Ehazaia nejin, e ar kiñ im binej jenkwōn.

41 Im ¹Jihoshapat nejin Esa e ar jino an kiñ ion Juda ilo yiō eo ken kemen an Ehab iroiñ ion Israel. 42 Jihoshapat e ar ridtōn jilñoul lailim yiō ke e ar jino an kiñ; im e ar kiñ iomin roñoul lailim yiō i Jerusalem. Im etan jinen, Ezuba, lio nejin Shilhai. 43 Im e ar etetal ilo aolepen ial an Esa jemen; e ar jab jeorlok jen e, im e ar kōmōn emōn iman mejen Jeova: ijoke, rar jab jolok jikin ko reutiej; armij ro rej katok wōt im kōkaijurjur ilo jikin ko reutiej. 44 Im Jihoshapat e ar kōmōn ainemōn iben kiñ in Israel.

45 Ak jermal ko jet an Jihoshapat, im kajur eo e ar kwaloke, im ekijkan an tōrinae, rar jab jeje ilo buk in bwebwenato ko in kiñ ro in Juda ke? 46 Im mātōn ro dri Sodom, ro rar berwōt jen ran ko an Esa jemen, e ar jolok ir jen eneo. 47 Im ejelok kiñ i Idom; juōn e jab kiñ ej iroiñ ie. 48 Jihoshapat e ar kōmōnmōn wa ko i Tarshish bwe ren ilok ñōn Opir kin gold; a rar jab ilok; bwe e rup wa ko i Izaion-giber. 49 Inem Ehazaia nejin Ehab e ar ba ñōn Jihoshapat, ro dri korijera ren uwe iben ro dri korijerōm ilo wa ko. A Jihoshapat e jab kōnan. 50 Im Jihoshapat e ar kiki iben ro jiman, im rar kalibwin e iben ro jiman ilo jikin kwelok an Devid jemen; im Jehoram e ar binej jenkwōn im kiñ.

51 Ehazaia nejin Ehab e ar jino in kiñ ion Israel i Sameria ilo yiō eo ken ka joñoul jiljilimjuōn an Jihoshapat kiñ ion Juda, im e ar kiñ ion Israel iomin ruo yiō. 52 Im e ar kōmōn nana iman mejen Jeova, im etetal ilo ial an jemen, im ilo ial an jinen, im ilo ial an Jeroboam nejin Nibat, eo e ar kabwir Israel kake. 53 Im e ar jermal ñōn Beal, im kabuñ ñōn e, im e ar kaillu Jeova, Anij in Israel, ekar ñōn aolepen men ko jemen e ar kōmōne.

KIŊ RO

1 Im Moab e ar kabata nae Israel elikin an Ehab mij. **2** Im Ehazaia e ar buñ jen windo ilo bo in mwewo imōn ilo Sameria, inem e nañinmij: im e ar jilkinlok rodri jilik, im ba ñōn ir, Komin ilok, im kajitōk iben Beal-zibub, anij in Ekron, elañe I naj mour jen nañinmij in. **3** A enjel ōn Jeova e ar ba ñōn Ilaija dri Tishba, Kwon jutōk, im ilen wōnmae ro dri jilik jen kiñ in Sameria, im ba ñōn ir, Komij ilen kajitōk iben Beal-zibub, anij in Ekron, kin ke ejelok Anij ilo Israel ke? **4** Inem kiō ein drein Jeova ej ba, Kwo jamin to jen aowej ne ijo kwar uwe ie, a emol kwo naj mij. Im Ilaija e ar ilok.

5 Im ro dri jilik rar jeblaktok ñōn iben, im e ar ba ñōn ir, Etke komij roltok? **6** Im re ba ñōn e, Juōn eman e ariten wōnmae kim, im e ar ba ñōn kim, Komin jeblak ñōn kiñ eo e ar jilkinlok kom, im ba ñōn e, Ein drein Jeova ej ba, Kwoj jilkinlok im kajitōk iben Beal-zibub, anij in Ekron, kin ke ejelok Anij ilo Israel ke? kin men in kwo jamin to jen aowej ne ijo kwar uwe ie, a emol kwo naj mij. **7** Im e ba ñōn ir, Ie ein man eo e ar iten wōnmae kom, im kenanek kom men kein? **8** Im re uak e, E juōn eman ekolole, im juōn kōñōr kilin kiru ej kabol ibin. Im e ar ba, Ej Ilaija dri Tishba.

9 Inem kiñ eo e ar jilkinlok juōn kapen in limñoul, im ro limñoul dron iben. Im e ar wōnliñlok ñōn iben: im lo, ej jijōt ion jabōn tol eo. Im e ar ba ñōn e, O armij ōn Anij, kiñ eo e ar ba, Kwon wōnlōltok. **10** Im Ilaija e ar uak im ba ñōn kapen in limñoul eo, Elañe ña juōn armij ōn Anij, kijeek en wōnlōltok jen lōñ im tile yuk im ro limñoul drom. Im kijeek e ar wōnlōltok jen lōñ im tile leo im limñoul ro dron. **11** Im e bar jil-

kinlok ñōn e juōn kapen in limñoul, im ro limñoul dron. Im e ar uak im ba ñōn e, O armij ōn Anij, ein drein kiñ eo e ar ba, Kwon jarōplōltok. **12** Im Ilaija e ar uak im ba ñōn ir, Elañe ña juōn armij ōn Anij, kijeek en wōnlōltok jen lōñ, im tile yuk im ro limñoul drom. Inem kijeek an Anij e ar wōnlōltok jen lōñ, im tile leo im ro limñoul dron. **13** Im e ar bar jilkinlok juōn kapen in limñoul, eo ken ka jilu, iben limñoul ro dron. Im kapen eo ken ka jilu im ro limñoul dron rar wōnliñlok, im item bukwelōlō iman Ilaija, im akwelap ñōn e, im ba ñōn e, O armij ōn Anij, ij akwelap bwe aō mour, im mour an rein limñoul ro dri kōrijerōm, ren aurōk iman mejōm. **14** Lo, kijeek e ar wōnlōltok jen lōñ, im tile kapen ro ruo mokta, kapen in limñoul kab limñoul ro droir; a kiō aō mour en aurōk iman mejōm. **15** Im enjel ōn Jeova e ar ba ñōn Ilaija, Kwon wōnlōllok iben: kwon jab mijōk e. Im e ar jutōk, im wōnlōllok ñōn iben kiñ eo. **16** Im e ar ba ñōn e, Kin am jilkinlok ro dri jilik bwe kwon kajitōk iben Beal-zibub, anij in Ekron, men in bwe ejelok Anij in Israel bwe kwon kajitōk An in nan ke? kin men in, kwo jamin to jen aowej ne ijo kwar uwe ie, a emol kwo naj mij.

17 Ein drein e ar mij ekar ñōn nan an Jeova, eo Ilaija e ar konono kake. Im Jehoram e ar jino in kiñ, im binej jenkwōn, ilo yiō eo ken ka ruo an Jehoram nejin Jihoshapat kiñ in Juda; bwe ejelok nejin man. **18** Ak jerbak ko jet an Ehazaia, ko e ar kōmōni, ar jab jeje ilo buk in bwebwenato ko an kiñ ro in Israel ke?

2 Im ke Jeova e kōnan¹ bōklinlok Ilaija kin juōn aire ñōn lōñ, Ilaija e ar ilok iben Ilaiha jen Gilgai.

¹ Jen. 5. 24.

2 Im Ilaija e ar ba ñõn Ilaisha, Kwon berwõt ijin, ij akwelap; bwe Jeova e ar jilkinlok iõ ñõn Betel. Im Ilaisha e ba, Einwõt Jeova e mour, im einwõt kwoj mour, I jamin ilok jen kwe. Ein drein rejro wõnlõllok ñõn Betel. 3 Im lõmaro nejin dri kanan ro i Betel rar drioiptok ñõn iben Ilaisha, im ba ñõn e, Kwo jela bwe Jeova e naj bõk karo eo am jen bõrõm ranin ke? Im e ba, Aet, I jela; komin kejeklokjen. 4 Im Ilaija e ar ba ñõn e, Ilaisha, kwon berwõt ijin, ij akwelap; bwe Jeova e ar jilkinlok iõ ñõn Jeriko. Im e ar ba, Einwõt Jeova e mour, im einwõt kwoj mour, I jamin ilok jen kwe. Ein drein rejro itok ñõn Jeriko. 5 Im lõmaro nejin dri kanan ro i Jeriko, rar druaktok ñõn iben Ilaisha, im ba ñõn e, Kwo jela bwe Jeova e naj bõklok karo eo am jen bõrõm ranin ke? Im ej uak, Aet, I jela; komin kejeklokjen. 6 Im Ilaija e ar ba ñõn e, Kwon berwõt ijin, ij akwelap, bwe Jeova e ar jilkinlok iõ ñõn Jordan. Im e ar ba, Einwõt Jeova e mour, im einwõt kwoj mour, I jamin ilok jen kwe. Im irro rar etal wõt. 7 Im limñoul man ian ro nejin dri kanan ro rar ilok, im jutõk ikijer im toane ir: im irro jutõk iturin Jordan. 8 Im Ilaija e ar bõk liboror eo an, im lukti, im dreñlokwe dren ko, im rar jibil jen dron ñõn ijen im ijen, ein drein rejro elã ion ene emõra. 9 Im ke emwij air elãlok, Ilaija e ar ba ñõn Ilaisha, Kwon kajitõk ta eo I naj kõmõne ñõn yuk, mokta jen bõklok iõ jen kwe. Im Ilaisha e ar ba, Ij kajitõk bwe en ruo alen am jitõb ber iõ. 10 Im e ar ba, Kwar kajitõk juõn men ebin: ijoke, elañe kwoj lo iõ ñe naj bõklok iõ jen ibõm, e naj ein drein ñõn yuk; a elañe jab, e jamin einwõt. 11 Im ke rejro etal wõt, im konono, lo, e ar walok juõn jariot kijeek, im ors ko kijeek, ko rar kijbil ir jen dron: im Ilaija e ar wõnliñlok ilo juõn aire ñõn lõñ. 12 Im Ilaisha e ar loe, im e ar lamij, Jema, jema, jariot ko an Israel, im dri uwe ion ors ro an!

Im e ar jab bar loe: im e ar jibwe

nuknuk ko an mõke, im kekele ilo ruo mõtõn. 13 Ej bareinwõt kapjere liboror an Ilaija, eo e ar wutlok jen e, im e ar jeblak, im jutõk i tõreren Jordan. 14 Im e ar bõk liboror an Ilaija eo e ar wutlok jen e, im e ar dreñlokwe dren ko, im ba, Ewi Jeova, Anij an Ilaija? Im ke e ar bareinwõt dreñlokwe dren ko, rar jibil, ijen im ijen; im Ilaisha e ar elãlok.

15 Im ke lõmaro nejin dri kanan ro, i Jeriko ikijen, rar loe, re ba, Jitõb õn Ilaija ej juk ion Ilaisha. Im rar iten wõnmae e, im barikrik jen e ion lõl. 16 Im rar ba ñõn e, Lo kiõ, iben ro dri korijerõm limñoul man re kajur; ren ilok, kimij akwelap ñõn yuk, im bukot karo eo am, ñe ab Jitõb õn Jeova e ar bõkliñlok im jolõllok e ion juõn tol, ak ilo juõn komlõl. Im e ar ba, Kom jamin jilkinlok. 17 Im ke rar akwelap ñõn e mae ien e jok kake, e ar ba, Komin jilkinlok. Inem rar jilkinlok limñoul eman, im kabukot e iomin jilu ran, a re jab loe. 18 Im rar jeblak ñõn iben ke e ar berwõt i Jeriko; im e ba ñõn ir, i ar jab ba ñõn kom ke, Komin jab ilok?

19 Im ro dri jikin kwelok eo rar ba ñõn Ilaisha, Kwon lale, kim akwelap, emõn biktokin jikin kwelok in, einwõt aõ iroi ej lo: a dren eo e nana, im eneo e lourõ. 20 Im e ar ba, Komin bõktok ñõn iõ juõn bõka ekal, im likit jätõk na ilon. Im rar bõktok ñõn iben. 21 Im e ar drioiptok ñõn unin dren ko, im ej jolok jätõk eo na ilon, im ba, Ein drein an Jeova ba, Emwij Aõ kemour dren kein; e naj ejelok bar jet mij ak lourõ jen ijo. 22 Ein drein e enno dren ko ñõn ranin, ekar ñõn nan eo Ilaisha e ar konono kake.

23 Im e ar wõnliñlok jen ijo ñõn Betel; im ke e ar wõnliñlok ilo ial eo, jet ladrik rar drioiptok jen jikin kwelok eo, im rar kajirere kake e, im re ba ñõn e, Kwon wõnliñlok, kwe kwumät; kwon wõnliñlok kwe kwumät. 24 Im e ar oktõklik im lo ir, im e ar kebel ir ilo etan Jeova. Im ruo baer kokõra rar drioiptok jen bukwoñ wijki ko, im rar kekel eñoul ruo ladrik

lair. 25 Im e ar ilok jen ijo ñõn tol Karmel, im jen ijo e ar jeblak ñõn Sameria.

3 Jehoram nejin Ehab e ar jino in kiñ ion Israel ilo yiõ eo ken ka drualitõk an Jihoshapat kiñ ion Juda, im e ar kiñ iomin joñoul ruo yiõ. 2 Im e ar kõmõn nana iman mejen Jeova, a e jab einwõt kar jemen, ak einwõt jinen; bwe e ar jolok jurõn Beal eo jemen e ar kõmõnmõne. 3 Ijoke, e ar edrep ñõn jerawiwi ko an Jeroboam nejin Nibat, ko e ar kabwir Israel kake; e ar jab illok jeni.

4 Ak Misha kiñ in Moab juõn dri mweie kin sip; im e ar lelok ñõn kiñ in Israel kolan jibuki tausan lam, im jibuki tausan sip koman. 5 A ke e mij Ehab, kiñ in Moab e ar kabata nae kiñ in Israel. 6 Im kiñ Jehoram e ar driojlok jen Sameria ien eo, im e ar teltillok ro dri Israel otemjej. 7 Im e ar ilem jiliklok ñõn Jihoshapat kiñ in Juda, im ba, Kiñ in Moab e ar kabata nae iõ: kwo kõnan ilen tõrinaek Moab iba ke? Im e ar ba, I naj wõnliñlok, ña einwõt kwe, ro droõ einwõt ro drom, ors ko aõ einwõt ors ko am. 8 Im e ar ba, Ial õt jen wõnliñlok ie? Im e ar ba, Ial in ene jemaren in Idom. 9 Ein drein kiñ in Israel e ar ilok, im kiñ in Juda, im kiñ in Idom; im rar etetal ilo ial likijerer iomin jiljilimjuõn ran: im ejelok limen jar in tõrinae eo, ak kiru ko rar lor ir. 10 Im kiñ in Israel e ar ba, Yok! bwe Jeova e ar kokweloktok kiñ rein jilu in ketõk ir na ilo pein Moab. 11 A Jihoshapat e ar ba, Eorke juõn dri kanan ijin an Jeova, bwe jen kajitõk iben Jeova kin e? Im juõn ian ro dri korijeran kiñ in Israel e ar uak im ba, Ilaisha nejin Shepat ej ber ijin, eo e ar lutõklok dren ion pein Ilaia. 12 Im Jihoshapat e ar ba, Nan an Jeova ej ber iben. Ein drein kiñ in Israel im Jihoshapat im kiñ in Idom rar wõnlõllok ñõn iben.

13 Im Ilaisha e ar ba ñõn kiñ in Israel, Ta eo ibõm im iba? kwon ilok ñõn dri kanan ro an jemõm, im ñõn dri

kanan ro an jinõm. Im kiñ in Israel e ar ba ñõn e, Jab; bwe Jeova e ar kokweloktok kiñ rein jilu in ketõk ir na ilo pein Moab. 14 Im Ilaisha e ar ba, Einwõt Jeova in inelip eo e mour, Eo ña ij jutõk iman, emol, elañe e kar jab Jihoshapat kiñ in Juda ijin, I jamin kar reiwoj, ak lo yuk. 15 A kiõ komin añintok ñõn iba juõn dri kajõñjõñ. Im ke dri kajõñjõñ eo ej kajõñjõñ, pein Jeova e ar itok ion. 16 Im e ar ba, Ein drein an Jeova ba, Komin kõmõn elõñ jukur ilo komlõl in. 17 Bwe ein drein Jeova ej ba, Kom jamin lo kõto, im kom jamin lo wut; a komlõl in e naj lõñ kin dren, im kom naj jimor irak, kom im kiru ko ami. 18 Im men in emera iman mejen Jeova: E naj bareinwõt ketõk ro dri Moab na ilo peõmi. 19 Im kom naj kokkure jabrewõt jikin kwelok eor an worwor, im jabrewõt jikin kwelok e kanuij emõn, im kom naj juokwe jabrewõt wijki emõn, im binej unin dren ko otemjej, im kokkure jabrewõt mõtõn ene emõn kin dreka ko. 20 Im ke ejiboñ, e nañin ien katok, lo, e ar walok dren ilo iallok ñõn Idom, im elõñ eneo kin dren.

21 Ke ro dri Moab rar roñjake bwe kiñ ro rar iten tõrinaek ir, rar teltilltok, ro otemjej rar maroñ in kõnõk ken tõrinae ko, im ridtolok jen ir, im rar jutõk ilo tõreren eneir. 22 Im rar jerkak ke ejiboñ wõt, im al e ar romak ion dren eo, im ro dri Moab rar lo dren eo ikijeir ekilmir einwõt bõtõktõk: 23 im rar ba, Eñin bõtõktõk; emol emwij kokkure kiñ ro, im rar mõn jabrewõt eman eo kajen: inem kiõ, Moab, ñõn rakim eo. 24 Im ke rar itok ñõn kamp in Israel, ro dri Israel rar jutõk im mõn ro dri Moab, ein drein rar ko jen imair; im rar toloñe eneo im mõn ro dri Moab. 25 Im rar kejebeplok jikin kwelok eo; im ion jabrewõt wãto emõn, rar jolok jabrewõt eman juõn dreka, im kobrõk e kake; im rar binej unin dren ko otemjej, im juokwe wijki emõn otemjej, mae ien rar tõbar Kir-hariset, im rar likit wõt dreka ko

an; ijoke, ro dri buat rar kabole im kakkure. 26 Im ke kiñ in Moab e ar lo bwe tōrinae eo e kajur jen e, e ar bōk iben jiljilimjuōn buki man rar nuri jāji, bwe en driblok nōn iben kiñ in Idom; a e bane. 27 Inem e ar bōk leo manjien, eo e naj kar kiñ im binej jenkwōn, im katok kake katok kijeek ion worwor eo. Im elap illu nae ro dri Israel: im rar illok jen e, im jeblak nōn eneir.

4 Im juōn kōra, lio belen juōn ian ro nejñ dri kanan ro, e ar lamij nōn Ilaisha, im ba, Korijerōm, leo beliō, e mij; im kwo jela bwe dri korijerōm eo e ar mijōk Jeova; im e mottok dri kamuri eo bwe en bōk ladrik ro ruo nejio bwe ren dri kama-koko. 2 Im Ilaisha e ar ba nōn e, Ta eo in kōmōn nōn yuk? kwon ba mōk; eor ta ibōm iloan mweo? Im lio e ar ba, Ejelok iba iloan mweo, a juōn wōt bōkā in oil. 3 Inem e ar ba, Kwon ilen kajerbal nōn yuk jen dri turōm otemjej, jābi ko, jābi ejelok kobair; en jab eiet. 4 Im kwon dreloñ, im kil aur eo ilikōm im ladrik ro nejōm, im lutōk na ilo aolepen jābi ko; im kwon kejenolok ko relōñ. 5 Ein drein lio e ar ilok jen iben, im e ar kil aur ilikin im ladrik ro nejñ; rar bōklok jābi ko nōn iben, im e ar lutōk. 6 Im ke relōñ jābi ko, e ar ba nōn ladrik eo nejñ, Kwon bar bōktok juōn jabi. Im e ar ba nōn e, Ejelok bar juōn jābi. Im oil eo e bwij-rōk. 7 Inem e ar iten kennanek armij ōn Anij. Im e ar ba, Kwon ilok, wiakake oil eo, im kōlla muri eo am, im kwe im ladrik ro nejōm komin bōk bween ami men in mour.

8 Im ilo juōn ran Ilaisha e ar ilok nōn Shunem, ijo juōn liātōktōk, im lio e ar drebij e bwe en mōña bred. Im ein drein, jabrewōt ien ke e ar elā, e ar dreloñ ijo bwe en mōña bred. 9 Im lio e ar ba nōn leo belen, Lo kiō, ij kile bwe lein ej juōn armij ōn Anij e kwojarjar, eo ej itoitōk ijin ien otemjej. 10 Ij kajitōk bwe jen kōmōn juōn bo erik ion worwor eo; im jen likit ijo nōn e, juōn aowej im juōn tebel, im juōn jikin jijōt, im

juōn jikin lamp: im ñe ej itok nōn iber e naj dreloñ ijo. 11 Im juōn ran, ke e ar itok ijo, e ar dreloñ ilo bo eo, im babu ie. 12 Im e ar ba nōn Gihezai, leo korijeran, Kwon kirtok dri Shunem in. Im ke e ar kirtok e, lio e ar jutōk iman. 13 Im e ar ba nōn leo, Kwon ba nōn lio, Lo, kwar kanuij kejbārok im ierke kimro: ta eo emōn kōmōne nōn yuk? kwo kōnan ke bwe in konono kin yuk nōn kiñ eo, ak kapen an jar in tōrinae? Im lio e ar uak, Ña ij jokwe iben ro dri ailiñ aō. 14 Im leo e ar ba, Ta eo emōn kōmōne kin e? Im Gihezai e ar uak, Emol ejelok nejñ eman, im leo belen e lōlap. 15 Im e ar ba, Kwon kirtok e. Im ke emwij an kirtok e, lio e ar jutōk ilo kejem. 16 Im e ar ba, Teren drein, ñe ien e jejit, kwo naj jiburlep juōn nejōm ladrik. Im e ar ba, Jab, aō iroi, kwe armij ōn Anij, kwon jab riōp nōn ña korijerōm.

17 Im kōra eo e ar etta im keutak juōn ladrik teren eo, ke ien e jejit, einwōt Ilaisha e ar ba nōn e. 18 Im ke e ridtolok ladrik eo ilo juōn ran, e ar drioiylok nōn iben jemen nōn ro dri marmir. 19 Im e ar ba nōn jemen, Bōra, bōra. Im leo e ar ba nōn korijeran, Kwon bōklok e nōn iben jinen. 20 Im ke emwij an bōklok e nōn iben jinen, e ar jijōt ion buken nōn raelip, inem e mij. 21 Im lio e ar wōnliñlok im likit e ion aowej eo an armij ōn Anij, im kil aur, im drioiylok. 22 Im e ar kir nōn leo belen, im ba, Kwon jilkintok nōn iba, ij akwelap, juōn ian dri korijer ro, im juōn ass, bwe in etōr nōn iben armij eo ōn Anij, im bar itok. 23 Im e ar ba, Etke kwo kōnan ilok nōn iben ranin? e jab aliñ ekal, ak ran in Sabat. Im lio e ar ba, E najemōn. 24 Inem e ar kapoje juōn ass, im e ar ba nōn dri korijeran, Kwon kaiure, im wōnmanlok; kwon jab karikrik aō wōnmanlok elañe I jab jiroñ yuk. 25 Ein drein e ar ilok, im itok nōn iben armij eo ōn Anij nōn tol Karmel.

Im ke armij ōn Anij e ar loe etolok, e ar ba nōn Gihezai, korijeran, Lo,

ijueo lio dri Shunem: 26 kwon etōr, ij kajitōk, kiō in wōnmae e, im ba nōn e, Emōn ke ibōm? emōn ke iben leo beleōm? emōn ke iben ladrik eo? Im e ar uak, Emōn. 27 Im ke e ar itok nōn iben armij ōn Anij ion tol eo, e ar kapjere neen. Im Gihezai e ar druaklok bwe en iunlok e; a armij ōn Anij e ar ba, En berwōt: bwe an e buromōj iloan; im Jeova e ar noje jen nā, im E ar jab kennanek iō. 28 Inem lio e ba, I ar kajitōk ibōm, aō iroi, kin juōn nejio ke? I ar jab ba ke, Kwon jab mone iō? 29 Inem leo e ar ba nōn Gihezai, Kwon kañōrñōr ibim, im bōk jokwōna ilo peōm, im etal wōt: elañe kwoj wōnmae jabrewōt armij, kwon jab yokyokwe e; im elañe jabrewōt ej yokyokwe yuk, kwon jab uak e: im likit jokwōna ion mejen ladrik eo. 30 Im jinen ladrik eo e ar ba, Einwōt Jeova e mour, im einwōt kwoj mour, I jamin ilok jen ibōm. Im e ar jutōk, im lore. 31 Im Gihezai e ar ilok imairlok, im likit jokwōn eo ion mejen ladrik eo; a ejelok ainiken ak roñjake. Kin men in e ar jeblak im wōnmae leo, im e ar kennanek e, im ba, Ladrik eo e jañin ruj.

32 Im ke Ilaisha e ar itok iloan mweo, lo, ladrik eo e mij, im e babu ion aowej eo an. 33 Inem e ar dreloñ, im kil irro, im jar nōn Jeova. 34 Im e ar beroane ladrik eo, im likit loñin ion loñin, im mejen ion mejen, im pein ion pein ladrik eo: im e ar kōnkōn ion; im kōniekin ladrik eo e mānānlok. 35 Inem e ar jeblak im itoitōk ilo mweo juōn alen; im e ar wōnliflok im kōnkōn ion ladrik eo; im ladrik eo e ar mōji jiljilimjuōn alen, im ladrik eo e ar kabellek mejen. 36 Im e ar kirtok Gihezai, im ba, Kwon kirtok lio dri Shunen. Ein drein e ar kirtok e. Im ke e ar dreloñ nōn iben, e ar ba, Kwon kwotōke ladrik ne nejōm. 37 Inem e ar dreloñ, im buñbero i neen, im barikrik nōn lōl; im¹ e ar kwotōke ladrik eo nejin im drioijslok.

38 Im Ilaisha e ar bar itok nōn Gil-

gal. Im juōn nita i eneo, im lōmaro nejin dri kanan ro rar jijoť iman; im e ar ba nōn dri korijeran, Kwon likit pot elap, im kōmāt nōn lōmaro nejin dri kanan ro. 39 Im juōn e ar drioijslok ilo jikin kallip in aine mar bōjik, im e ar lo juōn vain e awia, im e ar ain jene leen awia, bwe en libunak kin kobe eo an, im e ar juloki na ilo pot eo; bwe re jaje kake. 40 Ein drein rar lutōk bwe lōmaro ren mōña. Im ke rej mōña jen pot eo, rar lamij, im ba, O armij ōn Anij, eor mij ilo pot in. Im re ban mōña jen c. 41 A e ar ba, Inem bōktok flauo. Im e ar jolok na ilo pot eo; inem e ar ba, Kiō komin lutōk nōn armij, bwe ren mōña. Im ejelok jorran ilo pot eo.

42 Im e ar itok juōn eman jen Beal-shalisha, im e ar bōktok nōn armij ōn Anij bred jen jomōkōj ko, roñoul bred in barli, im urur in korn ilo bōjo eo an. Im e ar ba, ¹Kwon lelok nōn armij ro, bwe ren mōña. 43 Im leo korijeran e ar ba, Ta, in likit men kein iman jibuki man ke? A e ar ba, Kwon lelok nōn armij ro, bwe ren mōña; bwe ein drein Jeova ej ba, Re naj mōña, im re naj likit bweir. 44 Ein drein e ar likite imair, im rar mōña im likit bweir, ekar nōn nan in Jeova.

5 ²Neaman, kapen an jar in tōrinae an kiñ in Siria, juōn eman eutie j iben iroi j eo an, im rar nebar e, bwe Jeova e ar lelok anjo nōn Siria kin e: bareinwōt e ar kajur im beran, a e juōn leper. 2 Im ro dri Siria re kar drioijslok ilo jar ko, im rar añintok jen enen Israel juōn ledrik dri kama-koko; im e ar jermal nōn lio belen Neaman. 3 Im e ar ba nōn liroi j eo an, Emōn aō iroi j en kar ber iben dri kanan eo ej ber i Sameria! e naj kemour e jen an nañinmij in leper. 4 Im juōn e ar dreloñ, im kennanek iroi j eo an, im ba, Ein drein ledrik eo jen enen Israel ej ba. 5 Im kiñ in Siria e ba, Kwon ilok kiō, im I naj jilkinlok juōn letter nōn kiñ in Israel. Im e ar ilok, im bōklok iben joñoul

¹ Hib. 11. 35.

² Matu 14. 16-21. ³ Luk 4. 27.

talent silver, im jiljino tausan mōtōn gold, im joñoul lekōn nuknuk. 6 Im e ar bōklok letter eo ñōn kiñ in Israel, e ba, Inem kiō, ñe letter in ej iwij ñōn ibōm, lo, emwij aō jilkinwoj Neaman, korijera, bwe kwon kaej-mour e jen nañinmij in leper eo iben. 7 Im ke emwij an kiñ in Israel kono-no ilo letter eo, e ar kekel nuknuk ko an, im ba, Ña Anij bwe in mōn im kemour, inem armij en ej jilkintok ñōn iō kin kemour juōn eman jen nañinmij in leper eo an ke? a komin lale, ij akwelap, ekijkan ej bukot unin ak-wail iba.

8 Im ein drein, ke Ilaisha, armij eo òn Anij, e ar roñjake bwe kiñ in Israel e ar kekel nuknuk eo an, e ar jiliklok ñōn iben kiñ eo, im ba, Etke kwar kekel nuknuk ko am? en itok ñōn iba kiō, inem e naj jela bwe juōn dri kanan ilo Israel. 9 Ein drein Neaman e ar itok, im ors ko an, im jariat ko an iben, im e ar jutōk iturin kejem in mwēo imōn Ilaisha. 10 Im Ilaisha e ar jilkinlok juōn dri jilik ñōn iben, im ba, Kwon ilen tutu ilo Jordan jiljilimjuōn alen, inem kōnie-kōm e naj bar itok iom, im kwo naj erreō. 11 A Neaman e ar illu, im e ar ilok, im ba, Lo, I ar lemnok, Emol e naj kar drioiytok ñōn iba, im jutōk, im kir etan Jeova an Anij, im kamō-kit pein ion jikin, im kaejmour leper eo. 12 Abana im Parpar, river ko i Damaskōs, re jab emōn jen river ko otemjej ilo Israel ke? in jab tutu ilior im erreō ke? Ein drein e ar oktōk im ilok ilo an illu. 13 Im ro dri kori-jeran rar druaktok im konono iben, im ba, Jema, elañe dri kanan eo e ar jiroñ yuk bwe kwon kōmōn jabrewōt men eo elap, kwo jamin kar kōmōne ke? etke e jab emōnlok ke e ar ba ñōn yuk, Kwon tutu, im kwo naj erreō? 14 Inem e ar wōnlōllok, im tulok jiljilimjuōn alen ilo river Jordān, ekar ñōn nan an armij òn Anij; im kōniekin e ar bar itok einwōt kōniekin juōn niñniñ, im ej erreō.

15 Im e ar jehlak ñōn iben armij òn Anij, e im aolepen jar eo dron, im e ar itok, im jutōk iman; im e ar ba.

Kiō I jela bwe ejelok Anij ilo aolep-en lōl, a ilo Israel wōt: inem kiō, ij akwelap bwe kwon bōk juōn men in mōnōnō jen ña korijerōm. 16 A e ar ba, Einwōt Jeova ej mour, eo ij jutōk iman, I jamin bōk jabrewōt. Im ej akwelap ñōn e; a e jab kōnan. 17 Im Neaman e ar ba, Elañe jab, ijoke, ij akwelap, ren letok ñōn korijerōm brij bōkōn ruo mul; bwe ña korijerōm I jamin katok men in katok kijeek, ak men in katok ñōn anij ro jet, a ñōn Jeova wōt. 18 A ilo men in Jeova en jolok bwir jen korijerōm: ñe aō iroi ej dreloñ ilo imōn Rimmōn bwe en kabuñ, im ej atartar ion peiō, ñe ij barikrik ilo imōn Rimmōn, Jeova en jolok bwir jen korijerōm, ilo men in. 19 Im e ar ba ñōn e, Kwon ilok ilo ainemōn. Ein drein e ar ilok jen e im etolok jirik.

20 A Gihezai, korijeran Ilaisha armij eo òn Anij, e ar ba, Lo, karo eo aō e ar tiriamo kake Neaman dri Siria, kin an jab bōk jen pein men ko e ar bōkitok: einwōt Jeova e mour, I naj etōr im lore, im bōk jabrewōt jen e. 21 Ein drein Gihezai e ar lor Neaman. Im ke Neaman e ar lo juōn ej etōr lore, e ar tolōl jen jariat eo an im wōnmae e, im e ba, Emōn men otemjej ibōm ke? 22 Im e ar ba, Emōn wōt. Karo eo aō e ar jilkinwoj iō, im ba, Lo, kiō e ar itok ñōn iba jen ene eutie j in Ipreim, ruo likao ian ro ne-jin dri kanan ro; kwon lelok ñōn irro, ij kajitōk ibōm, juōn talent in silver im ruo lekōn nuknuk. 23 Im Neaman e ar ba, Kwon mōnōnō im bōk ruo talent. Im e ar akwelap ñōn e, im e lukwoj ruo talent ilo ruo bōjo, im ruo lekōn nuknuk iben, im likiti ion ruo ian ro dri korijeran; im irro rar bōkilok imanlok. 24 Im ke e ar itok ñōn tol eo, e ar bōki jen peir, im likiti i mwēo; inem e ar kōtlok lōmaro im rar ilok. 25 A e ar dreloñ im jutōk iman karo eo an. Im Ilaisha e ar ba, Kwoj itok jen ia, Gihezai? Im e ar ba, Korijerōm, ejelok ijo I ar ilok ielok. 26 Im e ar ba ñōn e, Buruō e ar jab ilok ibōmlōk, ke armij eo e ar oktōklik jen jariat eo an im

wōnmae yuk ke? Ien in ien emōn kin bōk nuknuk ko, im bwil in oliv im bwil in grep, im sip im ox ko, im korijerōm kōra ke? 27 Kin men in, nañinmij in leper an Neaman e naj edrep nōn yuk, im nōn ineōm nōn in drio. Im e ar drioijlok jene juōn leper e mouj einwōt sno.

6 Im lōmaro nejn dri kanan ro rar ba nōn Ilaisha, Lo kiō, jikem ijo kim jokwe ibōm, e obrōk kake kim. 2 Kimin ilok, kim kajitōk, nōn Jordan, im bōk jen ijo jabrewōt iam juōn alal, im kimin kalek nōn kim juōn jikem ijo, im kimin jokwe ie. Im e ar uak, Komin ilok. 3 Im juōn e ar ba, Kwon mōnōnō, ij akwelap, in ilok ibemlok. Im e ar uak, I naj ilok. 4 Ein drein e ar ilok ibeirlok. Im ke rar itok nōn Jordan, rar juokwe wijki ko. 5 A ke juōn e ar juokwe juōn wijki, lilil eo an e ar kālōk jen jurōn ilo dren; im e ar lamij, im ba, Yok, aō karo! bwe an juōn armij. 6 Im armij ōn Anij e ar ba, E ar wutlok, ia? Im e ar bakajen jikin eo. Im e ar juokwe juōn alal, im joloke na ijo, im e ar kōmōn bwe māl eo en ebebe. 7 Im e ar ba, Kwon jibwe. Ein drein e ar erlokwe pein im bōke.

8 Kiñ in Siria e ar tōrinaek Israel; im e ar bebe iben ro dri korijeran, im ba, Ilo jikin en, ak jikin en, e naj aō kamp. 9 Im armij ōn Anij e ar jilkinlok nōn kiñ in Israel, im ba, Kwon lale im jab elā jen jikin en; bwe ro dri Siria rej wōnlōltok nōn ijo. 10 Im kiñ in Israel e ar jilkinlok nōn jikin eo, im armij ōn Anij e ar kennanek e im kowe kake; im e ar mōke lomoren e, ijo, e jab juōn ak ruo wōt alen. 11 Im buruen kiñ in Siria e kanuij li-man kin men in: im e ar kirtok ro dri korijeran, im ba nōn ir, Kom jab kōnan bakajen nōn iō wōn iar ej te lojiliñin kiñ in Israel ke? 12 Im juōn ian dri korijeran e ar ba, Jab, aō iroi, O kiñ, a Ilaisha, dri kanan eo ilo Israel, ej kennanek kiñ in Israel nan ko kwoj konono ilo bo in kiki eo am. 13 Im e ar ba, Komin ilen aleko ijo ej ber ie, bwe in jilkinlok im āñintok e.

Im ar kennanek e, im ba, Lo, ej ber i Dotan.

14 Kin men in, e ar jilkinlok nōn ijo, ors ko, jariot ko, im juōn jar in tōrinae elap: im rar iaboñwe jikin kwelok eo, im kabole. 15 Im ke leo korijeran armij ōn Anij, e ar jerkak ke ejiboñ wōt, im drioijlok, lo, juōn jar in tōrinae im ors ko, im jariot ko, rej kabol jikin kwelok eo. Im dri korijeran e ar ba nōn e, Yok, aō karo! je naj it? 16 Im e ar uak, Kwon jab mijōk; bwe ¹ro rej rie kij relōñ jen ro rej rie ir. 17 Im Ilaisha e ar jar, im ba, Jeova, ij akwelap, Kwon kabbellok mejen lein, bwe en lolokjen. Im Jeova e ar kabbellok mejen likao eo; im e ar lokojen: im lo, tol eo eobrōk kin ors ko im jariot kijeek ko rej kabol Ilaisha. 18 Im ke rar wōnlōltok nōn iben, Ilaisha e ar jar nōn Jeova, im ba, Kwon kabilo armij rein, ij kajitōk ibōm. Im E ar kabilo ir ekar nōn nan an Ilaisha. 19 Im Ilaisha e ba, E jab ial eo in, im e jab jilkin kwelok eo in: komin lor iō im I naj tellok kom nōn armij eo komij bukote. Im e ar tel ir nōn Sameria.

20 Im ke rar itok nōn Sameria, Ilaisha e ar ba, Jeova, kwon kabbellok mejen armij rein, bwe ren lolokjen. Im Jeova e ar kabbellok mejeir, im rar lolokjen; im lo, rar ber ilujen Sameria. 21 Im kiñ in Israel, ke e ar lo ir, e ar ba nōn Ilaisha, Jema, in mōn ir ke? in mōn ir ke? 22 Im e ar uak, Kwo jamin mōn ir: kwo najkar mōn ro kwar bōk ir dri jebokwe kin am jāi im kin am libon ke? kwon likit bred im dren imair, bwe ren mōña im irak, im ilok nōn iben iroi eo air. 23 Im e ar kapojōk elōñ ekōn nōn ir; im ke emwij air mōña im irak, e ar jilkinlok ir, im rar ilok nōn iben iroi eo air. Im jar ko an Siria re jab bar itok ilo enen Israel.

24 Im elikin men in, Ben-hedad kiñ in Siria e ar kokweloktok aolepen an jar in tōrinae, im wōnliñlok im nitbwile Sameria. 25 Im juōn nita elap ilo Sameria: im lo, rar nitbwile, mae ien rar wiakake bōran juōn ass kin

druahtōkñoul mōtōn silver, im juōn mōtōn emen in juōn kab in toeōk in muli kin lailim mōtōn silver. 26 Im ke kiñ in Israel ej elā ion worwor eo, juōn kōra e ar lamij nōn e im ba, Kwon jibōñ, ao iroi, O kiñ. 27 Im e ar ba, Elañe Jeova e jab jibōñ yuk, I naj jibōñ yuk kin ta? jen jikin dreñdreñ, ak jen ken joniōk wain ke? 28 Im kiñ eo e ar ba nōn e, Kwo bōj it? Im e ar uak, Liin e ar ba nōn iō, Kwon letok ladrik eo nejōm, bwe jen kōñe ranin, im je naj kōñ ladrik eo nejō ilju. 29 Ein drein kim ar kōmāt ladrik eo nejō, im kimro kōñe: inem I ar ba nōn e, ran eo ken ka ruo, Kwon letok ladrik eo nejōm, bwe jen kōñe; im e ar noj ladrik eo nejō. 30 Im ke kiñ eo e ar roñjake nan ko an kōra eo, e ar kekel nuknuk ko an, (kiō ej elā wōt ion worwor); im armij ro rar reilok, im lo, eor nuknuk eklep iren iloan ion kōniekin. 31 Inem e ar ba, Anij en kōmōn einwōt nōn ña, im kalaplok e, elañe bōran Ilaisha nejōn Shepat ej tōt wōt ion ranin.

32 A Ilaisha e ar jijōt ilo mwēo imōn, im ridto ro rar jijōt iben; im kiñ eo e ar jilkinlok juōn armij jen iman: a mokta jen an dri jilik itok nōn iben, e ar ba nōn ridto ro, Komij lale ekijkan lein nejōn dri uror e ar jilkintok bwe en bōklok bōra ke? komin reilok, ñe dri jilik eo ej itok, komin kil aur, im en bin ami drebij aur eo nae e: ainiken buñten neen iroi eo an e jab elikin ke? 33 Im ke ej konono wōt ibeir, lo, dri jilik eo e ar itok nōn iben; im e ar ba, Lo, nana in jen Jeova; etke in kōtar wōt kin Jeova? 1 Im Ilaisha e ar ba, Komin roñjake nan an Jeova: ein drein Jeovaej ba, Ilju, e nañin ien in, re naj wiakake juōn joñōk in flauo kwerik kin juōn shekel, im ruo joñōk in barli kin juōn shekel, ilo kejem in Sameria. 2 Ien eo kapen eo kiñ ej atartar ion peñ, e ar uak armij eo òn Anij, im ba, Lo, elañe Jeova ej kōmōn windo ko ilo lōñ, men in e maroñ in walok ke? Im e ar ba, Kwo naj loe kin mejōm, a kwo jamin mōña mōtōn.

3 Ak emen armij dri leper rar ber iturin kejem: im re ba nōn dron, Etke jej jijōt ijin mae ien je mij? 4 Elañe jej ba, Je naj dreloñ ilo jikin kwelok en, inem ñita ej ilo jikin kwelok eo im je naj mij ie; im elañe jej jijōt wōt ijin, je mij bareinwōt. Inem kiō, jen buñlok nōn jar in tōrinae an dri Siria: elañe rej lomoren kij, je naj mour; im elañe rej mōn kij, je naj mij wōt. 5 Im rar jutōk ilo ran en ilokōn al, bwe ren ilok nōn kamp an dri Siria; im ke rar itok nōn tōreren kamp an dri Siria, lo, ejelok armij ie. 6 Bwe Jeova e ar kōmōn bwe jar in tōrinae an dri Siria ren roñjake ainiken jariot ko, im ainiken ors ko, aet, ainiken jarlipju in tōrinae; im rar ba nōn dron, Lo, kiñ in Israel e ar wiaik nae kij kiñ ro an dri Het, im kiñ ro an dri Ijpt, bwe ren iten kokkure kij. 7 Kin men in, rar jerkak im ko ilo jota eo, im likit im nuknuk ko air, im ors ko air, im ass ko air, im kamp einwōt an ber, im rar ko kin air mour. 8 Im ke dri leper rein rar itok nōn tōreren kamp eo, rar dreloñ ilo juōn im nuknuk, im rar mōña im irak, im bōklok jen e silver, im gold, im nuknuk ko, im ilem noji; im rar jeblaktok, im dreloñ ilo bar juōn im, im bōklok jen e bareinwōt im ilem noji.

9 Inem rar ba nōn dron, Je jab kōmōn emōn; ranin ran in nan emōn, im jej kejeklokjen: elañe jej kōtar an rantak, joñōn kwoton e naj walok nōn kij; inem kiō jen ilem kennanek ro dron kiñ eo. 10 Ein drein rar item kir nōn ro dri lale kejem in jikin kwelok eo; im rar kennanek ir im ba, Kim ar ilok nōn kamp an dri Siria, im lo, ejelok armij ie, ak ainiken armij, a ors ko emwij lukwoji, im ass ko lukwoji, im im nuknuk ko einwōt air ber mokta. 11 Im ro dri lale kejem e ar kir nōn dri lale kejem ro jet; im rar kennanek ro dron kiñ eo iloan. 12 Im kiñ eo e ar jerkak ilo boñ, im ba nōn ro dri korijeran, Kiō I naj kwalok nōn kom ta eo dri Siria rar kōmōn nōn kij. Re jela bwe je kwuli; inem rar drioiñlok jen kamp

eo im tilekek ilo melaj, im ba, Ñe re naj drioiĵlok jen ĵikin kwelok eo je naj ĵibwe ir, im dreloñ ilo ĵikin kwelok eo. 13 Im juōn ian ro dri korijeran e ar uak, im ba, Ij kajitōk bwe jet armij ren bōk lailim ian ors ko rej berwōt, emwij likiti ilo ĵikin kwelok in, (lo, rej einwōt aoepen jar an Israel emwij likit ir iloan; lo, rej einwōt aoepen jar an Israel re joko); im jen jiliklok im lale. 14 Inem rar bōk ruo jariot im ors ko; im kiñ eo e ar ĵilkinlok ir ilokōnlok jar in tōrinae an dri Siria, im ba, Komin ilen lale. 15 Im rar ilok ilokairlok ñōn Jordan; im lo, aoepen ial eo eobrōk kin nuk-nuk ko, im jābi ko, ro dri Siria rar ĵuloki ilo air kaiur ir. Im ro dri jilik rar jeblak im kennanek kiñ eo.

16 Im armij ro rar drioiĵlok im rakimi kamp an dri Siria. Ein drein rar wiakake juōn joñōk in flauo kwerek kin juōn shekel, im ruo joñōk in barli kin juōn shekel, ekar ñōn nan an Jeova. 17 Im kiñ eo e ar likit kapen eo e ar atartar ion pein, dri lale kejem: im armij ro rar jure ilo kejem eo, im e ar mij einwōt armij ōn Anij e ar ba, eo e ar konono ke kiñ e ar wōnlōltok ñōn iben. 18 Im einwōt armij ōn Anij eo e ar konono ñōn kiñ eo, im ba, Ruo joñōk in barli kin juōn shekel, im juōn joñōk in flauo kwerek kin juōn shekel, e naj ilju e nañin ien in, ilo kejem in Sameria; 19 im kapen eo e ar uak armij ōn Anij, im ba, Kiō, lo, elañe Jeova e naj karkōmōn windo ko ilo lōñ men eo einwōt e maroñ in walok ke? im e ar ba, Lo, kwo naj loe kin mejōm, a kwo jamin mōña mōtōn: 20 e ar walok ein drein ñōn e; bwe armij ro rar jure ilo kejem eo, im e mij.

8 Ilaisha e kar konono ñōn kōra eo jinen ladrik eo e ar kemour e, im ba, Kwon jutōk, im ilok, kwe im ro dri mweo imōm, im itoitōk ijoko jabrewōt kwo maroñ kake: bwe Jeova e ar kirtok juōn ñita; im bareinwōt e naj ber ion eneo ĵiljilimjuōn yiō. 2 Im lio e ar jutōk, im kōmōn ekar ñōn nan in armij ōn Anij: im e kab ro dri mweo imōn rar itoitōk ilo enen ro dri

Pilistia iomin ĵiljilimjuōn yiō. 3 Im i jemlekōn yiō ko ĵiljilimjuōn, kōra eo e ar jeblaktok jen enen ro dri Pilistia: im e ar drioiĵlok im lamij ñōn kiñ eo kin mweo imōn im wāto eo an. 4 Ak kiñ eo e kar konono iben Gihezai korijeran armij eo ōn Anij, im ba, Kwon kennanek iō, ij kajitōk, aoepen men ko relap Ilaisha e ar kōmōni. 5 Im ke e ar kennanek kiñ eo ekiĵkan e ar kemour juōn e mij, lo, kōra eo jinen lakrik eo e ar kemour e, e ar lamij ñōn kiñ eo kin mweo imōn im kin wāto eo an. Gihezai e ar ba, Aō iroiĵ, O kiñ, liin kōra eo, im lein nejin, eo Ilaisha e ar kemour e. 6 Im ke kiñ eo e ar kajitōk iben lio, e ar kennanek e. Ein drein kiñ e ar likit ñōn e juōn dri kabwijrōk, im ba, Kwon bar lelok ñōn e aoepen ijo e kar an, im aoepen leen ĵikin kallip ko elikin ran eo ke e ar ilok jen eneo, aet, ñōn ien in.

7 Im Ilaisha e ar itok ñōn Damaskōs, im Ben-hedad kiñ in Siria e nañinmij: im ar kennanek e, im ba, Armij eo ōn Anij e ar itok ñōn ijin. 8 Im kiñ e ar ba ñōn Hazael, Kwon bōk ilo peōm juōn men in lelok, im ilem wōnmae armij eo ōn Anij, im kajitōk iben jen Jeova, im ba, In mour jen nañinmij in ke? 9 Ein drein Hazael e ar ilen wōnmae e, im bōklok juōn men in lelok iben, aet, men ko remōn otemjej jen Damaskōs, bōkōn eñoul kamel, im item jutōk iman, im ba, Nejōm, Ben-hedad kiñ in Siria, ej ĵilkinwoj iō, im ba, In mour jen nañinmij in ke? 10 Im Ilaisha e ar ba ñōn e, Kwon ilok, kwon ba ñōn e, Emol kwo naj mour, ijoke, Jeova e ar kwalok ñōn iō bwe emol e naj mij. 11 Im e ar kalimjeke mae ien e jok, im armij ōn Anij e ar jōñ. 12 Im Hazael e ar ba, Etke aō iroiĵ ej jōñ? Im e ar uak, Kin ke I jela nana eo kwo naj kōmōne ñōn ro nejin Israel, kwo naj tile air ĵikin ko re kajur, likao ro air, kwo naj mōn kin jāji, im kwo naj ekababe niñniñ ro air, in janōke kōra ro air re bōroro. 13 Im Hazael e ar ba, A ta korijerōm, eo juōn kiru roror wōt, bwe in kōmōn

men in elap? Im Ilaisha e ar uak, Jeova e ar kwalok ñōn iō bwe kwo naj kiñ ion Siria. 14 Inem e ar ilok jen iben Ilaisha, im itok ñōn iben iroi j eo an; eo e ar ba ñōn e, Ta eo Ilaisha e ar ba ñōn yuk? Im e ar uak, E ar kennanek iō, emol kwo naj mour. 15 Im ilju, e ar bōk koj eo, im katuloke ilo dren, im erlokwe ion turin mejen, inem e mij: im Hazael e ar binej jenkwōn im kiñ.

16 Im ilo yiō eo ken ka lailim an Joram nejin Ehab kiñ in Israel, ke Jihoshapat ej kiñ in Juda, Jehoram nejin Jihoshapat kiñ in Juda, e ar jino an kiñ. 17 E ar ridtōn jilñoul ruo yiō ke e jino an kiñ, im e ar kin iomin drualitōk yiō i Jerusalem. 18 Im e ar etetal ilo ial an kiñ ro an Israel, einwōt ro dri imōn Ehab: bwe lio belen, nejin Ehab; im e ar kōmōn nana iman mejen Jeova. 19 Ijoke, Jeova e jab kōnan kokkure Juda, kin Devid korijeran, bwe emwij An kalimur ñōn e bwe En lelok ñōn e juōn lamp ñōn ro nejin in drio.

20 Ilo ran ko an, Idom e ar kabata jen iomin pein Juda, im rar mōke kōmōn juōn air kiñ. 21 Inem Joram e ar elālok jen Zeir, im jariot ko an otemjej iben: im e ar jerkak ilo boñ, im mōn ro dri Idom rar kabole, im kapen ro an jariot ko; im armij rar ko ñōn moko imweir. 22 Ein drein Idom e ar kabata jen iomin pein Juda ñōn ranin. Ien eo Libna e ar kabata. 23 Im jerral ko jet an Joram, im men ko otemjej e ar kōmōni, ar jab jeje ilo buk in bwebwenato ko an kiñ ro an Juda ke? 24 Im Joram e ar kiki iben ro jiman, im ar kalibwin e iben ro jiman ilo jikin kwelok eo an Devid; im Ehazaia nejin, e ar kiñ im binej jenkwōn.

25 Im ilo yiō eo ken ka joñoul ruo an Joram nejin Ehab kiñ in Israel, Ehazaia nejin Jehoram kiñ in Juda e ar jino an kiñ. 26 Ridtōn Ehazaia roñoul yiō ke e ar jino an kiñ; im e ar kiñ iomin juōn yiō i Jerusalem. Im etan jinen, Atalaia nejin Omrai, kiñ in Israel. 27 Im e ar etetal ilo ial

an imōn Ehab, im e ar kōmōn nana iman mejen Jeova, einwōt ro dri imōn Ehab; bwe e nejin imōn Ehab ekar ñōn belele. 28 Im e ar ilok iben Joram, nejin Ehab, bwe ren tōrinaek Hazael, kiñ in Siria i Remot-giliad: im ro dri Siria rar kokwōt Joram. 29 Im kiñ Joram e ar jeb-laktok bwe ren kaejmour e i Jezriel jen kinej ko ro dri Siria rar kakiniñij e i Rema, ke e ar tōrinaek Hazael kiñ in Siria. Im Ehazaia nejin Jehoram kiñ in Juda, e ar wōnlōllok in lolo Joram nejin Ehab i Jezriel, kin ke e nañinmij.

9 Im Ilaisha dri kanan eo, e ar kirtok juōn ian ro nejin dri kanan ro, im ba ñōn e, Kwon kañōrñōr ibim, im bōk bōkā in eor oil iloan, ilo peōm, im ilok ñōn Remot-giliad. 2 Im ñe kwoj tōbar e, kwon bukot ijo Jihu nejin Jihoshapat nejin Nimshai, im dreloñ im kajutōk e jen iben ro jein im jātin, im añinlok e ñōn juōn bo etino. 3 Inem kwon bōk bōkā in oil eo, im lutōklok e ion bōran, im ba, Ein drein Jeova e ba, I ar kabit yuk kiñ ion Israel. Inem kwon kabellek aur, im ko, im kwon jab rumij. 4 Ein drein likao eo, aet likao eo dri kanan, e ar ilok ñōn Remot-giliad. 5 Im ke e ar itok, lo, kapen ro an jar in tōrinae, rar jijōt; im e ar ba, Juōn aō nan ñōn yuk, O kapen. Im Jihu e ba, Ñōn wōn iamuij? Im e ba, Ñōn kwe, O kapen. 6 Im e ar jutōk, im dreloñ ilo mweo; im leo e ar lutōklok oil eo ion bōran, im ba ñōn e. Ein drein Jeova, Nij in Israel e ba, I ar kabit yuk kiñ ion dri ailiñ an Jeova, aet ion Israel. 7 Im kwo naj mōn ro dri imōn Ehab iroi j eo am, bwe In kwi kin bōtōktōkin ro dri korijera, dri kanan ro, im bōtōktōkin dri korijeran Jeova otemjej kin pein Jezebel. 8 Bwe aolepen dri imōn Ehab re naj joko; im I naj bukwelok jen Ehab jabrewōt nejin eman, im eo emwij kile im eo ej inabij ilo Israel. 9 Im I naj kōmōn imōn Ehab einwōt imōn Jeroboam nejin Nibat, im einwōt imōn Beasha nejin Ehaija. 10 Im kiru roror re naj kōñ Jezebel ilo

bukwōn in Jezriel, im e naj ejelok dri kalibwin e. Im e ar kablok aur eo, im ko.

11 Inem Jihu e ar drioiytok nōn iben ro dri korijeran iroi eo an: im juōn e ar ba nōn e, Emōn men otemjej ke? etke dri uriekak en e ar itok nōn ibōm? Im e ar ba nōn ir, Kom jela armij eo, im ekijkan an in nan. 12 Im rar ba, E jab ein drein, kwon kennanek kim kiō. Im e ba, Ein drein im ein drein e ar konono nōn iō, im ba, Ein drein Jeova ej ba, I ar kabit yuk kiñ ion Israel. 13 Inem rar kaiur ir, im jabrewōt iair e ar bōk nuknuk ko an, im jijōt ion iman ken uwe eo, im rar jilil, im ba, Jihu ej kiñ.

14 Ein drein Jihu, nejin Jihoshapat nejin Nimshai e ar kabata nae Joram. (Ak Joram e ar kejbārok Remot-giliad, e kab dri Israel otemjej, kin Hazael kiñ in Siria; 15 a kiñ Joram e ar jeblak bwe ren kemour e i Jezriel jen an kwōt iben ro dri Siria, ke e ar tōrinaek Hazael kiñ in Siria.) Im Jihu e ar ba, Elañe ein drein ami lemnok, inem ejelok en ko im drioiytok jen jikin kwelok in, bwe en ilen kwelok men in i Jezriel. 16 Eindrein Jihu e ar uwe ilo juōn jariot, im ilok nōn Jezriel; bwe ijo Joram e ar babu. Im emwij an Ehazaia kiñ in Juda wōnlōltok in lolok Joram.

17 Juōn dri kajere e ar jutōk ilo imōn bar i Jezriel, im e ar lo jar an Jihu ke ej itok, im e ba, Ij lo juōn jar. Im Joram e ar ba, Kwon bōk juōn dri uwe ion ors, im jilkinlok e im wōnmae ir, im en ba, Ainemōn ke? 18 Inem juōn e ar uwe ion ors im ilen wōnmae e, im e ar ba, Ein drein kiñ eo ej ba, Ainemōn ke? Im Jihu ej ba, Eor ta ibōm kin ainemōn? kwon oktōk im lor iō. Im dri kajere e ar kennan, im ba, Dri jilik e ar ilem wōnmae ir, a e jab jeblaktok. 19 Inem e ar jilkinlok armij eo ken ka ruo, eo e ar itok nōn ibeir im ba, Ein drein kiñ ej ba, Ainemōn ke? Im Jihu e ar uak, Eor ta ibōm kin ainemōn? kwon oktōk im lor iō. 20 Im dri kajere e ar kennan im ba, E ar bareinwōt tōbar ir, im e jab jeblaktok: im air kamōkōj ors ej

einwōt eo an Jihu nejin Nimshai; bwe e kanuij kamōkōj.

21 Im Joram e ar ba, Komin kapojōk. Im rar kapoj jariot eo an. Im Joram kiñ in Israel, kab Ehazaia kiñ in Juda rar jimor drioiytok ilo jariot ko air, im rar ilen wōnmae Jihu, im rar loe ilo wāto an Nebot dri Jezriel. 22 Im ke Joram e ar lo Jihu, e ar ba, Ainemōn ke, Jihu? Im e ar uak, Ainemōn ot, ñe lūñ ko an jinōm Jezebel im marmir ko an relōñ wōt? 23 Im Joram e ar ukot pein, im ko, im e ba nōn Ehazaia, Eor kabata, O Ehazaia. 24 Im Jihu e ar kiele libon eo an kin aolepen an maroñ, im e ar wākare Joram ikōtan pein; im mōri eo e ar bijlok jen ubōn, im e ar bero ilo jariot eo an. 25 Inem Jihu e ar ba nōn Bidkar, kapen eo an, Kwon kwōtke im jolok e na ilo jikin kallip an Nebot dri Jezriel; bwe kwoj keme-mej ekijkan ke kijro ar jimor uwe im lor Ehab jemen, Jeova e ar likit lomijen in ion: 26 Emol I ar lo ine bōtōktōkin Nebot, im bōtōktōkin lōmaro nejin, Jeova ej ba; im I naj nawōnan ilo jikin kallip in, Jeova e ba. Inem kiō kwon bōk im jolok e na ilo wāto eo ekar nōn nan an Jeova.

27 A ke Ehazaia kiñ in Juda e ar lo men in, e ar ko ilo ial iturin imōn jikin kallip eo. Im Jihu e ar lukwor-kwor e, im ba, Komin mōn e bareinwōt ilo jariot eo an: im rej mōn e ilo ialliñlok in Gur, eo iturin Iblam. Im e ar ko nōn Megido im e mij ijo. 28 Im ro dri korijeran rar bōklok e ilo juōn jariot nōn Jerusalem, im kalibwin e ilo lup eo lupōn, iben ro jiman, ilo jikin kwelok an Devid.

29 Im ilo yiō eo ken ka joñoul juōn an Joram nejin Ehab, Ehazaia e ar jino an kiñ ion Juda.

30 Im ke Jihu e ar itok nōn Jezriel, Jezebel e ar roñjake; im e ar unoik turin mejen, im kalitlit bōran, im reilok ilo juōn windo. 31 Im ke Jihu ej dreloñ ilo kejem, lio e ar ba, Ainemōn ke, kwe Zimrai, dri uror an iroi eo am? 32 Im e ar reiliñlok nōn windo eo, im ba, Wōn eo ej rie iō? Im ruo ak jilu eunōk rar reilok nōn e.

33 Im e ba, Komin jolöllok lio. Ein drein rar jolöllok e; im emwij kabōtūtūk worwor eo, im ors ko, kin bōtōktōkin: im e ar jure iomin neen. 34 Im ke leo e ar dreloñ, e ar mōña im irak; im e ba, Komin lale liin e binnikol, im kalibwin e; bwe e nejin juōn kiñ. 35 Im rar ilen kalibwin e; a rar lo ejelok, a lot in bōran, im neen, im lobiren pein. 36 Inem rar jeblaktok, im kennanek e. Im e ar ba, Eñin nan an Jeova, eo E ar konono kin korijeran, Ilaia dri Tishba, im ba, Ilo bukwōn Jezriel kiru roror re naj kōñ kōniekin Jezebel; 37 im ubōn Jezebel e naj einwōt toeōk ion mejen jikin kallip ilo bukwōn in Jezriel, inem re jamin ba, E in Jezebel.

10 Jiljilimjuōññoul nejin Ehab eman ilo Sameria. Im Jihu e ar jeje letter ko, im jilkinloki ñōn Sameria, ñōn iroi ro in Jezriel, aet ñōn ridto ro, im ñōn ro rar kōkajiririik ro nejin Ehab, im ba, 2 Kiō kiō, ñe letter in ej iwij ñōn ibemi, bwe lōmaro nejin iroi eo ami rej ber ibemi, im ibemi eor jariot im ors ko, im jikin kwelok eor an worwor, im ken tōrinae ko; 3 komin kālet eo emōntata ian lōmaro nejin iroi eo ami, im likit e ion tron an jemen, im komin tōrinae kin ro dri imōn iroi eo ami. 4 A re kanuij lelñōñ. im ba, Lo, kiñ ro ruo rar jab jutōk iman: inem ekijkan ar naj maroñ in jutōk? 5 Im eo ej iroi ion mweo, im eo ej iroi ion jikin kwelok eo, im ridto ro bareinwōt, im ro rar kōkajiririik ir, rar jiliklok ñōn Jihu, im ba, Kim ro dri korijerōm, im kim naj kōmōn men otemjej kwoj jiroñ kim; kim jamin kairoj jabrewōt armij bwe en kiñ: kwe kwon kōmōn jabrewōt men eo emōn iman mejōm. 6 Inem e ar jejelok letter eo ken ka ruo ñōn ir, im ba, Elañe komij rie iō, im elañe kom naj eoroñ ainikiō, komin bōk bōrair, bōran lōmaro nejin iroi eo ami, im itok ñōn iba i Jezriel, ilju e nañin ien in. Lōmaro nejin kiñ eo, jiljilimjuōññoul armij, rar ber iben leatōktōk ro an jikin kwelok eo, ro rar lale ir. 7 Im ke letter eo e ar itok ñōn ibeir, rar bōk lōmaro nejin

kiñ eo, im rar mōn ir, aet jiljilimjuōññoul armij, im rar likit bōrair ilo iep ko, im jilkinloki ñōn iben i Jezriel. 8 Im juōn dri jilik e ar itok, im e ba, Rar bōktok bōrair, bōran lōmaro nejin kiñ eo. Im e ar ba, Komin likiti ilo ruo ejoij iman kejem eo mae jiboñ. 9 Im ke ejiboñ e ar drioielok, im jutōk, im e ba ñōn armij otemjej, Kom dri wānik: lo, I ar kabata nae iroi eo aō, im mōn e, a wōn eo e ar mōn rein otemjej? 10 Kiō komin jela bwe e naj¹ ejelok eberir jen nan in Jeova, eo Jeova e ar konono kin imōn Ehab; bwe Jeova e ar kōmōn² men eo E ar ba kin korijeran, Ilaia. 11 Ein drein Jihu e ar mōn ro otemjej rar berwōt jen imōn Ehab i Jezriel, im aolepen leatōktōk ro an, im ro rar jitenburu iben, im pris ro an, mae ien ejelok juōn ej ber.

12 Im e ar jutōk im ilok im itok ñōn Sameria. Im ke e ar ber i imōn mijbar an ro dri lale sip ilo ial eo, 13 Jihu e ar wōnmae ro jein im jatin Ehazaia kiñ in Juda, im e ba, Wōn kom? Im rar uak, Kim, ro jein im jatin Ehazaia: im kimij wōnlōlok in yokyokwe ro nejin kiñ eo, im ro nejin iroi eo. 14 Im e ba, Komin jibwe ir. Im rar jibwe ir, im mōn ir i roñ in imōn dri mijbar ro, aet eñoul ruo eman; e ar jab likit juōn iair.

15 Im ke e ar ilok jen ijo, e ar lo Jihonadab nejin Rikab, ej iten wōnmae e; im e ar yokyokwe e, im ba ñōn e, Buruōm e jime, einwōt buruō iben buruōm ke? Im Jihonadab e ar uak, Aet. Elañe ein drein kwon letok peōm. Im e ar lelok pein ñōn e, im e ar kwotōkliñtok e ñōn iben ilo jariot eo. 16 Im e ar ba, Kwon itok iba, im lo aō kijejeto kin Jeova. Ein drein rar kōmōn bwe en uwe ilo jariot eo an. 17 Im ke e ar itok ñōn Sameria, e ar mōn ro otemjej mōtōn Ehab ilo Sameria, mae ien e ar kokkure e, ekar ñōn nan an Jeova, eo e ar konono ñōn Ilaia.

18 Im Jihu e ar kokweloktok armij otemjej, im e ba ñōn ir, ³Ehab e ar kabuñ ñōn Beal jirik wōt; a e naj lap

¹ jap. 9. 7-10. ² 1 Kiñ 21. 19-29. ³ 1 Kiñ 16. 31, 32.

an Jihu kabuñ ñōn e. 19 Inem kiō komin kirtok ñōn iba, ro dri kanan otemjej an Beal, ro otemjej dri kabuñ ñōn e, im aolepen pris ro an; ejelok juōn en joko: bwe iba juōn katok elap ñōn Beal; jabrewōt eo e jamin itok, e naj mij. A Jihu e ar kōmōn men in kin mon, bwe en maroñ in mōn ro rej kabuñ ñōn Beal. 20 Im Jihu e ar ba, Komin kokwojarjar juōn kwelok in kabuñ ñōn Beal. Im rar kwalok e. 21 Im Jihu e ar jiliklok ilujen aolepen Israel: im ro otemjej dri kabuñ ñōn Beal rar itok, inem ejelok armij e ar joko. Im rar dreloñ ilo imōn Beal; im imōn Beal e ar kanuij obrōk. 22 Im e ar ba ñōn eo ej lale imōn nuknuk ko, Kwon bōktok nuknuk ko ñōn ro otemjej dri kabuñ ñōn Beal. Im e ar bōktok nuknuk ko ñōn ir. 23 Im Jihu e ar dreloñ im Jihonadab nejin Rikab, ilo imōn Beal; im e ar ba ñōn ro dri kabuñ ñōn Beal, Komin kabukot, im lale, bwe en ijin ibemi ejelok ian ro dri korijeran Jeova, a ro dri kabuñ ñōn Beal wōt. 24 Im rar dreloñ im katok kin men in katok ko, im katok kijeek ko. A Jihu e ar kejenelok dualitōkñoul man inabij, im ba, Elañe jabrewōt ian armij ro I ar āñintok na ilo peōmi ej ko, eo ej kōtlok e, an mour e naj kin mour eo an.

25 Im ke e ar kamwijlok an katok kin men in katok kijeek eo, Jihu e ar ba ñōn ro dri bar im kapen ro, Komin dreloñ, im mōn ir; ejelok en drioijlok. Im rar mōn ir kin mejen jāji; im ro dri bar im kapen ro rar jolok ir inabij, im rar ilok ñōn jikin kwelok an imōn Beal. 26 Im rar kadrioijlok jur dreka ko rar ber iloan imōn Beal, im tili. 27 Im rar rupe ñōn lōl jurōn Beal, im rar kejebeplok imōn Beal; im rar kōmōne jikin tilo, ñōn ranin. 28 Ein drein Jihu e ar kokkure Beal jen Israel.

29 Ijoke, jen ¹bwir ko an Jeroboam nejin Nibat, ko e ar kabwir Israel kake, Jihu e ar jab illok jeni, aet, kon in gold ko rar ber i Betel im i Dan. 30 Im Jeova e ar ba ñōn Jihu,

Kin am kōmōn emōn ilo am jerbale men eo e jime iman meja, im kwar kōmōn ñōn imōn Ehab ekar ñōn men otemjej ilo buruō, ¹lōmaro nejōm ñōn ebeben eo ken kemen, re naj jijōt ion tron an Israel. 31 A Jihu e ar jab lale bwe en etetal ilo kien Jeova, Anij in Israel, kin aolepen buruen: e ar jab illok jen bwir ko an Jeroboam ko e ar kabwir Israel kake.

32 Ilo ran ko Jeova e ar jino in bukwelok mōtōn jen Israel: im Hazael e ar mōn ir ilo tōreran ko otemjej in Israel; 33 jen Jordan i rear, aolepen ene Giliad, ro dri Gad, im ro dri Ruben, im ro dri Menassa, jen Aroer iturin komlōl in Arnon, aet Giliad im Beshan. 34 A jerbale ko jetan Jihu, im men otemjej e ar kōmōni, im aolepen an kajur, ar jab jeje ilo buk in bwebwenato an kiñ ro in Israel ke? 35 Im Jihu e ar kiki iben ro jiman; im rar kalibwin e i Sameria. Im Jehoehaz nejin, e ar kiñ im binej jenkōn. 36 Im ien an Jihu kiñ ion Israel i Sameria, roñoul dualitōk yiō.

11 Ke² Atalaia jinen Ehazaia e ar lo bwe e mij leo nejin, e ar jutōk im mōn lōmaro otemjej nejin kiñ. 2 A Jihosheba, lio nejin kiñ Joram, jātin Ehazaia, e ar bōk Joash ladrik eo nejin Ehazaia, im kwot e jen iben lōmaro nejin kiñ, im rar jab mōn ir, e im lio dri lale e, im e ar likit irro ilo juōn bo in kiki; im rar nōj ir jen Atalaia, inem ar jab mōn e; 3 im e ar ber iben lio, im tilekek ilo imōn Jeova iomijn jiljino yiō. Im Atalaia e ar liroi ion eneo.

4 Im³ ilo yiō eo ken ka jiljilimjuōn, Jihoiada e ar jiliklok im āñintok kapen ro in buki ko im ro dri lale, im e ar āñintok ir na ilo imōn Jeova; im e ar kōmōn juōn bujen ibeir, im kabinbin nan ibeir ilo imōn Jeova, im kwalok ñōn ir ladrik nejin kiñ eo. 5 Im e ar jiroñ ir, im ba, Eñin men eo kom naj kōmōne: juōn mōtōn jilu iami, ro rej dreloñ ilo ran in Sabat, re naj ro dri lale mwēo imōn kiñ; 6 im juōn mōtōn jilu re naj ber i kejem eo Sur; im juōn mōtōn jilu i kejem elikin ro

dri lale: ein drein kom naj bar mweo, im kom naj biniworwor. 7 Im jar ko ruo iami, aet ro otemjej rej drioijslok ilo ran in Sabat, re naj lale imōn Jeova iturin kiñ eo. 8 Im kom naj kabol kiñ eo, jabrewōt armij an ken tōrinae ilo pein; im eo ej driblok kōlan ko, ren mōn e: im komin ber iben kiñ eo ñe ej drioijslok, im ñe ej dreloñtok.

9 Im kapen in buki ko rar kōmōn ekar ñōn men otemjej Jihoiada, pris eo e ar jiroñ ir, im rar bōk, jabrewōt iair, armij ro dron, ro rej dreloñtok ilo ran in Sabat, im ro rej drioijslok ilo ran in Sabat, im rar itok ñōn iben Jihoiada pris eo. 10 Im pris eo e ar lelok ñōn kapen ro in buki ko, mōri ko im likipijñōk ko kar an kiñ Devid, ko rar ber ilo imōn Jeova. 11 Im ro dri bar rar jutōk, jabrewōt eman an ken tōrinae ilo pein, jen turin anbij-marōñōn mweo ñōn turin anmiñin mweo, iturin lokatok eo im mweo, im ebak kiñ eo, iturin. 12 Inem e ar kadrioijslok ladrik eo nejin kiñ, im likit bokrōnat eo ion, im lelok ñōn e kalimur eo; im rar kairoijs e kiñ, im kabit e; im rar kabok pā, im ba, Kiñ en mour wōt.

13 Im ke Atalaia e ar roñjake aini-ken ro dri bar im armij ro, e ar itok ñōn iben armij ro ilo imōn Jeova: 14 im e ar reilok, im lo, kiñ eo e ar jutōk iturin jur eo, einwōt mōnit eo, im kapen ro im jilil ko iturin kiñ eo; im armij otemjej an eneo rar lōñliñ, im jilil. Inem Atalaia e ar kekel nuk-nuk ko an, im e ar lamij, Kabata! kabata! 15 Im Jihoiada pris eo e ar jiroñ kapen ro in buki ko, emwij likit ir ion jar in tōrinae eo, im ba ñōn ir, Kōmin kadrioijslok e ikōtan kōlan ko; im eo ej lore, komin mōn e kin jāji. Bwe pris eo e ba, Ren jab mōn lio ilo imōn Jeova. 16 Ein drein rar na ialin; im e ar ilok ilo ial in dreloñ an ors ko ñōn imōn kiñ: im ar mōn e ijo.

17 Im Jihoiada e ar kōmōn bujen ikōtan Jeova im kiñ eo im armij ro, bwe ren dri ailiñ an Jeova; bareinwōt ikōtan kiñ im armij ro. 18 Im armij otemjej ilo eneo rar ilok ñōn imōn

Beal, im rar rupe; lokatok ko an, im men in e ko an rar kanuij kokkure, im rar mōn Mattan pris an Beal iman lokatok ko. Im pris e ar likit dri kabwijnrōk ion imōn Jeova. 19 Im e ar bōk kapen ro in buki ko, im ro dri bar, im ro dri ailiñ eo otemjej; im rar bōkilōltok kiñ eo jen imōn Jeova, im itok ilo ial in kejem an ro dri bar, ñōn imōn kiñ eo. Im e ar jijōt ion tron an kiñ ro. 20 Ein drein aolepen armij in eneo rar lōñliñ, im jikin kwelok eo e jok. Im rar mōn Atalaia kin jāji iturin imōn kiñ.

21 ¹ Jehoash e ar ridtōn jiljilimjuōn 12 yiō ke e ar jino an kiñ. 1 Ilo yiō eo ken ka jiljilimjuōn an Jihu, Jehoash e ar jino an iroijs; im e ar kiñ iomin eñoul yiō i Jerusalem: im etan jinen, Zibia jen Bier-shiba. 2 Im Jehoash e ar kōmōn jime ilo mejen Jeova ran ko an otemjej ke Jihoiada pris e ar katakin e. 3 Ijoke, ar jab bōklok jikin ko reutiej; armij ro rar katok wōt im kōkaijurjur ilo jikin ko reutiej.

4 Im Jehoash e ar ba ñōn pris ro, Aolepen mōnni jen men ko rokwojar-jar emwij bōktok ñōn imōn Jeova, mōnni in wia, mōnni jen armij ro jabrewōt iair ej owoj kake, im mōnni otemjej ej ilo buruen jabrewōt armij bwe en bōktok ilon imōn Jeova, 5 pris ro ren bōki ñōn ibeir, jabrewōt armij jen ro jeran; im ren karbin rup ko i mweo, ijoko jabrewōt e rup. 6 A ein drein, ilo yiō eo ken ka roñou! jilu an kiñ Jehoash, pris ro re jāñin karbin rup ko i mweo. 7 Inem kiñ Jehoash e ar kirtok Jihoiada pris eo, im pris ro jet, im e ba ñōn ir, Etke kom jab karbin rup ko i mweo? inem kiō komin jab bar bōk mōnni jen ro jerami, a komin lelok kin rup ko i mweo. 8 Im pris ro rar ba emōn ren jab bar bōk mōnni jen armij ro, im ren jab karbin rup ko in mweo.

9 A ² Jihoiada e ar bōk juōn dipdip, im e ar kōmōn juōn roñ ilo mejen, im e ar likite iturin lokatok eo, i anbij-

maroñ ñe juõn ej dreloñ ilo imõn Jeova: im pris ro rej lale kejem rar likit iloan mõnni otemjej ar bõktok ilo imõn Jeova. 10 Im ein drein, ke rar lo bwe elap mõnni ilo dipdip eo, dri jeje an kiñ eo, im pris elap, rar itok, im rar likit e ilo bõjo ko, im bwini mõnni rar loe ilo imõn Jeova. 11 Im rar lelok mõnni eo emwij paun e na ilo pein ro rar kõmõn jerbal eo, ro rar lale imõn Jeova: im rar lilok ñõn ro dri jerbali rã, im ñõn ro dri kal, ro rar jerbal ilo imõn Jeova, 12 im ñõn ro dri kal kin dreka, im ñõn ro rej jekjek dreka ko, im kin wiaik wijki im dreka emwij jeki ñõn karbin rup ko ilo imõn Jeova, im kin men otemjej rar kapojõk ñõn mweo in karbin e. 13 A re jab kõmõnmõn ñõn imõn Jeova kōp silver ko, ken jojen melle an lamp ko, jābi ko, jilil ko, jabrewõt jābi gold, ak jābi silver, jen mõnni eo ar bõktok ilo imõn Jeova; 14 bwe rar lilok ñõn ro rar kõmõn jerbal eo, im rar karbin mweo kake. 15 Bareinwõt, rar jab watōke iben armij ro, ro rar lelok mõnni in ilo peir bwe ren lelok ñõn ro rar jerbal; bwe etiljek air kõmõn. 16 Mõnni kin katok bwir, im mõnni kin katok jerawiwi, rar jab bõktok ilo imõn Jeova: a an pris ro.

17 Ien eo ¹ Hazael kiñ in Siria e ar wõnliñlok, im tōrinaek Gat, im bōke; im Hazael e ar kaioklok Jerusalem. 18 Inem Jihoash kiñ in Juda e ar bōk men ko rokwojarjar otemjej, ko Jihoashapat, im Jehoram, im Ehazaia, ro jiman, kiñ ro in Juda rar aje, im men ko an rokwojarjar, im aolepen gold rar loe ilo jikin mweuik ko an imõn Jeova, im an imõn kiñ, im e ar jilkinloki ñõn Hazael, kiñ in Siria: inem e ar etal jen Jerusalem.

19 A jerbal ko jet an Joash, im men otemjej e ar kõmõni, ar jab jeje ilo buk in bwebwenato an kiñ ro in Juda ke? 20 Im ro dri korijeran rar jutōk, im kabata, im mõn Joash i imõn Millo, ilo iallok ñõn Silla. 21 Bwe Jozekar nejin Shimeat, im Jehozabad nejin Shomer, ro dri korijeran,

rar mõn e, inem e mij; im rar kalibwin e iben ro jiman ilo jikin kwelok an Devid: im ¹ Amazaia nejin, e ar kiñ im binej jenkwõn.

13 Ilo yiõ eo ken ka joñoul jilu an Joash, nejin Ehazaia, kiñ in Juda, Jihoash nejin Jihu, e ar jino an kiñ ion Israel i Sameria, im e ar kiñ iomin joñoul jiljilimjuõn yiõ. 2 Im e ar kõmõn nana iman mejen Jeova, im e ar lor jerawiwi ko an Jeroboam nejin Nibat, ko e ar kabwir Israel kake; e ar jab illok jeni. 3 Im ebwil illu an Jeova nae Israel, im E ar ketōke na ilo pein Hazael kiñ in Siria, im ilo pein Ben-hedad nejin Hazael, ien otemjej. 4 Im Jihoash e ar akwelap ñõn Jeova, im Jeova e ar eoroñ e; bwe E ar lo an Israel jorran, ekijkan kiñ in Siria e ar kejorran ir. 5 (Im Jeova e ar lelok ñõn Israel juõn dri lomor, ein drein rar ilok jen iomin pein ro dri Siria; im ro nejin Israel rar jokwe ilo mokoimweir einwõt mokta. 6 Ijoke, rar jab ilok jen jerawiwi ko an Jeroboam, ko e ar kabwir Israel kake, a rar etetal ilo ir: im Ashira ko rar berwõt ilo Sameria.) 7 Bwe e ar likit ñõn Jihoash ian armij ro, limñoul wõt dri uwe ion ors, im joñoul jariot, im joñoul tausan dri tōrinae etetal; bwe kiñ in Siria e ar mõn ir im kõmõn ir einwõt bõñõl-ñõl ilo ien dreñdreñ. 8 Ak jerbal ko jet an Jihoash im men otemjej e ar kõmõni, im an kajur, ar jab jeje ilo buk in bwebwenato ko an kiñ ro in Israel ke? 9 Im Jihoash e ar kiki iben ro jiman; im rar kalibwin e i Sameria: im Joash nejin e ar kiñ im binej jenkwõn.

10 Ilo yiõ eo ken ka jilñoul jiljilimjuõn an Joash kiñ in Juda, Jihoash nejin Jihoash e ar jino in kiñ ion Israel i Sameria, im e ar kiñ iomin joñoul jiljino yiõ. 11 Im e ar kõmõn nana iman mejen Jeova; e ar jab illok jen jerawiwi ko otemjej an Jeroboam nejin Nibat, ko e ar kabwir Israel kake, a e ar etetal ilo ir. 12 Ak jerbal ko jet an Joash, im men otemjej e ar kõmõni, im an kajur ke

e ar tōrinaek Amazaia kiñ in Juda, ar jab jeje ilo buk in bwebwenato ko an kiñ ro in Israel ke? 13 Im Joash e ar kiki iben ro jiman; im Jeroboame e ar jijōt ion tron eo an: im ar kalibwin Joash i Sameria iben kiñ ro in Israel.

14 Ilaisha e nañinmij kin nañinmij eo e ar mij kake: im Joash kiñ in Israel e ar wōnlōltok ñōn iben, im jōñ ion, im ba, Jema, jema, jariot ko an Israel im dri uwe ion ors ro an! 15 Im Ilaisha e ar ba ñōn e, Kwon kaptere juōn libon im mōri ko; inem e ar bōk ñōn iben libon im mōri ko. 16 Im e ar ba ñōn kiñ in Israel, Kwon likit peōm ion libon eo; im e ar likit pein ion. Im Ilaisha e ar likit pein ion pein kiñ eo. 17 e ar ba, Kwon kabbelok windo eo i rear; im e ar kabbelok e. Inem Ilaisha e ar ba, Kwon libon; im e ar libon. Im e ar ba, Mōri in anjo an Jeova, aet, mōri in anjo ion Siria; bwe kwo naj mōn ro dri Siria i Epek, mae ien am naj kokkure ir. 18 Im e ar ba, Kwon bōk mōri ko: im e ar bōki. Im e ar ba ñōn kiñ in Israel, Kwon dreñlokwe lōl. Im e ar dreñlokwe jilu alen im bwijrōk. 19 Im armij ōn Anij eo e ar illu iben, im ba, Emōn am kar dreñlokwe lailim ak jiljino alen: inem kwo naj kar mōn Siria mae ien am kokkure; a kiō kwo naj mōn Siria alen wōt jilu.

20 Im Ilaisha e mij, im rar kalibwin e. Ak jar ko an dri Moab rar dreloñtok ilo eneo ilo jinoin yiō. 21 Im ke rej kalibwin juōn eman, lo, rar lo juōn jaran armij; im rar jolok ubōn leo iloan lup eo an Ilaisha: im kiōkiō ke ubōn e ar uñire drin Ilaisha, e ar mour wōt im jerkak.

22 Im Hazael kiñ in Siria e ar kejjorran Israel ran ko otemjej an Jihoahaz. 23 A Jeova e ar joij ñōn ir, im tiriamokake ir, im lale ir, kin bujen eo An iben Ebrean, Aisak, im Jakob, im E jab kōnan mōn ir, im E ar jab jolok ir jen iman mejen ien eo. 24 Im Hazael kiñ in Siria e mij; im Ben-hedad nejin e ar kiñ im binej jenkwōn. 25 Im Jihoash nejin Jihoa-

haz e ar bōk jen pein Ben-hedad nejin Hazael, jikin kwelok ko e ar bōk jen pein Jihoahaz, jemen, kin tōrinae. Alen jilu Joash e ar mōn e, im e ar bar bōk jikin kwelok ko an Israel.

14 Ilo ¹yiō eo ken ka ruo an Joash nejin Joahaz kiñ in Israel, Amazaia nejin Joash kiñ in Juda e ar jino an kiñ. 2 Ridtōn roñoul lailim yiō ke e ar jino an kiñ; im e ar kiñ iomin roñoul druatimjuōn yiō i Jerusalem: im etan jinen, Jihoadin, dri Jerusalem. 3 Im e ar kōmōn emōn iman mejen Jeova, a jab einwōt David jemen: e ar kōmōn ekar ñōn men otemjej Joash e ar kōmōni. 4 Ijoke, ar jab bōklok jikin ko reutiej: armij ro rar katok im kōkaijurjur ilo jikin ko reutiej. 5 Im ke emwij kabin ailiñ eo ilo pein, e ar mōn lōmaro korijeran ro rar mōn jemen: 6 a ro nejin ro dri uror e ar jab mōn ir; ekar ñōn nan eo emwij jeje ilo buk in kien Moses, einwōt Jeova e ar jiroñ, im ba, Ren jab mōn ro jemeir kin ro nejir, im ren jab mōn ro nejir kin ro jemeir; a jabrewōt armij kin jera-wiwi eo an wōt. 7 E ar mōn ian dri Idom ilo Komlōl in Jātōk joñoul tausan, im e ar bōk Sila kin tōrinae, im naetan Jokteel, ñōn ranin.

8 ²Inem Amazaia e ar jilkinlok ro dri jilik ñōn Jihoash, nejin Jihoahaz, nejin Jihu, kiñ in Israel, im ba, Kwon itok, im jen jelmaedron. 9 Im Jihoash kiñ in Israel e ar jiliklok ñōn Amazaia kiñ in Juda, im ba, Kāliklik eo e kar i Lebanon e ar jilkinlok ñōn wij ki aik i Lebanon, im ba, Kwon lelok lio nejōm ñōn leo nejōi bwe en belen: im kiru e awia eo e ar ber i Lebanon, e ar elālok im jur kāliklik eo. 10 Emol kwar mōn Idom, im buruōm e ar koutiej yuk: kwon kimjāje kake, im berwōt i kabijuknōm; bwe etke kwon owajuij ñōn am jorran, bwe komin buñ, kwe im Juda ibōm?

11 A Amazaia e jab kōnan eoroñe. Ein drein Jihoash kiñ in Israel e ar wōnliñlok, im e kab Amazaia kiñ in Juda, irro rar jelmae dron i Bet-shimash eo an Juda. 12 Im Juda e jor-

ran iman Israel: im rar ko, jabrewōt armij nōn mweo imōn. 13 Im Jihoash kiñ in Israel e ar jibwe Amazaia kiñ in Juda, nejin Jihoash nejin Eha-zaia, i Bet-shimesh, im itok nōn Jerusalem, im kokkure worwor in Jerusalem jen kejem in Ipream nōn kejem eo i bōul, ābuki kubit. 14 Im e ar bōk aolepen gold im silver, im jābi otemjej rar loiilo imōn Jeova, im ilo jikin mweiuk ko an imōn kiñ, ro dri jebokwe bareinwōt, im jeblaklok nōn Sameria.

15 A jermal ko jet Jihoash e ar kōmōni, im an kajur, im ekijkan e ar tōrinaek Amazaia kiñ in Juda, ar jab jeje ilo buk in bwebwenato ko an kiñ ro in Israel ke? 16 Im Jihoash e ar kiki iben ro jiman, im ar kalibwin e i Sameria iben kiñ ro an Israel: im Jeroboam nejin e ar binej jenkwōn im kiñ.

17 Im Amazaia nejin Joash kiñ in Juda e ar mour elikin mij an Jihoash nejin Jihoahaz kiñ in Israel, joñoul lailim yiō. 18 Jermal ko jet an Amazaia, ar jab jeje ilo buk in bwebwenato ko an kiñ ro in Juda ke? 19 Im rar kabata nae e i Jerusalem; im e ar ko nōn Lekish: a rar jiliklok ilokōnlok nōn Lekish, im mōn e ijo. 20 Im rar bōktok e ion ors ko: im ar kalibwin e i Jerusalem iben ro jiman ilo jikin kwelok an Devid. 21 Im ro dri Juda otemjej rar bōk Azaraia, eo ridtōn joñoul jiljino yiō, im kairoi e kiñ im binej jenkwōn jemen, Amazaia. 22 E ar kalek Ilat, im kajeblaktok e nōn Juda, elikin an kiñ eo kiki iben ro jiman.

23 Ilo yiō eo ken ka joñoul lailim an Amazaia, nejin Joash kiñ in Juda, Jeroboam nejin Joash kiñ in Israel, e ar jino in kiñ i Sameria, im e ar kiñ iomin eñoul juōn yiō. 24 Im e ar kōmōn nana iman mejen Jeova; e ar jab illok jen aolepen jerawiwi ko an Jeroboam nejin Nibat, ko e ar kabwir Israel kake. 25 E ar kajime tōreran Israel jen mejāti in Hemat nōn loma-
lo in Araba, ekar nōn nan in Jeova, Anij in Israel, eo e ar konono kin dri korijeran, Jona, nejin Amittai, dri

kanan eo jen Bet-hiper. 26 Bwe Jeova e ar lo jorran an Israel, bwe e kanuij meo; bwe ejelok eo emwij kile ak ej inabij, im ejelok dri jibōñ nōn Israel. 27 Im Jeova e ar jab ba E naj jeorlok etan Israel jen iomin lōñ; a E ar lomor ir kin pein Jeroboam nejin Joash.

28 Jermal ko jet an Jeroboam, im men otemjej e ar kōmōni, im kajur eo an, ekijkan e ar tōrinae, im ekijkan e ar bōk Damaskōs, im Hemat, e kar an Juda, nōn Israel, ar jab jeje ilo buk in bwebwenato ko an kiñ ro in Israel ke? 29 Im Jeroboam e ar kiki iben ro jiman, aet iben kiñ ro in Israel; im Zekaraia nejin e ar binej jenkwōn im kiñ.

15 Ilo yiō eo ken ka roñoul jiljilimjuōn an Jeroboam kiñ in Israel, Azaraia nejin Amazaia kiñ in Juda e ar jino in kiñ. 2 Ridtōn joñoul jiljino yiō ke e ar jino in kiñ; im e ar kiñ iomin limñoul ruo yiō i Jerusalem: etan jinen, Jikolaia, dri Jerusalem. 3 Im e ar kōmōn emōn iman mejen Jeova, ekar nōn men otemjej jemen, Amazaia e ar kōmōni. 4 Ijoke, rar jab bōklok jikin ko reutiej: armij ro rar katok im kōkaijurrur wōt ilo jikin ko reutiej. 5 Im Jeova e ar kejjorran kiñ eo, ein drein e ar dri leper nōn ran eo ke e mij, im e ar jokwe ilo juōn im mōke ian. Im Jotam nejin kiñ eo, e ar iroi ion ro dri mweo imōn, im e ar ekajete armij ro in eneo. 6 Ak jermal ko jet an Azaraia, im men otemjej e ar kōmōni, ar jab jeje ilo buk in bwebwenato ko an kiñ ro in Juda ke? 7 Im Azaraia e ar kiki iben ro jiman; im rar kalibwin e iben ro jiman ilo jikin kwelok an Devid: im Joram nejin e ar kiñ im binej jenkwōn.

8 Ilo yiō eo ken ka jilñoul dualitōk an Azaraia kiñ in Juda, Zekaraia nejin Jeroboam e ar kiñ ion Israel i Sameria iomin jiljino aliñ. 9 Im e ar kōmōn nana iman mejen Jeova, einwōt ro jiman rar kōmōne: e ar jab illok jen jerawiwi ko an Jeroboam nejin Nibat, ko e ar kabwir

Israel kake. 10 Im Shallum nejin Jebesh e ar kabata nae e, im mōn e iman armij ro bwe en mij, im e ar kiñ im binej jenkwōn. 11 Ak jerbāl ko jet an Zekaraia, lo, emwij jeje ilo buk in bwebwenato ko an kiñ ro in Israel. 12 Eñin nan in Jeova eo e ar konono ñōn Jihu, im ba, Ro nejōm ñōn ebeben eo ken kemen, re naj jijōt ion tron eo an Israel. Inem ein drein an jejit.

13 Im Shallum nejin Jebesh e ar jino an kiñ ilo yiō eo ken ka jilñoul druatimjuōn an Uzzaia kiñ in Juda; im e ar kiñ iomin juōn aliñ i Sameria. 14 Im Menahem nejin Gedai e ar wōnliñlok jen Tirza, im itok ñōn Sameria, im e ar mōn Shallum nejin Jebesh i Sameria, bwe en mij, im e ar kiñ im binej jenkwōn. 15 Ak jerbāl ko jet an Shallum, im kabata eo e ar kōmōne, lo, emwij jeje ilo buk in bwebwenato an kiñ ro in Israel. 16 Ien eo Menahem e ar mōn Tipsa, im ro otemjej ilōan, kab ilo tōreren ko an, jen Tirza; kin ke rar jab kabellek ñōn e, inem e ar mōn e; im aolepen kōra ro re bōroro, e ar jannōke.

17 Ilo yiō eo ken ka jilñoul druatimjuōn an Azaraia kiñ in Juda, Menahem nejin Gedai e ar jino in kiñ ion Israel, im e ar kiñ iomin joñoul yiō i Sameria. 18 Im e ar kōmōn nana iman mejen Jeova: e ar jab illok ilo ran ko an otemjej jen jerawiwi ko an Jeroboam nejin Nibat, ko e ar kabwir Israel kake. 19 ¹Pul kiñ in Assiria e ar itok nae eneo; im Menahem e ar lelok ñōn Pul juōn tausan talent silver, bwe pein en iben, ken kabin ailiñ ilo pein. 20 Im Menahem e ar bōk mōnni eo jen Israel ilo kejem, aet jen aolepen armij ro dri mweie, jen kajuju armij limñoul shekel silver, bwe en lilok ñōn kiñ in Assiria. Ein drein kiñ in Assiria e ar rollok, im e ar jab berwōt ilo eneo. 21 Ak jerbāl ko jet an Menahem, im men otemjej e ar kōmōni, ar jab jeje ilo buk in bwebwenato an kiñ ro an Israel ke? 22 Im

Menahem e ar kiki iben ro jiman; im Pekahaia nejin e ar kiñ im binej jenkwōn.

23 Ilo yiō eo ken ka limñoul an Azaraia kiñ in Juda, Pekahaia nejin Menahem e ar jino in kiñ ion Israel i Sameria, im e ar kiñ iomin ruo yiō. 24 Im e ar kōmōn nana iman mejen Jeova: e ar jab illok jen jerawiwi ko an Jeroboam nejin Nibat, ko e ar kabwir Israel kake. 25 Im Pika, nejin Remalaia, kapen eo an, e ar kabata nae e, im mōn e i Sameria, ilo me in imōn kiñ eo, iben Argob im Eraia; im iben limñoul man ian ro dri Giliad: im e ar mōn e, im kiñ im binej jenkwōn. 26 Ak jerbāl ko jet an Pekahaia, im men otemjej e ar kōmōni, lo, emwij jeje ilo buk in bwebwenato an kiñ ro in Israel.

27 Ilo yiō eo ken ka limñoul ruo an Azaraia kiñ in Juda, Pika nejin Remalaia e ar jino in kiñ ion Israel i Sameria, im e ar kiñ iomin roñoul yiō. 28 Im e ar kōmōn nana iman mejen Jeova: e ar jab illok jen jerawiwi ko an Jeroboam nejin Nibat, ko e ar kabwir Israel kake.

29 Ilo ran ko an Pika kiñ in Israel, Tiglat-piliser kiñ in Assiria e ar item bōk Aijon, im Ebel-bet-meaka, im Janoa, im Kidesh, im Hezor, im Giliad, im Galili, aolepen enen Naptalai; im e ar āñinlok ir dri jebokwe ñōn Assiria. 30 Im Hoshia nejin Ila e ar kabata nae Pika nejin Remalaia, im mōn e bwe en mij, im kiñ im binej jenkwōn, ilo yiō eo ken ka roñoul an Jotam nejin Uzzaia. 31 Ak jerbāl ko jet an Pika, im men otemjej e ar kōmōni, lo, emwij jeje ilo buk in bwebwenato ko an kiñ ro in Israel.

32 Ilo yiō eo ken ka ruo an Pika nejin Remalaia kiñ in Israel, Jotam nejin Uzzaia kiñ in Juda, e ar jino an kiñ. 33 E ar ridtōn roñoul lailim yiō ke e ar jino in kiñ, im e ar kiñ joñoul jiljino yiō i Jerusalem: im etan jinen, Jirusha, liō nejin Zedok. 34 Im e ar kōmōn emōn iman mejen Jeova; e ar kōmōn ekar ñōn men otemjej jemen, Uzzaia e ar kōmōni. 35 Ijoke, e ar

jab bōklok jikin ko reutiej: armij ro rar katok im kōkaijurjur wōt ilo jikin ko reutiej. E ar kōmōnmōn aur eo ilōn ilo imōn Jeova. 36 Ak jerbalko jet an Jotam, im men otemjej e ar kōmōni, ar jab jeje ilo buk in bwebwewenato ko an kiñ ro in Juda ke? 37 Ilo ran ko Jeova e ar jino in jilkinlok nae Juda, Rizin kiñ in Siria, im Pika nejin Remalaia. 38 Im Jotam e ar kiki iben ro jiman, im ar kalibwin e iben ro jiman i jikin kwelok an Devid jemen: Im Pika nejin e ar kiñ im binej jenkwōn.

16 Ilo yiō eo ken ka joñoul jiljilimjuōn an Pika nejin Remalaia, Ehaz nejin Jotam kiñ in Juda e ar jino in kiñ. 2 Ehaz ridtōn roñoul yiō ke e ar jino an iroi, im e ariroi joñoul jiljino yiō i Jerusalem: im e ar jab kōmōn emōn iman mejen Jeova an Anij einwōt Devid jemen. 3 A e ar etetal ilo ial an kiñ ro in Israel, aet, e ar kōmōn bwe ladrik eo nejin en dribuk kijeek eo, ekar ñōn men ko men in jōjōik an dri ailiñ ko, ro Jeova e ar kadrioi, lok iman ro nejin Israel. 4 Im e ar katok im kōkaijurjur ilo jikin ko reutiej, im ion tol ko, im iomin jabrewōt wijki e māroro.

5 Ien eo Rizin kiñ in Siria im Pika nejin Remalaia kiñ in Israel rar itok ñōn Jerusalem bwe ren tōrinae: im rar nitbwile Ehaz, a re ban bōk anjo ion. 6 Ien eo Rizin kiñ in Siria e ar bōk lat ñōn Siria, im e ar ubaklok ro dri Ju jen Ilat; im ro dri Siria rar itok ñōn Ilat, im jokwe ie, ñōn ranin.

7 Inem Ehaz e ar jilkinlok ro dri jilik ñōn Tiglat-piliser kiñ in Assiria, im ba, Na dri korijerōm im nejōm: kwon item lomor iō jen pein kiñ in Siria, im jen pein kiñ in Israel, ro rej jutōk nae iō. 8 Im Ehaz e ar bōk silver im gold eo e ar loi ilo imōn Jeova, im ilo jikin mweiuk eo an imōn kiñ, im jilkinlok juōn men in wiaik buruen kiñ in Assiria. 9 Im kiñ in Assiria e ar eoroñ e; im kiñ in Assiria e ar wōnliñlok nae Damaskōs, im bōk e, im añinlok armij ro dri jebokwe ñōn Kir, im e ar mōn Rizin.

10 Im kiñ Ehaz e ar ilok ñōn Damaskōs bwe en wōnmae Tiglat-piliser kiñ in Assiria, im e ar lo lokatok eo e ar ber i Damaskōs; im kiñ Ehaz e ar jilkinlok ñōn Uraiia, pris eo, wāwen lokatok eo, im ekijkan kōmōne, ekar ñōn aolepen men in kōmōnmōne. 11 Im Uraiia pris eo e ar kōmōnmōn juōn lokatok: ekar ñōn aolepen men ko kiñ Ehaz e ar jilkinlok jen Damaskōs, im ein drein Uraiia pris eo e ar kōmōne ñōn jen an kiñ Ehaz itok jen Damaskōs. 12 Im ke kiñ eo e ar itok jen Damaskōs, kiñ eo e ar lo lokatok eo: im kiñ e ar druaktok ñōn lokatok eo, im katok ion. 13 Im e ar tile an men in katok kijeek, im an jurtak flauo, im lutōklok an katok irak, im kabōtūktūk bōtōktōkin an men in katok ainemōn ko, ion lokatok eo. 14 Im lokatok jinibōrōrō eo e kar iman Jeova, e ar bōktok jen iman mweo, jen ikōtan lokatok eo an im imōn Jeova, im likite eāñ jen lokatok eo an. 15 Im kiñ Ehaz e ar jiroñ Uraiia pris eo, im ba, Ion lokatok eo elap kwon tile men in katok kijeek ilo jiboñ, im katok flauo ilo jota, im men in katok kijeek an kiñ, im jurtak flauo eo an, iben katok kijeek an armij otemjej dri enen, im air jurtak flauo, im air jurtak irak; im kwon kabōtūktūk ion, aolepen bōtōktōkin men in katok kijeek eo, im aolepen bōtōktōkin men in katok eo: a lokatok jinibōrōrō e naj aō ken kajitōk. 16 Ein drein an Uraiia pris eo kōmōn, ekar ñōn men otemjej kiñ Ehaz e ar jiroñ e.

17 Im kiñ Ehaz e ar 'bukwelok likabroror ko an loñtōk ko, im kamōkit ken amin ko ioir, im e ar drore lomalo eo jen ox ko rar ber iomin, im likite ion loñtōk dreka. 18 Im ial eo e libubu ñōn ran in Sabat, eo emwij air kōmōne ilo mweo, im jikin dreloñ an kiñ inabij, e ar ukōte ñōn imōn Jeova, kin kiñ in Assiria. 19 Ak jerbalko jet an Ehaz ko e ar kōmōni, ar jab jeje ilo buk in bwebwenato ko an kiñ in Juda ke? 20 Im Ehaz e ar kiki iben ro jiman, im

ar kalibwin e iben ro jiman ilo jikin kwelok an Devid: im Hezeakaia nejin e ar kiñ im binej jenkwōn.

17 Ilo yiō eo ken ka joñoul ruo an Ehaz kiñ in Juda, Hoshia nejin Ila e ar jino an kiñ i Sameria ion Israel, im e ar kiñ iomin druati-mjuōn yiō. **2** Im e ar kōmōn nana iman mejen Jeova, a jab einwōt kiñ ro in Israel re kar mokta jen e. **3** Shalmaniser kiñ in Assiria e ar wōnliñlok nae e; im Hoshia e ar oktōm dri korijeran, im owōjlok ñōn e. **4** Im kiñ in Assiria e ar lo kabata iben Hoshia; bwe e ar jilkinlok ro dri jilik ñōn So kiñ in Ijpt, im e ar jab owōjlok ñōn kiñ in Assiria, einwōt e kar kōmōn yiō ko mokta: kin men in kiñ in Assiria e ar kile, im lukwoje ilo prison. **5** Inem kiñ in Assiria e ar wōnliñlok ilujen aolepen eneo, im wōnliñlok ñōn Sameria, im nitbwile iomin jilu yiō. **6** Ilo yiō eo ken ka druati-mjuōn an Hoshia, kiñ in Assiria, e ar bōk Sameria, im āñinlok ro dri Israel ñōn Assiria, im likit ir i Hela, im iturin Hebor, river in Gozan, im ilo jikin kwelok ko an ro dri Midia.

7 Im ein drein, kin ke ro nejin Israel rar jerawiwi nae Jeova air Anij, Eo e ar kadrioiytok ir jen Ijpt, jen iomin pein Pero kiñ in Ijpt, im rar mijōk anij ro jet, **8** im rar etetal ilo kien ko an dri ailiñ ko, ro Jeova e ar jolok ir jen iman ro nejin Israel, im an kiñ ro in Israel, ko rar kōmōni. **9** Im ro nejin Israel rar kōmōn ilo etino men ko re jab jime, nae Jeova air Anij: im rar mōke kalek ñōn ir jikin ko reutie j ilo aolepen jikin kwelok ko air, jen imōn har an ro dri kajere ñōn jikin kwelok eo eor an worwor; **10** im rar kajutōk jur dreka ko im Ashira ion tol ko otemjej, im iomin jabrewōt wijki e māroro; **11** im rar kōkaijurjur ie ilo jikin ko otemjej reutie, einwōt ro dri ailiñ ko, ro Jeova e ar jolok jen imair; im rar kōmōn men ko re nana in kaillu Jeova kake; **12** im rar jerbal ñōn ekjōp, ko Jeova e ar konono kake ñōn ir, Komin jab kōmōne men in. **13** Ijoke, Jeova e ar kwalok ñōn Israe¹ im ñōn Juda,

kin dri kanan otemjej, im dri lolo otemjej, im ba, Komin oktōk jen ial ko ami re nana, im kejbārok nan in jiroñ im nan in kaiñi ko Aō, ekar ñōn aolepen kien eo I ar jiroñ ro jimami, im ko I ar jilkinwoj ñōn ibemi kin ro dri korijera, dri kanan ro. **14** Ijoke, re jab kōnan eoroñ E, a rar kakiñiñi kenwair, einwōt kenwan ro jimair, ro rar jab tōmak Jeova air Anij. **15** Im rar jolok kien ko An, im bujen eo E ar kōmōne iben ro jimair, im nan in kalimur ko E ar kwalok ñōn ir; im rar lor men wan, im rar oktōm armij wan, im lore dri ailiñ ko iturir, kin ir Jeova e ar jiroñ ir bwe ren jab kōmōn eirwōt. **16** Im rar illok jen kien ko otemjej an Jeova air Anij, im rar mōke kōmōn ñōn ir men in e ko unlok, aet, ruo kon in kau, im rar kōmōn juōn Ashira, im kabuñ ñōn aolepen jaran lōñ, im rar jerbal ñōn Beal. **17** Im rar kōmōn bwe ladrik im ledrik ro nejir ren dribuk kijeek eo, im rar marmir im anij-nij, im wiakake ir ñōn kōmōn nana iman mejen Jeova, in kaillu E. **18** Kin men kein, Jeova e ar kanuij illu iben Israel, im kamōkit ir jen iman mejen: ejelok ej berwōt, a bwijin Juda wōt.

19 Bareinwōt¹ Juda e ar jab kejbārok kien ko an Jeova, a rar etal ilo nan in jiroñ ko an Israel, ko rar kōmōni. **20** Im Jeova e ar jolok aolepen inen Israel, im kaiñtan ir, im ketōk ir na ilo pein ro dri rakim, mae ien An jolok ir jen iman mejen. **21** Bwe E ar kekel Israel jen imōn Devid; im rar kairoi Jeroboam nejin Nibat air kiñ: im Jeroboam e ar kajeor Israel jen air lor Jeova, im e ar kōmōn bwe ren jerawiwi ilo juōn jerawiwi elap. **22** Im ro nejin Israel rar etetal ilo jerawiwi ko otemjej an Jeroboam, ko e ar kōmōni; rar jab illok jeni; **23** mae ien an Jeova kamōkit Israel jen iman mejen, einwōt E ar konono kin ro dri korijeran otemjej, ro dri kanan. Ein drein E ar āñinlok Israel jen eneo air, ñōn Assiria ñōn ranin.

¹ 1 Kiñ 14. 22 23.

24 Im ¹ kiñ in Assiria e ar āñintok armij jen Babilon, im jen Kuta, im jen Eva, im jen Hemat, im jen Separveim, im likit ir ilo jikin kwelok ko an Sameria, bwe ren binej jenkwōn ro nejin Israel; im rar drebij Sameria, im jokwe ilo jikin kwelok ko an. 25 Im ein drein, ilo jinoin air jokwe ijo, rar jab mijōk Jeova: kin men in, Jeova e ar jilkinlok laion ko nōn ibeir, im rar mōn jet iair. 26 Inem rar konono nōn kiñ in Assiria, im ba, Ro dri ailiñ ko kwar āñinlok ir im likit ir ilo jikin kwelok ko an Sameria, re jaje kien anij in eneo: kin men in, e ar jilkinlok laion ko nōn ibeir, im lo, rej mōn ir, kin ke re jab jela kien anij in eneo.

27 Inem kiñ in Assiria e ar jiroñ; im ba, Komin āñinlok nōn ijo juōn ian pris ro kom ar āñintok jen ijo; im ren jokwe ie, im en katakin ir kin kien anij in eneo. 28 Ein drein juōn ian pris ro rar āñinlok ir jen Sameria, e ar item jokwe i Betel, im katakin ir ekijkan ren mijōk Jeova. 29 Ijoke, dri jabrewōt ailiñ rar jimor kōmōn anij ro air, im likiti ilo moko an jikin ko reutiej, ko dri Sameria rar kōmōnmōni, jabrewōt dri ailiñ ilo jikin kwelok ko rar jokwe ie. 30 Im ro dri Babilon rar kōmōn Sōkkotbinot, im ro dri Kut rar kōmōn Nergal, im ro dri Hemat rar kōmōn Ashima, 31 im ro dri Eva rar kōmōn Nibhaz, im Tartak; im ro dri Separveim rar tili ro nejir ilo kijeek nōn Adramelek im Anamelek, anij ro an Separveim. 32 Ein drein rar mijōk Jeova im mōke kōmōn nōn ir jen iair pris ro nōn jikin ko reutiej, ro rar katok kin ir ilo moko an jikin ko reutiej. 33 Rar mijōk Jeova, im jermal nōn anij ro air, einwōt mōntin ro dri ailiñ ko ar āñinlok ir jen ibeir.

34 Nōn ranin rej kōmōn ekar nōn wāwen eo mokta: re jab mijōk Jeova, im re jab kōmōn ekar nōn nan in jiroñ ko air, ak ekar nōn kabuñjar eo Jeova e ar jiroñ ro nejin Jakob kake, eo E ar naetan Israel; 35 im ibeir Jeova e ar kōmōn juōn bujen, im ji-

roñ ir im ba, Komin jab mijōk anij ro jet, ak¹ barikrik jen ir, ak jermal nōn ir, ak katok nōn ir: 36 a Jeova, eo e ar āñintok kom jen ene Ijpt, kin kajur elap im pein erlok, Eo komin mijōk E, im Eo komin kabuñ nōn E, im Eo komin katok nōn E: 37 im nan in kaiñi ko, im kabuñjar ko, im kien eo, im nan in jiroñ, ko E ar jeje nōn kom, komin kejbārōki im bokaki nōn in drio; im komin jab mijōk anij ro jet: 38 im bujen eo I ar kōmōn ibemi, komin jab meloklok e; im komin jab mijōk anij ro jet: 39 a Jeova ami Anij, komin mijōk e; im E naj lomo-remi jen pein ro otemjej rej kijirāte kom. 40 Ijoke, rar jab eoroñ, a rar kōmōn ekar nōn kōmōn ko air mokta. 41 Ein drein ro dri ailiñ kein rar mijōk Jeova, im kabuñ nōn ekjōp jekjek ko air; ro nejir bareinwōt, kab ro jibwir, einwōt ro jimair, ein drein air kōmōn nōn ranin.

18 Ilo yiō ken ka jilu an Hoshia, nejin Ila kiñ in Israel, Heze-kaia nejin Ehaz kiñ in Juda e ar jino an kiñ. 2 Ridtōn roñoul lailim yiō ke e jino an kiñ; im e ar kiñ iomin roñoul druatimjuōn yiō i Jerusalem: im etan jinen, Ebai nejin Zekaraia. 3 Im e ar kōmōn emōn iman mejen Jeova, ekar nōn men eo Devid jemen e ar kōmōne. 4 E ar bōkilok jikin ko reutiej, im rupi jur dreka ko, im juokwe Ashira ko: im e ar ruprupe serpent jinibōrōrō eo Moses e ar kōmōnmōne; bwe nōn ran ko ro nejin Israel rar kōkaijurjur nōn e; im e ar naetan Nihushtan. 5 E ar liki Jeova, Anij in Israel; ein drein, ejelok einwōt elikin, ian kiñ ro otemjej in Juda, ak ian ro mokta jen e. 6 Bwe e aredrep nōn Jeova; e ar jab illok jen an lor E, a e ar bokake kien ko an Jeova, ko e ar jiroñ Moses. 7 Im Jeova e ar ber iben; ijoko jabrewōt e ar driojlok, e ar jerammōn: im e ar kabuñbata nae kiñ in Assiria, im jab korijer nōn e. 8 E ar mōn ro dri Pilistia nōn Geza im tōreran ko an, jen imōn ebar an ro dri kajere nōn jikin kwelok eo eor an worwor.

¹ Esra 4. 2, 10.¹ Ex. 20. 5.

9 Im ilo yiō eo ken kemen an kiñ Hezekaia, eo yiō ken ka jiljilimjuōn an Hoshia nejin Ila kiñ in Israel, Shalmaniser kiñ in Assiria e ar wōnliñtok nae Sameria, im nitbwile. 10 Im ke e jemlok jilu yiō rar bōke: ilo yiō eo ken ka jiljino an Hezekaia, eo e kar yiō eo ken ka druatimjuōn an Hoshia kiñ in Israel, e ar bōk Sameria. 11 Im kiñ in Assiria e ar āñinlok ro dri Israel ñōn Assiria, im likit ir i Hela, im iturin Hebor, river in Gozan, im ilo jikin kwelok ko an ro dri Midia; 12 kin ke rar jab bokake ainiken Jeova, air Anij, a rar jolok bujen eo An, aet, men otemjej Moses, korijeran Jeova e ar jiroñ ir, im rar jab kōnan eoroñ e ak kōmōne.

13 ¹Ilo yiō eo ken ka joñoul emen an kiñ Hezekaia, Senakerib, kiñ in Assiria e ar wōnliñlok nae jikin kwelok otemjej in Juda eor air worwor, im bōki. 14 Im Hezekaia kiñ in Juda e ar jiliklok ñōn kiñ in Assiria i Lekish, im ba, I ar bwir; kwon oktōkjen iō; men eo kwoj likit iō I naj bōke. Im kiñ in Assiria e ar likit ion Hezekaia kiñ in Juda jilu buki talent silver im jilñoul talent gold. 15 Im Hezekaia e ar lelok ñōn e aolepen silver rarloe ilo imōn Jeova, im ilo jikin mweiuk an imōn kiñ. 16 Ien eo Hezekaia e ar bukwe gold eo jen aur ko ilo tempel an Jeova, im jen jur ko Hezekaia kiñ in Juda e ar nakilin kake, im lilok ñōn kiñ in Assiria. 17 Im kiñ in Assiria e ar jilkinlok Tartan im Rabsaris im Rabshake jen Lekish ñōn iben kiñ Hezekaia, im ibeir juōn jar in tōrinae elap, ñōn Jerusalem. Im rar wōnliñtok im itok ñōn Jerusalem. Im ke rar wōnliñtok rar jutōk iturin tañ eo jen lwe eo ilōñ, ilo ial in jikin wāto eo an dri nuknuk kejeje. 18 Im ke emwij air kir ñōn kiñ eo, rar drioijtōk in wōnmae ir, Ilaiekim nejin Hilkaia, eo ej iroi ion ro dri mweo, im Shebna dri jeje, im Joa nejin Esap dri jeje bwebwenato ko.

19 Im Rabshake e ar ba ñōn ir, Komin ba kiō ñōn Hezekaia, Ein drein

kiñ elap, kiñ in Assiria, ej ba, Ta liki in, eo kwoj liki? 20 Kwoj ba, (a rej nan wan), Eor bebe im kajur ñōn tōrinae eo. Kiō wōn eo kwoj liki e, bwe kwon kabuñbata nae iō? 21 Kiō lo, kwoj liki jokwōn in koba in eobōp, aet, Ijipt; eo elañe juōn armij ej jurōke, e naj wia pein, im bijlok: ein drein Pero kiñ in Ijipt ñōn ro otemjej rej liki e. 22 A elañe komij ba ñōn iō, Kimij liki Jeova am Anij; E jab eo, jikin ko An reutiej, im lokatōk ko An, Hezekaia e ar bōkilok, im e ar ba ñōn Juda im Jerusalem, Komin kabuñ iman lokatōk in i Jerusalem ke? 23 Inem, kiō, ij kajitōk bwe kwon letok men in kamol ñōn iroi eo aō, kiñ in Assiria, im I naj lewoj ruo tausan ors, elañe kwe kwo maroñ in likit ro dri uwe ioir. 24 Inem ekijkan am maroñ in kajeor mejen juōn kapen ian ro redrik, dri korijeran iroi eo aō, im liki Ijipt kin jariat ko im kin dri uwe ion ors ko? 25 Kiō I ar wōnliñtok nae jikin in bwe in kokkure, im Jeova e jab iba ke? Jeova e ar ba ñōn iō, Kwon wōnliñlok nae enen im kokkure.

26 Inem Ilaiekim nejin Hilkaia, im Shebna, im Joa rar ba ñōn Rabshake, Ij kajitōk bwe kwon konono ñōn kim dri korijerōm ilo kajin Siria, bwe kim jela kake; im kwon jab konono ñōn kim ilo kajin dri Ju, ilo lojiliñin armij ro ion worwor eo. 27 A Rabshake e ar ba ñōn ir, Aō iroi e ar jab jilkinwoj iō ñōn iroi eo am, im ñōn yuk bwe in konono nan kein ke? e ar jab jilkinwoj iō ñōn armij ro rej jijōt ion worwor eo, bwe ren kōñi toeōkir im irak dren eo air ibōm ke? 28 Inem Rabshake e ar jutōk, im kir kin ainiken elap ilo kajin dri Ju, im e ar konono, im ba, Komin roñjake nan an kiñ eo elap, kiñ in Assiria. 29 Ein drein kiñ eo ej ba, Hezekaia en jab mone kom; bwe e jamin maroñ in lomoremi jen pein: 30 im Hezekaia en jab kōmōn bwe komin liki Jeova, im ba, Emol Jeova e naj lomorer, im jamin lelok jikin kwelok in na ilo pein kiñ in Assiria. 31 Komin jab eoroñ Hezekaia: bwe ein

drein kiñ in Assiria ej ba, Komin kōmōn ainemōn iba, im drioiĵtok ñōn iba; im komin mōña, jabrewōt iami jen vain eo an, im jen wijki fig eo an, im jabrewōt iami en irak dren jen aibij eo an; 32 mae ien I naj iwij im āñ-inlok kom ñōn juōn ene einwōt eneo ami, enen korn im wain ekāl, enen bred im bwil in grep, enen wijki oliv; im hōnni, bwe komin mour wōt, im jab mij: im komin jab eoroñ Hezekaia, ke ej karel kom, im ba, Jeova e naj lomorer. 33 Jabrewōt ian anij ro an dri ailiñ ko e ar lomoren enen jen pein kiñ in Assiria jabrewōt ien ke? 34 Ewi anij ro an Hemat, im an Arpad? ewi anij ro an Separveim, im Hima, im Iva? rar lomoren Sameria jen peiō ke? 35 Wōn ro ian anij ro an dri ailiñ ko, rar lomoren eneir jen peiō, bwe Jeova en lomoren Jerusalem jen peiō?

36 A armij ro rar kejeklokjen, im re jab uak e juōn nan; bwe kiñ eo e ar jiroñ ir, im ba, Komin jab uak e. 37 Inem Ilaiëkim nejin Hilkaia eo ej iroiĵ ion ro dri mweo, im Shebna dri jeje, im Joa nejin Esap, dri jeje bwe-bwenato ko, rar itok ñōn iben Hezekaia, emwij kekel nuknuk ko air, im kennanek e nan ko an Rabshake.

19 Im ¹ke Hezekaia e ar roñjake, E ar kekel nuknuk ko an, im kōnōk nuknuk eklep iren, im dreloñ ilo imōn Jeova. 2 Im e ar jilkinlok Ilaiëkim eo ej iroiĵ ion ro dri mweo, im Shebna dri jeje eo, im ridto ro ian pris ro, emwij kōnōk nuknuk ko eklep iren, ñōn Aiseia nejin Emoz, dri kanan eo. 3 Im rar ba ñōn e, Ein drein Hezekaia ej ba, Ranin ran in jorran, im enoik, im kajirere; bwe niñniñ ro rar itok ñōn ien lotak, im ejelok kajur in keutak ir. 4 Bwelen Jeova am Anij e naj roñjake nan ko otemjej an Rabshake, eo kiñ in Assiria, iroiĵ eo an, e ar jilkintok in kem-jōk Anij e mour, im E naj enoik e kin nan ko Jeova am Anij e ar roñjake: inem kwon leliñlok am jar kin matōn armij rej berwōt. 5 Ein drein ro dri koriĵeran kiñ Hezekaia rar itok ñōn

iben Aiseia. 6 Im Aiseia e ar ba ñōn ir, Ein drein ami naj ba ñōn iroiĵ eo ami, Ein drein Jeova ej ba, Kwon jab lelñōñ kin nan ko kwar roñjake, ro dri koriĵeran kiñ in Assiria rar blas-pim lō kake. 7 Lo I naj likit juōn jītōb iloan, im e naj roñjake jet nan, im e naj jeblak ñōn eneo an; im I naj kōmōn bwe en buñ kin jāji na ilo enen.

8 Inem Rabshake e ar jeblak, im l. bwe kiñ in Assiria ej tōrinaek Libna; bwe e ar roñ kin an ilok jen Lekish. 9 Im ke e ar roñjake air ba kin Tir-heka kiñ in Itiopia, Lo, e ar drioiĵlok in tōrinaek yuk, e bar jilkinlok ro dri jilik ñōn iben Hezekaia, im ba, 10 Ein drein ami naj konono ñōn Hezekaia kiñ in Juda, im ba, Anij eo am, Eo kwoj liki E, en jab mone yuk, im ba, Jamin lelok Jerusalem na ilo pein kiñ in Assiria. 11 Lo, emwij am roñjake ta eo kiñ ro in Assiria rar kōmōne ñōn ene otemjej, kin air kanuij kokkure: im naj lomoren yuk ke? 12 Anij ro an dri ailiñ ko rar lomorir, ro jema rar kokkuri, Gozan, im Heran, im Rizep, im ro nejin Iden rar ber i Telesar ke? 13 Ewi kiñ in Hemat, im kiñ in Arpad, im kiñ in jikin kwelok Separveim, an Hina, im Iva?

14 Im Hezekaia e ar bōk letter eo jen pein ro dri jilik, im konono kake; im Hezekaia e ar wōnliñlok ñōn imōn Jeova, im erlokwe iman Jeova. 15 Im Hezekaia e ar jar iman Jeova, im ba, O Jeova, Anij in Israel, Kweo kwoj jijōt ilōñin kerub ko, kwe Anij eo, aet, Kwe wōt, ion ailiñ ko otem-jej ilōl: Kwar kōmōn lōñ ko im lōl. 16 Kwon kajir lojiliñōm, O Jeova, im roñjake: Kwon kabellok mejōm, O Jeova, im loe; im roñjake nan ko an Senakerib, ko e ar jilkintok in keje-iokiok Anij e mour. 17 Emol, Jeova, kiñ ro in Assiria rar kejebeplik dri ailiñ ko im eneir; 18 im rar jolok ilo kijeek anij ro air: kin ke re jab anij, a iltan pein armij, wijki im dreka; kin men in rar kokkure ir. 19 Inem, O Jeova amuij Anij, kwon lomorem, ij akwelap, jen pein, bwe ro dri ailiñ

otemjej ren maroñ in jela bwe Kwe Jeova kwe wõt Anij.

20 Inem Aiseia nejin Emoz e ar jilkinlok ñõn Hezekaia, im ba, Ein drein Jeova, Anij in Israel, ej ba, Kin am jar ñõn Iõ nae Senakerib, kiñ in Assiria, I ar roñjake yuk. 21 Eñin nan eo Jeova e ar ba kin e: Jiroñ eo nejin Zaion e ar kejekron im tōñkake yuk; lio nejin Jerusalem e ar jibolul bōran nae yuk. 22 Wōn eo kwar kejeiokiok kake im blaspim nae E? im kwar kalaplok ainikiōm im koutiej mejōm ilōñ nae wōn? E Dri Kwojarjar eo an Israel. 23 Kin ro am dri jilik kwar kejeiokiok Iroi j eo, im kwar ba, Elōñ jariat iba, ilo aō wōñliñlok ñõn jabōn tol ko, ñõn jikin ko ilujen Lebanor; im I naj juokwe aik ko an reutiej, im wijki fōr ko an raurōk; im I naj dreloñ iloan jikin jokwe etolok tata, wijki ko in jikin kallip kouwa eo an. 24 Emwij aō kōbij im irak dren jet, im kin lobiren neiō I naj karoj river ko otemjej in Ijpt.

25 Kwar roñ ke ekijkan I ar kōmōne eto, im nawāwen ilo ien ko remotlok? kiō I ar kōmōn bwe kwonam in kejebeplok jikin kwelok ko eor air worwor ñõn ejoi j ko in menoknok. 26 Kin men in, erik kajur iben ro dri jokwe ie, rar lelñōñ im lolbon; rar einwōt ujoi j in jikin kallip, im mar e māroro, im einwōt ujoi j ion jabōn moko, im einwōt wit ej jiburikrik mokta jen an ridtolok. 27 A I jela am jijōt, im am drioi jlok im am dreloñtok, im am illu elej nae Iō. 28 Kin am lej nae Iō, im bwe am jualōñlōñ e ar wōñliñtok i lojiliñiō, inem I naj kij bodōm kin Aō kaj, im likit Aō to ikōtan tiōm, im I naj kajeblak yuk ilo ial eo kwar itok ietok.

29 Im men in e naj kakōle eo ñõn yuk: kom najmōña yiō in jen men ko rej mōke edrek, im ilo yiō eo ken ka ruo, jen men ko rej edrek jeni; im ilo yiō eo ken ka jilu, komin jeor, im marmir, im kallip bwil in grep, im mōña jen leir. 30 Im matōn ro dri ko jen imōn Juda re naj bar ellō okrair ilōl, im jebar leen ilōñ. 31 Bwe jen

Jerusalem mōtair re naj drioi jlok, im jen tol Zaion ro rej ko: kijejeto an Jeova e naj kōmōn men in. 32 Kin men in, ein drein Jeova ej ba kin kiñ in Assiria. E jamin itok ñõn jikin kwelok in, ak libon juōn mōri ie, im e jamin itok iman kin likipijñōk, ak kōmōn ejoi j nae e. 33 Ilo ial eo ear itok ietok, e naj jeblak ielok im e jamin itok ñõn jikin kwelok in, Jeova ej ba. 34 Bwe I naj tōrinae kin jikin kwelok in, im lomoren, kin Ña, im kin dri korijera Devid.

35 Im ilo boñ eo enjel òn Jeova e ar drioi jlok, im mōn ilo kamp an dri Assiria, jibuki drualitōkñoul lailim tausan: im ke armij ro rar jerkak ke ejiboñ wõt, lo, rein otemjej ubōn armij dri mij. 36 Inem Senakerib kiñ in Assiria e ar ilok, im etal im jeblak, im jokwe i Nineva. 37 Im ke e ar kabuñ ilo imōn Nisrok, anij eo an, Adramelek im Sharizer rar mōn e kin jāji: im rar ko ñõn enen Arerat. Im Isarhaddon, leo nejin, e ar kiñ im binej jenkwōn.

20 Ilo¹ ran ko Hezekaia e nañin-mij wõt jirik. Im Aiseia nejin Emoz e ar itok ñõn iben, im ba ñõn e, Ein drein Jeova ej ba, Kwon karōk men ko ilo mweo imōm; bwe kwo naj mij, im jamin mour. 2 Inem e ar illok mejen ñõn turin mweo, im jar ñõn Jeova im ba, 3 Kwon kememej, O Jeova, ij akwelap, ekijkan I ar etetal imam ilo mol im buruō e wāppen, im I ar kōmōn men ko remōn iman mejōm. 4 Im mokta jen an Aiseia drioi jlok ilujen jikin kwelok eo, nan jen Jeova e ar itok ñõn e, im ba, 5 Kwon jeblak im ba ñõn Hezekaia iroi j ion ro dri ailiñ Aō, Ein drein Jeova, Anij an Devid jemōm ej ba, I ar roñjake am jar, I ar lo am dren in kemjalal: lo, I naj kemour yuk; ilo ran eo ken ka jilu kwo naj wōñliñlok ñõn imōn Jeova. 6 Im I naj kobaik ñõn ran ko am joñoul lailim yiō; im I naj lomoren yuk im jikin kwelok in jen pein kiñ in Assiria; im I naj kouk jikin kwelok in kin Ña, im kin dri korijera Devid. 7 Im Aiseia e ar ba, Komin bōk juōn

kek in fig ko. Im rar bōke im likite ion mokiliñ eo, inem e ar mour.

8 Im Hezeakaia e ar ba ñōn Aiseia, E naj ta kakōle eo bwe Jeova e naj kemour iō, im I naj wōnliñlok ñōn imōn Jeova, ran eo ken ka jilu? 9 Im Aiseia e ar ba, Eñin e naj kakōle eo ñōn kwe jen Jeova, bwe Jeova E naj kōmōn men eo E ar konono kake: lur eo en wōnmanlok joñoul jekairu ke, ak en wōnliklok joñoul jekairu? 10 Im Hezeakaia e ar uak, Men eo erik elañe lur eo ej wōnmanlok joñoul jekairu: jab, en jeblaktok joñoul jekairu. 11 Im Aiseia e ar kir ñōn Jeova; im E ar bōk lur eo joñoul jekairu liklok, ijo e kar wōnlōllok kake ion jekairu ko an Ehaz.

12 ¹ Ten eo Berodak-baledan, nejin Baledan kiñ in Babilon, e ar jilkinlok letter ko im juōn men in lelok ñōn Hezeakaia, bwe e ar roñjake bwe e kar nañinmij. 13 Im Hezeakaia e ar roñjake ir, im e ar kwalok ñōn ir aolepen mweo imōn, an men ko re aurōk, silver, im gold, im spais ko, im oil e aurōk, im imōn ken tōrinae ko an, im men otemjej ilo jikin mweuiuk ko an: ejelok men ilo mweo imōn, ak ilo ailiñ eo an e ar jab kwaloki ñōn ir. 14 Inem Aiseia, dri kanan, e ar itok ñōn iben kiñ Hezeakaia im ba ñōn e, Rej ian armij rein? im rar itok jen ia ñōn ibōm? Im Hezeakaia e ar ba, Rej itok jen juōn ene etelok, aet jen Babilon. 15 Im e ar ba, Ta eo rar loe ilo mweo imōm? Im Hezeakaia e ar ba, Rar lo aolepen men ko ilo mweo imō: ejelok ian mweuiuk ko mweiō I ar jab kwalok ñōn ir.

16 Im Aiseia e ar ba ñōn Hezeakaia, Kwon roñjake nan an Jeova. 17 Lo, ran ko rej itok, ñe men otemjej rej ber ilo mweo imōm, im men ko ro jimmam rar kabinoke ilo jikir ñōn ranin, naj bōkilok ñōn Babilon: ejelok men e naj berwōt, Jeova ej ba. 18 Im ian ro nejōm ro re naj loktak ñōn kwe, ro kwo naj keutak ir, re naj añinlok ir; im re naj eunōk ro ilo imōn kiñ in Babilon. 19 Inem Hezeakaia e ar ba ñōn Aiseia, Emōn nan an

Jeova eo kwar konono kake. E ar bareinwōt ba, E jab ein drein, elañe ainemōn im mol re naj ber ilo ran ko aō ke? 20 Ak jerbak ko jet an Hezeakaia, im aolepen kajur eo an, im ekijkan e ar kōmōn lwe eo, im tañ eo, im bōktok dren ilo jikin kwelok eo, ar jab jeje ilo buk in bwebwenato ko an kiñ ro in Juda ke? 21 Im Hezeakaia e ar kiki iben ro jiman; im Menassa nejin e ar kiñ im binej jenkwōn.

21 ¹ Riddtōn Menassa joñoul ruo yiō ke e ar jino in kiñ: im e ar kiñ limñoul lailim yiō i Jerusalem: im etan jinen, Hepziba. 2 Im e ar kōmōn nana iman mejen Jeova, einwōt men in jōjōik ko an ro dri ailiñ, ro Jeova e ar jolok ir iman ro nejin Israel. 3 Bwe e ar bar kalek jikin ko reutiej ko Hezeakaia jemen e ar kokkure; im e ar kalek lokatok ko ñōn Beal, im kōmōnmōn juōn Ashira, einwōt Ehab kiñ in Israel e ar kōmōn, im e ar kabuñ ñōn aolepen jaran lōñ, im korijer ñōn ir. 4 Im e ar kalek lokatok ko ilo imōn Jeova, eo Jeova e ar ba kake, Ilo Jerusalem I naj likit eta. 5 Im e ar kalek lokatok ko ñōn aolepen jaran lōñ ilo worwor ko ruo an imōn Jeova. 6 Im e ar kōmōn bwe ladrik eo nejin en dribuk kijeek eo, im e ar marmir, im anijnij, im kōmao iben ro dimon rar miok na i enbwiniir, im iben ro rej drikanij; e ar kōmōn nana elap iman mejen Jeova, bwe en kaillu E wōt. 7 Im e ar kajur men in e jekjek an Ashira, eo e ar kōmōne, ilo mweo Jeova e ar konono kake ñōn Devid im ñōn Solomon nejin, Ilo mwin im ilo Jerusalem eo I ar kallet ian aolepen bwijin Israel, I naj likit eta ie ñōn in driō; 8 im I jamin bar kejebwābweik neen Israel jen eneo I ar lelok ñōn ro jimair, elañe rej lale wōt im kōmōn ekar ñōn men otemjej I ar jiroñ ir, im ekar ñōn aolepen kien eo Moses dri korijera e ar jiroñ ir. 9 A rar jab eoroñ: im Menassa e ar mone ir bwe ren kōmōn nana elap jen ro dri ailiñ ko Jeova e ar kokkure ir iman ro nejin Israel.

10 Im Jeova e ar konono kin ro dri korijeran, dri kanan ro, im ba. 11 Kin an Menassa kiŃ in Juda kōmōn men kein, men in jōjōik ko, im kōmōn nana elap jen ro dri Amor, ro rar ber mokta jen e, im e ar kabwir Juda bareinwōt kin ekjōp ko an; 12 kinmen in, ein drein Jeova, Anij in Israel, Ej ba, Lo, Ij bōktok ion Jerusalem im Juda, nana eo e naj katōñōlok aolepen lojiliñin jabrewōt eo e naj roñjake. 18 Im I naj kōnōke ion Jerusalem lain eo an Sameria, im ken kajime an imōn Ehab; in I naj kōmraik Jerusalem einwōt juōn armij ej kōmraik juōn jābi, ke ej kōmraik im ukōje. 14 Im I naj jolok ro matōn Aō men in jolit, im ketōk ir na ilo pein ro dri kijirāte ir; im re naj erom men in kokkure im men in rakim ñōn ro otemjej rej kijirāte ir; 15 kin ke rar kōmōn nana iman meja, im rar kaillu Iō, jen ran eo ke ro jimair rar drioijtōk jen Iijpt, aet ñōn ranin.

16 ¹Bareinwōt Menassa e ar kanuij katorlok bōtōktōkin ro ejelok rueir, mae ien e ar kalōñ Jerusalem kake jen juōn jabōn ñōn jabōn eo juōn; bareinwōt jerawiwi eo an e ar kabwir Juda kake, ilo air kōmōn nana iman mejen Jeova. 17 Ak aolepen jerbal ko jet an Menassa, im men otemjej e ar kōmōni, im jerawiwi eo an e ar bwir kake, ar jab jeje ilo buk in bwebwenato an kiŃ ro in Juda ke? 18 Im Menassa e ar kiki iben ro jiman, im ar kalibwin e ilo wāto in mweo imōn, ilo wāto an Uzza: im Amon nejin e ar kiŃ im binej jenkwōn.

19 Amon ridtōn roñoul ruo yiō ke ej jino in kiŃ; im e ar kiŃ iomin ruo yiō i Jerusalem: im etan jinen, Mishulimet, nejin Heruz dri Jotba. 20 Im e ar kōmōn nana iman mejen Jeova, einwōt Menassa jemen. 21 Im e ar etal ilo aolepen ial jemen e ar etal ie, im jerbal ñōn ekjōp ko jemen e ar jerbal ñōn ir, im kabuñ ñōn ir: 22 im e ar illok jen Jeova, Anij an ro jiman, im e ar jab etal ilo ial an Jeova. 28 Im ro dri korijeran Amon rar kabata

nae e, im rar mōn kiŃ eo ilo mweo imōn. 24 A ro dri eneo rar mōn ro otemjej rar kabata nae kiŃ Amon, im ro dri eneo rar kōmōn Josaia nejin bwe en kiŃ im binej jenkwōn. 25 Ak jerbal ko jet an Amon ko e ar kōmōni, ar jab jeje ilo buk in bwebwenato an kiŃ ro in Juda ke? 26 Im rar ka libwin e ilo lūpōn ilo wāto an Uzza: im Josaia nejin e ar kiŃ im binej jenkwōn.

22 ¹Josaia ridtōn dualitōk yiō ke ej jino an kiŃ; im e ar kiŃ iomin jilñoul yiō i Jerusalem: im etan jinen, Jedaida, nejin Adaia dri Bozkat. 2 Im e ar kōmōn emōn iman mejen Jeova, im etetal ilo aolepenial an Devid jemen, e ar jab jeorlok ñōn anbijmaroñōn ak anmiñin.

3 Im ilo yiō eo ken ka joñoul drualitōk an kiŃ Josaia, kiŃ eo e ar jilkinlok Shepan, nejin Azalaia nejin Mishullam, dri jeje eo, ñōn imōn Jeova, im ba, 4 Kwon wōnliñlok ñōn iben Hilkaia, pris eo elap, bwe en bwini mōnni eo ar bōkitok ilo imōn Jeova, eo ro dri lale kejem rar ainitok jen armij ro: 5 inem ren likiti ilo pein ro dri jerbal ro rej lale imōn Jeova; im ren lelok ñōn ro dri jerbal rej ilo imōn Jeova, bwe ren karbin rup ko i mweo, 6 ñōn ro dri jerbali wijki, im ñōn ro dri jerbali dreka, im ñōn ro dri kal, im ñōn wiaik wijki ko im dreka jekjek in karbin mweo. 7 Ijoke, rar jab watōk oran mōnni eo rar likiti na ilo peir; bwe e tiljek air kōmōn.

8 Im Hilkaia, pris elap, e ar ba ñōn Shepan dri jeje eo, Emwij aō lo buk in kien eo ilo imōn Jeova. Im Hilkaia e ar lelok buk eo ñōn Shepan, im e ar konono kake. 9 Im Shepan, dri jeje eo e ar itok ñōn iben kiŃ eo, im bar bōktok nan ñōn e, im e ba, Ro dri korijerōm rar lutōk mōnni eo, rar loi ilo mweo, im rar lelok na ilo pein ro dri jerbal rej lale imōn Jeova. 10 Im Shepan, dri jeje eo, e ar kennanek kiŃ eo im ba, Hilkaia pris eo e ar letok juōn buk. Im Shepan e ar konono kake iman kiŃ eo. 11 Im ke emwij an kiŃ eo roñjake nan ko an buk in

kien, e ar kekel nuknuk ko an. 12 Im kiñ eo e ar jiroñ Hilkaiä pris eo, im Ahaikam nejin Shepan, im Akbor nejin Maikeia, im Shepan dri jeje eo, im Eseiä dri korijeran kiñ eo, im ba, 13 Komin ilok, komin kajitök iben Jeova kin ña, im kin armij ro, im kin dri Juda otemjej, kin nan ko ilo buk in emwij aō loe; bwe ebwil illu elap an Jeova nae kij, kin ke ro jimar rar jab eoroñ nan ko ilo buk in, im kōmōn ekar ñōn men otemjej ar jeje kin kij.

14 Ein drein Hilkaiä pris eo, im Ahaikam, im Akbor, im Shepan, im Eseiä, rar ilok ñōn iben Hōlda lio dri kanan, lio belen Shallum nejin Tikva, nejin Harhas, dri lale jikin nuknuk ko, (ak lio e ar jokwe i Jerusalem ilo Misne); im rar kōmao iben. 15 Im lio e ar ba ñōn ir, Ein drein Jeova, Anij in Israel ej ba: Komin kennanek armij eo e ar jilkintok kom ñōn iba, 16 Ein drein Jeova ej ba, Lo, I naj bōktok jorran ion jikin kwelok in, im ion ro rej jokwe iji, aet, nan otemjej in buk eo kiñ in Juda e ar konono. 17 Kin ke rar ilok jen Ña, im rar kōkaijurjur ñōn anij ro jet, im kaillu Iō kin jermal ko otemjej in peir, kin men in, e naj bwil Aō illu nae jikin kwelok in, im e jamin kwun. 18 A ñōn kiñ in Juda, eo e ar jilkintok kom bwe komin kajitök iben Jeova, ein drein ami naj ba ñōn e, Ein drein Jeova, Anij in Israel ej ba: Kin nan ko kwar roñjake, 19 kin ke buruōm e kible, im kwar kōtaik yuk iman Jeova, ke kwar roñjake ta eo I kar konono nae jikin in, im nae ro dri jokwe ie, bwe re naj juōn men in kokkure im kamātōr, im kwar kekel nuknuk ko am, im jōñ imaō; bareinwōt Ña I ar roñjake yuk, Jeova ej ba. 20 Kin men in, lo, I naj ain yuk ñōn iben ro jimam, im kwo naj ilok ñōn lūp eo am ilo ainemōn, im mejōm re jamin lo jorran eo I naj bōktok ion jikin kwelok in. Im rar bar bōktok nan ñōn kiñ eo.

23 1 Im kiñ eo e ar jiliklok, im rar kokweloktok ñōn iben, ridto ro otemjej in Juda im Jerusalem. 2 Im

kiñ eo e ar wōnliñlok ñōn mweo imōn Jeova, im iben lōmaro dri Juda otemjej, im ro dri jokwe i Jerusalem, im pris ro, im ro dri kanan, im armij otemjej, ro redrik im ro relap: im e ar konono i lojiliñir nan ko otemjej ilo buk in bujen eo emwij loe ilo imōn Jeova. 3 Im kiñ eo e ar jutōk iturin jur eo, im e ar kōmōn juōn bujen iman Jeova, bwe en etal lor Jeova, im bokake kien ko An, im nan in kennan ko An, im nan in kaiñi ko An, kin aolepen buruen, im aolepen an, bwe en kabin nan ko in bujen eo ar jeje ilo buk in: im armij otemjej rar kabin bujen eo.

4 Im kiñ eo e ar jiroñ Hilkaiä, pris eo elap, im pris ro ian lajrōk eo ken ka ruo, im ro dri lale kejem, bwe ren kadrioielok jen tempel in Jeova jābi otemjej ar kōmōnmōni ñōn Beal, im ñōn jaran lōñ; im e ar tili ilikin Jerusalem ilo melaj ko in Kidron, im bōklok brii in ubaj jeni ñōn Betel. 5 Im e ar kōtaik pris ro an ekjōp ko, ro kiñ ro in Juda rar likit ir bwe ren kōkaijurjur ilo jikin ko reutiej ilo jikin kwelok ko in Juda, im ilo jikin ko iturin Jerusalem; ro bareinwōt rar kōkaijurjur ñōn Beal, ñōn al, ñōn aliñ, ñōn buke in iju ko, im ñōn aolepen jaran lōñ. 6 Im e ar kadrioielok Ashira eo jen imōn Jeova, ilikin Jerusalem, ñōn wea Kidron, im tile iturin wea Kidron, im kōprakilkile, im joloke na ion wuliej ko an armij wan ro. 7 Im e ar kokkure moko imōn dri Sodom; ko rar ber ilo imōn Jeova, ijo kōra ro rar ej im nuknuk ñōn Ashira eo. 8 Im e ar āñintok pris ro otemjej jen jikin kwelok ko in Juda, im e ar katton jikin ko reutiej ijo pris ro rar kōkaijurjur, jen Giba ñōn Bier-shiba; im e ar kokkure jikin ko reutiej in kejem ko, ko rar ber iturin kejem eo an Joshua iroi in jikin kwelok eo, ko i anmiñin aur in jikin kwelok eo. 9 Ijoke, pris ro in jikin ko reutiej rar jab wōnliñlok ñōn lokatok in Jeova i Jerusalem, a rar mōña bred e jab uwe, iben ro jeir im jātir. 10 Im e ar katton Topet, eo ej ilo komlōl in ro nejin Hinnom, bwe

ejelok man en kōmōn bwe nejin kōra ak man en dribuk kijeek nōn Molek. 11 Im e ar bōkilok ors ko kiñ ro in Juda rar lelok nōn al, iturin kejem in imōn Jeova, iturin rum eo an Netanmīlek dri lale bo ko, eo e ar ber ilo jikin ko rebak; im e ar tile jariot ko in al kin kijeek. 12 Im lokatok ko ion kejenwan bo eo an Ehaz, ko kiñ ro in Juda rar kōmōnmōni, im lokatok ko Menassa e ar kōmōnmōni ilo worwor ko ruo in imōn Jeova, kiñ eo e rupi, im e ar kokkure jen ijo, im e ar jolok bōñōlñōl eo air na ilo wea Kidron. 13 Im jikin ko reutiej rar ber iman Jerusalem, ko rar ber i anibijmaroñōn tol in etton, ko Solomon kiñ in Israel e ar kalek nōn Ashterot men in jōjōik an ro nejin Saidon, im nōn Kimosh men in jōjōik an Moab, im nōn Milkom men in jōjōik an ro nejin Amon, kiñ eo e ar kattoni. 14 Im e ar rupi jur dreka ko, im juokwe Ashira ko, im kobrōk jikir kin drin armij.

15 Bareinwōt, ¹ lokatok eo i Betel, im jikin eutiej eo Jeroboam nejin Nibat, eo e ar kabwir Israel, e ar kōmōne, aet, lokatok eo im jikin eo eutiej, e ar kokkure; im e ar tile jikin eo eutiej im kōprakilkile, im tile Ashira eo. 16 Im ke Josaia e ar oktōk, e ar lo lūp ko rar ber ijo ilo tol eo; im e ar jilkinlok im bōk dri ko jen lūp ko, im tili ion lokatok eo, im katton e, ekar nōn nan eo an Jeova, eo armij ōn Anij e ar kwaloke, eo e ar kwalok men kein. 17 Inem e ar ba, Ta ken kemem ne ijloe? Im [armij in jikin kwelok eo rar ba nōn e, Lūpōn armij ōn Anij eo e ar itok jen Juda, im e ar kwalok men kein kwar kōmōni nae lokatok in Betel. 18 Im e ar ba, En berwōt; ejelok armij en kamōkit dri ko drin. Ein drein rar likit dri ko drin iben drin dri kanan eo e ar drioijtōk jen Sameria. 19 Im moko otemjej ilo jikin ko reutiej rar ber ilo jikin kwelok ko in Sameria, ko kiñ ro in Israel rar kōmōnmōni in kaillu Jeova, Josaia e ar bōkilok, im e ar kōmōn nōn ir ekar

nōn men otemjej e ar kōmōni i Betel. 20 Im e ar mōn pris ro otemjej an jikin ko reutiej rar ber ijo, ion lokatok ko, im e ar tile dri ko drin armij ioir; im e ar jeblaktok nōn Jerusalem.

21 Im kiñ eo e ar jiroñ armij otemjej, im ba, Komin lale kijone eo nōn Jeova ami Anij, einwōt emwij jeje ilo buk in, buk in bujen. 22 Emol re jañin lale juōn kijone einwōt, jen ran ko ke ro dri ekajet rar ekajete Israel, jab ilo ran ko otemjej an kiñ ro in Israel, ak an kiñ ro in Juda; 23 a ilo yiō eo ken ka joñoul drualitōk an kiñ Josaia, ar lale kijone in nōn Jeova i Jerusalem.

24 Bareinwōt ro jitōb rej kōmao ibeir, im ro dri marmir, im ekjōp ko, im men in jōjōik otemjej ar loi ilo imōn Juda, im i Jerusalem, Josaia e ar juloki, bwe en kabin nan ko an kien eo emwij jeje ilo buk eo Hilkaia, pris eo, e ar loe ilo imōn Jeova. 25 Im ejelok kiñ einwōt, mokta jen e, eo e ar oktōk nōn Jeova kin aolepen buruen, im aolepen an, im aolepen an kajur, ekar nōn aolepen kien Moses; im elikin, ejelok e ar walok einwōt.

26 Ijoke, Jeova e ar jab oktōk jen An illu ebwil im elap, eo E ar illu kake nae Juda, kin kakitōtō ko otemjej Menassa e ar kakitōtōik E kake. 27 Im Jeova e ar ba, I naj bareinwōt kamōkit Juda jen iman meja, einwōt I ar kamōkit Israel, im I naj jolok jikin kwelok in I ar kālete, aet Jerusalem, im mweo I ar konono kake, Eta e naj ie.

28 Ak jerbal ko jet an Josaia, im men ko otemjej e ar kōmōni, ar jab jeje ilo buk in bwebwenato ko an kiñ ro in Juda ke? 29 Ilo ran ko an, Pero-niko kiñ in Ijīpt, e ar wōnliñlok nae kiñ in Assiria nōn river Upretis: im kiñ Josaia e ar ilok nae e: im Pero-niko e ar mōn e i Megiddo, ke e ar loe. 30 Im ro dri korijeran rar bōktok ubōn ilo juōn jariot, jen Megiddo nōn Jerusalem, im kalibwin e ilo lūp eo lūpon. Im ro dri eneo rar bōk Jihoahaz, nejin Josaia, im kabit e, im kōmōn e kiñ in binej jenkwōn jemen. 31 Jihoahaz ridtōn roñoul jilu yiō ke

e jino an kiñ, im e ar kiñ iomin jilu aliñ i Jerusalem: im etan jinen, Hamutal, nejin Jeremaia dri Libna. 32 Im e ar kōmōn nana iman mejen Jeova ekar ñōn men otemjej ro jimar rar kōmōne. 33 Im Pero-niko e ar lukwoje i Ribla ilo ene Hemat, bwe en jab jeblak ñōn Jerusalem; im kakien eneo kin owoj, jibuki talent silver, im juōn talent gold. 34 Im Pero-niko e ar kairoij Ilaekim nejin Josaia kiñ in binej jenkwōn Josaia jemen, im e ar ukōt etan ñōn Jihoiakim: a e ar bōklok Jihoahaz, im e ar itok ñōn Ijpt, im e mij ijo. 35 Im Jihoiakim e ar lelok silver im gold eo ñōn Pero; a e ar kakien eneo bwe en lelok mōnni eo ekar ñōn kien Pero: e ar bōk silver im gold eo jen armij dri eneo ilo kajuren, jen jabrewōt iair ekar ñōn owōj eo an, bwe en lelok ñōn Pero-niko.

36 Jihoiakim ridtōn roñoul lailim yiō ke e ar jino in kiñ; im e ar kiñ iomin joñoul juōn yio i Jerusalem: im etan jinen, Zibaida nejin Pedaia dri Ruma. 37 Im e ar kōmōn nana iman mejen Jeova, ekar ñōn men otemjej ro jimar rar kōmōni.

24 ¹ Ilo ran ko an, Nebukadnezzar kiñ in Babilon e er wōnlīntok, im Jihoiakim e ar korijer ñōn e iomin jilu yiō: inem e ar oktōk im kabuñbata nae e. 2 Im Jeova e ar jilkinlok nae e jar ko jaran dri Kaldia, im jar ko jaran dri Siria, im jar ko jaran dri Moab, im jar ko jaran dri Amon, im jilkinlok ir nae Jerusalem bwe ren kokkure, ekar ñōn nan an Jeova, eo E ar konono kin ro dri korijeran, dri kanan ro. 3 Emol, kin kien Jeova, men in e ar itok ion Juda, im kamōkit ir jen iman mejen, kin bwir ko an Menassa, ekar ñōn men otemjej e ar kōmōni, 4 im kin bōtōktōk eo ejelok ruōn, eo e ar katorloki; bwe e ar kalōñ Jerusalem kin bōtōktōk ejelok ruōn: inem Jeova e jab kōnan jeorlok. 5 Ak jerbali ko jet an Jihoiakim, im men otemjej e ar kōmōni, ar jab jeje ilo buk in bwebwenato ko an kiñ ro in Juda ke? 6 Ein drein Jihoiakim e ar kiki iben ro jimar; im

Jihoiakim nejin e ar kiñ im binej jenkwōn. 7 Im kiñ in Ijpt e ar jab bar itok jen eneo an; bwe kiñ in Babilon e ar bōk, jen river in Ijpt ñōn river Upretis, aolepen ijo e kar an kiñ in Ijpt.

8 Jihoiakim ridtōn joñoul dualitōk yiō ke e ar jino in kiñ; im e ar kiñ i Jerusalem iomin jilu aliñ: im etan jinen, Nihushta nejin Elnetan dri Jerusalem. 9 Im e ar kōmōn nana iman mejen Jeova, ekar ñōn men otemjej jemen e ar kōmōni.

10 Ien eo ro dri korijeran Nebukadnezzar kiñ in Babilon rar itok ñōn Jerusalem, im rar nitbwile jikin kwelok eo. 11 Im Nebukadnezzar kiñ in Babilon e ar itok ñōn jikin kwelok eo, ke ro dri korijeran rar nitbwile; 12 im Jihoiakim kiñ in Juda e ar drioielok ñōn iben kiñ in Babilon, e, kab jinen, im ro dri korijeran, im iroi ro an, im dri kabwjrōk ro an: im kiñ in Babilon e ar bōk e ilo yiō eo ken ka dualitōk in an kiñ. 13 Im e ar bōklok jen ijo mweiuk ko otemjej an imōn Jeova, im mweiuk ko an imōn kiñ, im e ar tibrikrik jābi gold otemjej, ko Solomon kiñ in Israel e ar kōmōnmōni ilo tempel in Jeova, einwōt Jeova e ar ba. 14 Im e ar bōkilok aolepen Jerusalem, im iroi otemjej, im aolepen dri tōrinae re kajur, aet, joñoul tausan dri jebokwe, im ro dri kabel otemjej im dri jerbali māl; ejelok ej berwōt, a ro dri jeramel wōt jen armij dri eneo. 15 Im e ar bōklok Jihoiakim ñōn Babilon; im jinen kiñ eo, im limaro belen, im dri kabwjrōk ro an, im ro dri leatōktōk in eneo, e ar bōkilok dri jebokwe jen Jerusalem ñōn Babilon. 16 Im ro otemjej dri kajur, jiljilimjuōn tausan, im ro dri kabel im ro dri jerbali māl juōn tausan, ro otemjej re kajur im maroñ in tōrinae, aet, ir kiñ in Babilon e ar bōkitok ñōn Babilon dri jebokwe. 17 Im kiñ in Babilon e ar kairoij Mattanaia, jātīn jemen Jihoiakim, kiñ in binej jenkwōn, im e ar ātkālen e Zedekaia.

18 Zedekaia ridtōn roñoul juōn yiō

ke ej jino in kiñ; im e ar kiñ iomin joñoul juōn yiō i Jerusalem: im etan jinen, Hamutal nejin Jeremaia dri Libna. 19 Im e ar kōmōn nana iman mejen Jeova, ekar ñōn men otemjej Jihoiakim e ar kōmōni. 20 Bwe kin illu an Jeova, e ar walok im ein drein ilo Jerusalem im Juda, mae ien an kadrioiĵlok ir jen iman mejen.

Im ¹Zedekaia e ar kabuñbata nae
25 kiñ in Babilon. 1 Ilo yiō eo ken ka druatimjuōn in an kiñ, ilo aliñ eo ken ka joñoul, ilo ran eo ken ka joñoul in aliñ eo, Nebukadnezzar kiñ in Babilon e ar itok, e im aolepen jar in tōrinae eo an nae Jerusalem, im rar kamp nae; im rar kōmōn me ko nae e, im kabol e. 2 Ein drein emwij nitbwile jikin kwelok eo ñōn yiō eo ken ka joñoul juōn an kiñ Zedekaia. 3 Ilo ran eo ken ka druatimjuōn in aliñ eo ken kemen, e kanuij lap ñita ilo jikin kwelok eo, inem ejelok bred ñōn armij dri eneo. 4 Ien eo ar rupe worwor in jikin kwelok eo, im ro dri tōrinae otemjej rar ko ilo boñ, ilo ial in aur eo ikōtan worwor ko ruo, eo iturin jikin kallip an kiñ, (ak ro dri Kaldia rar jurōk jikin kwelok eo im kabole); im kiñ eo e ar ilok ilo ial in Araba. 5 A jar in tōrinae an dri Kaldia rar lukworkwore kiñ eo, im rar tōbare ilo ene emōn biken in Jeriko; im jar in tōrinae eo an e ar jibiliklik jen e. 6 Inem rar bōk kiñ eo, im bōklok e ñōn kiñ in Babilon ñōn Ribla; im rar ekajete. 7 Im rar mōn lōmaro nejin Zedekaia iman mejen, itiki mejen, im lukwoje kin tomere ko, im bōklok e ñōn Babilon.

8 Ak ilo aliñ eo ken ka lailim, ilo ran eo ken ka jiljilimjuōn in aliñ eo, eo yiō eo ken ka joñoul druatimjuōn an kiñ Nebukadnezzar, kiñ in Babilon, Nebuzaredan kapen an ro dri bar, korijeran kiñ in Babilon, e ar itok ñōn Jerusalem. 9 Im e ar tile imōn Jeova, im imōn kiñ eo; im moko otemjej i Jerusalem, aet, jabrewōt im elap e ar kaloke. 10 Im aolepen jar an ro dri Kaldia, ro rar ber iben kapen

in ro dri bar, rar rupe worwor ko an Jerusalem i belakin. 11 Im armij ro jet ro rar berwōt ilo jikin kwelok eo, im ro rar buñlok, ro rar illok ñōn iben kiñ in Babilon, im matōn jar eo, Nebuzaredan, kapen an ro dri bar, e ar bōklok ir dri jebokwe. 12 A kapen an ro dri bar e ar likit jet ian ro dri jeramel tata in eneo, bwe ren lale bwil in grep ko im jikin kallip ko.

13 ¹Im jur jinibōrōrō ko rar ber ilo imōn Jeova, im loñtōk ko im lometo jinibōrōrō ko rar ber ilo imōn Jeova, ro dri Kaldia rar tibrikriki, im bōklok jinibōrōrō eo ñōn Babilon. 14 Im pot ko, im shovel ko, im ken jojen melle in lamp ko, im jibun ko, im jābi otemjej jinibōrōrō rar korijer kake, rar bōkilok. 15 Im pan in kijeek ko, im besōn ko, gold ak silver, kapen an ro dri bar e ar bōkilok. 16 Jur ko ruo, juōn lometo, im loñtōk ko Solomon e ar kōmōnmōni ñōn imōn Jeova, jini-bōrōrō an jābi kein otemjej, ejelok joñair. 17 Utiejen juōn jur joñoul drualitōk kubit, im juōn eoñlok jini-bōrōrō ion; im utiejen eoñlok jilu kubit, im eor ok im pōmgranet ion eoñlok eo i belakin, aolep jinibōrōrō; im jur eo juōn e ar bareinwōt, im eor an ok.

18 Im kapen in ro dri bar e ar bōk Siraia pris elap, im Zepanaia pris eo ken ka ruo, im lōmaro jilu dri lale kejem: 19 im jen jikin kwelok eo e ar bōk juōn dri kabwijrōk, eo e ar likit e ion armij dri tōrinae; im lailim eman ian ro rej lo mejen kiñ, ar lo ir ilo jikin kwelok eo; im dri jeje eo, kapen in jar in tōrinae, eo ej teltillok armij ro dri eneo; im jiljinofoul eman ian ro dri eneo, ar lo ir ilo jikin kwelok eo. 20 Im Nebuzaredan, kapen in ro dri bar e ar bōk ir, im āñinlok ir ñōn kiñ in Babilon, i Ribla. 21 Im kiñ in Babilon e ar mōn ir bwe ren mij, i Ribla ilo enen Hemat. Ein drein emwij āñinlok Juda, dri jebokwe jen eneir.

22 Im kin armij ro ar likit ir ilo enen Juda, ro kiñ in Babilon e ar likit ir, e ar kōmōn Gedelaia nejin Fhaikam,

nejin Shepan, bwe en iroiĵ ioir. 23 A ke kapen ro an jar ko, ir im ro droir, rar roĥjake bwe kiĥ in Babilon e ar kōmōn Gedelaia iroiĵ, rar itok ņōn iben Gedelaia i Mizpa, aet, Ishmeel nejin Netenaia, im Johenan nejin Karia, im Siraia nejin Tanhuræet, dri Nitopa, im Jeazanaia nejin dri Meakat, ir im ro droir. 24 Im Gedelaia e ar kanĉjnjij ņōn ir im ro droir, im ba ņōn ir, Komin jab mijōk ro dri koriĵeran dri Kaldia: komin jokwe ilo enin im koriĵer ņōn kiĥ in Babilon, inem e naj emōn ibemi. 25 A ilo aliĥ eo ken ka jiljilimjuōn, Ishmeel nejin Netenaia, nejin Elishema, ian ro nejin kiĥ, e ar itok, im joĥoul eman iben, im mōn Gedelaia, bwe en mij, im ro dri Ju, im ro dri Kaldia, ro rar ber iben i Mizpa. 26 Im armij otemĵej, ajiri ro im ridto ro, im

kapen ro in jar ko, rar jutōk im itok ņōn Iĵipt; bwe rar mijōk ro dri Kaldia.

27 ¹ Im ilo yiō eo ken ka jilĥoul jiljilimjuōn an Jiĥoiakin kiĥ in Juda jebokwe, ilo aliĥ eo ken ka joĥoul ruo, ilo ran eo ken ka roĥoul jiljilimjuōn in aliĥ eo, Ivil-merodak kiĥ in Babilon, ilo yiō eo ke e ar jino in kiĥ, e ar koutiej bōran Jiĥoiakin kiĥ in Juda, jen prison; 28 im e ar konono joij ņōn e, im likit tron eo an eutieĵ jen tron ko an kiĥ ro rar ber iben i Babilon, 29 im e ar ukōt nuknuk ko an, nuknuk in prison. Im Jiĥoiakin e ar mōĥa bred iman meĵen ien otemĵej, ran ko otemĵej in an mour: 30 im kin kijen, ien otemĵej, rar lelok kijen jen kiĥ eo, jabrewōt ran juōn kij, ran ko otemĵej in an mour.

¹ Jer. 52. 31-34

BUK EO MOKTA IN KRONIKEL

1 ¹Adam, Seth, Inos, **2** Kenan, ¹Mehalelel, Jered, **3** Inök, Mituse-la, Lemek, **4** Noa, Shem, Ham, im Jepet.

5 Ro nejin ²Jepet: Gomer, im Megog, im Medai, im Jevan, im Tubal, im Mishek, im Tiras. **6** Im ro nejin Gomer: Ashkinaz, im Dipat, im Togarma. **7** Im ro nejin Jevan: Ilaisha, im Tarshish, Kittim, im Rodanim.

8 Ro nejin Ham: Kush, im Mizreim, Put, im Kenean. **9** Im ro nejin Kush: Siba, im Havila, im Sabta, Reama, im Sabtika. Im ro nejin Reama: Shiba, im Didan. **10** Im Kush e ar keutak Nimrod: e ar jino an dri kajur ilo löl. **11** Im Mizreim e ar keutak Ludim, Anamim, im Lihehim, im Naptuhim, **12** im Patrusim, im Kasluhim, (eo ro dri Pilistia rar walok jen e), im Kaptorim. **13** Im Kenean e ar keutak Saidon Manjien, im Het, **14** im dri Jibus, im dri Amor, im dri Girgas, **15** im dri Hiv, im dri Ark, im dri Sin, **16** im dri Arvad, im dri Zemar, im dri Hemat.

17 Ro nejin ³Shem: Ilam, im Ashur, im Arpaksad, im Lud, im Eram, im Uz, im Hul, im Gitur, im Mishek. **18** Im Arpaksad e ar keutak Shila, im Shila e ar keutak Iber. **19** Im ar lotak ruo nejin Iber: etan juön Pileg; bwe ilo ran ko an, emwij kijbil löl: im etan leo jätin Joktan. **20** Im Joktan e ar keutak Almodad, im Shilep, im Hezarmevet, im Jira, **21** im Hadoram, im Uzal, im Dikla, **22** im Ibal, im Abimael, im Shiba, **23** im Opir, im Havila, im Jobab. Rein otemjej ro nejin Joktan.

24 ⁴Shem, Arpaksad, Shila, **25** Iber, Pileg, Reu, **26** Sirug, Nehor, Tira, **27** Ebram, (e in Ebrean).

28 Ro nejin Ebrean: Aisak, im

Ishmeel. **29** Ir kein ebeben ko air: manjien Ishmeel, Nebaiot; inem Kidar, im Abdiel, ira Mibsam, **30** Mishma, im Duma, Massa, Hedad, im Tima, **31** Jitur, Nepish, im Kedima. Rein ro nejin Ishmeel.

32 Im ro nejin Ketura, konkubain an Ebrean: e ar keutak Zimran, im Jokshan, im Midian, im Ishbak, im Shua. Im ro nejin Jokshan: Shiba, im Didan. **33** Im ro nejin Midian: Ipa, im Iper, im Henok, im Ebaida, im Eldea. Rein otemjej ro nejin Ketura.

34 Im Ebrean e ar keutak Aisak. Ro nejin Aisak: Iso, im Israel.

35 Ro nejin ¹Iso: Elipaz, Reuel, im Jeush, im Jelan, im Kora. **36** Ro nejin Elipaz: Timan, im Omar, Zepi, im Getam, Kinaz, im Timna, im Amalek. **37** Ro nejin Reuel: Nehat, Zira, Shamma, im Mizza.

38 Ro nejin Sier: Lotan, im Shobal, im Zibeon, im Ena, im Daishan. **39** Im ro nejin Lotan: Hori, im Homam; im Timna lio jätin Lotan. **40** Ro nejin Shobal: Elian, im Manahat, im Ibal, Shipai, im Onam. Im ro nejin Zibeon: Aia, im Ena. **41** Ro nejin Ena, Daishon. Im ro nejin Daishon: Hamran, im Eshban, im Itran, im Kiran. **42** Ro nejin Izer: Bilhan, im Zeevan, Jeekan. Ro nejin Daishan: Uz, im Eran.

43 Ak rein kiñ ro rar kiñ ilo ene Idom, mokta jen jabrewöt kiñ e ar iroi ion ro nejin Israel: Bila nejin Bior; im etan jikin kwelok eo an Dinheba. **44** Im Bila e ar mij, im Jobab nejin Zira jen Bozra e ar binej jenkwön im kiñ. **45** Im Jobab e ar mij, im Husham jen enen ro dri Timan e ar binej jenkwön im kiñ. **46** Im Husham e ar mij, im Hedad nejin Bidad, eo e ar mōn Midian ilo melaj an Moab,

¹ Jen. 5. 1-32. ² Jen. 10. 2-4. ³ Jen. 10. 22-29. ⁴ Luk 3. 34-36.

¹ Jen. 36. 4-10.

e ar binej jenkwōn im kiñ: im etan jikin kwelok eo an Evit. 47 Im Hedad e ar mij, im Samla jen Masreka e ar binej jenkwōn im kiñ. 48 Im Samla e ar mij, im Shaul jen Rihobot iturin River eo e ar binej jenkwōn im kiñ. 49 Im Shaul e ar mij, im Beal-henan nejin Akbor e ar binej jenkwōn im kiñ. 50 Im Beal-henan e ar mij, im Hedad e ar binej jenkwōn im kiñ: im etan jikin kwelok eo an, Pei: im etan lio belen Mihetabel, nejin Metred, lio nejin Mi-zehab. 51 Im Hedad e ar mij.

Iroijs ro an Idom: iroijs Timna, iroijs Elia, iroijs Jitet, 52 iroijs Oholibima, iroijs Ila, iroijs Painon, 53 iroijs Kinaz, iroijs Timan, iroijs Mibzar, 54 iroijs Magdiel, iroijs Iram. Rein iroijs ro in Idom.

2 Rein ro nejin ¹Israel: Ruben, Simeon, Livai, im Juda, Issakar, im Zebulun, 2 Dan, Josep, im Benjamin, Naptalai, Gad, im Asher.

3 Ro nejin Juda: Er, im Onan, im Shila: irjil rar lotak ñōn e jen lio nejin Shua, dri Kenean. Im Er manjien Juda e ar nana iman mejen Jeova: inem E ar mōn e. 4 Im Tamar lio nejin kin belele, e ar keutak ñōn e Pirez, im Zira. Aolepen ro nejin Juda, lailim.

5 Ro nejin Pirez: Hezron, im Hemul. 6 Im ro nejin Zira: Zimrai, im Itan, im Himan, im Kalkol, im Dera: aolepeir lailim. 7 Im ro nejin Karmai: Ekar, eo dri kejjorran Israel, eo e ar bwir kin men eo emwij lelok ñōn Jeova. 8 Im ro nejin Itan: Azaraia.

9 Bareinwōt ro nejin Hezron, ro rar lotak ñōn e: Jirameel, im Ram, im Kelubai. 10 Im Ram e ar keutak Aminadab, im Aminadab e ar keutak Nashon, eo iroijs an ro nejin Juda. 11 Im Nashon e ar keutak Salma, im Salma e ar keutak Boaz, 12 im Boaz e ar keutak Obed, im Obed e ar keutak Jesse: 13 im Jesse e ar keutak manjien Ilaiab, im Abinadab eo ken ka ruo, im Shimea eo ken ka jilu, 14 Netanel eo ken kemen, Rada eo ken

ka lailim, 15 Ozem eo ken ka jiljino, Devid eo ken ka jiljilimjuōn; 16 im limaro jeir im jātir Ziruaia im Abigeil. Im ro nejin Ziruaia: Ebishai, im Joab, im Esahel, jilu. 17 Im Abigeil e ar keutak Amasa: im jemen Amasa Jiter dri Ishmeel.

18 Im Keleb nejin Hezron e ar keutak ro nejin iben Azuba lio belen, im iben Jeriot; im rein ro nejin: Jisher, im Shobab, im Ardon. 19 Im Azuba e ar mij, im Keleb e ar bōk ñōn e Eprat, eo e ar keutak ñōn e Hur. 20 Im Hur e ar keutak Uri, im Uri e ar keutak Bezalel.

21 Im tokelik Hezron e ar dreloñ ñōn iben lio nejin Mekir jemen Giliad, eo e ar bōk e bwe en belen ke e ridtōn jiljinoñoul yiō: im e ar keutak ñōn e Sigub. 22 Im Sigub e ar keutak Jeir, eo an roñoul jilu jikin kwelok ilo ene Giliad. 23 Im Gishur im Eram rar bōk jikin kwelok ko an Jeir jen ir, im Kinat, kab jikin kwelok ko wujen, aet, jiljinoñoul jikin kwelok. Rein otemjej ro nejin Mekir jemen Giliad. 24 Im elikin an Hezron mij ilo Keleb-eprata, inem Abaija lio belen Hezron e ar keutak ñōn e Ashur jemen Tikoa.

25 Im ro nejin Jirameel manjien Hezron, Ram manjien, im Buna, im Oren, im Ozem, Ehajja. 26 Im iben Jirameel bar juōn belen etan Atara: eo jinen Onam. 27 Im ro nejin Ram manjien Jirameel, Meaz, im Jemin im Iker. 28 Im ro nejin Onam, Shammai, im Jeda. Im ro nejin Shammai: Nedab, im Abishur. 29 Im etan lio belen Abishur, Abiheil: im e ar keutak ñōn e Aban, im Molid. 30 Im ro nejin Nedab: Siled, im Apaim: a Siled e ar mij im ejelok nejin. 31 Im ro nejin Apaim Ishai. Im ro nejin Ishai: Shishan. Im ro nejin Shishan: Alai. 32 Im ro nejin Jeda jātine Shammai: Jiter im Jonetan: im Jiter e ar mij im ejelok nejin. 33 Im ro nejin Jonetan: Pilet, im Zeza. Rein ro nejin Jirameel. 34 Ak ejelok nejin Shishan eman, a nejin kōra wōt. Im iben Shishan juōr dri korijeran, dri Ijpt, etan Jarha

35 Im Shishan e ar lelok lio nejin nōn Jarha, korijeran, bwe en belen: im e ar keutak nōn e Attai. 36 Im Attai e ar keutak Netan, im Netan e ar keutak Zebad, 37 im Zebad e ar keutak Eplal, im Eplal e ar keutak Obed, 38 im Obed e ar keutak Jihu, im Jihu e ar keutak Azaraia, 39 im Azaraia e ar keutak Hilez, im Hilez e ar keutak Eleesa, 40 im Eleesa e ar keutak Sismai, im Sismai e ar keutak Shallum, 41 im Shallum e ar keutak Jekemaia, im Jekemaia e ar keutak Elishema.

42 Im ro nejin Keleb jätin Jirameel, Misa manjien, eo jemen Zip: im ro nejin Maresha jemen Hibron. 43 Im ro nejin Hibron: Kora, im Tappua, im Rikem, im Shima. 44 Im Shima e ar keutak Reham, jemen Jorkeam: im Rikem e ar keutak Shammai. 45 Im leo nejin Shammai Meon: im Meon jemen Bet-zur. 46 Im Ipa, konkubain eo an Keleb, e ar keutak Heran, im Moza, im Gezez: im Heran e ar keutak Gezez. 47 Im ro nejin Jadai: Rigem, im Jotan, im Gishan, im Pilet, im Ipa, im Sheap. 48 Meeka, konkubain eo an Keleb, e ar keutak Shiber im Tirhena. 49 E ar bareinwöt keutak Sheap jemen Madmana, Shiva jemen Makbina, im jemen Gibeä: im lio nejin Keleb Aksa.

50 Rein lōmaro nejin Keleb, eo nejin Hur, manjien Eprata: Shobal jemen Kiriät-jierim, 51 Salma jemen Bet-leem, Herep jemen Bet-geder. 52 Eman ro nejin Shobal jemen Kiriät-jierim: Haroe, jimōtōn dri Menuhot. 53 Im ro nukin Kiriät-jierim: ro dri Itrai, im ro dri Pur, im ro dri Sumat, im ro dri Misra: jen ir ar walok ro dri Zorat im ro dri Esnteol. 54 Ro nejin Salma: Bet-leem, im ro dri Nitopa, Atrot-bet-joab, im jimōtōn ro dri Manahat, ro dri Zor. 55 Im ro nukin dri jeje ro rar jokwe ilo Jebez: ro dri Tirat, ro dri Shimeat, ro dri Sukat. Rein ro dri Ken rar walok jen Hemat jemen ro nukin Rikab.

3 Ak ¹rein ro nejin Devid, ro rar lotak nōn e ilo Hibron; manjien

Amnon, jen Ehinoam, dri Jezriel: eo ken ka ruo, Daniel, jen Abigeil dri Karmel: 2 eo ken ka jilu, Absalom, nejin Meaka, nejin Talmai, kiñ in Gishur: eo ken kemen, Adonaija nejin Hagit: 3 eo ken ka lailim, Shepetaia, jen Abital: eo ken ka jiljino, Itriam, jen Eglä, lio belen: 4 jiljino rar lotak nōn e ilo Hibron; im e ar kiñ ijo jiljilimjuōn yiō im jiljino aliñ. Im ilo Jerusalem e ar kiñ iomin jilñoul jilu yiō; 5 im rein rar lotak nōn e ilo Jerusalem: Shimea, im Shobab im Netan, im Solomon, emen, jen Bat-shua, nejin Ammaiel; 6 im Ibhar, im Elishema, im Elipelet, 7 im Noga, im Nipeg, im Japia, 8 im Elishema, im Ilaia, im Elipelet, druätimjuōn. 9 Rein otemjej lōmaro nejin Devid, eor jen lōmaro nejin limaro dri konkubain: belen Devid im Temar jeir im jätir kōra.

10 Im leo nejin Solomon, Rihoboam, Ebaija leo nejin, Esa leo nejin, Jihoshapat leo nejin, 11 Joram leo nejin, Ehazaia leo nejin, Joash leo nejin, 12 Amazaia leo nejin, Azaraia leo nejin, Jotam leo nejin, 13 Ehaz leo nejin, Hezekaia leo nejin, Menassa leo nejin, 14 Amon leo nejin, Josaia leo nejin. 15 Im ro nejin Josaia: manjien Johenan, eo ken ka ruo Jihoiakim, eo ken ka jilu Zedekaia, eo ken kemen Shallum. 16 Im ro nejin Jihoiakim: Jekonaia leo nejin, Zedekaia leo nejin. 17 Im lōmaro nejin Jekonaia, dri jebokwe eo: Shialtiel leo nejin, 18 im Malkairam, im Pedaia, im Shinazar, Jekamaia, Hoshema, im Nedabaia. 19 Im ro nejin Pedaia: Zirubbabel, im Shimeai. Im ro nejin Zirubbabel: Mishullam im Hananaia: im Shelomit lio jeir im jätir: 20 im Hashuba, im Ohel, im Berekaia, im Hasadaia, Jushab-hised, lailim. 21 Im ro nejin Hananaia: Peletaia, im Jeshaja: ro nejin Repaia, ro nejin Arnan, ro nejin Obedia, ro nejin Shekenai. 22 Im ro nejin Shekenai: Shemaia. Im ro nejin Shemaia: Hattush, im Igal, im Beraia, im Niarai, im Shepat, jiljino. 23 Im ro nejin Niarai: Elioinai, im Hizkaia,

im Azrikam, jilu. 24 Im ro nejin Elioinai: Hodevaia, im Ilaieshib, im Pelaia, im Akub, im Johenan, im Delaia, im Anenai, jiljilimjuōn.

4 Ro nejin 'Juda: Pirez, Hezron, im Karmai, im Hur, im Shobal. 2 Im Riaia nejin Shobal e ar keutak Jehat: im Jehat e ar keutak Ehumai im Lehad. Rein ro nukin ro dri Zorat. 3 Im rein ro nejin jemen Itam: Jezriel, im Ishma, im Ibdash: im etan lio jeir im jätir Hazelponi: 4 im Penuel jemen Gidor, im Izer jemen Husha. Rein ro nejin Hur, manjien Eprata, jemen Bet-leēm. 5 Im iben Ashur jemen Tekoa ruo belen, Hila im Neara. 6 Im Neara e ar keutak nōn e Ehuzzam, im Hiper im Timenai, im Heahashterai. Rein ro nejin Neara. 7 Im ro nejin Hila, Ziret, Izhar, im Etnan. 8 Im Hakoz e ar keutak Enub, im Zobia, im ro nukin Eharhel nejin Herum. 9 Im Jebez e ar utiej jen ro jein im jätin: im jinen e ar naetan Jebez, im ba, Bwe I ar keutak e kin buromōj. 10 Im Jebez e ar kir nōn Anij in Israel, im e ba, Emōn Kwon kejerammōn iō ilo mol, im kalaplok tōreran eo aō, im bwe peōm en iba, im Kwon kejbārok iō jen nana, bwe en jab kaburomōj iō. Im Anij e ar lelok nōn e men eo e ar kajitōk kake. 11 Im Kilub, jätin Shuba, e ar keutak Mihir, eo jemen Eshton. 12 Im Eshton e ar keutak Bet-repa, im Pasia, im Tehina jemen Ir-nehas. Rein armij in Rika. 13 Im ro nejin Kinaz: Otniel im Siraia. Im ro nejin Otniel: Hetat. 14 Im Mionotai e ar keutak Opra: im Siraia e ar keutak Joab jemen Gi-harashim: bwe ir dri mejerik. 15 I ro nejin Keleb nejin Jepunne: Iru, Ila, im Neam; im ro nejin Ila; im Kinaz. 16 Im ro nejin Jihalelel: Zip, im Zipa, Tiria, im Asarel. 17 Im ro nejin Ezra: Jiter, im Mired, im Iper, im Jelon: im lio e ar keutak Miriam, im Shammai, im Ishba jemen Eshtimoa. 18 Im lio belen, dri Ju, e ar keutak Jired jemen Gidor, im Hiber jemen Soko, im Jekutiel jemen Zenoa. Im

rein ro nejin Bithaia lio nejin Pero, eo Mired e ar bōke. 19 Im ro nejin lio belen Hodaia, lio jätin Neham, jemen Keila dri Garmi, im Eshtimoa dri Meakat. 20 Im ro nejin Shaimon: Amnon, im Rinna, Benhenan im Tailon. Im ro nejin Ishai: Zohet, im Ben-zohet. 21 Ro nejin Shila nejin Juda: Er jemen Lika, im Leada jemen Maresha, im ian ro nukin ro rej kōmōnmōn linen kworairik, jen nukin Ashbia: 22 im Jokim, im armij ro in Koziba, im Joash, im Serap, eo iroi j ilo Moab, im Jashubai-lihem. Im jeje ko eto air ber. 23 Rein ro dri potter, im ir ro dri Neteim im Gedira: bwe rar jokwe iben kiñ eo kin jerbal eo an.

24 Ro nejin Simeon: Nemuel, im Jemin, Jerib, Zira, Shaul: 25 Shallum nejin, Mibsam nejin, Mishma nejin. 26 Im ro nejin Mishma: Hamuel nejin, Zakkur nejin, Shimeai nejin. 27 Im joñoul jiljino eman im jiljino kōra nejin Shimeai: a e jab kanuij or nejin lōmaro jein im jätin, im e jab aolep ian ro nukir rar orlok einwōt ro nejin Juda. 28 Im rar jokwe i Bier-shiba, im Moleda, im Hezar-shual, 29 im i Bilha, im i Izem, im i Tolad, 30 im i Bituel, im i Horma, im i Ziklag, 31 im i Bet-markebot, im i Hezar-susim, im i Bet-bairai, im i Sheareim. Ir kein jikin kwelok ko air nōn ien eo Devid e ar kiñ. 32 Im jikin kwelok ko air redrik, Itam, im Ain, Rimmon, im Token, im Eshan, lailim jikin kwelok: 33 im jikin kwelok ko air otemejj rar iturin jikin kwelok kein, nōn Beal. Ir kein jikir, im eor nan in ebeben ibeir. 34 Im Meshobab, im Jamlek, im Josha nejin Amezaia, 35 im Joel, im Jihu nejin Joshibia, nejin Siraia, nejin Esaiel, 36 im Elioinai, im Jeakoba, im Jeshohaia, im Esaia, im Adiel, im Jesimiel, im Beneia, 37 im Zaiza nejin Shipai, nejin Allon, nejin Jedaia, nejin Shimrai, nejin Shimaia: 38 rein emwij kwalok etair, iroi j ilo nukir: im mo ko imōn jemeir elap air orlok. 39 Im rar ilok nōn kejem in Gidor, nōn rear in komlōl eo, bwe ren bukot kijen

kiru ko air. 40 Im rar lo melaj emōn im eor molawi, im ene eo e rebōkbōk im ejelok iruij, a ej ainemōn: bwe ro rar jokwe ie mokta ro dri Ham. 41 Im rein emwij jeje etair, rar itok ilo ran ko an Hezeakaia, kiñ in Juda, im rar kokkure mo ko im nuknuk ko air, im dri Meunim ro rar lo ir ie, im torlok bokir ñōn ranin, im rar binej jenkwaair im jokwe ie: bwe eor kijen kiru ko air ie. 42 Im jet iair, ian ro nejin Simeon, limabuki man, rar ilok ñōn to Sier, im iroi ro air, Peletaia, im Nieraia, im Repeaia, im Uzzaia, ro nejin Ishai. 43 Im rar mōn ro bwen dri Amelek rar ko, im rej jokwe ie ñōn ranin.

5 Im ro nejin Ruben, manjien Israel, (bwe e¹ manjien: a kin an katton kinien jemen, emwij lelok jolit an manjien ñōn ro nejin Josep, nejin Israel inem re jab bwine nan in ebeben ekar ñōn jolit in manjien. 2 Bwe Juda e ar bōk anjo jen ro jein im jātīn, im jen e ar walok iroi ro: a jolit ko an manje e naj an Josep), 3 ro nejin Ruben manjien Israel: Henok, im Pallu, Hezron, im Karmai. 4 Ro nejin Joel: Shemaia nejin, Gog nejin, Shimeai nejin, 5 Maika nejin, Riaia nejin, Beal nejin, 6 Beira nejin, eo Tilgat-pilniser kiñ in Assiria e ar bōklok dri jebokwe: e ar iroi an ro dri Ruben. 7 Im ro jein im jātīn ekar ñōn ro nukir, ke nan in ebeben ko air emwij watōk e: ro re utiej, Jeiel im Zekeraia, 8 im Bila nejin Ezaz, nejin Shima, nejin Joel, eo e ar jokwe ilo Aroer, aet ñōn Nibo im Beal-mion: 9 im e ar jokwe i mejāti eo i rear ñōn ene jemaren jen river Upretis, bwe eorlok kiru ko air ilo ene Giliad. 10 Im ilo ran ko an Saul, rar tōrinaek ro dri Hegar, im rar buñ kin peir: inem rar jokwe ilo im nuknuk ko air, ilo aolepen ene eo i rear jen Giliad.

11 Im ro nejin Gad rar jokwe iki-jeir, ilo ene Beshan ñōn Salika: 12 Joel eo e utiej, im Shepan eo ken ka ruo, im Janai, im Shipat ilo Beshan. 13 Im ro jeir im jātīr ian mo ko imōn

jemeir: Maikeel, im Mishullam, im Shiba, im Jorai, im Jekan, im Zia, im Iber, jiljilimjuōn. 14 Rein ro nejin Abiheil, nejin Hurai, nejin Jaroa, nejin Giliad, nejin Maikeel, nejin Jeshishai, nejin Jado, nejin Buz; 15 Ehai nejin Abdaiel, nejin Gunai, iroi ro ion mo ko imōn jemeir. 16 Im rar jokwe ilo Giliad im Beshan, im ilo jikin kwelok ko an, im ilo wujen an She-ron, ñōn tōreren ko air. 17 Rein otemjej emwij watok ir kin nan in ebeben ilo ran ko an Jotam kiñ in Juda, kab ilo ran ko an Jeroboam kiñ in Israel.

18 Ro nejin Ruben, im ro dri Gad, im jibilkwōn bwijin Menassa, man ro re beran, im maroñ in inek likipijnōk im jāji, im re jela tōrinae, eñoul emen tausan jiljilimjuōn buki jiljinoñoul, re maroñ in ilen tōrinae. 19 Im rar tōrinaek ro dri Hegar, im Jitur, im Nepish, im Nodab. 20 Im ar jibōñ ir nae ir, im emwij lelok ro dri Hegar na ilo peir, kab ir otemjej rar ber ibeir: bwe rar kir ñōn Anij ilo tōrinae eo, im E ar eoroñ ir bwe rar liki E. 21 Im rar āñinlok kiru ko air: kamel ko air limñoul tausan, im sip ko rubuki limñoul tausan, im ass ko ruo tausan, im armij jibuki tausan. 22 Bwe elōñ ro rar buñ im mij, bwe tōrinae eo an Anij. Im rar binej jenkwaair im jokwe ie ñōn ien jebokwe eo.

23 Im ro nejin jibilkwōn bwijin Menassa rar jokwe ilo eneo; rar orlok jen Beshan ñōn Beal-hermon im Sinir im to Hermon. 24 Ir rein jiōb ro an imōn ro jimair: aet Iper, im Ishai, im Ilaiel, im Azriel, im Jeremaia, im Hodevaia, im Jadiel, armij dri kajur im beran, re buñbuñ, jiōb ro an imōn ro jimair.

25 Im rar bwir nae Anij an ro jemeir, im rar lūñ kin air lore anij ro an ro dri ailiñ ko ilo eneo, ro Anij e ar mōn iman mejeir. 26 Im Anij e ar biuktōke an Pul kiñ in Assiria, im an Tilgat-pilniser kiñ in Assiria, im e ar bōklok ir, aet ro dri Ruben, im ro dri Gad, im ro dri jibilkwōn bwijin Menassa, im e ar bōktok ir ñōn Hela,

im Hebor, im Aera, im nōn river Gozan nōn ranin.

6 Ro nejin¹ Livai: Gershon, Kohat, im Mirerai. **2** Im ro nejin Kohat: Amram, Izar, im Hibron, im Uzaiel. **3** Im ro nejin Amram: Aron, im Moses, im Miriam. Im ro nejin Aron: Nedab, im Ebaihu, Iliezar, im Itamar. **4** Iliezar e ar keutak Pinehas, Pinehas e ar keutak Abishua, **5** im Abishua e ar keutak Bukkai, im Bukkai e ar keutak Uzai, **6** im Uzai e ar keutak Zerehaia, im Zerehaia e ar keutak Mireiot, **7** Mireiot e ar keutak Ameraia, im Ameraia e ar keutak Ehaitub, **8** im Ehaitub e ar keutak Zedok, im Zedok e ar keutak Ehimeaz, **9** im Ehimeaz e ar keutak Azaraia, im Azaraia e ar keutak Johenan, **10** im Johenan e ar keutak Azaraia, (eo e ar kōmōn jerbāl an pris ilo mweo Solomon e ar kalek i Jerusalem), **11** im Azaraia e ar keutak Ameraia, im Ameraia e ar keutak Ehaitub, **12** im Ehaitub e ar keutak Zedok, im Zedok e ar keutak Shallum, **13** im Shallum e ar keutak Hilkaia, im Hilkaia e ar keutak Azaraia, **14** im Azaraia e ar keutak Siraia, im Siraia e ar keutak Jihozedak: **15** im Jihozedak e ar ilok nōn jebokwe, ke Jeova e ar āninlok Juda im Jerusalem kin pein Nebukadnezar.

16 Ro nejin Livai: Gershom, Kohat, im Mirerai. **17** Im ir kein etan ro nejin Gershom: Libnai, im Shimeai. **18** Im ro nejin Kohat Amram, im Izhar, im Hibron, im Uzaiel. **19** Ro nejin Mirerai: Malai im Mushai. Im ir kein nukin ro dri Livai, ekar nōn mo ko imōn ro jimair. **20** An Gershom, Libnai nejin, Jehat nejin, Zimma nejin, **21** Joa nejin, Iddo nejin, Zira nejin, Jeateraia nejin. **22** Ro nejin Kohat: Aminadab nejin, Kora nejin, Assir nejin, **23** Elkena nejin, im Ebiesap nejin, im Assir nejin, **24** Tehat nejin, Uraiel nejin, Uzaiia nejin, in Shaul nejin. **25** Im ro nejin Elkena: Amasai, im Ehaimot. **26** Kin Elkena, ro nejin Elkena: Zopai nejin,

im Nehat nejin, **27** Ilaia nejin, Jeroham nejin, Elkena nejin. **28** Im ro nejin Samuel: manjien Joel, im eo ken ka ruo Ebaija. **29** Ro nejin Mirerai: Malai, Libnai nejin, Shimeai nejin, Uzai nejin, **30** Shimeai nejin, Haggia nejin, Esaia nejin.

31 Rein ro Devid e ar likit ir dri tel ilo jerbāl in al ilo imōn Jeova, elikin an dipdip eo jokōne. **32** Im rar jerbāl kin al iman imōn kabēr in imōn kwelok eo, mae ien emwij an Solomon kalek imōn Jeova ilo Jerusalem: im lal jerbāl eo air ekar nōn air lajrōk. **33** Rein ro rar jerbāl, im ro nejir. Ian ro nejin ro dri Kohat, Himan dri al, nejin Joel, nejin Samuel, **34** nejin Elkena, nejin Jeroham, nejin Ilaia, nejin Toa, **35** nejin Zup, nejin Elkena, nejin Mehat, nejin Amesai, **36** nejin Elkena, nejin Joel, nejin Azaraia, nejin Zepenaia, **37** nejin Tehat, nejin Assir, nejin Ebaiesap, nejin Kora, **38** nejin Izar, nejin Kohat, nejin Livai, nejin Israel. **39** Im jein im jātin Esap, eo e ar jutōk i anbijmarōnōn, aet Esap nejin Berekaia, nejin Shimeai, **40** nejin Maikel, nejin Beasaia, nejin Malkaija, **41** nejin Etnai, nejin Zira, nejin Adai, **42** nejin Itan, nejin Zima, nejin Shimeai, **43** nejin Jehat, nejin Gershom, nejin Livai. **44** Im i anmiñin ro jeir im jātir ro nejin Mirerai: Itan nejin Kishai, nejin Abdai, nejin Maluk, **45** nejin Hasebaia, nejin Amazaia, nejin Hilkaia, **46** nejin Amzai, nejin Benai, nejin Shimer, **47** nejin Malai, nejin Mushai, nejin Mirerai, nejin Livai. **48** Im ro jeir im jātir dri Livai emwij likit ir nōn aolepen jerbāl in imōn kabēr eo an imōn Anij.

49 A Aron im ro nejin rar¹ katok ilo lokatok in katok kijeek, im ilo lokatok in kaijurjur, nōn aolepen jerbāl an jikin kwojarjar otem kwojarjar im nōn kōmōn kilajrōk nōn Israel, ekar nōn aolepen men ko Moses korijeran Anij e ar jiroñ ir kake. **50** Im rein ro nejin Aron: Iliezar nejin, Pinehas nejin, Abishua nejin, **51** Bukkai nejin, Uzai nejin, Zerehaia ne-

¹ Ex. 6. 16-25.

² Ex. 27. 1-8.

jin, 52 Mireiot nejin, Ameraia nejin, Ehaitub nejin, 53 Zedok nejin, Ehimeaz nejin.

54 Ir kein jikin kwelok ko air ekar ñõn kamp ko air, ilo tõreren ko air: ñõn ro nejin Aron, ian ro nukin dri Kohat, (bwe air kakõle eo mokta), 55 ñõn ir rar lelok Hibron ilo ene Juda, im wujen ko an; 56 a jikin kallip ko an jikin kwelok eo, im jikin kwelok ko wujen, rar lelok ñõn Keleb nejin Jepunne. 57 Im ñõn ro nejin Aron rar lelok jikin kwelok ko, jikin kone, Hibron; Libna bareinwõt im wujen ko an, im Jattir, im Eshtimoa im wujen ko an, 58 im Hailen kab wujen ko an, Diber im wujen ko an, 59 im Eshan kab wujen ko an, im Bet-shimesh kab wujen ko an: 60 im jen bwijin Benjamin, Giba kab wujen ko an, im Allemet kab wujen ko an, im Anatot kab wujen ko an. Jikin kwelok ko otemjej ñõn ro nukir, joñoul jilu jikin kwelok.

61 Im ñõn ro jet ian ro nejin Kohat, rar lelok kin kakõle, jen nukin bwij eo, jen jibilkwõn bwij, jen jibilkwõn Menassa, joñoul jikin kwelok. 62 Im ñõn ro nejin Gershom, ekar ñõn ro nukir, jen bwijin Issakar, im jen bwijin Asher, im jen bwijin Naptalai, im jen bwijin Menassa ilo Beshan, joñoul jilu jikin kwelok. 63 Ñõn ro nejin Mirerai ar lelok kin kakõle, ekar ñõn ro nukir, jen bwijin Ruben, im jen bwijin Gad, im jen bwijin Zebulun, joñoul ruo jikin kwelok. 64 Im ro nejin Israel rar lelok ñõn ro dri Livai air jikin kwelok ko kab wujen ko air. 65 Im rar lelok kin kakõle jen bwijin ro nejin Juda, im jen bwijin ro nejin Simeon, im jen bwijin ro nejin Benjamin, jikin kwelok kein, emwij naetair.

66 Im iben jet ian ro nukin ro nejin Kohat, jikin kwelok ko iloan tõrereir jen bwijin Ipreim. 67 Im rar lelok ñõn ir jikin kwelok ko jikin kone, Shikem ilo ene tol an Ipreim, kab wujen ko an: Gizer bareinwõt, kab wujen ko an, 68 im Jokmiam kab wujen ko an, im Bet-horon kab wujen ko an, 69 im Aijalon kab wujen ko an,

im Gat-rimon kab wujen ko an, 70 im jen jibilkwõn bwijin Menassa, Ener kab wujen ko an, im Bileam kab wujen ko an, ñõn nukin ko jet ian ro nejin Kohat.

71 Ñõn ro nejin Gershom rar lelok, jen nukin jibilkwõn bwijin Menassa, Golan ilo Beshan kab wujen ko an, im Ashterot kab wujen ko an: 72 im jen bwijin Issakar, Kedesh kab wujen ko an, Dabera kab wujen ko an, 73 im Remot kab wujen ko an, im Enem kab wujen ko an: 74 im jen bwijin Asher, Meshal kab wujen ko an, im Abdon kab wujen ko an, 75 im Hukok kab wujen ko an, im Rihob kab wujen ko an; 76 im jen bwijin Naptalai, Kedesh ilo Galili kab wujen ko an, im Hamon kab wujen ko an, im Kiriateim kab wujen ko an.

77 Ñõn ro jet ian ro dri Livai, ro nejin Mirerai, ar lelok jen bwijin Zebulun, Rimono kab wujen ko an, Tebor kab wujen ko an: 78 im jen Jordan ikijen Jeriko, i rear in Jordan, ar lelok ñõn ir, jen bwijin Ruben, Bizer ilo ene jemaren kab wujen ko an, im Jaza kab wujen ko an, 79 im Kedemot kab wujen ko an, im Mepeat kab wujen ko an: 80 im jen bwijin Gad, Remot i Giliad kab wujen ko an, im Mehaneim kab wujen ko an, 81 im Heshbon kab wujen ko an, im Jezer kab wujen ko an.

7 Im ian ro nejin Issakar: Tola, im Pua, Jashub, im Shimron, emen. 2 Im ro nejin Tola: Uzzai, im Repaia, im Jeriel, im Jamai, im Ibsam, im Shemuel, jiõb ro an imõn ro jimair, aet, an Tola: armij re kajur ilo ebeben ko air: orair ilo ran ko an Devid roñoul ruo tausan jiljino buki. 3 Im ro nejin Uzzai: Izrahaia. Im ro nejin Izrahaia: Maikeel, im Obedai, im Joel, Isshaia, lailim: ir otemjej armij re utiej. 4 Im ibeir, kin ebeben ko air, ekar ñõn mo ko imõn ro jimair, jar ko ian jar in tõrinae, jilñoul jiljino tausan: bwe elõn limaro beleir im ro nejir. 5 Im ro jeir im jätir iben ro nukin otemjej in Issakar, armij ro re beran im kajur, emwij bwini ir otemjej ekar ñõn ebe-

ben, drualitōkñoul jiljilimjuōn taus-san.

6 Ro nejin Benjamin: Bila, im Biker, im Jedaiel, jilu. 7 Im ro nejin Bila: Ezbon, im Uzzai, im Uzaiel, im Jerimot, im Airi, lailim: jiōb ro an imōn ro jimair, armij re beran im kajur: im emwij bwini ir ekar ñōn ebeben ko, roñoul ruo tausand jilñoul emen. 8 Im ro nejin Biker: Zemaira, im Joash, im Iliezar, im Elioinai, im Omrai, im Jerimot, im Ebaija, im Anatot, im Alemet. Rein otemjej ro nejin Biker. 9 Im emwij bwini ir kin ebeben, ekar ñōn ebeben ko air, jiōb ro an imōn ro jimair, armij re beran im kajur, roñoul tausand rubuki. 10 Im ro nejin Jedaiel: Bilhan. Im ro nejin Bilhan: Jeush, im Benjamin, im Ihud, im Keneana, im Zitan, im Tarshish, im Ehishehar. 11 Rein otemjej ro nejin Jedaiel, ekar ñōn jiōb ro an imōn ro jimair, armij re beran im kajur, joñoul jiljilimjuōn tausand rubuki, rar maroñ in wōnmanlok ilo jar in tōrinae. 12 Shuppim bareinwōt, im Huppim, ro nejin Ir, Hushim, ro nejin Eher.

13 Ro nejin Naptalai: Jazaiel, im Guni, im Jizer, im Shallum, ro nejin Bilha.

14 Ro nejin Menassa: Asriel, eo lio konkubain eo an, dri Eram, e ar keutak: e ar keutak Mekir, jemen Giliad. 15 Im Mekir e ar bōk lio belen jen Huppim im Shuppim, etan jein kōra Meaka: im etan eo ken ka ruo Zelopihad: im iben Zelopihad eor nejin kōra. 16 Im Meaka lio belen Mekir e ar keutak juōn nejin man, im e ar naetan Pires: im etan jein im jatin man Shires: im ro nejin man Ulam im Rekem. 17 Im ro nejin Ulam: Bidan. Rein ro nejin Giliad nejin Mekir, nejin Menassa. 18 Im jein im jatin kōra Hammoleket, e ar keutak Ishdod, im Ebaiezer, im Mala. 19 Im ro nejin Shemaida: Ehian, im Shikem, im Likhai, im Eniam.

20 Im ro nejin Ipreim: Shutela, im Bired nejin, im Tehat nejin, im Eleada nejin, 21 im Zebad nejin,

im Shutela nejin, im Izer, im Iliad, irro ro dri Gat ro rar lotak ilo eneo rar mōn ir, bwe rar wōnlōltok in bōklok kiru ko air. 22 Im Ipreim jemeir e ar joñōt ir elōñ ran, im ro jein im jatin rar iten kaine-mōne. 23 Im e ar dreloñ ñōn iben lio belen, inem e ar etta, im e ar keutak juōn ladrik, im e ar naetan Biraia, kin nana eo e ar walok ñōn mweo imōn. 24 Im nejin kōra, Shiera, eo e ar kalek Bet-horon eo etā im eo e utiej, im Uzzan-Shiera. 25 Im Ripa nejin, im Rishep, im Tila nejin, im Tehan nejin, 26 Ledan nejin, Amihud nejin, Elishema nejin, 27 Nun nejin, Joshua nejin.

28 Im men ko air im mo ko imweir, Betel im jikin ko wujen, im i rear Nearan, im i kabilūñ Gizer, im jikin ko wujen: Shikem bareinwōt, im jikin ko wujen, ñōn Azza im jikin ko wujen: 29 im i tōreran ko an ro nejin Menassa, Bet-shian im jikin ko wujen, Teanak im jikin ko wujen, Megiddo im jikin ko wujen, Dor im jikin ko wujen. Ro nejin Josep nejin Israel rar jokwe ilo jikin kwelok kein.

30 Ro nejin Asher: Imna, im Ishva, im Ishvai, im Beraia, im Sira jeir im jatin kōra. 31 Im ro nejin Beraia: Hiber, im Malkaiel, eo jemen Birzait. 32 Im Hiber e ar keutak Japlet, im Shomer, im Hotam, im Shua jeir im jatin kōra. 33 Im ro nejin Japlet: Pesak, im Bimhal, im Ashvat. Rein ro, nejin Japlet. 34 Im ro nejin Shimer: Ehai, im Roga, Jehubba, im Eram. 35 Im ro nejin Hilem, jein im jatin: Zopa, im Imna, im Shilesh, im Emal. 36 Ro nejin Zopa: Sua, im Harniper, im Shual, im Birai, im Imra, 37 Bizer, im Hod, im Shamma, im Shilsha, im Itran, im Biera. 38 Im ro nejin Jiter: Jepunne, im Pispas, im Era. 39 Im ro nejin Ulla: Era, im Hannaiel, im Rizia. 40 Rein otemjej ro nejin Asher, jiōb ro an imōn ro jimair, armij ro ar kålet ir, im re beran im kajur, re utiej ian iroiñ rōn. Im orair emwij bwini ir kin ebeben ñōn jer-

bal in tōrinae, roñoul jiljino tausan armij.

8 Im Benjamin e ar keutak Bila manjien, Ashbel eo ken ka ruo, Ehara eo ken ka jilu, 2 Noha eo ken kemen, im Repa eo ken ka lailim. **3** Im Bila eor nejin: Addar, im Gira, Ebaihud, **4** im Ebishua, im Neaman, im Ahoa, **5** im Gira, im Shipupan, im Huram. **6** Rein ro nejin Ihud: rein jiōb ro an imōn ro jimair ian ro dri Giba, im rar bōklok ir dri jebokwe ñōn Manehat: **7** im Neaman, im Ehaja, im Gira, e ar bōklok ir dri jebokwe: im e ar keutak Uzza im Ehaiud. **8** Im Shehereim e ar keutak ro nejin ilo enen Moab, elikin an jilkinlok ir: Hushim im Beara limaro belen. **9** Im e ar keutak jen Hodesh, liobelen, Jobab, im Zibia, im Misha, im Malkam, **10** im Jiuz, im Shekia, im Mirma. Rein ro nejin jiōb ro an imōn ro jimair. **11** Im jen Hushim e ar keutak Ebaitub, im Elpeal. **12** Im ro nejin Elpeal: Iber, im Misham, im Shemed, eo e ar kalek Ono im Lod, kab jikin kwelok ko iturir: **13** im Beraia, im Shima, jiōb ro an imōn ro jimair ñōn ro dri Aijalon, rar kokōk ro dri Gat: **14** im Ehaio, Sheshak, im Jerimot, **15** im Zebedaia, im Erad, im Ider, **16** im Maikael, im Ishba, im Joha, ro nejin Beraia, **17** im Zebedaia, im Mishullam, im Hizkai, im Hiber, **18** im Ishmerai, im Izlaia, im Jobab, ro nejin Elpeal, **19** im Jekim, im Zikrai, im Zabdai, **20** im Elienai, im Zilletai, im Ilaiel, **21** im Edaia, im Beraia, im Shimrat, ro nejin Shimeai, **22** im Ishpan, im Iber, im Ilaiel, **23** im Abdon, im Zikrai, im Henan, **24** im Hanenaia, im Ilam, im Antotaija, **25** im Ipdaia, im Penuel, ro nejin Sheshak, **26** im Shamsheraia, im Sheharaia, im Atalaia, **27** im Jeareshaia, im Ilaija, im Zikrai, ro nejin Jehoram. **28** Rein jiōb ro an imōn ro jimair iomin ebeben ko air, armij re utiej: rein rar jokwe ilo Jerusalem.

29 Im ilo Gibeon e ar jokwe jemen Gibeon, Jeiel, etan liobelen Meaka: **30** im manjien Abdon, im Zur, im

Kish, im Beal, im Nedab, **31** im Gidor, im Ehaio, im Ziker. **32** Im Miklot e ar keutak Shimeia. Im ir bareinwōt rar jokwe iben ro jeir im jātir ilo Jerusalem. **33** Im Ner e ar keutak Kish; im Kish e ar keutak Saul; im Saul e ar keutak Jonetan, im Malkishua, im Abinedab, im Esh-beal. **34** Im nejin Jonetan Merib-beal: im Merib-beal e ar keutak Maika. **35** Im ro nejin Maika: Paiton, im Milek im Taria, im Ehaz. **36** Im Ehaz e ar keutak Jihoada; im Jihoada e ar keutak Alemet, im Azmivet, im Zimrai; im Zimrai e ar keutak Moza. **37** Im Moza e ar keutak Binia; Repa leo nejin, Iliesa leo nejin, Ezel leo nejin. **38** Im jiljino nejin Ezel, etair: Azrikam, Bokiru, im Ishmeel, im Shieraia, im Obedeia, im Henan. Rein otemjej nejin Ezel. **39** Im ro nejin Ishek jein im jātin: Ulam manjien, Jiush eo ken ka ruo, im Elipelet eo ken ka jilu. **40** Im ro nejin Ulam armij re beran im kajur, dri libon, im elōñ nejin, im ro nejin nejin, jibuki limñoul. Rein otemjej ian ro nejin Benjamin.

9 Ein drein emwij bwini dri Israel otemjej kin ebeben ko air; im lo, emwij jeji ilo buk in kiñ ro in Israel. Im ar bōklok ro dri Juda ñōn Babilon, bwe ren dri jebokwe, kin jerawiwi ko air. **2** Ak ro rar jokwe mokta ilo jolit ko air, ilo jikin kwelok ko air, Israel, pris ro, ro dri Livai, im dri Netinim. **3** Im ilo Jerusalem rar jokwe jet ian ro nejin Juda, im jet ian ro nejin Benjamin, im jet ian ro nejin Ipreim im Menassa: **4** Utai nejin Amihud, nejin Omrai, nejin Imrai, nejin Benai, ian ro nejin Pirez nejin Juda. **5** Im ian ro dri Shailo: Esaia manjien im ro nejin. **6** Im ian ro nejin Zira: Jiuel, im ro jeir im jātir, jiljino buki druatinjuōñoul. **7** Im ian ro nejin Benjamin: Sallu nejin Mishullam nejin Hodavaia, nejin Hassenua, **8** im Ibniaia nejin Jeroham, im Ila nejin Uzzai, nejin Mikrai, im Mishullam nejin Shepetaia, nejin Reuel, nejin Ibnaija: **9** im ro jeir im jātir, ekar ñōn ebeben ko air, druatinjuōñ buki limñoul jiljino.

Rein otemjej jiõb ro an imõn ro jimair, kin mo ko imõn ro jimair.

10 Im ian pris ro: Jedaia, im Jehoia-rib, Jekin, 11 im Azaraia nejin Hilkaia, nejin Mishullam, nejin Zedok, nejin Mireiot, nejin Ehaitub, iroi j in imõn Anij; 12 im Adaia nejin Jeroham, nejin Pashur, nejin Malkaija, im Meassai nejin Adaiel, nejin Jazira, nejin Mishullam, nejin Mishillemit, nejin Immer; 13 im ro jeir im jätir, jiõb ro an imõn ro jimair, juõn taus- san jiljilimjuõn buki jiljinoñoul armij; re kanuij kajur ñõn jerbal ilo imõn Anij.

14 Im ian ro dri Livai: Shimaia nejin Hasshub, nejin Azrikam, nejin Hashebaia, ian ro nejin Mirerai; 15 im Bakbakar, Hireshe, im Galal, im Mattanaia nejin Maika, nejin Zikrai, nejin Esap, 16 im Obediaia nejin Shimaia, nejin Galal, nejin Jedutun, im Berekaia nejin Esa, nejin Elkena, eo e ar jokwe ilo jikin kwelok ko an ro dri Nitopa.

17 Im ro dri lale kejem: Shallum, im Akkub, im Talmon, im Ehaiman, im ro jeir im jätir, (Shallum eo e utiej), 18 ro rar ber ñõn ien in, ilo kejem in kiñ i rear, ro dri lale kejem in kamp in ro nejin Livai. 19 Im Shallum nejin Kore, nejin Ebiesap, nejin Kora, im ro jein im jätin, jen mweo imõn jemen, ro kri Kora, rar iroi j in jerbal in kabuñ eo, ro dri lale kejem in imõn kabere eo; im ro jimair re kin lale kamp in Jeova, ro dri lale ial in dreloñ. 20 Im Pinehas nejin Iliezar e ar iroi j ioir ilo ien e motelok, im Jeova e ar ber iben. 21 Zekeraia nejin Mishelemaia e ar dri lale aor in imõn kwelok. 22 Rein otemjej emwij kålet ir ñõn lale kejem ko rubuki joñoul ruo. Emwij bwini ir ekar ñõn ebeben ilo jikin kwelok ko air, ro Devid im Samuel dri lolo rar likit ir ilo air jerbal in liki. 23 Ein drein ir im ro nejir rar lale kejem ko in imõn Jeova, aet imõn kabere eo, kin jerbal in lale. 24 Ro dri lale kejem rar ber ilo turin ko emen, i rear, i kabiluñ, i eañ, im i røk. 25 Im ro jeir im jätir, ilo jikin

kwelok ko air, ren dreloñ juõn alen ilo jiljilimjuõn ran, jen ien ñõn ien, im ber ibeir: 26 bwe ro dri lale kejem, emen re utiej, ro dri Livai, rar ber ilo juõn jerbal in liki, im rar lale bo ko im jikin mweiuk ko ilo imõn Anij. 27 Im rar jokwe iturin imõn Anij, bwe kwonair lale: im emõn ren kabellek e jiboñ otemjej.

28 Im jet iair rar lale jabi ko in kabuñ: bwe rar bwini ir im kadreloñ ir, im rar bwini ir im kadrioijlok ir. 29 Bareinwõt jet iair rar lale men ko men in kõmõnmõn, im jabi otemjej in imõn kwojarjar, im flauo kwerik, im wain, im oil, im kaijurjur, im spais ko. 30 Im jet ian ro nejin pris ro rar kapojök im käreik spais ko. 31 Im Mattitaia, juõn dri Livai, eo manjien Shallum dri Kora, iben jerbal in liki bwe en lale men ko rej umum ilo pan ko. 32 Im jet ian ro jeir im jätir, ro nejin dri Kohat, rar lale bred in kalikar, im rar kõmõne ran in Sabat otemjej.

33 Im rein ro rar al, jiõb ro an imõn ro jimair ian ro dri Livai, rar jokwe ilo bo ko, im rar anemkwójair jen jerbal ko jet: bwe ar kejerbal ir ilo jerbal eo air ran im boñ. 34 Rein jiõb ro an imõn ro jimair an ro dri Livai, ilo ebeben ko air, armij re utiej: rein rar jokwe ilo Jerusalem.

35 Im ilo Gibeon ar jokwe jemen Gibeon, Jeiel, etan lio belen Meaka; 36 im manjien, Abdon, im Zur, im Kish, im Beal, im Ner, im Nedab, 37 im Gidor, im Ehaio, im Zekeraia, im Miklot. 38 Im Miklot e ar keutak Shimeam. Im rar bareinwõt jokwe iben ro jeir im jätir ilo Jerusalem, ikijen ro jeir im jätir. 39 Im Ner e ar keutak Kish; im Kish e ar keutak Saul; im Saul e ar keutak Jonetan, im Malkishua, im Abinedab, im Eshbeal. 40 Im leo nejin Jonetan Meribbeal; im Meribbeal e ar keutak Maika. 41 Im ro nejin Maika: Paiton, im Milek, im Tarea, im Ehaz. 42 Im Ehaz e ar keutak Jera; im Jera e ar keutak Alemet, im Azmevet, im Zimrai; im Zimrai e ar keutak Moza;

43 im Moza e ar keutak Binia ; im Repaia nejin, im Ileasa nejin, Ezel nejin. 44 Im jiljino nejin Ezel eman, ir kein etair : Azrikam, Bokeru, im Ishmeel, im Shiarra, im Obedaia, im Henan: rein ro nejin Ezel.

10 Ak rodri ¹ Pilistia rar tōrinaek Israel: im ro dri Israel rar ko jen iman ro dri Pilistia, rar buñ im mij i tol Gilboa. 2 Im ro dri Pilistia rar kanuij lukworkwor Saul im ro nejin: im ro dri Pilistia rar mōn Jonetan, im Abinedab, im Malkishua, ro nejin Saul. 3 Im tōrinae eo e kanuij bin nae Saul, im ro dri libon rar kebak ñōn e: im e ar kanuij jorran kin ro dri libon. 4 Inem e ar ba ñōn eo ej inek ken tōrinae ko an, Kwon nure jāji ne am, im wākari iō kake, ñe ab dri jab mijmij rein ren item kananaik iō! A dri inene eo e jab kōnan: bwe e kanuij mijōk. Kin men in Saul e ar bōk jāji eo an im buñ ion. 5 Im ke dri inene eo e ar lo bwe e mij Saul, bareinwōt e ar buñ ion jāji eo an, im e mij. 6 Ein drein Saul e ar mij, im ro nejin jilu; im aolepen mweo imōn rar jimor mij.

7 Im ke dri Israel otemjej rar ber ilo komlōl eo rar lo bwe rej ko, rar ilok jen jikin kwelok ko air, im ko; im ro dri Pilistia rar item jokwe ilo ir. 8 Im ilju, ke ro dri Pilistia rar iten rakimi ro dri mij, rar lo Saul im ro nejin re buñ i tol Gilboa. 9 Im rar rakimi men ko an, im bōk bōran, im ken tōrinae ko an, im jilkinlok ñōn enen ro dri Pilistia iturin, im kennanek ekjōp ko air, im armij ro. 10 Im rar likit ken tōrinae ko an ilo imōn anij ro air, im rar likit bōran ilo imōn Degon. 11 Im ke ro dri Jebesh-giliad otemjej rar roñjake men otemjej ro dri Pilistia rar kōmōn ñōn Saul, 12 ro dri beran otemjej rar jutōk, im rar bōklok ubōn Saul, im ubōn ro nejin, im bōktok ñōn Jebesh, im kalibwin driir iomin wijki ok eo i Jebesh, im jitlok jiljilimjuōn ran.

13 Ein drein Saul e ar mij kin jera-wiwi eo e ar kōmōn nae Jeova, kin

nan an Jeova, eo e ar jab kejbārok e; im bareinwōt kin an kōmao iben juōn, dimon e miōk na ilo enbwinin, im kajitōk kake, 14 im e ar jab kajitōk iben Jeova: kin men in E ar mōn e, im ukōt ailiñ eo ñōn Devid, nejin Jesse.

11 ¹ Inem dri Israel otemjej rar kweloktok ñōn iben Devid i Hibron, im re ba, Lo kimuij driōm im kōniekōm. 2 Ilo ien ko re motelok, ke Saul e ar kiñ, kweo kwar kadrioi-jok, im kadreloñtok Israel: im Jeova am Anij e ar ba ñōn yuk, Kwo naj seperd an armij ro Aō, Israel, im kwo naj dri tel ion armij ro Aō, Israel. 3 Ein drein ridto ro otemjej in Israel rar itok ñōn iben kiñ eo ñōn Hibron; im Devid e ar kōmōn juōn bujen ibeir i Hibron, iman Jeova; im rar kabit Devid kiñ ion Israel, ekar ñōn nan in Jeova kin Samuel.

4 Im Devid im dri Israel otemjej rar ilok ñōn Jerusalem, (eo Jibus); im ro dri Jibus, ro dri eneo, re ber ie. 5 Im ro dri Jibus rar ba ñōn Devid, Kwo jamin dreloñ ijin. Mekarta, Devid e ar bōk me eo, Zaion; eo jikin kwelok an Devid. 6 Im Devid e ar ba, Jabrewōt eo ej mōn ro dri Jibus mokta, e naj dri utiejtata im kapen. Im Joab nejin Ziruaia e ar wōnlñflok mokta, inem e dri utiejtata. 7 Im Devid e ar jokwe ilo me eo; kin men in rar naetan jikin kwelok an Devid. 8 Im e ar kalek jikin kwelok eo i belakin, jen Millo i belakin; im Joab e ar kōkāl ijo ko jet mōtōn jikin kwelok eo. 9 Im Devid e ar kajurlok wōt; bwe Jeova an inelip eo E ar ber iben.

10 Ak rein ro re utiej ian ro dri kajur iben Devid, rar kwalok ir re kajur iben, ilo ailiñ eo an, im iben ro dri Israel otemjej, in kōmōn e kiñ, ekar ñōn nan jen Jeova kin Israel. 11 Im eñin oran armij re kajur iben Devid: Jashobiam, nejin juōn dri Hakmon, eo e utiejtata ian jilñoul eo; e ar kwotōke mōri eo an nae jilu buki im mōn ir ilo juōn wōt ien. 12 Im ijilto-kin Iliezar nejin Dodo, dri Eho, eo

juõn ian ro jilu re kajur. 13 E ar ber iben Devid i Pasdamim, im ijo ro dri Pilistia rar kweloktok in tōrinae, im juõn jikin kallip ie eobrōk kin barli: im armij ro rar ko jen iman ro dri Pilistia. 14 Im rar jutōk ilo jikin kallip eo, im koiki, im mōn ro dri Pilistia: im Jeova e ar lomor ir kin juõn anjo elap.

15 Im jilu ian armij ro jilñoul re utiej rar wōnlōllok ñōn dreka eo ñōn iben Devid, ñōn ilonan roñ in dreka Adullam; a jar in tōrinae an dri Pilistia rar kamp ilo komlōl an Ripeim. 16 Im ien eo Devid e ar ber ilo me e kajur, im ro dri me an dri Pilistia, rar ber ilo Betleem. 17 Im Devid e ar oñkake, im e ba, O emōn elañe juõn e naj letok dren in irak jen aibij an Betleem, eo ej iturin kejem! 18 Im armij ro jilu rar driblok jar in tōrinae an ro dri Pilistia, im itōk dren jen aibij an Betleem, eo iturin kejem, im bōke, im bōktok ñōn Devid: a Devid e jab kōnan irak jen e, a e ar lutōklok e ñōn Jeova, 19 im e ba, Aō Anij en bōprae iō jen aō kōmōn men in: in irak bōtōktōkin armij rein rar jab uōta in mij ke? bwe kin jab uōta in mij rar bōktok. Kin men in e jab kōnan irak e. Men kein armij ro jilu re kajur rar kōmōnmōni.

20 Im Ebishai, jein im jātın Joab, e ar utiejlok ian jilu; bwe e ar kwo-tōke mōri eo an nae jilu buki im mōn ir, im e ar buñbuñ ian jilu. 21 Ian ro jilu e ar utiej jen ruo, im emwij kōmōn e kapen ioir: a e jab tōbar ro jilu mokta.

22 Beneia nejin Jihoiada, nejin juõn armij e beran im kajur jen Kabziel, eo e ar kōmōn jerbal ko relap, e ar mōn ruo nejin Eriel an Moab: bareinwōt e ar wōnlōllok im mōn juõn laion ilo juõn roñ ilo ien sno. 23 Im e ar mōn juõn dri Ijıpt, juõn armij aitokōn lailim kubit: im ilo peın dri Ijıpt mōri einwōt alal an dri ej nuknuk; im e ar wōnlōllok ñōn iben kin juõn jokwōn, im e ar kwotak mōri eo jen peın dri Ijıpt, im e ar mōn e kin mōri eo an. 24 Men

kein Beneia nejin Jihoiada e ar kōmōni, im ar likit e juõn ian armij ro jilu re beran im kajur. 25 Lo, e utiej jen jilñoul ro, a e jab tōbar jilu ro mokta: im Devid e ar likit e ion ro jurōn.

26 Bareinwōt armij re beran im kajur ian jar in tōrinae ko: Esahel jātın Joab, Elhenan nejin Dodo jen Betleem, 27 Shammot dri Haro, Hilez dri Pilon, 28 Aira nejin Ikkesh dri Tekoa, Ebaiezer dri Anatot, 29 Sibe-kai dri Hushat, Ailai dri Eho, 30 Meharai dri Nitopa, Hiled nejin Beena dri Nitopa, 31 Itai nejin Ribai jen Gibe, ian ro nejin Benjamin, Beneia dri Piraton, 32 Hurai jen wea ko an Geash, Abaiel dri Arbat, 33 Azmevet dri Baharum, Ilaiba dri Shealbor, 34 ro nejin Heshem dri Gaizon, Jonetan nejin Shage dri Herar, 35 Ehaiam nejin Sekar dri Harar, Elipal nejin Ur, 36 Hiper dri Mekerat, Ehaija dri Pilon, 37 Hezro dri Karmel, Nearai nejin Ezbai, 38 Joel jein im jātın Netan, Mibar nojin Hagrai, 39 Zilek dri Amon, Naherai dri Birot, dri inek ken tōrinae ko an Joab nejin Ziruaia, 40 Aira dri Itrai, Gereb dri Itrai, 41 Uraia dri Het, Zebad nejin Alai, 42 Adaina nejin Shaiza dri Ruben, juõn e utiej ian rod ri Ruben, im jilñoul iben: 43 Hanan nejin Meaka, im Joshapat dri Mitna, 44 Uzzaia dri Ashterat, Shema im Jeiel ro nejin Hotam dri Aroer, 45 Jedaiel nejin Shimrai, im Joa jein im jātın, dri Tiz, 46 Ilaiel dri Mahav, im Jerebai, im Joshevaia, ro nejin Elneam, im Itma, dri Moab, 47 Ilaiel, im Obed, Jeasaiel dri Mezoba.

12 Ak rein ro rar itok ñōn iben Devid ñōn Ziklag, ke e ar tilekek jen Saul nejin Kish, im ir ian armij ro re kajur, ro dri jibōñ ilo tōrinae. 2 Ken tōrinae ko ibeir, libon, im re maroñ in buat kin dreka, ak wā kin mōri jen libon, ilo anmiñ anmon: im rej ian ro jein im jātın Saul an Benjamin. 3 Eo e utiejtata Ehaiezer; inem Joash, ro nejin Shimea dri Gibe, im Jezaiel, im Pilet, ro nejin Azmevet, im Bireka, im

Jihu dri Anatot, 4 im Ishmaia dri Gibeon, juōn armij e kajur ian ro jilñoul, im ion ro jilñoul, im Jeremaia, im Jaheziel, im Johenan, im Jozebad dri Gedira, 5 Eluzai, im Jerimot, im Bielaia, im Shemeraia, im Shepetaia dri Harup, 6 Elkena, im Ishaia, im Azarel, im Joezer, im Jashobeam, ro dri Kora, 7 im Joela, im Zebedaia, ro nejin Jeroham jen Gidor.

8 Im ian ro dri Gad rar mōke kejenlok ir nōn Devid, nōn me eo e kajur ilo ene jemaren, armij re kajur im beran, armij emwij katakin ir kin tōrinae, re jela toōn mōri im likipij-nōk, turin mejeir einwōt turin mejen laion, im re mōkōj einwōt kiru dir ko ion tol ko: 9 Izer eo e utiejtata, Obedaia eo ken ka ruo, Ilaia eo ken ka jilu, 10 Mishmana eo ken kemen, Jeremaia eo ken ka lailim, 11 Attai eo ken ka jiljino, Ilaiel eo ken ka jiljilimjuōn; 12 Johenan eo ken ka dru-alitōk, Elzebad eo ken ka druatimjuōn, 13 Jeremaia eo ken ka joñoul, Makbanai eo ken ka joñoul juōn. 14 Rein ro nejin Gad rej kapen in jar in tōrinae: eo eriktata ej einwōt jibuki, im eo elaptata einwōt juōn tausan. 15 Rein ro rar elā jen Jordan ilo aliñ eo mokta, ke dren e ar elā jen tōren river ko otemjej: im rar kokōk ir otemjej i komlōl ko, nōn rear im nōn kabilūñ.

16 Im jet ian ro nejin Benjamin im Juda rar itok nōn me eo e kajur nōn Devid. 17 Im Devid e ar drioiplen wōnmae ir, im e ar uak im ba nōn ir, Elañe komij itok ilo ainemōn nōn iba in jibōñ iō, buruō e naj kanuij edrep nōn kom; a elañe komij iten ketōk iō nōn ro rej kijirāt iō, ñe ejelok bwir ilo peiō, inem Anij an ro jemer En lale im enoik e. 18 Ien eo Jitōb eo e ar itok ion Amesai, eo e utiejtata ian jilñoul, im e ar ba, Kimuij am, O Devid, im kimij rie yuk, kwe nejin Jesse: ainemōn, ainemōn nōn kwe, im ainemōn nōn ro dri jibōñ yuk: bwe am Anij ej jibōñ yuk. Inem Devid e bōk ir, im kōmōn ir kapen ro an jar eo.

19 Bareinwōt jen Menassa jet rar

ilok nōn iben Devid, ke e ar itok iben ro dri Pilistia nae Saul ilo tōrinae: a rar jab jibōñ ir; bwe iroijs ro an ro dri Pilistia rar bebe kake im jilkinlok ir, im re ba, E naj ilok nōn iben Saul, iroijs eo an, nōn lanbinikumkum. 20 Im ilo an ilok nōn Ziklag, rar buñtok nōn iben jen Menassa, Adna, im Jozebad, im Jedaiel, im Maikael, im Jozebad, im Ilaihu, im Zilletai, kapen ro an tausan ko an Menassa. 21 Im rar jibōñ Devid nae jar an dri itoitōk: bwe ir otemjej armij re beran im kajur, im kapen ro ilo jar in tōrinae eo. 22 Bwe jen ran nōn ran, armij rar itok nōn iben Devid in jibōñ e, mae ien juōn jar in tōrinae elap, einwōt jar an Anij.

23 Im eñin oran ro rar bōk ken tōrinae nōn tōrinae, rar itok nōn iben Devid nōn Hibron, im ukōt ailiñ eo an Saul nōn e, ekar nōn nan jen Jeova. 24 Ro nejin Juda, ro rar inek likipijñōk im mōri, jiljino tausan dru-alitōk buki, re pojōk nōn tōrinae. 25 Ian ro nejin Simeon, armij re beran im kajur nōn tōrinae eo, jiljilimjuōn tausan jibuki. 26 Ian ro nejin Livai emen tausan jiljino buki. 27 Im Jihoiada e ar dri tel an imōn Aron: im iben jilu tausan jiljilimjuōn buki, 28 im Zedok, juōn likao e beran im kajur, im jen imōn jemen roñoul ruo kapen. 29 Im ian ro nejin Benjamin, ro jein im jātin Saul, jilu tausan: bwe nōn ien in e nañin aolep-eir rar edrep nōn imōn Saul. 30 Im ian ro nejin Ipreim roñoul tausan drualitōk buki, armij re beran im kajur, im re buñbuñ ilo mo ko imōn ro jimair. 31 Im jen jibilkwōn bwijin Menassa drualitōkñoul tausan, emwij kwalok etair, in iten kōmōn Devid kiñ. 32 Im ian ro nejin Issakar, armij re meletlet kin ien ko, in jela ta eo emōn an Israel kōmōne, bōrair rubuki: im ro jeir im jātir otemjej rar bokake ir. 33 Ian Zebulun, ro re maroñ drioijs iben jar in tōrinae, ro re kanuij jela tōrinae, im wāwen ken tōrinae otemjej ibeir, limñoul tausan, im re maroñ in kalejar nōn tōrinae, im e jab burueir ruo. 34 Im jen Nap-

talai juōn tausan kapen, im ibeir eor air likipijñōk im mōri, jilñoul jiljilim-juōn tausan. 35 Im ian ro dri Dan ro rar maroñ in kalejar ñōn tōrinae, roñoul drualitōk tausan jiljino buki. 36 Im jen Asher, ro re maroñ in drioiyllok ilo jar in tōrinae, rar maroñ in kalejar ñōn tōrinae, eñoul tausan. 37 Im i rear in Jordan, ian ro dri Ruben, im ro dri Gad, im jen jibil-kwōn bwijin Menassa, im ibeir jabrewōt wāwen ken tōrinae ko, jibuki roñoul tausan.

38 Rein otemjej, armij dri tōrinae, re maroñ in kalejur dri tōrinae, rar itok, emōn burueir, ñōn Hibron, in kōmōn Devid kiñ ion aolepen Israel: im aolepen ro jet dri Israel juōn wōt burueir in komōn Devid kiñ. 39 Im rar ber iben Devid ijo iomin jilu ran, im rej mōña im irak: bwe ro jeir im jātir rar kapojōk ñōn ir. 40 Bar juōn, ro rar ebak ñōn ir, tokrōn wōt Issakar im Zebulun im Naptalai, rar bōktok bred ion ass ko, im ion kamel ko, im ion mul ko, im ion ox ko, men in mōña jen flauo, kek in fig, urur in grep e mōrā, im wain, im oil, im ox ko, im sip ko relōn: bwe eor lōñliñ ilo Israel.

13 Im Devid e ar bebe iben kapen ro an tausan ko im buki ko, im iben jabrewōt dri tel. 2 Im Devid e ar ba ñōn aolepen jar an Israel, Elañe emōn ibemi, im elañe ej jen Jeova aruij Anij, jen jilkinlok ñōn ijo jabrewōt ñōn ro jeer im jāter rej berwōt ilo aolepen ene in Israel, ro eor pris im dri Livaì ibeir ilo jikin kwelok ko air kab wujen ko air, bwe ren kweloktok ñōn iberuij; 3 im jen bar bōktok dipdip eo an Anij ñōn iber: bwe jar bukotlok ilo ran ko an Saul. 4 Im aolepen jar eo rar ba re naj kōmōn men in; bwe emōn ilo mejen armij otemjej. 5 Ein drein Devid e ar kokweloktok dri Israel otemjej, jen Shaihor, river erik in Ijīpt, ñōn mejāti in Hemat, im bōktok dipdip eo an Anij jen Kiriāt-jierim. 6 Im Devid e ar wōnliñlok, e im aolepen Israel, ñōn Beala, eñin Kiriāt-jierim, eo an Juda, in bōktok jen ijo dipdip

an Anij Jeova, Eo ej jijōt ilōñin kerub ko, Eo rej kir ñōn E kin Āt eo. 7 Im rar bōktok dipdip eo ion juōn kart ekāl, im kadrioiytok e jen imōn Abinedab: im Uzza im Ehaio rar kowōnmanlok kart eo. 8 Im Devid im dri Israel otemjej rar kajōñjōñ iman mejen Anij kin aolepen air kajur, kin al ko, im kin arp ko, im kin salteri ko, im kin timbrel ko, im kin simbal ko, im kin jilil ko.

9 Im ke rar itok ñōn jikin dreñdreñ an Kaidon, Uzza e ar erlokwe pein bwe en drebij dipdip eo; bwe ox ko rar jebebepe. 10 Im ebwil illu an Anij nae Uzza, im E ar mōn e, bwe e ar erlokwe pein ñōn dipdip eo, inem e ar mij ijo iman Anij. 11 Im Devid e ar buromōj kin ke Jeova e ar kokkure Uzza: inem e ar naetan jikin eo Pirez-uzza ñōn ranin. 12 Im Devid e ar mijok Anij ran eo, im e ba, Ekijskan in bōktok dipdip an Anij ñōn iba, ñōn kabijukniō? 13 Ein drein Devid e ar jab kamōkit dipdip eo ñōn iben ilo jikin kwelok an Devid, a e ar kajeorlok e ñōn imōn Obed-idom dri Git. 14 Im dipdip an Anij e ar berwōt iben ro nukin Obed-idom ilo mwewo imōn iomin jilu aliñ: im Jeova e ar kejerammōn imōn Obed-idom, im men ko otemjej iben.

14 Im ¹Hairam kiñ in Tair e ar jilkinlok ro dri jilik ñōn iben Devid, im wijki aik, im ro dri kōmōnmōn kin dreka, im ro dri kōmōn im, in kalek ñōn e juōn im. 2 Im Devid e ar kile bwe Jeova e ar kabin e kiñ ion Israel; bwe aliñ eo an e kanuij utiej, kin dri Israel ro dron. 3 Im Devid e ar korlok limaro belen, i Jerusalem: im Devid e ar keutak bar or nejin man im kōra. 4 Im ir rein etan ro nejin rar lotak ñōn e i Jerusalem, Shammua, im Shobab, Netan, im Solomon, 5 im Ibhar, im Elishua, im Elpelet, 6 im Noga, Nipeg, im Japia, 7 im Elishema, im Bealiada, im Elipelet.

8 Im ke ro dri Pilistia rar roñjake kin air kabit Devid kiñ ion aolepen Israel, inem ro dri Pilistia otemjej rar

wōnliñlen kabukot Devid: im Devid e ar roñjake im drioijslok nae ir. 9 Ak ro dri Pilistia rar item kalejar ilo komlōl Ripeim. 10 Im Devid e ar kajitōk iben Anij, im ba, In wōnliñlok nae ro dri Pilistia ke? im Kwo naj ketōk ir na ilo peiō ke? Im Jeova e ar ba ñōn e, Kwon wōnliñlok: bwe I naj ketōk ir na ilo peōm. 11 Ein drein rar wōnliñtok ñōn Beal-pirezim, im Devid e ar mōn ir ijo; im Devid e ar ba, Anij e ar rupi ro dri kijirāt iō kin peiō, einwōt an dren ko torlok. Kin men in rar naetan jikin eo Beal-pirezim. 12 Im rar likit anij ko air na ijo; im Devid e ar jiroñ ir, inem rar tili ilo kijeek.

13 Im ro dri Pilistia rar bar kalejar ilo komlōl eo. 14 Im Devid e ar bar kajitōk iben Anij; im Anij e ar ba ñōn e, Kwon jab wōnliñlok im lor ir: kwon jeorlok jen ir, im buñ ioir iki-jen wijki mōlberi ko. 15 Im ñe kwoj roñ ainiken wōnmanlok ilo jābōn wijki mōlberi ko, inem kwon drioijslen tōrinaek ir; bwe emwij an Anij drioijslok imam in mōn jar an ro dri Pilistia. 16 Im Devid e ar kōmōn einwōt Anij e ar jiroñ e: im rar mōn jar an ro dri Pilistia jen Gibeon ñōn Gizer. 17 Im buñbuñ an Devid e drioijslok ñōn ene ko otemjej: im Jeova e ar kōmōn bwe ailiñ ko otemjej ren mijōk e.

15 Im Devid e ar kōmōn mo ko ilo jikin kwelok an Devid; im e ar kapojōk juōn jikin ñōn dipdip an Anij, im e ar kajur ñōn e imōn nuk-nuk. 2 Inem Devid e ar ba, Emōn bwe ejelok en bōktok dipdip an Anij, a ro dri Livai wōt: bwe Jeova e ar kålet ir in inek dipdip an Anij, im bwe ren jermal ñōn E in drio. 3 Im Devid e ar kokweloktok dri Israel otemjej i Jerusalem, in bōktok dipdip an Jeova ñōn jikin eo emwij an kapojōk ñōn e. 4 Im Devid e ar kokweloktok ro nejin Aron, im ro dri Livai: 5 ian ro nejin Kohat, Urael eo e utiejtata, im ro nejin jätin, jibuki roñoul; 6 ian ro nejin Mirerai, Esaia eo e utiejtata, im ro jein im jätin rubuki roñoul; 7 ian ro nejin Gershom, Joel

eo e utiejtata, im ro jein im jätin jibuki jilñoul; 8 ian ro nejin Elizepan, Shimaia eo e utiejtata, im ro jein im jätin rubuki; 9 ian ro nejin Hibron, Ilaiel eo e utiejtata, im ro jein im jätin drualitōkñoul; 10 ian ro nejin Uzaiel, Aminadab eo e utiejtata, im ro jein im jätin jibuki joñoul ruo. 11 Im Devid e ar kirtok Zedok im Ebaiatar pris ro, im ro dri Livai, Urael, Esaia, im Joel, Shimaia, im Ilaiel, im Aminadab, 12 im e ba ñōn ir, Kom jioḅ ro an ro jimami an ro dri Livai: komin mōke kokwojarjar kom, kom im ro jeōmi im jätōmi, bwe komin bōkliñtok dipdip an Jeova, Anij in Israel, ñōn jikin eo emwij aō kapoj ñōn e. 13 Bwe kin ami jab bōktok mokta, Jeova aruij Anij e ar kōmōn-mōn juōn men in rupi kij, bwe jar jab kabukot Eekar ñōn kien eo. 14 Ein drein pris im ro dri Livai rar mōke kokwojarjar ir in bōktok dipdip an Jeova, Anij in Israel. 15 Im ro nejin ro dri Livai rar inek dipdip an Anij ion aierair kin ine ko, einwōt Moses e ar jiroñ ekar ñōn nan jen Jeova.

16 Im Devid e ar ba ñōn ro re utiejtata ian ro dri Livai bwe ren kajutōk ro jeir im jätir dri al, im ibeir ken kajōñjōñ ko, salteri ko im arp ko im simbal ko, en lap air kajōñjōñ im koutiej ainikeir kin lōñliñ. 17 Ein drein ro dri Livai rar kålet Himan nejin Joel; im ian ro jein im jätin, Esap nejin Berekaia; im ian ro nejin Mirerai ro jeir im jätir, Itan nejin Kusaia; 18 im ibeir ro jeir im jätir an lajrōk eo ken ka ruo, Zekeraia, Ben, im Jeaziel, im Shemiramot, im Jehaiel, im Unnai, Ilaiab, im Beneia, im Measiaia, im Mattitaia, im Elipelehu, im Mikniaia, im Obed-idom, im Jeaiel, dri lale kejem ko. 19 Ein drein rar kajutōk ro dri al, Heman, Esap, im Itan, im ibeir simbal ko jiniḅrōrō in kajōñjōñ alikar, 20 im Zekeraia, im Ezaiel, im Shemiramot, im Jehaiel, im Unnai, im Ilaiab, im Measiaia, im Beneia, ibeir salteri ko, emwij kilajrōk ir ekar ñōn Alamot; 21 im Mattitaia, im Elipelehu, im

Miknaia, im Obed-idom, im Jeaiel, im Azezaia, ibeir arp ko emwij kilajrök ir ñõn Sheminit, in tel. 22 Im Kenenaia, e utiejtata ian ro dri Livai, ej ion al eo: e ar katakin kin al eo, bwe e mejerik. 23 Im Berekaia im Elkena, rar dri lale kejem ñõn dipdip eo. 24 Im Shebenaia, im Joshapat, im Netanel, im Amesai, im Zekeraia, im Beneia, im Iliezar, pris ro, rar kajõñjõñ jilil ko iman dipdip an Anij: im Obed-idom im Jihaia rar dri lale kejem ñõn dipdip eo.

25 Ein drein ¹ Devid im ridto ro in Israel, im kapen ro ion tausan ko, rar ilen bõktok dipdip in kalimur an Jeova jen iloan imõn Obed-idom, kin lõñliñ. 26 Im ein drein ke Anij e ar jibõñ ro dri Livai, ro rar inek dipdip in kalimur an Jeova, rar katok kin jiljilimjuõn kau koman im jiljilimjuõn sip koman. 27 Im Devid e ar kõnõk juõn liboror nuknuk linen kwo-rairik, im dri Livai otemjej rar inek dipdip eo, im ro dri al, im Kenenaia iroiñ in al iben ro dri al; im Devid e ar kõnõk juõn epod linen. 28 Ein drein aolepen Israel rar bõkliñtok dipdip in kalimur an Jeova kin lamij, im ainiken kornet, im kin jilil ko, im kin simbal ko, im rej kajõñjõñ alikar kin salteri ko im kin arp ko. 29 Im ein drein ke dipdip in kalimur an Jeova e ar dreloñtok ilo jikin kwelok an Devid, Maikal lio nejin Saul e ar reilok jen juõn windo, im e ar lo Devid, kiñ eo, ke ej eep im kajõñjõñ; im e ar kejekron e ilo buruen.

16 Im rar kadreloñtok dipdip an Anij, im ² likit e ilo im nuknuk eo Devid e ar kalek ñõn e: im rar katok kin katok kijeek ko, im katok ainemõn ko, iman Anij. 2 Im ke Devid e ar kamwijlok an katok kin katok kijeek ko im katok ainemõn ko, e ar kejerammõn armij ro ilo etan Jeova. 3 Im e ar lelok ñõn jabrewõt dri Israel, man in kõra, ñõn jabrewõt iair, juõn ion bred, im juõn mõtõn kõniek, im juõn kek in grep e mōrā.

4 Im e ar kålet jet dri Livai bwe ren jermal iman dipdip an Jeova, im

bwe ren kabuñbuñ, im kamolol, im nebar Jeova Anij an Israel. 5 Esap eo e utiejtata, im eo ken ka ruo ñõn e Zekeraia, Jeaiel, im Shemiramot, im Jehaiel, im Mattitaia, im Ilaia, im Beneia, im Obed-idom, im Jeaiel, ibeir salteri ko im arp ko; im Esap eo eor simbal iben e alikar air jõñ; 6 im Beneia im Jehazaiel pris ro eor jilil ibeir ien otemjej, iman dipdip in kalimur an Anij.

7 Inem ran eo Devid e ar kaiñi in kamolol Jeova, kin pein Esap im ro jein im jätin.

8 O komin kamolol Jeova, komin kir ñõn etan; komin kwalok jermal ko An iben ro dri ailiñ ko.

9 Komin al ñõn E, komin al ñõn E kin nebar ko; komin konono kin jermal in bwilõñ ko An otemjej.

10 Komin kimjāji ilo etan e kwojarjar; buruen ro rej bukot Jeova ren lõñliñ.

11 Komin bukot Jeova im An kajur; komin bukot mejen ñõn in drio.

12 Komin kememej jermal in bwilõñ ko An, E ar kõmõni, men in bwilõñ ko An im ekajet ko an lõn,

13 O kom ro nejin Israel korijeran, kom ro nejin Jakob, ro E ar kålet ir.

14 E Jeova aruij Anij; ekajet ko An rej ilo aolepen lõl.

15 Komin kememej bujen eo An ñõn in drio, nan eo E ar kaiñi ñõn juõn tausan ebeben ko,

16 Bujen eo E ar kõmõne iben Ebrean, im An kanõjniñ ñõn Aisak,

17 Im E ar kabin e ñõn Jakob ñõn juõn kien, ñõn Israel bwe en juõn bujen ñõn in drio,

18 Im E ba, Ñõn kwe I naj lelok ene Kenean, kakõlen ami men in jolit:

19 Ke kom eiet wõt, armij in bwinbwin, aet, kanuij eiet, im ro dri itõtõk iloan;

20 Im rar etetal jen ailiñ ñõn ailiñ, im jen juõn ailiñ in kiñ ñõn bar juõn jar an armij.

21 E ar jab kötlok jabrewõt armij bwe en kokkure ir; aet, E ar enoik kiñ ro kin ir,

22 Im ba, Komin jab ufir ro I ar kabit ir, im jab kōmōn nana nōn dri kanan ro Aō.

23 Komin al nōn Jeova, kom dri lōl otemjej; komin kwalok lomor eo An jen ran nōn ran.

24 Komin ba kin An aibujuij iben ro dri ailiñ ko, men in bwilōñ ko An iben ro dri ailiñ ko otemjej.

25 Bwe elap Jeova, im ren kanuij nebar E: ren bareinwōt mijōk E jen anij otemjej.

26 Bwe anij otemjej an ro dri ailiñ ko rej ekjōp wōt: a Jeova e ar kōmōnmōn lōñ ko.

27 Mutoktok im utiejen rej iman: kajur im mōnōnō rej ilo jikin.

28 Komin lelok nōn Jeova, kom ro nukin ian ro dri ailiñ ko, komin lelok nōn Jeova aibujuij im kajur;

29 Komin lelok nōn Jeova aibujuij eo ekar nōn etan: bōktok juōn jurtak, im itok nōn iman: komin kabuñ nōn Jeova ilo litlit e kwojarjar.

30 Komin wuririr iman, aolepen lōl: lōl bareinwōt emwij kabin e bwe ren ban kamōkit e.

31 Lōñ ko ren mōnōnō, im lōl en lōñliñ; im ren ba iben ro dri ailiñ ko, Jeova ej kiñ.

32 Lometo en nīrñir, im an obrōk; melaj eo en jualōñlōñ, im men otemjej ilon;

33 Inem wijki ko an bukwōn wijki re naj al kin lōñliñ iman Jeova; bwe Ej iten ekajet lōl in.

34 O komin kamolol Jeova; bwe Ej emōn: bwe An tiriamo ej berwōt nōn in drio.

35 Im komin ba, Kwon lomorem, O Anij in am lomor, im Kwon kokweloktok kim jen iben ro dri ailiñ ko, in kamolol etōm e kwojarjar, im in kwalok anjo ilo nebar eo Am.

36 E mōnōnō Jeova, Anij in Israel, jen in drio nōn in drio.

Im armij otemjej rar ba, Amen, im rar nebar Jeova.

37 Ein drein e ar likit na ijo iman dipdip in kalimur an Jeova, Esap im ro jein im jātīn, bwe ren korijer iman dipdip eo ien otemjej, einwōt jermal in jabrewōt ran ej aikwij; 38 im

Obed-idom iben ro jeir im jātīr, jiljinoñoul drualitōk; Obed-idom, bareinwōt nejin Jedutun, im Hosa bwe ren dri lale kejem, 39 im Zedok pris eo, im pris ro jein im jātīn, iman imōn kabēr an Jeova, ilo jikin eo e utiej e kar i Gibēon, 40 bwe ren katok kin katok kijeek ien otemjej, jiboñ im jota, ekar nōn aolep emwij jeje ilo kien Jeova, e ar jiroñ Israel kake; 41 im ibeir Heman im Jedutun im ro jet emwij kālet ir, im ar kwalok etair, bwe ren kamolol Jeova, kin ke tiriamo eo An ej berwōt nōn in drio; 42 im ibeir Heman im Jedutun eor jilil nōn ro ren kajōñjōñ alikar, im ken kajōñjōñ ko nōn al ko an Anij; im ro nejin Jedutun ren ber ilo kejem. 43 Im armij otemjej rar ilok jabrewōt armij nōn mweo imōn: im Devid e ar jeblak in kejerammōn mweo imōn.

17 ¹Im ke Devid e ar jokwe ilo mweo imōn, Devid e ar ba nōn Netan, dri kanan eo, Lo, ij jokwe ilo juōn im aik, a dipdip in kalimur an Jeova ej berwōt iomīn nuknuk ko. 2 Im Netan e ar ba nōn Devid, Kwon kōmōn aolepen men ko ilo buruōm; bwe Anij ej ber ibōm. 3 Im boñ eo, nan jen Anij e ar itok nōn Netan, im ba, 4 Kwon ilem kennanek Devid korijera, Ein drein Jeova ej ba, Kwo jamin kalek nōn Iō juōn im, bwe In jokwe ilon: 5 bwe I ar jab jokwe ilo juōn im elikin ran eo ke I ar bōkliñtok Israel nōn ranin, a I ar ilok jen im nuknuk nōn im nuknuk, im jen juōn imōn kabēr nōn bar juōn. 6 Ilo jikin otemjej ijo I ar etetal iben aolepen Israel, I ar ba ke juōn nan nōn jabrewōt ian ro dri ekajet in Israel, ro I ar jiroñ ir bwe ren seperd an ro droō, im ba, Etke kom ar jab kalek nōn Iō mweo imō aik? 7 Kin men in, ein drein am naj ba nōn korijera Devid, Ein drein Jeova an inelip eo ej ba, I ar bōk yuk jen jikin sip ko, jen am lore sip ko, bwe kwon iroi j ion ro droō Israel: 8 im I ar ber ibōm ijo jabrewōt kwar ilok ielok, im I ar kokkure ro dri kijirāte yuk jen iman mejōm; im I naj kōmōn bwe etōm en

utiej einwöt etan ro dri utiej wöt ilo löl. 9 Im I naj likit juön jikin nön ro droö Israel, im I naj kallip ir, bwe ren jokwe ilo jikir, im ren jab kamokit ir; im ro nejin nana re jamin bar kokkure ir, einwöt mokta, 10 im einwöt jen ran eo ke I ar jiroñ ro dri ekajet, bwe ren ion ro droö Israel; im I naj kōtaik ro otemjej dri kijirāte yuk. Bareinwöt ij kennanek yuk, bwe Jeova e naj kalek nön yuk juön im. 11 Im ñe e naj jejit ran ko am bwe kwon ilen ber iben ro jemōm, I naj koutiej ineōm, elikōm, eo e naj ian ro nejōm man; im I naj kabin ailiñ in kiñ eo an. 12 E naj kalek nön Iō juön mweo imō, im I naj kabin tron eo an nön in drio. 13 ¹I naj jemen, im e naj nejō: im I jamin bōk Aō tiriamo jen e, einwöt I ar bōk e jen eo e ar mokta jen kwe; 14 a I naj kabin e ilo mweo imō im ilo ailiñ in kiñ eo Aō nön in drio; im naj kabin tron eo an nön in drio. 15 Einwöt nan kein otemjej, im einwöt aolepen visoñ in, ein drein Netan e ar konono nön Devid.

16 Inem Devid, kiñ eo, e ar dreloñlok, im jijōt iman Jeova; im e ba, Wōn ña, O Jeova Anij, im ta mweo imō, bwe Kwar āñintok iō nön ijin? 17 Im men in erik i mejōm, O Anij; a Kwar ba kin mweo imōn dri korijerōm ilo ien ej itok im etolok wöt, im Kwar lale iō einwöt wāwen juön armij e utiej, O Jeova Anij. 18 Ta eo Devid e maroñ in bar ba nön Kwe, kin utiej eo emwij kōmōne nön korijerōm? bwe Kwo jela wöt korijerōm. 19 O Jeova, kin ña korijerōm, im ekar nön buruōm, Kwar kōmōn aolepen utiej in elap, in kwalok men kein otemjej relap. 20 O Jeova, ejelok juön einwöt Kwe, im ejelok bar juön Anij ijillokōm, ekar nön men otemjej kim ar roñjake kin lojiliñem. 21 Im ailiñ ot juön ilo löl einwöt Israel dri ailiñ ro Am, ro Anij e ar ilen lomor ir bwe ren ro dri ailiñ An, in kōmōn nön Yuk etan elap im men in lelñōñ, ilo Am kadrioijlok ro dri ailiñ ko jen iman ro drom, ro Kwar lomor ir jen

Ijpt! 22 Bwe Israel, dri ailiñ ro Am, Kwar kōmōn ir ro drom nön in drio, im Kwe, Jeova, Kwar air Anij wöt. 23 Im kiō, O Jeova, nan eo Kwar ba kin ña korijerōm. im kin mweo imō, en bin nön in drio, im Kwon kōmōn einwöt Am ba kake. 24 Im etōm en bin im laplok nön in drio, im ren ba, Jeova an inelip eo, Ej Anij in Israel, aet Anij wöt nön Israel: im mweo imōn Devid dri korijerōm emwij kabin e imam. 25 Bwe Kwe, O aō Anij, Kwar kwalok nön ña korijerōm bwe Kwo naj kalek nön e juön im: kin men in dri korijerōm e ar lo ilo buruen bwe en jar imam. 26 Im kiō, O Jeova, Kwe Anij, im Kwar kalimur men in emōn nön ña korijerōm: 27 im kiō e ar buñburuōm in kejerammōn mweo imōn dri korijerōm, bwe en berwöt nön in drio imam; bwe Kwe O Jeova, Kwar kejerammōn e, inem e jerammōn nön in drio.

18 Elikin men in Devid e ar mōn ro dri Pilistia, im kōtaik ir, im e ar bōk Gat kab jikin kwelok ko redrik an jen pein ro dri Pilistia. 2 Im e ar mōn Moab; im ro dri Moab rar dri korijeran Devid, im owōjlok.

3 Im Devid e ar mōn Hadarizer kiñ in Zoba nön Hemat, ilo an ilen kabin an kiñ iturin river Upretis. 4 Im Devid e ar bōk jen e juön tausan jariot, im jiljilimjuön tausan dri uwe ion ors, im roñoul tausan dri tōrinae etetal; im Devid e ar bukwe iki ko i neen ors in jariot otemjej, a e ar kejbārok jen ir nön jibuki jariot.

5 Im ke ro dri Siria jen Damaskōs rar iten jibōñ Hadarizer kiñ in Zoba, Devid e ar mōn roñoul ruo tausan armij ian ro dri Siria. 6 Ien eo Devid e ar likit ro dri me ilo Siria im Damas-kōs; im ro dri Siria rar korijer nön Devid, im rar owōjlok. Im Jeova e ar lelok anjo nön Devid ijoko jabrewöt e ar ilok ielok. 7 Im Devid e ar bōk likipijñōk ko gold rar iben ro dri korijeran Hadarizer, im bōkitok nön Jerusalem. 8 Im jen Tibhat im jen Kun, jikin kwelok ko an Hadarizer, Devid e ar bōk olōñ jinibōrōrō, im jen

e Solomon e ar kōmōn lometo jinibor, im jur ko, im jābi jinibōrōrō ko.

9 Im ke Tou kiñ in Hemat e ar roñjake kin an Devid mōn aolepen jar in tōrinae an Hadarizer kiñ in Zoba, 10 e ar jilkinlok Hadoram, nejin, nōn iben kiñ Devid, in yokyokwe e, im kejerammōn e, kin an tōrinaek Hadarizer im mōn e, (bwe Hadarizer e kar tōrinaek Tou); im iben wāwen otemjej wāwen jābi ko gold im silver im jini-bōrōrō. 11 Men kein bareinwōt Devid e ar lelok nōn Jeova iben silver im gold eo e ar bōktok jen ailiñ otemjej; jen Idom, im jen Moab, im jen ro nejin Amon, im jen ro dri Pilstia, im jen Amelek.

12 Bar juōn, Ebishai, nejin Ziruaia, e ar mōn ian ro dri Idom ilo komlōl jātōk, joñoul drualitōk tausan. 13 Im e ar likit ro dri me ilo Idom; im ro dri Idom otemjej rar dri korijeran Devid. Im Jeova e ar lelok anjo nōn Devid ijoko jabrewōt e ar ilok ielok.

14 Im Devid e ar iroiñ ion aolepen Israel; im e ar kōmōn wānik im jime nōn kajur ro otemjej. 15 Im Joab nejin Ziruaia e ar ion jar in tōrinae; im Jihoshapat, nejin Ehailud, dri jeje bwebwenato; 16 im Zedok, nejin Ehaitub, im Abimelek nejin Ebaiatar, rar pris; im Shavshae ar dri jeje; 17 im Beneia nejin Jihoiada e ar ion ro dri Kiret im ro dri Pilet; im ro nejin Devid rar iroiñ iturin kiñ eo.

19 ¹Im elikin men in, Nehash, kiñ an ro nejin Amon, e ar mij, im leo nejin e ar binej jenkwōn im kiñ. 2 Im Devid e ar ba, I naj kwalok joij nōn Henun nejin Nehash, bwe jemen e ar kwalok joij nōn iō. Ein drein Devid e ar jilkinlok ro dri jilik bwe ren kainemōn e kin jemen. im ro dri korijeran Devid rar dreloñ ilo enin ro nejin Amon, nōn Henun, bwe ren kainemōn e. 3 A iroiñ ro re ettā ian ro nejin Amon rar ba nōn Henun. Kwoj lemnok Devid ej nebar jemōm ilo an jilkintok ro dri kainemōn nōn kwe ke? ro korijeran re jab iten kabukot, im kokkure, im alekoik ene in ke? 4 Ein drein Henun e ar

jibwe ro dri korijeran Devid, im eal ir, im bukwe lukwōn nuknuk ko air nōn lomiar, im jilkinlok ir. 5 Inem jet rar ilen kennanek Devid ekijkan air kōmōn nōn armij rein. Im e ar jiliklok in wōnmae ir, bwe armij ro re kanuij jok. Im kiñ eo e ba, Komin berwōt i Jeriko mae ien kworeak ko ami rej edreklok, inem komin jeblak-tok.

6 Im ke ro nejin Amon rar lo bwe rar mōke kōmōn ir men in jōjōik nōn Devid, Henun im ro nejin Amon rar jilkinlok juōn tausan talent in silver, bwe ren kejerbal jariat ko, im ro rej uwe ion ors, jen Mesopotemia, im jen Eram-meaka, im jen Zoba. 7 Ein drein rar kejerbal jilñoul ruo tausan jariat, im kiñ in Meaka, kab ro dron, rar item kamp iman Mediba. Im ro nejin Amon rar kweloktok jen jikin kwelok ko air im iten tōrinae. 8 Im ke Devid e ar roñjake, e ar jilkinlok Joab, im aolepen jar in tōrinae an armij re kajur. 9 Im ro nejin Amon rar drioiñtok im kalejar iman kejem in jikin kwelok eo: im kiñ ro re kar itok, rar mōke iair ilo melaj.

10 A ke Joab e ar lo air tōrinaek e iman im ilikin, e ar kālet ro remōn-tata ian ro dri Israel, im kalejar mae ro dri Siria. 11 Im ro jet ian dri tōrinae e ar likit ir ilo pein Ebishai jātīn; im rar kalejar mae ro nejin Amon. 12 Im e ar ba, Elañe ro dri Siria re kajur jen nā, inem kwon jibōñ iō; a elañe ro nejin Amon re kajur jen kwe, inem I naj jibōñ yuk. 13 Kwon kanuij beran, im jen kōmōn einwōt man ro, kin dri ailiñ ro arro, im jikin kwelok ko an ar Anij: im Jeova en kōmōn einwōt emōn iben. 14 Ein drein Joab im armij ro iben rar druaklok iman ro dri Siria bwe ren tōrinaek ir; im rar ko jen iman. 15 Im ke ro nejin Amon rar lo bwe ro dri Siria rar ko, bareinwōt rar ko jen iman Ebishai jātīn, im rar dreloñlok ilo jikin kwelok eo. Inem Joab e ar jeblak nōn Jerusalem.

16 Im ke ro dri Siria rar lo air jorran iman israel, rar jilkinlok ro dri jilik, im āñintok ro dri Siria rar ber i

River jab eo juōn, im Shopak kapen in jar in tōrinae an Hadarizer e ar iroi j ioir. 17 Im ar kennanek Devid men in; im e ar kokweloktok aoepen Israel, im elālok jen Jordan, im itok mae ir, im kalejar nae ir. Inem ke Devid e ar kalejar nae ro dri Siria, rar tōrinaek e. 18 Im ro dri Siria rar ko jen iman ro dri Israel; im Devid e ar mōn ian ro dri Siria, armij dri jariot, jiljilimjuōn tausan, im eñoul tausan dri tōrinae rej etetal, im e ar mōn Shopak, kapen an jar in tōrinae eo. 19 Im ke ro dri korijeran Hadarizer rar lo air jorran iman Israel, rar mirik Devid, im korijer nōn e: im ro dri Siria rar jab bar kōnan jibōn ro nejin Amon.

20 ¹Im ilo yiō eo ilokōn yiō in, ien eo ke kiñ ro rej ilen tōrinae, Joab e ar tellok jar in tōrinae eo, im e ar kokkure enen ro nejin Amon, im e ar item nitbwili Rabba. A Devid e ar berwōt i Jerusalem. Im Joab e ar mōn Rabba im kejebeplik e. 2 Im Devid e ar bōk bokrōnat an kiñ eo air jen bōran, im lo an paun juōn talent gold, im eor dreka re aurōk ion: im e ar likit e ion bōran Devid. Im e ar bōktok elōñ wōt men in rakim jen jikin kwelok eo. 3 Im e ar kadrioi jtok armij ro rar iloan, im e ar bukwe ir kin jirben ko, im kin harro māl, im kin ilil ko. Im ein drein an Devid kōmōn nōn jikin kwelok otemjej an ro nejin Amon. Im Devid kab armij otemjej rar jeblak nōn Jerusalem.

4 Im ²elikin men in, e ar walok juōn tōrinae i Gizer, iben ro dri Pilistia: ien eo Sibbekai dri Hushat e ar mōn Sippai, ian ro nejin inea eo; im kōtaik ir. 5 Im bar juōn ien, juōn tōrinae iben ro dri Pilistia; im Elhennan, nejin Jeir, e ar mōn Lamai, jein im jātin Golaia dri Gat, buñ in mōri eo an einwōt alal eo an dri ej nuknuk. 6 Im bar juōn tōrinae i Gat, im juōn armij ie e kanuij utiej, im arrin neen im pein roñoul emen, jiljino lok wōt ilo pā ko, im jiljino lok wōt ilo ne ko, im emwij keutak e bareinwōt nōn

inea eo. 7 Im ke ej kimjōk Israel, Jonetan, nejin Shimea, jein Devid, e ar mōn e. Rein rar lotak nōn inea eo i Gat; im rar buñ kin pein Devid im kin pein ro dri korijeran.

21 Im Setan e ar ¹jutōk jumae Israel, im e ar karel Devid bwe en bwine Israel. 2 Im Devid e ar ba nōn Joab, im nōn iroi j ro an armij rōn, Komin ilok im bwine Israel jen Bier-shiba nōn Dan; im bōktok nan nōn iō, bwe in jela orair. 3 Im Joab e ar ba, Jeova en kōmōn bwe armij ro An ren orlok jibuki alen: a kwe, aō iroi j kiñ, ir otemjej re jab dri korijeran aō iroi j ke? etke aō iroi j ej jiroñ kin men in? etke en unin ruōn nōn Israel? 4 Ijoke, nan an kiñ eo e kajur jen Joab. Kin men in Joab e ar ilok, im e ar itoitōk ilo aoepen Israel, im ej itok nōn Jerusalem. 5 Im Joab e ar lelok oran armij rōn nōn Devid. Im dri Israel otemjej rej nuri jāji juōn tausan tausan, im jibuki tausan: im dri Juda ābuki jiljilimjuōnñoul tausan rej nuri jāji. 6 A e jab bwine dri Livali im dri Benjamin ibeir; bwe nan an kiñ eo e ar men in jōjōik nōn Joab. 7 Im Jeova e ar illu kin men in; im E ar mōn Israel. 8 Im Devid e ar ba, Elap aō bwir kin aō kōmōn men in: a kiō ij akwelap, Kwon jolok jerawiwi an korijerōm; bwe men in I ar kōmōn e, e kanuij bwebwe.

9 Im Jeova e ar konono nōn ²Gad, dri lolo an Devid, im E ba, 10 Kwon ilen konono nōn Devid, im ba, Ein drein Jeova ej ba, Ij lewoj men ko jilu: kwon kålet juōn iair bwe In kōmōne nōn yuk. 11 Ein drein Gad e ar itok nōn iben Devid, im e ar ba nōn e, Ein drein Jeova ej ba, Kwon bōk men eo kwo kōnan: 12 jilu yiō in nita; ak jilu aliñ ñe kwo naj jorran iman ro dri kijirāte yuk ke air jāji ej lukworwor im tōbar yuk; ak jilu ran in jāji an Jeova; aet, nañinmij elap ilo ene, im enjel òn Jeova en mōn wōt ilo tōreren ko otemjej in Israel. Kin men in kwon kalomōnlojken uak òt I naj kejeblak nōn Eo

e ar jilkinwoj iō. 13 Im Devid e ar ba ñōn Gad, Ña I jaje wōt kake: in buñ, ij akwelap, na ilo pein Jeova; bwe e kanuij lap tiriamokake ko An: im in jab buñ ilo pein armij rōn. 14 Ein drein Jeova ej jilkinlok juōn nañinmij e nana ion Israel; inem rar buñ ilo Israel jiljilimjuōñioul tausand man rōn. 15 Im Anij e ar jilkinlok juōn enjel ñōn Jerusalem bwe en kokkure: im ke e nañin kokkure, Jeova e ar reilok, im E ar ukwelok jen nana eo, im e ar ba ñōn enjel eo dri kokkure, Emwij; kiō kwon drebij peōm. Im enjel ōn Jeova e ar jutōk iturin jikin dreñdreñ an Ornan dri Jibus eo. 16 Im Devid e ar reiliñlok, im lo enjel ōn Jeova eo ej jutōk ikōtan lōl im lōñ ko, im ilo pein juōn jāji emwij an nure im erlokwe ion Jerusalem. Inem Devid kab ridto ro, ke emwij air kōnōk nuknuk eklep iren, rar buñbero. 17 Im Devid e ar ba ñōn Anij, E jab ña eo I ar jiroñ bwe ren bwine armij ro ke? ña wōt eo I ar bwir im kōmōn nana elap; a sip rein, ta eo rar kōmōne? ij akwelap ibōm, O Jeova, aō Anij, peōm en nae iō, im nae imōn jema; a en jab nae ro drom bwe ren jorran.

18 Inem enjel ōn Jeova e ar jiroñ Gad bwe en ba ñōn Devid, bwe Devid en wōñliñlok im kōmōn juōn lokatok ñōn Jeova, ilo jikin dreñdreñ an Ornan dri Jibus. 19 Im Devid e ar wōñliñlok ekar ñōn nan an Gad, eo e ar konono ilo etan Jeova. 20 Im Ornan e ar oktōklik, im lo enjel eo; im ro nejin eman iben re tilekek. Ak Ornan ej dreñlokwe wit. 21 Im ke Devid e ar itok ñōn iben Ornan, Ornan e ar reilok im lo Devid, im e ar ilok jen jikin dreñdreñ eo, im e ar barikrik jen Devid im buñbero. 22 Inem Devid e ar ba ñōn Ornan, Kwon letok jikin dreñdreñ in, bwe in kalek ion, juōn lokatok ñōn Jeova: kin aolepen wōññan kwo naj letok, bwe en jemlok nañinmij eo e nana jen armij rōn. 23 Im Ornan e ar ba ñōn Devid, Kwon bōke ñōn kwe, im aō iroi en kōmōn men eo emōn ilo mejen: lo, ij lewoj ox ko ñōn katok kijeek, im

ken dreñdreñ ko ñōn kane, im wit eo ñōn men in lelok flauo: ij lewoj aolepeir. 24 Im kiñ Devid e ar ba ñōn Ornan, Jab; a I naj wiaik e kin aolepen wōññan: bwe I jab kōnan bōk men ko am ñōn Jeova, ak katok kin katok kijeek ejelok wōññan. 25 Ein drein Devid e ar lelok ñōn Ornan kin jikin eo, jiljino buki sekel gold ekar ñōn air paun. 26 Im Devid e ar kalek ie juōn lokatok ñōn Jeova, im e ar katok kin katok kijeek ko, im katok ainemōn ko, im e ar kir ñōn Jeova: im E ar uak e kin kijeek ion lokatok in katok kijeek. 27 Im Jeova e ar jiroñ enjel eo; im e ar likit jāji eo an na ilo nien.

28 Ien eo ke Devid e ar lo an Jeova uak e ilo jikin dreñdreñ an Ornan dri Jibus, inem e ar katok ie. 29 Bwe ien eo imōn kabēr an Jeova, eo Moses e ar kōmōn e ilo ene jemaren, im lokatok in katok kijeek, rar ber ilo jikin e utiej i Gibeon. 30 A Devid e ar jab maroñ in ilok iman, in kajitōk iben Anij; bwe e mijōk kin jāji an enjel ōn Jeova. 1 Inem Devid e ar ba, 22 Eñin imōn Jeova Anij, im eñin lokatok in katok kijeek an Israel.

2 Im Devid e ar jiroñ bwe ren kokweloktok ro dri itoitōk rar ber ilo enen Israel: im e ar kejerbal dri jekjek dreka ko emōn jebair in kalek mweo imōn Anij. 3 Im Devid e ar kapojōk elōñ māl ñōn drila ko ñōn aor in kejem ko, im ken kobaik ko: im elōñ jinibōrōrō, ejelok joñōn; 4 im wijki aik ejelok orair: bwe ro dri Saidon, im ro dri Tair rar bōktok elōñ wijki aik ñōn Devid. 5 Im Devid e ar ba, Solomon, nejiō, ej ajiri wōt im e biruru an rel im mōjino, ak mweo ren kalek ñōn Jeova emōn en kanuij lap an wolio, im en buñbuñ kin an aibujuij ilo ailiñ ko otemjej: kin men in, I naj kapojōk ñōn e. Ein drein Devid e ar kanuij kapojōk mokta jen an mij.

6 Inem e ar kirtok Solomon, nejin, im jiroñ e bwe en kalek juōn im ñōn Jeova, Anij in Israel. 7 Im Devid e ar ba ñōn Solomon, nejin, 1 Kin ña,

e kar ilo buruō bwe in kalek juōn im ñōn etan Jeova aō Anij. 8 A nan jen Jeova e ar itok ñōn iō, im ba, Kwar kanuij katorlok bōtōktōk, im kwar kōmōn tōrinae ko relap: kwo jamin kalek juōn im ñōn eta, bwe kwar kanuij katorlok bōtōktōk ion lōl iman meja. 9 Lo, juōn nejōm e naj lotak ñōn yuk, eo e naj juōn armij in kakiye: im I naj lelok ñōn e kakiye jen dri kijirāte otemjej iturin. Bwe etan e naj Solomon, im I naj lelok ainemōn im kakiye ñōn Israel ilo ran ko an. 10 E naj kalek juōn im ñōn eta, im e naj nejiō, im Ña jemen: im I naj kabin tron in ailiñ eo an ion Israel ñōn in drio. 11 Inem, nejiō, Jeova en ibōm; im kwon jerammōn wōt, im kalek mweo imōn Jeova am Anij, einwōt E ar konono kin yuk. 12 Men in wōt, Jeova en lewoj metletlet im jelalokjen, im lewoj nan in jiroñ kin Israel; bwe ein drein kwo naj maroñ in bokake kien Jeova am Anij. 13 Inem kwo naj jerammōn, elañe kwo naj lale im kōmōn kien ko im nan in jiroñ ko Jeova e ar ba ñōn Moses kin Israel: kwon kajur im beran; kwon jab mijōk, im jab lelñōñ. 14 Ak, lo, ilo aō jorran, emwij ao kapojōk ñōn mweo imōn Jeova, jibuki tausan talent gold, im juōn tausan tausan talent silver, im jinibōrōrō im māl ejelok joñair; bwe re kanuij lōñ: wijki ko im dreka ko I ar bareinwōt kapojōk; im kwo maroñ in kalōñlok. 15 Bar juōn, elōñ dri jerbal ibōm, dri jekjek im kōmōnmōn wijki im dreka, im armij otemjej re kabel ilo wāwen jerbal otemjej: 16 ejelok oran gold, silver im jinibōrōrō, kab māl. Kwon jutōk, im loetōk, im Jeova en ibōm.

17 Bareinwōt Devid e ar jiroñ iroi ro otemjej ilo Israel bwe ren jibōñ Solomon, nejin, im e ba, 18 Jeova am Anij e jab ibemi ke? im E ar jab lewoj kakiye ñōn kom i tōreren ko otemjej ke? bwe E ar ketōk ro dri enin ilo peiō; im emwij kōtaik eneo iman Jeova, im iman ro An dri ailiñ. 19 Inem komin likit buruōmi im ami bwe ren bukot Jeova ami Anij: kin men in komin jutōk im kalek imōn

kwojarjar an Jeova Anij, im bōktok dipdip in kalimur an Jeova, im jābi rokwojarjar an Anij, iloan mweo naj kalek e ñōn Jeova.

23 Ak ¹Devid e ar ridto wōt im bwijwōlā; inem e ar kōmōn Solomon, nejin, kiñ ion Israel. 2 Im e ar kokweloktok iroi ro otemjej in Israel, kab pris ro im ro dri Livai. 3 Im rar bwine ro dri Livai jen ridtōn jilñoul yiō im jima: im orair kin bōrair, juōn im juōn, jilñoul dualitōk tausan. 4 Roñoul emen tausan iair ren lale jerbal in mweo imōn Jeova: im jiljino tausan ren dri kabwijrōk im dri ekajet; 5 im emen tausan rej drilale kejem; im emen tausan rar nebar Jeova kin ken kajōñjōñ ko emwij aō kōmōnmōni, Devid ej ba, in nebar kake. 6 Im Devid e ar kijbil ir ilo lajrōk ko ekar ñōn ro nejin Livai: Gershon, Kohat, im Mirerai.

7 Ian ro dri Gershon: Ledan im Shimeai. 8 Ro nejin Ledan: Jehaiel e utiej, im Zetan, im Joel, jilu. 9 Ro nejin Shimeai: Shelomit, im Hezaiel, im Heran, jilu. Rein jiōb ro an imōn ro jimair, an Ledan. 10 Im ro nejin Shimeai: Jehat, Ziza, im Jeush, im Biraia. Rein emen ro nejin Shimeai. 11 Im Jehat e utiej, im Ziza eo ken ka ruo: a eiet ro nejin Jeush im Biraia eman, kin men in rar juōn wōt bwij ilo imōn jemeir.

12 Ro nejin Kohat: Amram, Izhar, Hibron, im Uzaiel, emen. 13 Ro nejin Amram: Aron im Moses; im ar kejenolok Aron, bwe en kokwojarjar men ko re kwojarjar otem kwojarjar, e im ro nejin, ñōn in drio, bwe ren tile kaijurjur iman Jeova, in jerbal ñōn E, im bwe ren kejerammōn ilo etan, ñōn in drio. 14 A kin Moses, armij dron Anij, ar naetan ro nejin iben bwijin Livai. 15 Ro nejin Moses: Gershom im Iliezar. 16 Ro nejin Gershom: Shebuel e utiej. 17 Im ro nejin Iliezar: Rihabaia e utiej; im ejelok bar juōn eman nejin Iliezar; a elōñ eman nejin Rihabaia. 18 Ro nejin Izhar: Shelomit e utiej. 19 Ro nejin Hibron: Jeraia e utiej, Ame-

raia eo ken ka ruo, Jehazaiel eo ken ka jilu, im Jekamiam eo ken kemen. 20 Ro nejin Uzzaiel: Maika e utiej, im Ishaia eo ken ka ruo.

21 Ro nejin Mireraï: Malai im Mushai. Ro nejin Malai: Iliezar im Kish. 22 Im Iliezar e ar mij, im ejelok nejin eman, a nejin kōra wōt: im ro jeir im jātir, ro nejin Kish, rar bōk dron. 23 Ro nejin Mushai: Malai, im Ider, im Jerimot, jilu.

24 Rein ro nejin Livai ekar ñōn ruo ko imōn ro jimair, ian ro emwij bwine ir, ilo oran ekar ñōn bōrair, rar kōmōn jerbal in korijer ilo imōn Jeova, jen roñoul yiō im jima. 25 Bwe Devid e ar ba, Jeova, Anij in Israel, e ar letok kakiije ñōn ro dron: im Ej jokwe ilo Jerusalem ñōn in drio: 26 im bareinwōt ro dri Livai re jamin bar inek imōn kabere eo im jābi otemjej an ñōn jerbal eo an. 27 Bwe kin nan ko eliktata an Devid, ar bwine ro nejin Livai jen roñoul yiō im jima. 28 Bwe air jerbal ñōn ro nejin Aron ilo jerbal in mweo imōn Jeova, ilo worwor ko, im ilo mōjab ko, im ilo kokwojarjar men otemjej rokwojarjar, jerbal in korijer ilo mweo imōn Anij; 29 kin bred in kalikar bareinwōt, kin flauo kwerik, ñōn jurtak in flauo, kek ko re jab uwe, ak men ko rej umum ilo juōn pan, ak men eo e molōlō, im kin jabrewōt joñok; 30 im bwe ren jutōk jiboñ otemjej im kamolol im nebar Jeova, im bareinwōt ke e jota; 31 im bwe ren katok kin katok kijeek otemjej ñōn Jeova, ilo Sabat ko, im ke ekāl aliñ, im ilo kwojkwoj ko emwij likiti, oran ekar ñōn kien eo, ien otemjej iman Jeova; 32 im bwe ren lale imōn kwelok im nuknuk eo, im lale jikin kwojarjar eo, im lale ro nejin Aron ro jeir im jātir, ñōn jerbal in imōn Jeova.

24 Im ir kein lajrōk ko an ro nejin Aron. Ro nejin Aron: Nedab im Ebaihu, Iliezar im Itamar. 2 A Nedab im Ebaihu rar mij mokta jen jemeir, im ejelok nejir: kin men in Iliezar im Itamar rar kōmōn jerbal in pris. 3 Im Devid, im Zedok ian ro nejin Iliezar, im Ehimelek ian

ro nejin Itamar, rar kijbil ir ekar ñōn air nan in jiroñ, ilo air jerbal. 4 Im elōñ armij re utiej ian ro nejin Iliezar jen ian ro nejin Itamar; inem ein drein air kijbil ir: ian ro nejin Iliezar joñoul jiljino, jiōb ro an imōn ro jimair: im ian ro nejin Itamar, ekar ñōn mo ko imōn jimair, drualitōk. 5 Ein drein ar kijbil ir kin kakōle, kaju wāweir ibeir otemjej; bwe eor iroiñ in imōn e kwojarjar, im eor iroiñ an Anij, ian ro nejin Iliezar, kab ian ro nejin Itamar. 6 Im Shemaia nejin Netanel dri jeje, eo ian ro dri Livai, e ar jeje ir iman kiñ eo im iroiñ ro, im Zedok pris eo, im Ehimelek nejin Ebaiatar, im jiōb ro an imōn jimair. ian pris ro im ian ro dri Livai; rar lelok imōn jimair, juōn ñōn Iliezar, im juōn ñōn Itamar.

7 A kakōle eo mokta e ar walok ñōn Jihoiarib, eo ken ka ruo ñōn Jedaia, 8 eo ken ka jilu ñōn Herim, eo ken kemen ñōn Seorim, 9 eo ken ka lailim ñōn Malkaija, eo ken ka jiljino ñōn Mijamin, 10 eo ken ka jiljilimjuōn ñōn Hakkoz, eo ken ka drualitōk ñōn Ebaija, 11 eo ken ka druatimjuōn ñōn Jeshua, eo ken ka joñoul ñōn Shekenaija, 12 eo ken ka joñoul juōn ñōn Ilaieshib, eo ken ka joñoul ruo ñōn Jekim, 13 eo ken ka joñoul jilu ñōn Huppa, eo ken ka joñoul emen ñōn Jeshebeab, 14 eo ken ka joñoul lailim ñōn Bilga, eo ken ka joñoul jiljino ñōn Immer, 15 eo ken ka joñoul jiljilimjuōn ñōn Hezir, eo ken ka joñoul drualitōk ñōn Happizez, 16 eo ken ka joñoul druatimjuōn ñōn Petehaia, eo ken ka roñoul ñōn Jihezkel, 17 eo ken ka roñoul juōn ñōn Jekin, eo ken ka roñoul ruo ñōn Gamul, 18 eo ken ka roñoul jilu ñōn Deleaija, eo ken ka roñoul emen ñōn Meazaia. 19 Ein drein air lajrōk ilo jerbal ko air, bwe ren dreloñ ilo mweo imōn Jeova ekar ñōn kien eo emwij lelok ñōn ir jen Aron jemeir, einwōt Jeova Anij in Israel e ar jiroñ e.

20 Im ian ro jet nejin Livai: ian ro nejin Amram, Shubeel; ian ro nejin Shubeel, Jedaia. 21 An Rihe-

baia: ian ro nejin Rihebaia, Ishaia e utiej. 22 Ian ro dri Izhar, Shelomit; ian ro nejin Shelomit, Jehat. 23 Ian ro nejin Hibrón: Jeraia e utiej, Ameraia eo ken ka ruo, Jehazaiel eo ken ka jilu, Jekamiam eo ken kemen. 24 Ro nejin Uzaiel, Maika; ian ro nejin Maika, Shemir. 25 Jein im jätin Maika, Ishaia; ian ro nejin Ishaia, Zekeraia. 26 Ro nejin Mirerai: Malai im Mushai; ro nejin Jeazai: Bino. 27 Ro nejin Mirerai: jen Jeazai, Bino, im Shoham, im Zakkur, im Ibrai. 28 Jen Malai: Iliezar, eo ejelok nejin eman. 29 Jen Kish; ro nejin Kish: Jirameel. 30 Im ro nejin Mushai: Malai, im Ider, im Jerimot. Rein ro nejin ro dri Livai kin mo ko imön ro jimair. 31 Rein ein drein air kōmön kaköle ko einwöt ro jeir im jätir, ro nejin Aron, iman mejen Devid kiñ eo, im Zedok, im Ehimelek, im jiöb ro an imön ro jimair, an pris ro im ro dri Livai; mo ko imön ro jimair an eo e utiej einwöt an ro jätin.

25 Bar juön, Devid im kapen in jar in törinae rar kejenelok iair nön jerbal eo, jet ian ro nejin Esap, im ro nejin Himan, im ro nejin Jedutun bwe ren drikanij kin arp ko im kin salteri ko, im kin simbal ko: im oran ro rar kōmön jerbale eo, ekar nön air jerbal, eñin: 2 ian ro nejin Esap; Zakkur, im Josep, Netenaia, im Asherila, ro nejin Esap, iomin pein Esap, rar drikanij ekar nön kien kiñ eo. 3 Jen Jedutun; Gedelaia, im Zirai, im Jeshai, Hashabaia, im Mattitaia, jiljino, iomin pein jemeir Jedutun kin arp, rar drikanij ilo kamolol im nebar Jeova. 4 Jen Himan; Bukaia, Mattanaia, Uzaiel, Shebuel, im Jerimot, Hanenaia, Hanenai, Ilaieta, Gidaltai, im Romamti-izer, Joshbikasha, Mallo-tai, Hotir, Meheziot. 5 Rein otem-jej ro nejin Himan dri lolo an kiñ eo ilo nan ko jen Anij, nön leliñlok drun. Im Anij e ar lelok nön Himan joñoul nejin eman, im jilu nejin kōra. 6 Rein otemjej rar iomin pein jemeir kin al ilo imön Jeova, kin simbal ko, salteri ko, im arp ko, nön korijer ilo

imön Anij; Esap, Jedutun, im Himan, iomin kien kiñ eo. 7 Im orair, iben ro jeir im jätir emwij katakin ir ilo al nön Jeova, ir otemjej rej kabel, rubuki dualitökñoul dualitök. 8 Im rar kōmön kaköle ko kin jerbal ko air, ir otemjej einwöt juön, ro redrik einwöt ro relap, dri kaki einwöt dri katak.

9 Ak kaköle eo mokta e ar walok kin Esap nön Josep: eo ken ka ruo nön Gedelaia; e im ro jein im jätin, im ro nejin, joñoul ruo: 10 eo ken ka jilu nön Zakkur, ro nejin im ro jein im jätin, joñoul ruo: 11 eo ken kemen nön Izrai, ro nejin im ro jein im jätin, joñoul ruo: 12 eo ken ka lailim nön Netenaia, ro nejin im ro jein im jätin, joñoul ruo: 13 eo ken ka jiljino nön Bukaia, ro nejin im ro jein im jätin, joñoul ruo: 14 eo ken ka jiljilimjuön nön Jesharila, ro nejin im ro jein im jätin, joñoul ruo: 15 eo ken ka dualitök nön Jeshai, ro nejin im ro jein im jätin, joñoul ruo: 16 eo ken ka druatimjuön nön Mattanaia, ro nejin im ro jein im jätin, joñoul ruo: 17 eo ken ka joñoul nön Shimeai, ro nejin im ro jein im jätin, joñoul ruo: 18 eo ken ka joñoul juön nön Azerel, ro nejin im ro jein im jätin, joñoul ruo: 19 eo ken ka joñoul ruo nön Hashebaia, ro nejin im ro jein im jätin, joñoul ruo: 20 kin eo ken ka joñoul jilu nön Shubeel, ro nejin im ro jein im jatin, joñoul ruo: 21 kin eo ken ka joñoul emen nön Mattitaia, ro nejin im ro jein im jätin, joñoul ruo: 22 kin eo ken ka joñoul lailim, nön Jerimot, ro nejin im ro jein im jätin, joñoul ruo: 23 kin eo ken ka joñoul jiljino, nön Hanenaia, ro nejin im ro jein im jätin, joñoul ruo: 24 kin eo ken ka joñoul jiljilimjuön, nön Joshbikasha, ro nejin im ro jein im jätin, joñoul ruo: 25 kin eo ken ka joñoul dualitök, nön Hanenai, ro nejin im ro jein im jätin, joñoul ruo: 26 kin eo ken ka joñoul druatimjuön, nön Malletai, ro nejin im ro jein im jätin, joñoul ruo: 27 kin eo ken ka roñoul, nön Ilaieta, ro nejin im ro jein im jätin, joñoul ruo: 28 kin eo ken ka

roñoul juõn, ñõn Hotir, ro nejin im ro jein im jätin, joñoul ruo: 29 kin eo ken ka roñoul ruo, ñõn Gidaltai, ro nejin im ro jein im jätin, joñoul ruo: 30 kin eo ken ka roñoul jilu, ñõn Mehezaiot, ro nejin im ro jein im jätin, joñoul ruo: 31 kin eo ken ka roñoul emen ñõn Romamti-izer, ro nejin im ro jein im jätin, joñoul ruo.

26 Kin lajrõk ko an ro dri lale kejem: ian ro dri Kora, Mishelemaia nejin Kora, ian ro nejin Esap. 2 Im eor man nejin Mishelemaia: Zekeraia manjien, Jedaiel eo ken ka ruo, Zebedaia eo ken ka jilu, Jatniel eo ken kemen, 3 Ilam eo ken ka lailim, Jihohenan eo ken ka jiljino, Ilaihoenai eo ken ka jiljilimuõn. 4 Im eor man ro nejin Obed-idom; Shimaia manjien, Jihozebad eo ken ka ruo, Joa eo ken ka jilu, im Sekar eo ken kemen, im Netanel eo ken ka lailim, 5 Amaiel eo ken ka jiljino, Issakar eo ken ka jiljilimuõn, Piulitai eo ken ka drualitõk: bwe Anij e ar kejeram-mõn e. 6 Bareinwõt ñõn Shimaia nejin, ar lotak ro nejin man, ro rar iroiõ ion mweo imõn jemeir; bwe re armij kajur im beran. 7 Ro nejin Shimaia: Othnai, im Ripeel, im Obed, Elzebad, eo ro jein im jätin armij re beran im kajur, Ilaihu, im Seme-kaia. 8 Rein otemjej ro nejin Obed-idom: ir im ro nejir im ro jeir im jätir, armij re maroñ im kajur ñõn jerb-al eo: jiljinoñoul ruo ro nejin Obed-idom. 9 Im man ro nejin Mishelemaia im ro jein im jätin, armij re kajur, joñoul drualitõk. 10 Bareinwõt Hosa, ian ro nejin Mirerai, eor nejin man: Shimrai eo e utiej, (bwe meñe e jab manjien, jemen e ar ko-utiej e), 11 Hilkaia eo ken ka ruo, Tebelaia eo ken ka jilu, Zikeraia eo ken kemen: ro nejin Hosa im ro jein im jätin otemjej, joñoul jilu.

12 Ian rein lajrõk ko an ro dri lale kejem, ian ro re utiej, air jerb-al einwõt ro jeir im jätir, bwe ren korijer ilo imõn Jeova. 13 Im rar kõmõn kakõle ko, ro redrik im ro relap, ekar ñõn mo ko imõn ro jimaier, ñõn jabre-

wõt kejem. 14 Im kakõle i rear e ar walok ñõn Shelemaia. Inem ñõn Zekeraia nejin, juõn dri bebe emõn mwilin rar kõmõn kakõle ko; im kakõle eo an e ar walok ñõn eañ. 15 Ñõn Obed-idom eo i rõk: im ñõn ro nejin, imõn mweiuk eo. 16 Ñõn Shup-pim im Hosa eo i kabiluñ, iturin kejem an Shaleket, iturin ial e utiej, ro dri ekil kajen ro dri ekil. 17 I rear jiljino dri Livai, eañ emen ilo juõn ran, i rõk emen ilo juõn ran, im ñõn imõn mweiuk ruo im ruo. 18 Ñõn Parbar i kabiluñ, emen iturin ial e utiej, im ruo i Parbar. 19 Rein lajrõk ko an ro dri lale kejem; ian ro nejin ro dri Kora, im ian ro nejin Mirerai.

20 Im ian ro dri Livai, Ehajia e ar iroiõ ion mweiuk ko an imõn Anij, im ion mweiuk ko emwij lelok ñõn Anij. 21 Ro nejin Ledan, ro nejin ro dri Gershon an Ledan, jiõb ro an imõn ro jimaier, an Ledan dri Gershon: Jihaielai. 22 Ro nejin Jihaielai: Zitam, im Joel jein im jätin, ion mweiuk ko an imõn Jeova. 23 Ian ro dri Amram, ian ro dri Izhar, ian ro dri Hibr-on, ian ro dri Uzaiel: 24 im Shebuel nejin Gershom, nejin Moses, e ar iroiõ ion mweiuk ko. 25 Im ro jein im jätin: jen Iliezar e ar walok Rihabaia nejin, im Jeshai nejin, im Joram nejin, im Zikrai nejin, im Shelomot nejin. 26 Shelomot in, im ro jein im jätin rar iroiõ ion mweiuk ko men in lelok, ko Devid, kiñ eo, im jiõb ro an imõn ro jimaier, kapen ro ion tausan ko im buki ko, im kapen ro an jar in törinae, rar lelok. 27 Jen men in rakim rar bõk ilo törinae ko, rar lelok men in kõkäl mweo imõn Jeova. 28 Im aolepen men ko Samuel dri lolo, im Saul nejin Kish, im Abner nejin Ner, im Joab nejin Ziruaia, rar lelok, mweiuk ko jabrewõt rar lelok, e ar ber iomin pein Shelomot, im pein ro jein im jätin.

29 Ian ro dri Izhar, Kenenaia im ro nejin, ir ñõn jerb-al inabij ion Israel, ro dri kabwiyrõk im dri ekajet. 30 Ian ro dri Hibr-on, Hashebaia im ro jein im jätin, armij re beran, juõn

tausan jiljilimjuōn buki, rar lale ro dri Israel jen Jordan tu irilik, kin jerbal otemjej an Jeova, im kin korijer nōn kiñ eo. 31 Ian ro dri Hibron Jeraija eo e utiej, aet ian ro dri Hibron, ekar nōn ebeben ko air, kin mo imōn ro jimair. Ilo yiō eo ken ka eñoul an Devid kiñ, ar bukot ir, im ar lo ibeir armij re kajur im beran i Jezer in Giliad. 32 Im ro jein im jätin, armij re beran, ruo tausan jiljilimjuōn buki, jiōb ro an imōn ro jimair, ro Devid e ar kōmōn ir dri lale ion ro dri Ruben, im ro dri Gad, im jibilkwōn bwijin ro dri Menassa, nōn men ko jabrewōt kin Anij, im nōn men ko an kiñ eo.

27 Ak ro nejin Israel kin orair, jiōb ro an imōn ro jimair, im kapen ro an tausan ko im buki ko, im dri kabwijrōk ro air rar korijeran kiñ eo, ilo jabrewōt men ko an lajrōk ko, rar dreloñtok im drioijlok aliñ nōn aliñ iomin aliñ ko otemjej in yiō, ilo jabrewōt lajrōk roñoul emen tausan. 2 Ion lajrōk eo mokta nōn aliñ eo mokta, Jashobiam nejin Zabdiel: im ilo lajrōk eo an, roñoul emen tausan. 3 E juōn ian ro nejin Pirez, eo e utiej jen kapen otemjej in jar in tōrinae nōn aliñ eo mokta. 4 Im ion lajrōk eo an aliñ eo ken ka ruo, Dodai dri Aho, im lajrōk eo an: im Miklot iroi: im ilo lajrōk eo an roñoul emen tausan. 5 Kapen eo ken ka jilu in jar in tōrinae, nōn aliñ eo ken ka jilu, Beneia, nejin Jihoiada pris, ej iroi: im ilo lajrōk eo an roñoul emen tausan. 6 Eñin Beneia eo ej armije kajur ian jilñoul eo, im ion jilñoul eo: im ilo lajrōk eo an, Amizebad nejin. 7 Kapen eo ken kemen nōn aliñ eo ken kemen, Esahel jätin Joab, im Zebedaia nejin ijillockin: im ilo lajrōk eo an roñoul emen tausan. 8 Kapen eo ken ka lailim nōn aliñ eo ken ka lailim, Shamhut dri Izra: im ilo lajrōk eo an roñoul emen tausan. 9 Kapen eo ken ka jiljino nōn aliñ eo ken ka jiljino, Aira nejin Ikesh, dri Tekoa: im ilo lajrōk eo an roñoul emen tausan. 10 Kapen eo ken ka jiljilimjuōn nōn aliñ eo ken ka jiljilimjuōn, Hilez dri Pilon, ian ro dri

Ipreim: im ilo lajrōk eo an roñoul emen tausan. 11 Kapen eo ken ka drualitōk nōn aliñ eo ken ka drualitōk, Sibekai dri Husha, ian ro dri Zira: im ilo lajrōk eo an roñoul emen tausan. 12 Kapen eo ken ka druatimjuōn nōn aliñ eo ken ka druatimjuōn, Abalizer dri Anatot, ian ro dri Benjamin: im ilo lajrōk eo an roñoul emen tausan. 13 Kapen eo ken ka joñoul nōn aliñ eo ken ka joñoul, Meherai dri Nitopa, ian ro dri Zira: im ilo lajrōk eo an roñoul emen tausan. 14 Kapen eo ken ka joñoul juōn nōn aliñ eo ken ka joñoul juōn, Beneia dri Pireton, ian ro nejin Ipreim: im ilo lajrōk eo an roñoul emen tausan. 15 Kapen eo ken ka joñoul ruo nōn aliñ eo ken ka joñoul ruo, Heldai dri Nitopa, jen Otniel: im ilo lajrōk eo an roñoul emen tausan.

16 Bar juōn, ion bwij ko bwijin Israel: ian ro dri Ruben Iliezar nejin Zikrai, iroi: ian ro dri Simeon, Shepetaia nejin Meaka: 17 an Livai, Hashebaia nejin Kemuel: an Aron, Zedok: 18 an Juda, Ilaihu juōn ian ro jein Devid: an Issakar, Omrai nejin Maikael: 19 an Zebulun, Ishmaia nejin Obedaia: an Naptalai, Jerimot nejin Azriel: 20 ian ro nejin Ipreim, Hoshia nejin Azezaia: an jibilkwōn bwijin Menassa, Joel nejin Pedeia: 21 an jibilkwōn bwijin Menassa i Giliad, Iddo nejin Zekeraia: an Benjamin, Jeasiel nejin Abner: 22 an Dan, Azerel nejin Jiroham. Rein kapen ro an bwij ko bwijin Israel. 23 A Devid e ar jab bwine ro roñoul yiō im erik jen e, bwe Jeova e ar ba E naj korlok dri Israel einwōt iju ko ilōñ. 24 Joab nejin Ziruaia e ar jino in bwine ir, a e ar jab kamwijlok; im illu e ari tok ion Israel kin men in; im ar jab likit orair ilo jeje in bwebwenato an kiñ Devid.

25 Im ion mweiuk ko an kiñ eo, Azmevet nejin Edaiel: im ion mweiuk ko ilo jikin kallip ko, ilo jikin kwelok ko, im ilo jikin kwelok ko redrik, im ilo mo ko, Jonetan nejin Uzzaia: 26 im ion ro rar jerbal ilo jikin kallip nōn tōblōl brii, Ezrai nejin Kilub:

27 im ion bwil in grep ko, Shimeai dri Remat: im ion orlok in bwil in grep ko ññon jikin wain, Zabdai, dri Shipma: 28 im ion wijki oliv im wijki sikomor ilo ene etā, Beal-henan dri Gider: im ion jikin oil ko, Joash: 29 im ion bwijin kau ko rar mōña i She-ron, Shitrai, dri Sheron: im ion bwijin kau ko ilo komlōl ko, Shepat, nejin Adlai: 30 im ion kamel ko, Obil dri Ishmeel: im ion ass ko, Jedeia dri Mironot: im ion bwijin sip ko, Jeziz dri Hagar. 31 Rein otemjej iroi j ro ion men ko an kiñ Devid.

32 Bareinwōt Jonetan, alap an Devid, e dri bebe, juōn armij e meletlet, im e dri jeje; im Jihaiel, nejin Hakmonai, e ar ber iben ro nejin kiñ eo: 33 im Ehito pel dri bebe an kiñ eo: im Hushai, dri Ark, e ar jeran kiñ eo: 34 im ijillokin Ehito pel, Jihoiada nejin Beneia, im Ebaiatar: im Joab kapen in jar in tōrinae an kiñ eo.

28 Im Devid e ar kokweloktok iroi j ro otemjej an Israel, iroi j in bwij ko, im kapen ro an jar ko rar jerbal ññon kiñ eo ilo lajrōk ko, im kapen ro an tausan ko, im kapen ro an buki ko, im ro rar lale mweiuk im men ko an kiñ im an ro nejin, im ro dri kabwivrōk, im armij ro re kajur, aet armij otemjej re beran im kajur, ññon Jerusalem. 2 Inem Devid e ar jutōk, im e ba, Komin roñjake iō, komeo ro jeiō im jātīō, im ro droō: kin ña, e kar ilo buruō bwe in kalek juōn imōn kakije ññon dipdi in kalimur an Jeova, im ññon eran neen aruij Anij; im emwij aō kapojōk ññon kalek e. 3 A Anij e ar ba ññon iō, Kwo jamin kalek juōn im ññon eta, bwe kwe juōn armij in tōrinae, im kwar katorlok bōtōktōk. 4 Mekarta, Jeova, Anij in Israel, e kar kălet iō jen aolepen mweo imōn jema bwe in kiñ ion Israel ññon in drio: bwe E ar kălet Juda bwe en iroi j; im ilo imōn Juda, mweo imōn jema; im ian ro nejin jema E ar buñburuen kin ña, in kōmōn io kiñ ion aolepen Israel; 5 im jen ian man ro otemjej nejiō, (bwe Jeova e ar letok elōñ nejiō man), E ar kălet Solomon

nejiō bwe en jījōt ion tron an ailiñ an Jeova ion Israel. 6 Im E ar ba ññon iō, Solomon, nejm, e naj kalek mweo imō im worwor ko Aō; bwe I ar kălet e nejiō, im Ña I naj jemen. 7 Im I naj kabin ailiñ eo an ññon in drio, elañe ej tiljek in kōmōn nan in jiroñ ko Aō im kien ko Aō, einwōt ranin. 8 Inem kin men in, iman mejen aolepen Israel, jar an Jeova, im ilo an aruij Anij roñjake, komin lale im bukot kien ko otemjej an Jeova ami Anij: bwe komin berwōt ilo eninemōn, im likite men in jolit ññon ro nejmōi elikemi, ññon in drio.

9 Im kwe, Solomon, nejiō, kwon jela Anij eo an jemōm, im korijer ññon E kin buru e wăppen; im lolātāt e mōnōnō; bwe Jeova ej tur buru otemjej, im E jela kin lōkōm im lemnok otemjej: elañe kwoj bukot E, kwo naj lo E: a elañe kwoj ilok jen E, E naj jolok yuk in drio. 10 Inem kwon lale mōk: bwe Jeova e ar kălet yuk bwe kwon kalek juōn im ññon jikin kwojarjar: kwon kajur, im kōmōne.

11 Inem Devid e ar lelok ññon Solomon joñok in ¹ portiko an tempel eo, im an mo ko, im an jikin mweiuk ko, im an rum ko ilōñ, im an mōjab ko iloan, im an jikin tiriamokake; 12 im joñon men otemjej iben kin Jitōb, ññon worwor ko in imōn Jeova, im an mōjabeo otemjej iturin, an jikin mweiuk ko in mweo imōn Anij, im an jikin mweiuk ko ññon men ko men in lelok; 13 bareinwōt an lajrōk ko an pris ro im ro dri Livai, im an jerbal otemjej in korijer an mweo imōn Jeova, im an jābi otemjej ññon jerbal ko ilo imōn Jeova; 14 an gold kin joñon erro ññon jābi gold, an jābi ko ññon jabrewōt wăwen jerbal; an silver ññon jābi otemjej silver kin joñon erro, ññon jābi otemjej ilo jabrewōt wăwen korijer; 15 kin joñon erro bar einwōt ññon jikin lamp ko gold, im ññon jikin lamp ko silver, silver kin joñon erro ññon jabrewōt jikin lamp im lamp ko an, ekar ññon jabrewōt jikin lamp kōmōn kake; 16 im gold

kin joñon erro ñõn tebel ko in bred in kalikar, ñõn jabrewõt tebel; im silver ñõn tebel ko silver; 17 im kãj ko ñõn kõniek, im jãbi ko, im kõp ko, jen gold erreo; im ñõn bol ko gold kin joñon erro ñõn jabrewõt bol; im ñõn bol ko silver kin joñok ñõn jabrewõt bol; 18 im ñõn lokatok in kaijurjur, gold erreo kin joñon erro; im gold ñõn joñok in jariot, aet kerub ko, ko rar erlokwi peir, im kalibubu dipdip in kalimur an Jeova. 19 Aolepen men in, Devid e ar ba, ar kajelaik iõ kin jeje jen pein Jeova, aet, men in kõmõn otemjej an joñok in.

20 Im Devid e ar ba ñõn Solomon, nejin, Kwon kajur im kwon beran wõt, im kõmõnmõne: kwon jab mijõk, im jab leñõñ: bwe Jeova Anij, aõ Anij, ej ber ibõm; E jamin likjõp ak illok jen kwe, mae ien kamwijlok aolepen jerbal ñõn korijer in mweo imõn Jeova. 21 Im, lale, lajrõk ko an pris ro im ro dri Livai, ñõn aolepen jerbal in mweo imõn Anij; im armij otemjej re mõnõnõ im kabel ilo jabrewõt wāwen jerbal, re naj ibõm ñõn jabrewõt wāwen korijer: bareinwõt kapen ro im armij otemjej re naj kanuij bokake yuk.

29 Im Devid, kiñ eo, e ar ba ñõn aolepen jar eo, Solomon, nejiõ, eo Anij wõt E ar kãlet e, ej ¹drik wõt im e ub an lemnok, im jerbal eo elap wõt; bwe mweo e jab ñõn armij, a ñõn Jeova Anij. 2 A ña ²I ar kapojõk einwõt aõ maroñ ñõn mweo imõn aõ Anij, gold eo ñõn men ko gold, im silver ñõn men ko silver, im jinibõrõrõ ñõn men ko jinibõrõrõ, māl eo ñõn men ko māl, im wijki ko ñõn men ko jen alal; dreka ko onix, im dreka ko ñõn loñwe na jikin, dreka ko ñõn men in kõmõn tiltil, im neme-meir ein juõn jen dron, im dreka re aurõk jabrewõt wāweir, im dreka ajaj elõñ. 3 Bareinwõt kin aõ kanuij yokwe mweo imõn aõ Anij, im eor gold im silver iba, ij lelok ñõn mweo imõn aõ Anij, eorlok jen aolepen men ko I ar kapojõk ñõn mweo

e kwojarjar, 4 aet, jilu tausan talent gold, gold in Ofir, im jiljilimjuõn tausan talent silver emwij karreoik e, bwe ren nakilin kake turin mo ko; 5 gold ñõn men ko an gold, im silver ñõn men ko an silver, im ñõn jabrewõt wāwen ren kõmõne kin pein ro dri kõmõnmõn. Inem wõn eo e mõnõnõ in mõke lelok e ñõn Jeova ranin?

6 Inem iroi j ro an mo ko imõn ro jimair, im iroi j ro an bwij ko in Israel, im kapen an tausan ko im buki ko, im ro dri lale jerbal an kiñ eo, rar lelok im mõnõnõ; 7 im rar lelok ñõn jerbal in mweo imõn Anij, gold lailim tausan talent im joñoul tausan derik, im silver joñoul tausan talent, im jinibõrõrõ joñoul drualitõk tausan talent, im māl jibuki tausan talent. 8 Im ro eor dreka re aurõk ibeir rar lelok ñõn mweiuk ko an imõn Jeova, iomin pein Jihaiel dri Gershon. 9 Inem armij ro rar lõñliñ kin air lelok im mõnõnõ, bwe kin buru e wāppen rar lelok im mõnõnõ ñõn Jeova: im Devid, kiñ eo, e ar bareinwõt lõñliñ kin lõñliñ elap.

10 Kin men in Devid e ar kamõnõnõik Jeova iman aolepen jar eo; im Devid e ar ba, E mõnõnõ Kwe, O Jeova, Anij in Israel, jemem, ñõn in drio im in drio. 11 ¹Am, O Jeova, lapen, im kajur, im maroñ, im aibujuij, im anjo, im utiejen: bwe aolepen men ko ilo lõñ im ilo lõl, Am; Am ailiñ eo, O Jeova, im Kwoj utiej im einwõt bõran men otemjej. 12 Mweiuk ko im nebar rej jen Kwe, im Kwoj iroi j ion aolep; im ilo peõm kajur im maroñ; im ilo peõm men in koutiej, im men in kakajur armij otemjej. 13 Inem, amuij Anij, kim kamolol Yuk, im nebar etõm e aibujuij. 14 A wõn ña, im ta dri ailiñ eo aõ, bwe kimin maroñ in mõnõnõ in lelok einwõt in? bwe men ko otemjej rej itok jen Kwe, im jen men ko Am kim ar lewoj ñõn Kwe. 15 Bwe kim druamajet imam, im dri itoitõk einwõt ro jemem otemjej: ran ko am ion lõl einwõt elur, im ejelok berwõt. 16 O Jeova amuij Anij, men kein otem-

jeu kim ar kapojök in kalek ñön Kwe juön im, ñön etöm e kwojarjar, rej itok jen peöm, im aolepeir Am wöt. 17 Bareinwöt I jela, aō Anij, Kwoj melejoñ buru, Kwo mōñōñō kin jime. Kin ña, ilo buruō e jime I ar mōñōñō in lewoj men kein otemjej: im kiō, emwij aō lo kin lōñliñ, dri ailiñ ro Am, ro rej ber ijin, ke rar lewoj im mōñōñō. 18 O Jeova, Anij an Ebream, an Aisak, im an Israel ro jemem, Kwon drebij men in ñön in drio ilo lōkōm in lemnok ko an buruen ro Am dri ailiñ, im kapojök buruer ñön Kwe; 19 im Kwon lelok ñön Solomon, nejiō, buru e wāppen, bwe en bokake kien ko Am, nan ko Am, nan in kaiñ ko Am, im kōmōn men kein otemjej, kab kalek mweo elap eo I ar kapojök ñön e.

20 Im Devid e ar ba ñön aolepen jar eo, Inem komin kamōñōñōik Jeova ami Anij. Im aolepen jar eo rar kamōñmōñōik Jeova Anij an ro jimair, im rar mōjir kin bōrair, im kabuñ ñön Jeova, im kiñ eo. 21 Im ran eo ilju rar katok kin men in katok ñön Jeova, im lelok katok kijeek ñön Jeova, juōn tausan kau koman, juōn tausan sip koman, im juōn tausan lam, kab jur-tak irak, im elōñ men in katok kin dri Israel otemjej, 22 im rar mōña im irak iman Jeova ilo ran eo, im kanuij mōñōñō.

Im rar kairoij Solomon, nejin Devid, alen ken ka ruo, im kabit e ñön Jeova, bwe en iroi, im Zedok bwe en pris. 23 Inem Solomon e ar jijōt ion tron an Jeova einwöt kiñ, im binej jenkwōn Devid jemen, im e ar jerammōn; im ro dri Israel otemjej rar bokake. 24 Im iroi ro otemjej, im armij re kajur, bareinwöt ro otemjej nejin kiñ Devid, jemen, rar mōke kōtaik ir ñön Solomon, kiñ eo. 25 Im Jeova e ar kanuij koutiejlok Solomon iman aolepen Israel, im E ar lelok ñön e lapen kiñ, elap jen An lelok ñön jabrewöt kiñ mokta jen e ilo Israel.

26 Ak Devid nejin Jesse e ar kiñ ion aolepen Israel. 27 Im ¹ien eo e ar kiñ ion Israel, eñoul yiō: jiljilim-juōn yiō e ar kiñ i Hibron, im jilñoul jilu yiō e ar kiñ i Jerusalem. 28 Im e ar mij ke emōn an lōlap, e obrōk kin ran ko, mweiuk ko, im nebar e: im Solomon, nejin, e ar kiñ im binej jenkwōn. 29 Ak jerbal ko an Devid kiñ eo, ko mokta im ko eliktata, lo, emwij jeje ilo buk in bwebwenato an Samuel, dri lolo eo, im ilo buk in bwebwenato an Netan, dri kanan eo, im ilo buk in bwebwenato an Gad, dri lolo eo, 30 kab aolepen an kiñ im kajur eo an, im ien ko rar itok ion, im ion Israel, im ion ailiñ otemjej in kiñ ro air.

KRONIKEL

1 Im ¹Solomon, nejin Devid, e ka-
jurlok ilo ailiñ eo an, im Jeova,
an Anij, E ar ber iben, im E ar ka-
nuij koutiejlok e. **2** Im Solomon e ar
konono ñon aolepen Israel, ñon ka-
pen an tausan ko im buki ko, im ñon
ro dri ekajet, im ñon iroi ro otemjej
ilo aolepen Israel, jiðb ro an imõn ro
jimair. **3** Ein drein Solomon im ao-
lepen jar eo iben, rar wõnliñlok ñon
jikin e utiej eo i Gibeon; bwe ijo
imõn kwelok an Anij, eo Moses kori-
jeran Jeova e ar kômõnmõn ilo ene
jemaren. **4** A Devid e ar bõklifitok
dipdip an Anij jen Kiriath-jerim ñon
jikin eo Devid e ar kapoj ñon e: bwe
e ar kajutõk juõn im nuknuk ñon e i
Jerusalem. **5** Bareinwõt lokatok ji-
nibõrõrõ, eo Bizalel nejin Urai, nejin
Hur, e ar kômõne, e ar ber ijo iman
imõn kabere an Jeova: im Solomon im
jar eo rar bukotlok. **6** Im Solomon e
ar wõnliñlok ñon ijo, ñon lokatok ji-
nibõrõrõ eo iman Jeova, eo e ar ber
iturin imõn kwelok eo, im e ar katok
ion kin juõn tausan katok kijeek.

7 Ilo ²boñ eo Anije ar weaktok ñon
Solomon, im ba ñon e, Kwon kajitõk
men õt in lewoj ñon yuk. **8** Im Solo-
mon e ar ba ñon Anij, Kwe Kwar
kwelok tiriamokake elap ñon Devid,
jema, im Kwar kômõn iõ kiñ bwe in
binej jenkwõn. **9** Inem, O Jeova
Anij, Am kalimur ñon Devid, jema,
en bin wõt: bwe Kwar kairoij iõ kiñ
ion juõn ailiñ einwõt bok in löl kin air
lõñ. **10** Kið, Kwon letok ñon iõ me-
letlet im jelalokjen bwe in maroñ in
drioi dreloñ iman ro dri ailiñ in; bwe
wõn e maroñ in ekajete ailiñ in Am,
bwe e kanuij lap? **11** Im Anij e ar
ba ñon Solomon, Bwe men in e ar ber
ilo buruõm, im kwar jab kajitõk mõi-
ni, mweik ko, ak nebar, ak bwe ro
rej kijirät yuk ren mij, im kwar jab

kajitõk mour e aitok; a kwar kajitõk
meletlet im jelalokjen ñon kwe mõi-
ke, bwe kwon maroñ in ekajete ro dri
ailiñ Að, ro emwij Að kairoij yuk
ioir: **12** emwij lewoj meletlet im je-
lalokjen ñon yuk; im I naj lewoj
mõnni im mweik ko, im nebar, ein-
wõt e jañin ber iben kiñ ro mokta jen
kwe: im jamin einwõt iben ro rejlor
yuk. **13** Ein drein Solomon e ar itok
jen jikin e utiej eo ilo Gibeon, jen
imõn kwelok eo, ñon Jerusalem; im
e ar kiñ ion Israel.

14 Im ¹Solomon e ar kokweloktok
jariot ko im ro rej uwe ion ors: im
iben juõn tausan abuki jariot, im joñ-
oul ruo tausan ro rej uwe ion ors, im
e ar likiti ilo jikin kwelok ko an jari-
ot, im iben kiñ eo ilo Jerusalem. **15**
Im kiñ eo e ar kômõn silver im gold
ilo Jerusalem einwõt dreka ko, im
wijki aik e ar kômõn bwe ren einwõt
wijki sikomor rej ilo ene etã, kin air
lõñ. **16** Im ors ko iben Solomon rar
bõkitok jen Ijpt; ro dru wia an kiñ
eo rar bõki ilo bwij ko, jabrewõt
bwij kin juõn wõnan. **17** Im ke rar
añintok im bõktok juõn jariot jen
Ijpt, wõnan jiljino buki sekel in sil-
ver, im wõnan juõn ors jibuki lim-
ñoul: im ein drein ñon kiñ otemjej an
ro dri Het, im kiñ ro an Siria, rar
bõktok kake.

2 Ak ²Solomon e ar lemnok in ka-
lek juõn im ñon etan Jeova, im
juõn im ñon ailiñ eo an. **2** Im Solo-
mon e ar bwini jiljilimjuõnñoul tau-
san armij bwe ren inene, im dru-
alitõkñoul tausan armij dri jekjek ilo tol
ko, im jilu tausan jiljino buki dri lale
ir. **3** ³Im Solomon e ar jilkinlok ñon
Hiram kiñ in Tair, im e ba, Einwõt
am kar kômõn ñon Devid, jema, im
kwar jilkinlok ñon iben, wijki aik ko
in kalek ñon e juõn im bwe en jokwe

iloan, ein drein kwon kōmōn nōn iō. 4 Lo, nā, I nañin kalek juōn im nōn etan Jeova, aō Anij, bwe in lelok nōn E, bwe¹ in tile kaijurjur an spais ko re tōñōl iman mejen, im nōn bred in kalikar ran otemjej, im nōn katok kijeek jiboñ im jota, ilo Sabat ko, im aliñ ko rekāl, im ilo kwojkwoj in ka-iñi ko an Jeova am Anij. Eñin juōn kien in drio nōn Israel. 5 Im mweo ij kalek e, elap wōt; bwe am Anij elap jen anij otemjej. 6 A wōn e maroñ in kalek nōn E juōn im, ke lōñ ko im lōñ in lōñ ko re ban drebij E? Inem wōn nā bwe in kalek nōn E juōn im, elañe jab men in wōt bwe in tile kaijurjur iman? 7 Inem kwon jilkintok nōn iba juōn eman e kabel in jerbale kin gold, im kin silver, im kin jinibōrōrō, im kin māl, im kin eoij, im kilmir, im blu, im jela ekij-kan jekjek jabrewōt wāwen, bwe en ber iben man ro re kabel iba, i Juda im ilo Jerusalem, ro Devid jema e ar loi. 8 Bareinwōt kwon jilkintok nōn iba wijki aik ko, wijki fōr ko, im wijki algum ko, jen Lebanon: bwe I jela ro dri korijerōm re jela jekjek wijki ko i Lebanon. Im, lo, ro dri korijera re naj ber iben ro dri korijerōm, 9 bwe ren kapoj elōñ wijki nōn iō; bwe mweo I naj kalek e, e naj lap im men in bwilōñ. 10 Im, lo, I naj lelok nōn ro dri korijerōm, dri jekjek wijki ko, roñoul tausan joñon wit emwij nowe, im roñoul tausan joñon barli, im roñoul tausan bath in wain, im roñoul tausan bath in oil.

11 Inem Huram, kiñ in Tair, e ar uak kin jeje, im jilkinlok nōn kiñ Solomon, Kin an Jeova yokwe dri aliñ ne An, E ar kairoij yuk kiñ ioir. 12 Bareinwōt Huram e ar ba, Emō-nōnō Jeova, Anij in Israel, Eo e ar kōmōnmōn lōñ im lōl, Eo e ar lelok nōn Devid juōn nejin e meletlet, eo e jelalokjen im lolātāt, eo en kalek juōn im nōn Jeova, im juōn im nōn aliñ eo an. 13 Im kiō, emwij aō jilkinwoj juōn eman e kabel, e jelalokjen, dron Huram, jema, 14 ²nejin juōn kōra ian kōra ro nejin Dan; im jemen dri

Tair, dri mejerik in jerbale gold, im silver, im jinibōrōrō, im māl, im dreka, im wijki ko, im eoij, im blu, im linen kworairik, im kilmir, im bareinwōt jekjek jabrewōt wāwen jeje, im nōn kine jabrewōt ekin; bwe ren najikin iben ro am dri kabel, im iben ro an aō iroi, Devid, jemōm. 15 Inem wit eo im barli, oil eo im wain, im aō iroi e ar konono kake, en jilkinlok nōn iben ro dri korijeran; 16 im kim naj jekjek wijki ko jen Lebanon, einwōt am aikwij: im kim naj bōkwoj, kin tōra in wijki ilo lojit nōn Joppa, im kwe kwo naj bōkliñwoj nōn Jerusalem.

17 Im Solomon e ar bwine ro dri itoitōk otemjej rar ber ilo aolepen ene in Israel, elikin bwini ir kake; im rar lo jibuki limñoul jilu tausan jiljino buki. 18 Im e ar likit jiljilimjuōnñoul tausan iair dri inene, im drualitōkñoul tausan dri jekjek ilo tol ko, im jilu tausan jiljino buki dri lale, bwe ren kejerbal armij rōn.

3 ¹Inem Solomon e ar jino in kalek mweo imōn Jeova i Jerusalem, ilo tol Moraia, ijo Jeova e ar weaktok nōn Devid, jemen, eo e ar kapojōk ilo jikin eo Devid e ar bakajen, ilo jikin drefidrefi an Ornan dri Jibus. 2 Im e ar jino in kalek ilo ran eo ken ka ruo in aliñ eo ken ka ruo, ilo yiō eo ken kemen in an kiñ. 3 Ak ir kein loñtak ko Solomon e ar kabin nōn an kalek mweo imōn Anij. Aitokōn ilo kubit ekar nōn joñon mokta jiljinoñoul kubit, im drilpen roñoul kubit. 4 Im tōñak eo iman mweo, aitokōn ekar nōn drilpen mweo, roñoul kubit, im utiejen jibuki roñoul; im e ar naki-lin ilolan kin gold erreo. 5 Im e ar binej tuilōñ ilo mweo elap kin wijki fōr, im nakilin kin gold erreo, im e ar kōmōn ion, wijki pam im to ninir ko. 6 Im e ar kalitlit mweo kin dreka raurōk, nōn aibuuij; im gold eo jen Parveim. 7 E ar bareinwōt nakilin mweo, alal ko, biten kejem ko, im turin mweo, kab aor ko an kin gold, im e ar bukwe kerub ko ion turin ko.

¹ Ex. 30. 7. ² 1 Kiñ 7. 14.

¹ 1 Kiñ 6. 1.

8 Im e ar kōmōn mweo e kwojarjar otem kwojarjar: aitokōn ekar nōn drilpen mweo, roñoul kubit, im drilpen roñoul kubit: im e ar nakilin kin gold emōn, driten jiljino buki talent. 9 Im paun in drila ko limfoul sekel gold. Im e ar nakilin bo ko ilōñ kin gold.

10 Im iloan jikin kwojarjar otem kwojarjar e ar kōmōn ruo kerub wāwen men in e: im rar kalibubuk kin gold. 11 Im pein kākī ko pein kerub ko aitokōn roñoul kubit: pein juōn kerub lailim kubit, im e ar tōbar turin mweo: pein eo juōn bareinwōt lailim kubit, im e koba iben pein kerub eo juōn. 12 Im pein kerub eo juōn lailim kubit im ej tōbar turin mweo; im pein eo juōn bareinwōt lailim kubit im koba iben pein kerub eo juōn. 13 Pein kākī ko pein kerub kein erlokin roñoul kubit: im rar jutōk kin neir, im rar jujellok nōn mweo. 14 Im e ar kōmōnmōn rōñel nuknuk eo jen blu, im eoij, im kilmir, im linen kworairik, im e ar tiltil kerub ko ion.

15 Bareinwōt e ar kōmōnmōn iman mweo ruo jur utiejir jilfoul lailim kubit, im eoñlok ion jabrewōt iair lailim kubit. 16 Im e ar kōmōnmōn toninir ko iloan jikin kwojarjar eo, im e ar likiti ion jābōn jur ko: im e ar kōmōnmōn jibuki pomgranet, im likiti ion toninir ko. 17 Im e ar kajutōk jur ko iman tempel eo, juōn i anbijmaroñ im juōn i anmiñ; im e ar natan eo i anbijmaroñ Jekin, im eo i anmiñ Beaz.

4 Bar juōn, ¹e ar kōmōnmōn juōn lokatok jinibōrōrō, roñoul kubit aitokōn im roñoul kubit drilpen, im joñoul kubit utiejen. 2 Bareinwōt, e ar kōmōnmōn lomalo unlok eo, joñoul kubit jen tōreran nōn tōreran, belakin e rolul; im utiejen lailim kubit: im juōn an to jilfoul kubit e ar kabol e. 3 Im iomin, wāwen ox ko, rar kabole, nōn joñoul kubit, im kabole i belakin. Ox ko ilo ruo lajrōk, im ar kaunloki ke ar kaunlok lomalo eo. 4 E ar jutōk ion joñoul ruo ox ko, jilu

rar reniñalok, jilu reitolok, jilu reiruñalok, im jilu rar reitalok; im lomalo e ar ber ioir, im lokair otemjej rar ber iolap. 5 Im mijilin, drilpen juōn pā; im tōreran einwōt tōreran kōp, einwōt ebul in kiōp: e ar kōke jilu tausand bath. 6 Bareinwōt e ar kōmōnmōn joñoul lever, im e ar likiti lailim i anbijmaroñ, im lailim i anmiñ, nōn kwoolkwol iloan; men ko an katok kijeek rar kwoli ilo air: a lomalo eo bwe pris ro ren tutu iloan.

7 Im e ar kōmōnmōn joñoul jikin lamp gold, ekar nōn kien eo: im e ar likiti iloan tempel eo, lailim i anbijmaroñ, im lailim i anmiñ. 8 Bareinwōt e ar kōmōnmōn joñoul tebel, im likiti ir iloan tempel eo, lailim iair i anbijmaroñ, im lailim i anmiñ. Im e ar kōmōnmōn jibuki besōn gold. 9 Bar juōn, e ar kōmōnmōn worwor an pris ro, im worwor eo elap, im aor ko nōn worwor eo, im e ar nakilin aor ko kin jinibōrōrō. 10 Im e ar likiti lomalo eo i anbijmaroñ in mweo i rear, nōn rōk. 11 Im Huram e ar kōmōnmōn pot ko, im sovel ko, im besōn ko.

Ein drein Huram e ar kajemlok jerbal eo e ar kōmōne nōn kiñ Solomon iloan mweo imōn Anij: 12 jur ko ruo, im jābi ko, im eoñlok ko ruo ion jur ko, im ok ko ruo nōn kalibubu jābi ko ruo an eoñlok ko rar iman jur ko, 13 im ābuki pomgranet nōn ok ko ruo; ruo lajrōk in pomgranet nōn jabrewōt ok, bwe ren kalibubu jābi ko ruo an eoñlok ko an jur ko. 14 Im e ar bareinwōt kōmōnmōn loñtak ko, im e ar kōmōnmōn lever ion loñtak ko: 15 juōn lomalo, im ox ko joñoul ruo iomin. 16 Pot ko bareinwōt, im sovel ko, im kāj ko nōn kōniek, im jābi otemjej an, Huram, jemen, e ar kōmōnmōn nōn kiñ Solomon nōn imōn Jeova jen jinibor e jātōltil. 17 Ilo enen Jordan jebān wōt juōn, kiñ eo e ar kaunloki, ilo ene kle ikotan Sōkkot im Zerida. 18 Ein drein Solomon e ar kōmōnmōn jābi kein im re kanuij lōñ: bwe rar jabbukot erroñ jinibōrōrō eo.

19 Im Solomon e ar kōmōnmōn

jābi otemjej iloan mweo imōn Anij, im bareinwōt lokatok gold eo, im tebel ko bred in kalikar e ar ber ion. 20 Im jikin lamp ko kab lamp ko air, bwe ren urur ekar nōn kien iman jikin kwojarjar otem kwojarjar, jen gold erreo: 21 im inōk ko, im lamp ko, im jābōnpi ko, jen gold, im gold in e wāppen: 22 im ken jojen melle ko, im besōn ko, im jibun ko, im jābi kijeek ko, jen gold erreo. Im kin kejem an mweo, aor ko iloan nōn jikin kwojarjar otem kwojarjar, im aor ko in mweo, eñin an tempel eo, jen gold.

5 Ein drein emwij aolepen jermal ko Solomon e ar kōmōnmōne nōn mweo imōn Jeova. Im Solomon e ar kadreloñtok men ko Devid, jemen, e kar aje, silver eo, im gold eo, im jābi otemjej, in likiti ilo jikin mweiuk ko an imōn Anij.

2¹ Inem Solomon e ar kokweloktok ridto ro in Israel, im jiōb ro otemjej an bwij ko, iroi ro in mo ko imōn ro jimair an ro nejin Israel, nōn Jerusalem, im bōkliñtok dipdip in kalimur an Jeova jen jikin kwelok an Devid, eñin Zaion. 3 Im ro dri Israel otemjej rar kweloktok nōn iben kiñ eo ilo kwojkwoj eo ej ilo aliñ eo ken ka jiljilimjuōn. 4 Im ridto ro otemjej in Israel rar itok: im ro dri Livai rar kwotōke dipdip eo; 5 im rar bōkliñtok dipdip eo im imōn kwelok nuknuk eo, im jābi otemjej ro kwojarjar rar ber iloan im nuknuk eo; men kein pris ro, dri Livai, rar bōkliñtok. 6 Im kiñ Solomon im aolepen jar eo an Israel, ro rar kweloktok nōn iben, rar ber iman dipdip eo, im katok kin sip ko im ox ko, re jab maroñ in bwini ak jela orair kin air lōñ. 7 Im pris ro rar kadreloñtok dipdip in kalimur an Jeova nōn jikin, nōn jikin kwojarjar otem kwojarjar, aet iomin pā ko pein kerub ko. 8 Bwe kerub ko rar erlokwi peir ilōñin jikin dipdip eo, im kerub ko rar kalibubu dipdip eo im ine ko an ilōñin. 9 Im ine ko re aitok, inem jābōn ko jābōn ine ko rar alikar jen dipdip eo iman jikin eo e kwo-

jarjar otem kwojarjar: a rar jab loi inabij: im ej ber ie nōn ranin. 10 Ejelok men iloan dipdip eo, a tebel ko ruo wōt, ko Moses e ar likiti na i Horeb, ke Jeova e ar kōmōn juōn kalimur iben ro nejin Israel, ke rar drioijtok jen Ijpt.

11 Im ein drein, ke pris ro rar drioijtok jen jikin e kwojarjar, (bwe pris otemjej rar ber ijo re kar mōke kokwojarjar ir, im re jab kejbārok lajrōk ko air, 12 bareinwōt ro dri Livai ro dri al, ir otemjej, Esap, Himan, Jedutun, im ro nejir man in ro jeir im jātir, emwij kōnōk linen kworairik, im ibeir simbal ko im salteri ko im arp ko, rar jutōk iturin lokatok eo tuirear, im ibeir jibuki roñoul pris rej uk jilil ko); 13 im ein drein ke ro dri jilil im ro dri al rar einwōt juōn im kōmōn juōn wōt ainiken in roñjake ilo nebar im kamolol Jeova: im ke rar koutiej ainikeir iben jilil ko im simbal ko im ken kajōñjōñ ko, im nebar Jeova, im ba, Bwe Ej emōn; bwe tiriamokake eo An ej ber nōn in drio: ien eo e obrōk mweo kin juōn kōro, aet iman Jeova, 14 einwōt bwe pris ro re ban jutōk im korijer kin kōro eo: bwe aibujuij an Jeova e ar kobrōk imōn Anij.

6 Inem Solomon e ar ba, Emwij an Jeova ba bwe E naj jokwe iloan marok jiliñliñ. 2 A ña I ar kalek nōn Kwe juōn imōn jokwe, im jikin berwōt nōn in drio. 3 Im kiñ eo e ar oktōk turin mejen, im kejerammōn aolepen jar an Israel: im aolepen jar an Israel rar jutōk.

4 Im e ar ba, Emōnōnō Jeova Anij in Israel, Eo e ar konono kin loñin nōn Devid Jema, im kin pein E ar kajejite, im E ba, 5 Elikin ran eo ke I ar kadrioijtok dri aliñ ro Aō jen ene in Ijpt, I ar kålet ejelok jikin kwelok jen bwij otemjej bwijin Israel in kalek juōn im iloan, bwe eta en ber ie; im I ar kålet ejelok eman bwe en iroi ion dri aliñ ro Aō, Israel: 6 a I ar kålet Jerusalem, bwe eta en ber ie: im I ar kålet Devid bwe en ion dri aliñ ro Aō, Israel. 7 A e ar ber ilo buruen Devid, jema, bwe en kalek

juōn im fñōn etan Jeova, Anij in Israel. 8 A Jeova e ar ba fñōn Devid, jema, Kin an kar ber ilo buruōm bwe kwon kalek juōn im fñōn eta, emōn wōt am kōmōn bwe men in e ar ber ilo buruōm: 9 Ijoke, kwo jamin kalek mweo; a nejōm man, eo e naj walok jen ibim, e naj kalek mweo fñōn eta. 10 Im Jeova e ar kamol nan eo E ar ba kake; bwe fña I ar jutōk im binej jenkwōn Devid, jema, im jijōt ilo tron in Israel, einwōt Jeova e ar kalimur, im I ar kalek mweo fñōn etan Jeova, Anij in Israel. 11 Im I ar likit dipdip eo ie, im iloan, bujen an Jeova, eo E ar kōmōn iben ro nejn in Israel.

12 Im e ar jutōk iman lokatok an Jeova iman mejen aolepen jar an Israel, im e ar erlokwe pein, 13 (bwe Solomon e kar kōmōnmōn juōn jikin jutōk jinibōrōrō aitokōn lailim kubit, im drilpen lailim kubit, im utiejen jilu kubit, im e kar likit e iolapin worwor eo; im e ar jutōk ion, im e ar bukwelōlō iman aolepen jar an Israel, im erlokwe pein fñōn lōñ); 14 im e ar ba, O Jeova, Anij an Israel, ejelok Anij einwōt Kwe, ilo lōñ, ak ilo lōl, Eo ej kejbārok bujen im tiriamokake iben ro dri korijerōm, ro rej etetal imam kin aolepen burueir; 15 Kweo kwar kejbārok iben dri korijerōm Devid, jema, men eo Kwar kalimur fñōn e: aet, Kwar konono kin loñōm, im Kwar kajejit e kin peōm, einwōt ranin. 16 Inem, O Jeova, Anij in Israel, Kwon kejbārok iben dri korijerōm Devid, jema, men eo Kwar kalimur fñōn e, im ba, E jamin likjōp jen kwe juōn eman iman meja bwe en jijōt ion tron in Israel, elañe men in wōt, ro nejōm ren lale air ial, in etetal ilo kien eo Aō einwōt kwe kwar etal imaō. 17 Inem, O Jeova, Anij in Israel, en mol wōt am in nan, eo Kwar konono kake fñōn dri korijerōm Devid.

18 A Anij e naj jokwe wōt iben armij ion lōl ke? Lo, lōñ ko im lōñ in lōñ ko re ban drebij yuk; e nañin drilklok mwin emwij aō kalek e! 19 Ijoke, Kwon roñjake jar an dri kori-

jerōm, im akwelap eo an, O Jeova, aō Anij, im eoroñ lamij im jar an dri korijerōm, ij jar kake imam; 20 bwe mejōm ren bellok fñōn mwin ran im boñ, fñōn jikin eo Kwar ba kake Kwo naj likit etōm ie; bwe Kwon eoroñ jar eo an dri korijerōm e naj jar fñōn jikin in. 21 Im Kwon eoroñ akwelap ko an dri korijerōm, im an Israel, dri ailiñ eo Am, fñe rej jar fñōn jikin in: aet, Kwon roñjake jen jikōm, jen lōñ ko; im fñe Kwoj roñjake, Kwon jolok bwir.

22 Elañe juōn eman ej bwir nae dri turin, im rej likit juōn kanōjni ion, im ej item kanōjni iman lokatok eo Am ilo mwin; 23 inem Kwon roñjake jen lōñ ko, im kōmōne, im eka-jeti ro dri korijerōm, im nawōnan ro dri nana, im bōktok ial eo an ion bōran; im kowānik eo dri jime, im lelok fñōn e ekar fñōn wānik eo an.

24 Im elañe e jorran ro drom Israel iben ro rej kijirāte ir, kin air bwir nae Yuk, im rej oktōk im kwalok etōm, im jar im akwelap imam ilo mwin; 25 inem Kwon roñjake jen lōñ ko, im jolok bwir an ro drom Israel, im bar āñintok ir ilo eneo Kwar lelok fñōn ir im fñōn ro jimair.

26 Ñe e kilik lōñ ko, im ejelok wut, kin air bwir nae Yuk; elañe rej jar fñōn jikin in, im kwalok etōm, im oktōk jen air bwir, fñe Kwoj kejjorran ir: 27 inem Kwon roñjake ilo lōñ ko, im jolok bwir eo an ro dri korijerōm, im an ro drom Israel, fñe Kwoj katakin ir ial eo emōn, ren etetal iloan; im Kwon jilkinlok wut ion eneo Am, eo Kwar lelok fñōn ro drom bwe en air jolit.

28 Elañe eor fñita ilo eneo, elañe juōn mij e nana, elañe eor kamenok-nok ak li, lokōs ak katerpilar; elañe ro dri kijirāte ir rej nitbwil ir ilo enen jikin kwelok ko air; jabrewōt men in kañtan ak jabrewōt nañinmij ej ie; 29 jabrewōt jar im akwelap jabrewōt armij ej kōmōne, ak ro drom Israel otemjej, ro jabrewōt iair e naj jela iñtan eo an im buromōj eo an, im e naj erlokwe pein fñōn mwin; 30 inem Kwon roñjake jen lōñ ko,

jikōm, in Kwon jolok bwir, im lelok ñōn jabrewōt armij ekar ñōn ial otemjej an, im buruen Kwo jela kake; (bwe Kwe, Kwe wōt Kwo jela buru ko buruen ro nejin armij); 31 bwe ren mijōk Yuk, im etetal ilo ial ko Am, iomin ien eo ñe rej mour ilo eneo Kwar lelok ñōn ro jemem.

32 Bar juōn, kin eo drua maijet, eo e jab ian ro drom Israel, ñe ej itok jen juōn ene etolok kin etōm elap, im kin peōm e kajur, im kin peōm erlokwe; ñe rej jujeltok ñōn mwīn im jar; 33 inem Kwon roñjake jen lōñ ko, jen jikōm, im kōmōn-ekar ñōn aolepen men ko drua maijet eo ej kajitōk ibōm kake; bwe ro dri aliñ otemjej ilōl ren jela etōm, im mijōk Yuk, einwōt ro drom Israel, im bwe ren jela kin air naetan mwīn, emwij aō kalek e, ilo etōm.

34 Elañe ro drom rej drioijlen tōrinaek ro dri kijirāte ir, ilo jabrewōt ial Kwo naj jilkinlok ir ie, im rej jujeltok im jar ñōn jikin kwelok in Kwar kålet e, im ñōn mwīn I ar kalek e ñōn etōm; 35 inem Kwon roñjake jen lōñ ko, air jar im air akwelap, im jibōñ ir wōt, im jolok bwir jen ro drom rar jerawiwi nae Yuk.

36 Elañe rar jerawiwi nae Yuk, (bwe ejelok juōn armij e jab jerawiwi), im Kwoj illu ibeir, im lelok ir ñōn ro rej kijirāte ir, einwōt bwe ren bōklok ir, dri jebokwe ñōn juōn aliñ etolok ak ebak; 37 ijoke, elañe ej ieñaktok air ilo ene eo rej dri jebokwe, im oktōk, im akwelap ibōm ilonen air jebokwe, im ba, Kim ar jerawiwi, kim ar ankeke im jerbāl ilo jab jime; 38 elañe rej jeblakwoj kin aolepen burueir im aolepen air ilonen air jebokwe, ijo rar bōklok ir dri jebokwe, im jar im jujeltok ñōn eneo Kwar lelok ñōn ro jimair, im jikin kwelok eo Kwar kålet e, im ñōn mweo, eo I ar kalek ñōn etōm; 39 inem Kwon roñjake jen lōñ, jen ijo Kwoj jokwe, air jar im akwelap, im kowānik ir, im jeorlok bwir ko an ro drom ro rar jerawiwi nae Yuk.

40 Kiō, O aō Anij, ij akwelap ñōn Yuk, mejōm ren bellok, im lojiliñōm

ren eoroñ jar eo re naj jare ilo jikin in. 41 Inem kiō, O Jeova Anij, Kwon jerkak ñōn iloan jikin kakiye eo Am, Kwe im dipdip eo an Am kajur: pris ro Am, O Jeova Anij, ren kōnōk men in lomor, im ro Am ro kwojarjar ren lōñliñ ilo emōn; 42 O Jeova Anij, Kwon jab kajeor turin mejen eo Kwar kabit e: Kwon kememej tiriamokake ko Am ñōn Devid dri korijerōm.

7 A ke Solomon e ar kamwijlok jar eo an, ¹kijeeke e ar wōnlōltok jen lōñ, im tile katok kijeek im men in katok ko: im aibujbuij an Jeova ej kobrōk mweo. 2 Im pris ro re jab maroñ in dreloñ ilo mweo imōn Jeova, bwe aibujuij an Jeova e ar kobrōk mweo imōn Jeova. 3 Im ro nejin Israel otemjej rar kalimjeke ke kijeek eo e ar wōnlōltok, im aibujuij an Jeova e ar ber ion mweo; im rar barikrik kin turin mejeir ñōn lōl ion eran loan worwor, im rar kabuñ, im kamolol Jeova, im re ba, Bwe Ej emōn; bwe tiriamokake eo An ej ber ñōn in drio.

4 ²Inem kiñ eo im armij otemjej rar katok iman Jeova. 5 Im kiñ Solomon e ar katok men in katok roñoul ruo tausan ox, im jibuki roñoul tausan sip. Ein drein kiñ eo im armij otemjej rar lelok mweo imōn Anij. 6 Im pris ro rar jutōk ekar ñōn jerbāl ko air; bareinwōt ro dri Livai im ibeir ken kajōñjōñ an Jeova, ko Devid kiñ eo e kar kōmōnmōni in kamolol Jeova kake (bwe An tiriamokake ej ber ñōn in drio), ke Devid e ar nebar kin air jibōñ e: im pris ro rar jilil imair: im aolepen Israel rar jutōk. 7 Bar juōn, Solomon e ar kwojarjar lukwōn worwor eo iman mweo imōn Jeova; bwe ijo e ar lelok katok kijeek ko, im kioeo an katok ainemōn ko, kin ke lokatok jinibōrōrō eo Solomon e ar kōmōnmōne e jab maroñ in bōk katok kijeek eo im katok flauo, im kioeo eo.

8 Ein drein Solomon e ar kōmōn kwojkwoj ien eo iomin jiljilimjuōn ran, im iben dri Israel otemjej, juōn

jar e kanuij lap, jen Hemat ñon riverik in Ijpt. 9 Im ilo ran eo ken ka dualitök rar kômôn juôn ran in kwe-lok : bwe rar kejbârok kwojkwoj in lelok lokatok eo iomin jiljilimjuôn ran, im kwojkwoj eo jiljilimjuôn ran. 10 Im ilo ran eo ken ka roñoul jilu in aliñ ken ka jiljilimjuôn, e ar jilkinlok armij ro ñon im nuknuk ko air, re mōnōnō im lōñliñ ilo buruer kin emōn eo Jeova e ar kwalok ñon Devid, im ñon Solomon, im ñon Israel ro dri aliñ eo An.

11 Ein drein Solomon e ar kamwijlok imōn Jeova, im imōn kiñ eo: im men ko otemjej rar dreloñ ilo buruen Solomon bwe en kômōnmōne ilo imōn Jeova, im ilo mweo imōn, e ar jeram-mōn in kômōni. 12 Im Jeova e ar weaktok ñon Solomon ilo boñ, im ba ñon e, Emwij Aō eoroñ am jar, im I ar kâlet jikin in ñon Ña juôn imōn katok. 13 Elañe Ij kili lōñ ko inem ejelok wut, a elañe Ij jiroñ lokōs eo bwe en kokkure eneo, ak elañe Ij jilkinlok nañinmij e nana ñon ro droō; 14 elañe ro droō, naetair kin eta, rej kōtaik ir mōke, im jar, im kabukot turin meja, im illok jen ial ko air re nana; inem I naj roñjake jen lōñ, im I naj jolok air bwir, im I naj kaejmour eneo. 15 Kiō meja re naj bellok, im lojiliñiō re naj jujellok ñon jar eo rej jare ilo jikin in. 16 Bwe kiō emwij Aō kâlet im kokwojarjar mwin bwe eta en ber ie ñon in drio: im meja im buruō re naj ber ijo ien otemjej. 17 Im kin kwe, elañe kwo naj etetal imaō einwōt Devid e ar etetal, im kômōn men otemjej einwōt I ar jiroñ yuk kake, im kwo naj bokake kien ko Aō im nan in kaiñi ko Aō; 18 inem I naj kabin tron eo an ailiñ eo am, einwōt I ar kômōn bujen iben Devid, jemōm, im I ar ba, e jamin likjōp jen kwe juôn eman in iroi ion Israel.

19 A elañe kom naj illok, im likit kien ko Aō im nan in kaiñi ko Aō emwij Aō likiti imami, im kom naj ilen korijer ñon anij ro jet, im kabuñ ñon ir; 20 inem I naj kōtep ir jen eneo I ar lelok ñon ir; im mwin I

ar kokwojarjar e ñon eta, I naj jolok e jen iman meja, im I naj kômōne juôn jabōn kennan im nan in jekron iben dri aliñ otemjej. 21 Im mwin, eo e kanuij utiej, jabrewōt eo ej kijone e naj bwilōñ kake, im e naj ba, Etke ein drein an Jeova kômōn ñon ene in, im ñon mwin? 22 Im re naj uak, Kin ke rar illok jen Jeova, Anij an ro jimair, Eo e ar kadrioiptok ir jen ene Ijpt, im rar bōk anij ro jet, im kabuñ ñon ir, im jermal ñon ir: kin men in E ar bōktok aolepen jorran in ioir.

8 Im i¹ jemlokōn roñoul yiō, iloir Solomon e ar kalek mweo imōn Jeova, im mweo imōn, 2 jikin kwelok ko Hiram e ar lelok ñon Solomon, Solomon e ar kaleki, im kômōn bwe ro nejin Israel ren jokwe ie.

3 Im Solomon e ar ilok ñon Hemat-zoba, im bōk anjo ion. 4 Im e ar kalek Tadmor ilo ene jemaren, im jikin kwelok mweiuk otemjej, e ar kaleki i Hemat. 5 Bareinwōt e ar kalek Bet-horon eo ilōñ, im Bet-horon eo etā, jikin kwelok ko re kajur, eor air worwor, im aor ko, im alal ko; 6 im Bealat, im jikin kwelok mweiuk otemjej an Solomon, im jikin kwelok otemjej ñon jariat ko an, im jikin kwelok otemjej ñon ro dri uwe ion ors, im jikin otemjej Solomon e kōnan kaleki im mōnōnō kake ilo Jerusalem, im i Lebanon, im ilo aolepen aliñ eo an.

7 Kin armij otemjej rar berwōt ian ro dri Het, im ro dri Amor, im ro dri Periz, im ro dri Hiv, im ro dri Jibus, ro re jab ian ro dri Israel, 8 ian ro nejir rar ber elikir ilo eneo, ro nejin Israel rar jab mōn ir, iair Solomon e ar kômōn juôn jaran ro dri korijeran ñon ranin. 9 A ian ro nejin Israel Solomon e ar kômōn ejelok dri korijer ñon jermal eo an: a rar dri tōrinae im iroi ion kapen ro an, im iroi ro ion jariat ko an, im dri uwe ion ors. 10 Im rein ro dri kabwijrōk re utiej an kiñ Solomon, rubuki limñoul, rar iroi ion armij rōn.

11 Im Solomon e ar añinliñtok kōra

eo nejin Pero jen jikin kwelok an Devid nōn mweo emwij an kalek nōn e; bwe e ar ba, Lio beliō e jamin jokwe ilo imōn Devid, kiñ in Israel, bwe e kwojarjar jikin kwelok ko dipdip an Jeova e ar ilok nōni.

12 Inem Solomon e ar lelok nōn Jeova katok kijeek ko, ilo lokatok eo e ar kalek iman portiko eo, 13 einwōt kien jabrewōt ran, ekar nōn nan ko an Moses, ilo Sabat ko, im ilo aliñ ko rekāl, im ilo kwojkwoj in jiroñ ko, 1 jilu alen ilo juōn yiō, aet kwojkwoj in bred e jab uwe, im kwojkwoj in wik ko, im ilo kwojkwoj in imōn kabere ko.

14 Im e ar likit ekar nōn kien Devid, jemen, lajrōk ko in pris ro nōn air korijer, im dri Livai nōn air jerbal in nebar, im in korijer iman pris ro, einwot kien jabrewōt ran e ar jiroñ; ro dri lale kejem ko bareinwōt, ilo jabrewōt kejem ilo lajrōk ko air: bwe ein drein Devid, armij dron Anij e ar jiroñ. 15 Im rar jab illok jen kien kiñ eo nōn pris ro im ro dri Livai kin jabrewōt men, ak kin jabrewōt mweiuik.

16 Ak aolepen jerbal ko an Solomon, ar kapoji nōn ran in loñtōn mweo imōn Jeova, im mae ien kamwijloke. Ein drein ar kajemlok air kalek imōn Jeova.

17 Inem Solomon e ar ilok nōn Izion-giber, im nōn Elot i barijit ilo ene Idom. 18 Im Huram e ar jilkinlok nōn iben kiñ kin pein ro dri korijeran, wa ko, im ro dri korijer rar jela meto; im rar itok iben ro dri korijeran Solomon, nōn Ofir, im bōktok jen e jibuki limñoul talent gold, im bōktok nōn iben kiñ Solomon.

9 Im 2 ke liroi in Shiba e ar roñjake buñbuñ an Solomon, e ar iten melejoñ Solomon kin kajitōk ko re bin i Jerusalem, im iben elōñ armij, im kamel ko rar inek spais ko, im elōñ gold, im dreka re aurōk; im ke e mottok nōn iben Solomon, e ar kōmao iben kin men ko otemjej ilo buruen. 2 Im Solomon e ar kennanek e nan in kajitōk otemjej an; ejelok men eo e

nojōk jen Solomon im e ar jab kennanek e. 3 Im ke liroi in Shiba e ar lo meletlet an Solomon, im mweo imōn emwij an kalek e, 4 im kijen ilo tebel eo an, im an ro dri korijeran jijōt, im wāwen an ro dri kabwijrōk jerbal nōn e, im nuknuk ko air, ro dri ititōk an bareinwōt, im nuknuk ko air, im ialliñlok e ar wōñliñlok kake nōn imōn Jeova: e nañin lokjenan. 5 Im e ar ba nōn kiñ eo, E ar juōn nan emol eo I ar roñjake ilo eneo aō kin kōmōn ko am, im kin am meletlet. 6 Ijoke I ar jab tōmak air in nan, mae ien aō iten loe; im lo, ar jab kennanek iō jibilkwōn lapen am meletlet; kweo kwoj utiej jen buñbuñ eo I ar roñjake. 7 Re mōnōnō armij ro drom, im re mōnōnō rein ro dri korijerōm, ro rej jutōk imam ien otemjej, im roñjake am meletlet. 8 E mōnōnō Jeova am Anij, Eo e ar yokwe yuk im kajijōt yuk ion tron eo An, bwe kwon kiñ nōn Jeova am Anij: kin ke am Anij ej yokwe Israel, in kabin ir nōn in drio, inem E ar kairoij yuk kiñ ioir, bwe kwon kōmōn wānik im jime.

9 Im e ar lelok nōn kiñ eo jibuki roñoul talent gold, im elōñ spais, in dreka re aurōk: im ejelok bar spais einwōt ko liroi in Shiba e ar lelok nōn kiñ Solomon. 10 Im bareinwōt ro dri korijeran Huram, im ro dri korijeran Solomon, ro rar ektōktok jen Ofir, rar ektōktok wijki algum ko, im dreka re aurōk. 11 Im kiñ eo e ar kōmōnmōn jen wijki algum ko, ken uwe ko nōn imōn Jeova, im nōn mweo imōn kiñ, im arp ko im salteri ko nōn ro dri al: im rar lo ejelok einwōt mokta ilo ene Juda. 12 Im kiñ Solomon e ar lelok nōn liroi in Shiba men ko otemjej ej kōnake, jabrewōt eo e ar kajitōk kake, eor jen men ko e ar bōktok nōn kiñ eo. Ein drein e oktōk, im ilok nōn eneo an, e im ro dri korijeran.

13 Ak 1 erron gold e ar itok nōn iben Solomon ilo juōn yiō, jilu buki jiljinoñoul jiljino talent gold, 14 eor jen eo ro dru wia rar bōktok: im kiñ

otemjej in Arebia im iroiĵ rōn in eneo rar bōktok gold im silver nōn Solomon. 15 Im kiñ Solomon e ar kōmōnmōn rubuki ken tōrak jen gold nowe: jiljino shekel in gold nowe ilo juōn ken tōrak. 16 Im e ar kōmōnmōn jilu buki likipijñōk jen gold nowe; jilu buki shekel gold ilo juōn likipijñōk: im kiñ eo e ar likiti ilo imōn wijki in Lebanon. 17 Bareinwēt kiñ eo e ar kōmōn juōn tron elap jen aivori, im e ar nakilin kin gold erre. 18 Im jiljino jekairu ken uwe ilo tron eo, im juōn eran ne jen gold, emwij kabin e nōn tron eo, im jikin pā ko ilo turin ko iturin jikin jijōt, im ruo laion rej jutōk ebak pā ko. 19 Im joñoul ruo laion rej jutōk ijen im ijen, ilo jekairu ko jiljino: ejelok bar juōn wāwen ar kōmōnmōne einwōt ilo jabrewōt ailīñ. 20 Im jābi in irak otemjej an Solomon jen gold, im jābi otemjej in mweo imōn wijki ko jen Lebanon, gold erre; rej lemnok ejelok tokjen silver ilo ran ko an Solomon. 21 Bwe iben Solomon eor wa ko rar ilok nōn Tarshish, im iloir ro dri koriĵeran Hura: juōn alen ilo jilu yiō wa ko wan Tarshish rar itok, im ektōktok gold im silver, aivori, im kiru ep ko, im bao pikok ko.

22 Ein drein kiñ Solomon e ar mweie im meletlet jen kiñ ro otemjej ilo lōl. 23 Im kiñ ro otemjej an lōl rar bukot mejen Solomon in roñjake meletlet eo an, eo Anij e ar likit ilo buruen. 24 Im jabrewōt iair e ar bōktok owōj eo an, jābi silver ko im jābi gold ko, im nuknuk ko, im ken tōrak in tōrinae, im spais ko, ors ko, mul ko, jet ilo jabrewōt yiō. 25 Im an Solomon emen tausan rum nōn ors ko im jariat ko, im roñoul tausan dri uwe ion ors e ar likit ir ilo jikin kwelok ko an jariat im iben kiñ eo i Jerusalem. 26 Im e ar iroiĵ ion kiñ ro otemjej jen River eo nōn enen ro dri Pilistia, im nōn tōreren Ijĵpt. 27 Im kiñ eo e ar kōmōn bwe silver ilo Jerusalem en einwōt dreka ko, im e ar kōmōn bwe wijki aik rej einwōt wijki sikomor rej ilo ene etā, kin air lōñ. 28 Im rar bōktok ors

ko nōn Solomon jen Ijĵpt, im jen ene otemjej.

29 A ¹kōmōn ko jet an Solomon, ko mokta im eliktata, ar jab jeje ilo bwebwenato an Netan dri kanan, im ilo nan in drikanij an Ehaija dri Shailo, im ilo vison ko an Iddo dri lolo kin Jeroboam neĵin Nibat ke? 30 Im Solomon e ar kiñ ilo Jerusalem ion aolepen Israel iomin eñoul yiō. 31 Im Solomon e ar kiki iben ro ĵiman, im rar kalibwin e ilo jikin kwelok an Devid, jemen: im Rihoboam e ar kiñ im binej jenkwōn.

10 Im ²Rihoboam e ar ilok nōn Shikem; bwe ro dri Israel otemjej rar itok nōn Shikem in kōmōne kiñ. 2 Im ein drein ke Jeroboam, neĵin Nibat, e ar roñjake, (bwe e ar ber ilo Ijĵpt, ijo e ar ko nōn e jen mejen kiñ Solomon), inem Jeroboam e ar jeblaktok jen Ijĵpt. 3 Im rar jiliklok im kirtok e: im Jeroboam kab dri Israel otemjej rar itok, im rar konono nōn Rihoboam, im ba, 4 Jemōm e ar kōmōn bwe am inek en kanuij erro: kin men in kwe kwon kōmōn bwe koriĵer e nana an jemōm im inek eo an e erro e ar likit iom en meralok, inem kim naj koriĵerōm. 5 Im e ar ba nōn ir, Komin bar itok nōn iba elikin jilu ran. Im armij ro rar ilok.

6 Im kiñ Rihoboam e ar bebe iben ridto rōn, ro rar jutōk iman Solomon, jemen, ke e ar mour, im e ba, Bebe ōt komij kwalok nōn iō bwe in lelok nan in uak nōn armij rein? 7 Im rar konono nōn e im ba, Elañe kwo joij nōn armij rein, im kabuñburueir, im konono nan ko remōn nōn ir, inem re naj dri koriĵerōm nōn in drio. 8 A e ar jolok bebe an ridto rōn, eo rar kwalok nōn e, im e ar bebe iben likao, ro re kar ridtolok iben, ro rar jutōk iman. 9 Im e ar ba nōn ir, Bebe ōt eo komij kwalok e, bwe jen lelok nan in uak nōn armij rein, ro rar konono nōn iō, im ba, Kwon kōmōn bwe inek eo jemōm e ar likit iom en merālok? 10 Im likao ro, ro rar ridtolok iben rar konono nōn e im ba, Ein drein

kwon konono ñōn armij ro rar konono ñōn yuk, im re ba, Jemōm e ar kōmōn bwe inek eo am en erro, a kwe kwon kōmōn bwe en meralok ñōn kim: ein drein kwon ba ñōn ir, Arririk in peiō e naj killip jen ibin jema. 11 Im kiō, ke jema e ar likit iomi juōn inek e erro, I naj kobaik ñōn inek ne ami: jema e ar dreñlokwe kom kin ken dreñdreñ ko, a I naj dreñlokwe kom kin marebep ko.

12 Ein drein Jeroboam im armij otemjej rar itok ñōn iben Rihoboam ilo ran eo ken ka jilu, einwōt kiñ eo e ar jiroñ ir, im e ba, Komin bar itok ñōn iba ilo ran eo ken ka jilu. 13 Im kiñ e ar uak ir kin nan re bin; im kiñ Rihoboam e ar jolok bebe an ridto rōn, 14 im e ar ba ñōn ir, einwōt bebe eo an likao rōn, im e ba, Jema e ar kōmōn bwe ine eo ami en erro, a ña I naj kobaik ñōn e; jema e ar dreñlokwe kom kin ken dreñdreñ ko, a I naj dreñlokwe kom kin marebep ko. 15 Ein drein kiñ eo e ar jab eoroñ armij rōn; bwe men eo jen Anij, bwe Jeova en kamol nan eo E ar konono kin Ehajja dri Shailo ñōn Jeroboam nejin Nibat.

16 Im ke ro dri Israel rar lo bwe kiñ eo e jab eoroñ ir, armij ro rar uak ñōn kiñ eo, im ba, Ewi amuij kij ilo Devid? Im ejelok amuij jolit ilo nejin Jesse: jabrewōt armij ñōn mo ko imwemi, O Israel: inem kiō, Devid, kwon mōke lale mweo imōm! Ein drein dri Israel otemjej rar ilok ñōn mo ko imweir. 17 A kin dri Israel ro rar jokwe ilo jikin kwelok ko an Juda, Rihoboam e ar kiñ ioir. 18 Ien eo kiñ eo e ar jilkinlok Hadoram, eo e ar iroi ion ro dri jerbal: im ro nejin Israel rar kare e kin dreka inem e mij. Im kiñ Rihoboam e ar kaiur e im uwe liñlok ilo jariot eo an bwe en ko ñōn Jerusalem. 19 Ein drein Israel rar kabata nae mweo imōn Devid ñōn ranin.

11 Im ke e mottok Rihoboam ñōn Jerusalem, e ar kokweloktok imōn Juda im Benjamin, jibuki dualitōkñoul tausān armij ro ar kã-

let ir, ro dri tōrinae, bwe en tōrinaek Israel, im kejeblaktok ailiñ eo ñōn Rihoboam. 2 A nan jen Jeova e ar itok ñōn Shemeaia armij ōn Anij, im ba, 3 Kwon konono ñōn Rihoboam nejin Solomon, kiñ in Juda, im ñōn aolepen Israel ilo Juda im Benjamin, im ba, 4 Ein drein Jeova ej ba, Komin jab wōnliñlok ak tōrinaek ro jeōmi im jātōmi: komin jeblaklok jabrewōt armij ñōn mweo imōn: bwe men in jen Na. Ein drein rar eoroñ nan ko jen Jeova, im rar jeblak jen air ilen tōrinaek Jeroboam.

5 Im Rihoboam e ar jokwe i Jerusalem, im e ar kalek jikin kwelok ko re bin i Juda. 6 E ar kalek Betleem, im Itam, im Tekoa, 7 im Bet-zur, im Soko, im Adullam, 8 im Gat, im Maresha, im Zip, 9 im Adoreim, im Lekish, im Azika, 10 im Zora, im Aijalon, im Hibron, ir ko ilo Juda im Benjamin, jikin ko eor air worwor. 11 Im e ar kalek jikin ko re bin, im likit kapen ioir, im ekōn, im oil im wain. 12 Im ilo jikin kwelok otemjej e ar likit mōri ko im likipijñōk ko, im e ar kanuij kabinloki. Im iben, Juda im Benjamin.

13 Im pris ro im ro dri Livai, ro rar ber ilo aolepen Israel, rar kwe-loktok ñōn iben jen aolepen tōrereir. 14 Bwe ro dri Livai rar likit wujeir iturin jikin kwelok ko, im men ko air, im rar itok ñōn Juda im Jerusalem: bwe Jeroboam im ro nejin rar jolok ir bwe ren jab kōmōn jerbal in pris ñōn Jeova: 15 im e ar kãlet ñōn e, pris ro ñōn jikin ko re utiej, ñōn got koman ko, im kon in kau ko e ar kōmōnmōni. 16 Im elikir, jen bwij otemjej bwijin Israel, ro rar kabin burueir im bukot Jeova, rar itok ñōn Jerusalem bwe ren katok ñōn Jeova, Anij an ro jimair. 17 Ein drein rar kakajur ailiñ in Juda, im kōmōn bwe Rihoboam nejin Solomon en kajur iomin jilu yiō; bwe iomin jilu yiō rar etetal ilo ial an Devid im Solomon.

18 Im Rihoboam e ar belek juōn kōra, Mehelat nejin Jerimot nejin Devid, im Abiheil liō nejin Ilaiab ne-

jin Jesse; 19 im e ar keutak ñōñ e man ro nejin: Jiush, im Shemaraia, im Zeham. 20 Im elikin lio e ar bōk Meaka lio nejin Absalom; im e ar keutak ñōñ e Ebaija im Attai, im Zaiza, im Shelomit. 21 Im Rihoboam e ar yokwe Meaka nejin Absalom elap jen limaro belen otemjej im konkubain ro: (bwe e ar bōk joñoul drualitōk kōra ro belen, im jiljinoñoul konkubain, im e ar keutak roñoul drualitōk nejin man, im jiljinoñoul nejin kōra). 22 Im Rihoboam e ar likit Ebaija nejin Meaka bwe en lijiklok, iroi j eo iben ro jein im jātin: bwe e ar lemnok in kōmōn e kiñ. 23 Im e ar kōmōn meletlet, im kijibliklok lōmaro nejin ilo aolepen ene in Juda im Benjamin, ñōñ jabrewōt jikin kwelok e bin: im e ar lelok ñōñ ir elōñ ekōn. Im e ar kabukot ñōñ ir elōñ kōra ro beleir.

12 Ein drein ke emwij kabin ailiñ eo ñōñ Rihoboam, im e ar kajur wōt, inem e ar illok jen kien Jeova, im aolepen Israel ro kōmōn einwōt. 2 Im ilo yiō eo ken ka lailim an Rihoboam, Shaishak kiñ in Ijpt e ar wōnliñtok nae Jerusalem, bwe rar jerawiwi nae Jeova, 3 im iben, joñoul ruo tausan jariot, im jiljinoñoul tausan dri uwe ion ors. Im ejelok oran armij ro rar itok ibentok jen Ijpt: ro dri Lubia, dri Sukkal, im ro dri Itiopia. 4 Im e ar bōk jikin kwelok ko re bin, im itok ñōñ Jerusalem. 5 Ak Shemeaia, dri kanan, e ar itok ñōñ iben Rihoboam, im ñōñ iroi j ro in Juda, ro rar kweloktok ñōñ Jerusalem kin Shaishak, im e ba ñōñ ir, Ein drein Jeova ej ba, Kom ar illok jen Ña, kin men in I ar bareinwōt likit kom ilo pein Shaishak. 6 Inem iroi j ro in Israel im kiñ eo rar mōke kōtaik ir; im ba, E wānik Jeova. 7 Im ke Jeova e ar lo air kōtaik ir mōke, nan jen Jeova e ar itok ñōñ Shemeaia, im E ba, Emwij air mōke kōtaik ir: I jamin kokkure ir: a I naj lelok ñōñ ir lomor kin jimōtōn, im jamin lutōklok Aō illu ion Jerusalem kin pein Shaishak. 8 Ijoke, re naj dri korijeran, bwe ren jela Aō jermal, im jermal an ailiñ ko.

9 Ein drein ¹Shaishak kiñ in Ijpt e ar wōnliñtok nae Jerusalem, im e ar bōklok mweiuk ko an imōn Jeova, im mweiuk ko an imōn kiñ eo: e ar aolepilok; bareinwōt e ar bōklok likipijñōk gold ko Solomon e ar kōmōnmōni. 10 Im Rihoboam e ar kōmōnmōni likipijñōk jinibōrōrō ko bwe ren binej jenkwair, im lelok ilo pein kapen an ro dri bar, ro rar kejbārok kejem in mweo imōn kiñ eo. 11 Im ein drein jabrewōt ien ke kiñ eo e ar dreloñ ilo imōn Jeova, ro dri bar rar item bōki, im bar bōkilok ñōñ iloan mweo an ro dri bar. 12 Im ke e ar mōke kōtaik e, illu an Jeova e ar oktōk jen e, bwe En jab kejebeplik wōt; im bareinwōt ar lo men ko remōn ilo Juda.

13 Eindrein ²Rihoboam e ar mōke kakajur e ilo Jerusalem, im iroi j: bwe Rihoboam e ar ridtōn eñoui juōn yiō ke e ar jino an kiñ, im e ar kiñ iomin joñoul jiljilimjuōn yiō ilo Jerusalem, jikin kwelok eo Jeova e ar kålet e jen bwij otemjej bwijin Israel, bwe En likit etan ie: im etan jinen, Neama dri Amon. 14 Im e ar kōmōn nana, bwe e ar jab likit buruen bwe en bukōt Jeova.

15 Ak jermal ko an Rihoboam, ko mokta im ko eliktata, ar jab jeje ilo bwebwenato ko an Shemeaia dri kanan, im an Iddo dri lolo, ilo wāwen nan in ebeben ko ke? Im ien otemjej ikotan Rihoboam im Jeroboam e kar or tōrinae. 16 Im Rihoboam e ar kiki iben ro jiman, im ar kalibwin e ilo jikin kwelok an Devid: im Ebaija nejin, ej kiñ im binej jenkwōn.

13 ³Ilo yiō eo ken ka joñoul drualitōk an kiñ Jeroboam, Ebaija e ar jino an kiñ ion Juda. 2 E ar kiñ i Jerusalem iomin jilu yiō: im etan jinen Maieaia, nejin Uraiel dri Gibia. Im juōn tōrinae ikotan Ebaija, im Jeroboam. 3 Im Ebaija e ar jino, an tōrinae kin juōn jar in tōrinae, armij re beran, ābuki tausan armij, ar kålet ir, re beran im kajur. 4 Im Ebaija e ar jutōk ilo tol Zemareim, eo ilo enen tol ko an Ipreim, im e ba,

Komin roñjake ið, O Jeroboam im dri Israel otemjej: 5 E jab emõn ke bwe komin jela bwe Jeova, Anij in Israel, E ar lelok ñõn Devid bwe en iroi ion Israel ñõn in drio, aet, ñõn e im ro nejin man, kin juõn bujen in jätök? 6 Ijoke, Jeroboam nejin Nibat, kori-jeran Solomon nejin Devid, e ar jutök, im kabata nae iroi eo an. 7 Im e ar kokweloktok ñõn iben armij rewan, dri kõmõn bata, ro rar mõke kakajur ir, nae Rihoboam nejin Solomon, ke Rihoboam e ar likao wõt im e ub an lemnok, im e jab maroñ in jumae ir. 8 Im kiõ komij lemnok in jumae ailiñ an Jeova, ilo pein ro nejin Devid: im kom juõn jar elap, im ibemi kon in kau ko gold, ko Jeroboam e ar kõmõnmõni anij ñõn kom. 9 Kom ar jab ubakelok pris ro an Jeova ke, ro nejin Aron, im ro dri Livai, im kõmõn ñõn kom pris ro ilo wāwen dri ailiñ ko ilo ene ko jet? Einwõt bwe jabrewõt eo ej iten kokwojarjar e kin juõn kau koman emõn ridtõn im jiljilimjuõn sip koman, armij eo e maroñ in pris ñõn ro re jab anij rōn. 10 A kin kim, Jeova ej amuij Anij, im kim ar jab illok jen E; im ibem pris ro rej korijer ñõn Jeova, ro nejin Aron, im ro dri Livai ilo air jerbal: 11 im rej tile katok kijeek ko im kajurjur e ñõj ñõn Jeova jabrewõt jiboñ: im rej likit bred in kalikar ion tebel eo erre: im jikin lamp gold kin lamp ko an, bwe en urur jota otemjej, bwe kimij kejbārok nan in jiroñ an Jeova amuij Anij: a kom ar illok jen E. 12 Im, lo, Anij ej ibem amuij dri tel, im bareinwõt pris ro An, im ibeir jilil in kajelaik ko, bwe ren jilil kin kom. O ro nejin Israel, komin jab tōrinaek Jeova, Anij an ro jemōmi; bwe kom jamin jerammõn.

13 A Jeroboam e ar kōmõn bwe juõn jar in kebao en itok elikir: ein drein rar ber iman Juda, im jar in kebao elikir. 14 Im ke Juda e ar reiliklok, lo, tōrinae ej imair im elikir; im rar kir ñõn Jeova, im pris ro rar jilil. 15 Inem ro dri Juda rar lamij: im ke ro dri Juda rar lamij,

ein drein Anij e ar mōn Jeroboam im aolepen Israel iman Ebaija im Juda. 16 Im ro nejin Israel rar ko jen iman Juda; im Anij e ar ketök ir na ilo peir. 17 Im Ebaija im ro dron rar mōn ir kin juõn im elap: ein drein rar bero im mij jen Israel limabuki tausan armij ro ar kålet ir. 18 Ein drein ar kōtaik ro nejin Israel ieneo, im ro nejin Juda rar bōk anjo, kin air liki Jeova Anij an ro jimair. 19 Im Ebaija e ar lukworkwor Jeroboam, im bōk jen e jikin kwelok ko, Betel im jikin kwelok ko wujen, im Jeshena kab jikin kwelok ko wujen, im Ipron kab jikin kwelok ko wujen. 20 Im Jeroboam e ar jab bar kajurlok iomin ran ko an Ebaija: im Jeova e ar mōn e, inem e mij. 21 A Ebaija e ar kajurlok, im e ar bōk ñõn iben, joñoul emen kōra belen, im e ar keutak roñoul ruo nejin man, im joñoul jiljino nejin kōra. 22 Im kōmõn ko jet an Ebaija im ial ko an, im nan ko an, emwij jeje ilo buk in kemelele an Iddo dri kanan.

14 Ein drein Ebaija e ar kiki' iben ro jiman, im rar kalibwin e ilo jikin kwelok an Devid; im Esa nejin e ar kiñ im binej jenkwōn. Ilo ran ko an, eneo e ar ainemõn iomin joñoul yið. 2 Im Esa e ar kōmõn men ko remõn im jime iman mejen Jeova Anij eo an: 3 bwe e ar bōklok lokatok ko drua, im jikin ko re utiej, im rupe jur ko, im juokwe Ashira ko, 4 im e ar jiroñ Juda bwe ren kabukot Jeova, Anij an ro jimair, im bwe ren bokake kien eo im nan in kaiñ eo. 5 Bareinwõt e ar bōklok jek jikin kwelok otemjej an Juda, jikin ko re utiej im men ko men in e einwõt al: im ailiñ eo e ar ainemõn iman. 6 Im e ar kalek jikin kwelok ko re bin i Juda; bwe eneo e ar ainemõn, im ejelok tōrinae iben iomin yið ko, bwe Jeova e ar lelok ñõn e kakije. 7 Bwe e ar ba ñõn Juda, Jen kalek jikin kwelok kein, im kōmõnmõn iturir worwor ko im imõn bar ko, im aor ko im alal ko; eneo ej imar kin aruij kabukot Jeova aruij Anij; jar bukot E inem E ar letok ñõn kij kakije

ijoko otemjej. Ein drein rar kalek im jerammōn. 8 Im iben Esa juōn jar in tōrinae rar inek likipijñōk ko im mōri ko, ian dri Juda jilu buki tausān; im ian dri Benjamin, rar inek likipijñōk ko im kiele libon ko, rubuki drualitōkñoul tausān: rein otemjej armij re beran im kajur.

9 Im Zira dri Itiopia e ar drioijtōk mae ir, im iben juōn jar in tōrinae juōn tausān tausān, im jilu buki jariot; im e ar itok ñōn Maresha. 10 Inem Esa e ar drioijlok im jumae e, im rar kalejar ilo komlōl in Zepheta i Maresha. 11 Im Esa e ar kir ñōn Jeova, an Anij, im e ba, Jeova, ejelok dri jibōñ a Kwe wōt, ikōtan eo e kajur im eo ejelok an kajur: Kwon jibōñ kim, O Jeova amuij Anij: bwe kimuij liki yuk, im ilo etōm kim ar iten jumae jar in elap. O Jeova, Kwe amuij Anij; armij ren jab bōk anjo jen Kwe. 12 Ein drein Jeova E ar mōn dri Itiopia iman Esa, im iman Juda; im ro dri Itiopia rar ko. 13 Im Esa im armij ro iben rar lukworkwor ir ñōn Girar: im rar hero ian ro dri Itiopia elōñ, inem re ban bar bōk air kajur: bwe emwij mōn ir iman Jeova, iman jar in tōrinae eo An: im rar bōklok elōñ men in rakim. 14 Im rar mōn jikin kwelok otemjej iturin Girar; mijōk Jeova e ar itok ioir: im rar rakimi jikin kwelok otemjej; bwe elōñ men in rakim ilo ir. 15 Im rar kokkure mo ko im nuknuk im kiru ko, im āninlok elōñ sip, im kamel ko, im rar jeblak ñōn Jerusalem.

15 Im Jitōb òn Anij e ar itok ion Azaraia, nejn Oded: 2 im e ar drioijlok in wōnmae Esa, im e ar ba ñōn e, Kwon roñjake iō, Esa, im aolepen Juda im Benjamin: Jeova ej ibemi elañe kom iben: im elañe komij kabukot E, kom naj lo E: a elañe kom illok jen E, E naj illok jen kom. 3 Ak etto an Israel aikwij Anij eo e mol, im iben ejelok pris dri katakin, im ejelok kien: 4 a ke ilo air iñtan rar oktōk ñōn Jeova, Anij in Israel, im bukot E, rar lo E. 5 Im ilo ien ko ejelok ainemōn ñōn eo e ar drioijlok, ak ñōn eo e ar dre-

loñtok: a jorran elap ioir otemjej rar jokwe ilo ene ko. 6 Im emwij rupi ir ilo mōtōn ko, aliñ nae aliñ, im jikin kwelok nae jikin kwelok; bwe Anij e ar kejjorran ir kin iñtan elap. 7 A komin kajur, im peōmi ren jab mōjino: bwe e naj or wōnan ami jerbal.

8 Im ke Esa e ar roñjake nan kein, im drikanij an Oded dri kanan eo, e beranlok, im e ar jolok men in jōjōik ko jen aolepen ene Juda im Benjamin, im jen jikin kwelok ko e ar bōki jen ene e utiej in Ipreim: im e ar kōkāl lokatok an Jeova, eo iman portiko an Jeova. 9 Im e ar kokweloktok aolepen Juda im Benjamin, im ro rar itoitōk ibeir jen Ipreim im Menassa, im jen Simeon: bwe elōñ rar itok ñōn iben jen Israel, ke rar lo bwe Jeova Anij ej iben. 10 Ein drein rar kweloktok i Jerusalem ilo aliñ eo ken ka jilu, ilo yiō eo ken ka joñoul lailim an Esa kiñ. 11 Im rar katok ñōn Jeova ran eo, jen men in rakim rar bōktok, jiljilimjuōn buki ox im jiljilimjuōn tausān sip. 12 Im rar kōmōn juōn bujen in kabukot Jeova, Anij an ro jimair, kin aolepen burueir im kin aolepen air: 13 im jabrewōt eo e makoko in bukot Jeova Anij an Israel, naj mōn e, elañe elap ak erik, man ak kōra. 14 Im rar kanōjniñ ñōn Jeova kin ainikeir elap, im kin lamij, im kin jilil ko, im kin kornet ko. 15 Im aolepen Juda rar lōñliñ kin kanōjniñ eo; bwe rar kanōjniñ kin aolepen burueir, im kabukot E kin aolepen air kōnan; inem rar lo E: im Jeova e ar lelok ñōn ir kakiye ijoko otemjej.

16 Bareinwōt Meaka, jinen Esa kiñ, e ar kamōkit e jen an liroiñ, kin an kar kōmōn juōn men in e jōjōik, bwe en Ashira; im Esa e ar juokwe men in e eo an, im kōprakilkile, im tile i wea Kidron. 17 A jikin ko re utiej ar jab bōklok jen Israel; meñe. buruen Esa e ar wāppen iomin ran ko otemjej an. 18 Im e ar kadreloñtok ilo imōn Anij men ko jemen e kar aje, im men ko e ar aje, silver im gold im jābi ko. 19 Im ejelok bar juōn tōri-

nae ñōn yiō eo ken ka jilñoul lailim an Esa kiñ.

16 ¹ Ilo yiō eo ken ka jilñoul jiljino an Esa kiñ, Beasha kiñ in Israel e ar wōnlñlok nae Juda, im e ar kalek Rema, bwe en bōprae an jabrewōt armij drioiylok ak dreloñtok ñōn iben Esa kiñ in Juda. **2** Inem Esa e ar bōk silver im gold jen mweiuk ko an imōn Jeova, im jen imōn kiñ eo, im jilkinlok e ñōn iben Benhedad kiñ in Siria, eo e ar jokwe i Damas-kōs, im e ba, **3** Juōn bujen ikōtarro, einwōt ikōtan jema im jemōm: lo, emwij aō jilkinwoj silver im gold; kwon ilem rupe bujen eo am iben Beasha kiñ in Israel, bwe en ilok jen ña. **4** Im Benhedad e ar eoroñ kiñ Esa, im e ar jilkinlok kapen ro im jar in tōrinae ko an nae jikin kwelok an Israel; im rar mōn Aijon, im Dan, im Ebel-meim, im jikin kwelok ko otem-jej ñōn mweiuk i Naptalai. **5** Im ein drein ke Beasha e ar roñjake, e ar likit an kalek Rema, im ej jokwor jen jermal eo an. **6** Inem Esa e ar bōk aolepen Juda; im rar bōklok dreka an Rema, im wijki ko an, Beasha e kar kalek kaki: im e ar kalek kaki Giba im Mizpa.

7 Im ilo ien eo Hananai dri lolo e ar itok ñōn iben Esa kiñ in Juda, im e ba ñōn e, Kin am kar liki kiñ in Siria, im kwar jab liki Jeova am Anij, inem jar in tōrinae an kiñ in Siria rar ko jen ilo peōm. **8** Ro dri Itiopia im dri Libia re jab juōn jar in tōrinae elap, im ibeir e kanuij lōñ jariot im ro dri uwe ion ors ke? mekar-ta, kin am liki Jeova, E ar ketōk ir na ilo peōm. **9** Bwe mejen Jeova rej etōrluk im etōrtok ilo aolepen lōl, im mōke kwalok E kajur in jibōñ ro burueir re wāppen ñōn E. Ilo men in kwar kōmōn men in bwebwe bwe jen ien in e naj or tōrinae ibōm. **10** Im Esa e ar illu ñōn dri lolo eo, im likit e na ilo imōn prison; bwe e ar kanuij illu iben kin men in. Im Esa e ar kejjorran jet ian armij rōn ien eo.

11 Im lo, ² kōmōn ko an Esa ko mokta im eliktata, lo, emwij jeje ilo

buk eo an kiñ ro kiñ in Juda im Israel. **12** Im ilo yiō eo ken ka jilñoul druatiñjuōn in an kiñ, Esa e ar nañinmij i neen; e kanuij nana nañinmij eo: a ilo an nañinmij e ar jab kabukot Jeova, a dru uno rōn. **13** Im Esa e ar kiki iben ro jiman, im e mij ilo yiō eo ken ka eñoul juōn in an kiñ. **14** Im rar kalibwin e ilo lūp ko an, ko emwij an jekjek ñōn e mōke ilo jikin kwelok an Devid, im likit e ilo aowej eo e obrōk kin bwi ko re ñōj, im eor wāwen spais ko re pojōk kin kabel an dri jermal ilo men ko re ñōj; im rar kōmōn juōn kijeek e kanuij lap ñōn e.

17 Im ¹ Jihoshapat nejin e ar kiñ im binej jenkwōn, im e ar mōke kakajur e nae Israel. **2** Im e ar likit ro dri tōrinae iloan jikin kwelok ko otemjej re bin an Juda, im e ar likit ro dri tōrinae ilo ene Juda, im ilo jikin kwelok in Ipreim, ko Esa jemen e ar bōki. **3** Im Jeova e ar ber iben Jihoshapat, bwe e ar etetal ilo ial ko mokta an Devid jemen, im e ar jab kabukot Beal ko, **4** a e ar kabukot Anij an jemen, im etetal ilo kien ko An, im jab lore kōmōn ko an Israel. **5** Kin men in Jeova e ar kakajur ailiñ eo an ilo pein; im aolepen Juda rar bōktok owōj ñōn Jihoshapat: im iben elōñ mweiuk, im nebar. **6** Im e ar lelilñlok buruen ilo ial ko an Jeova: im bar juōn, e ar bōklok jikin ko re utiej im Ashira ko jen Juda.

7 Bareinwōt ilo yiō eo ken ka jilu in an kiñ e ar jilkinlok iroi ro an, aet Ben-heil, im Obedaia, im Zekeraia, im Netanel, im Maikaeia, bwe ren kaktakin ilo jikin kwelok ko an Juda; **8** im ibeir ro dri Livai, Shemeaia, im Nethanaia, im Zebadaia, im Esahel, im Shemiremot, im Jehonetan, im Adonaija, im Tobaija, im Tobadonaija, ro dri Livai; im ibeir Elishema, im Jehoram pris ro. **9** Im rar katakin ilo Juda, im ibeir buk in kien Jeova: im rar itoitōk ilo jikin kwelok etemjej in Juda, im rar katakin i bwiljin armij ro.

10 Im mijōk Jeova e ar buñlok ion

aliiñ otemjej in ene ko iturin Juda, ein drein rar jab tōrinaek Jihoshapat. 11 Im jet ian ro dri Pilistia rar bōktok jurtak ko ñōn Jihoshapat, im silver ñōn owōj; bareinwōt dri Arebia rar bōktok bwij ko, jiljilimjuōn tausān jiljilimjuōn buki sip koman, im jiljilimjuōn tausān jiljilimjuōn buki got koman. 12 Im Jihoshapat e ar kanuij laplok wōt: im e ar kalek ilo Juda imōn bar ko im jikin kwelok ko ñōn mweiuk. 13 Im ilo jikin kwelok ko an Juda e ar likit elōñ men in kōmōn; im armij dri tōrinae, ro re kajur im beran ilo Jerusalem. 14 Im eñin orair ekar ñōn mo ko imōn ro jimair: jen Juda, kapen ro an tausān ko: Adna kapen eo, im iben armij re kajur im beran jilu buki tausān; 15 im ijillockin Jehohenan kapen eo, im rubuki drualitōkñoul tausān; 16 im ijillockin Amasaia nejin Zikrai, eo e ar kōnan mōke lelok e ñōn Jeova: im iben rubuki tausān armij re beran im kajur. 17 Im jen Benjamin: Elaieda juōn dri kajur im beran, im iben rubuki tausān, ken tōrinae ko ibeir libon im likipijñōk; 18 im ijillockin Jehozebad, im iben jibuki drualitōkñoul tausān re pojōk ñōn tōrinae. 19 Rein ro rar ber iben kiñ eo, eor jen ro kiñ e ar likit ir ilo jikin kwelok ko re bin ilujen aolepen Juda.

18 Ak iben Jihoshapat elōñ mweiuk im nebar; im irro Ehab rar jeraik dron. 2 Im ¹elikin jet yiō e ar wōnlōllok ñōn iben Ehab ñōn Sameria. Im Ehab e ar mōn elōñ sip im ox ñōn e, im ñōn armij ro iben, im karel e bwe en ilok ibenlok ñōn Remot-giliad. 3 Im Ehab kiñ in Israel e ar ba ñōn Jihoshapat kiñ in Juda, Kwo kōnan ilok ibalok ñōn Remot-giliad ke? im e ar uak e, Ña einwōt kwe, im ro droō einwōt ro drom; im kim naj ibōm ilo tōrinae eo.

4 Im Jihoshapat e ar ba ñōn kiñ in Israel, Kwon kajitōk mokta, ij akwelap ñōn yuk, kin nan an Jeova. 5 Inem kiñ in Israel e ar kokweloktok dri kanan ro, ābuki armij, im e ba ñōn ir, Kim naj ilok ñōn Remot-gili-

ad ke, ak in berwōt? Im re ba, Kwon wōnlōllok: bwe Anij e naj ketōk e na ilo pein kiñ. 6 A Jihoshapat e ar ba, E bar or ke dri kanan an Jeova bwe jen maroñ in kajitōk iben? 7 Im kiñ in Israel e ar ba ñōn Jihoshapat, Mātōn bar juōn armij je maroñ in kajitōk iben Jeova kake: a ij drike: bwe e jab drikanij emōn kin ña, a nana ien otemjej: eñin Maikeaia nejin Imla. Im Jihoshapat e ar ba, kiñ en jab ba ein drein. 8 I nem kiñ in Israel e ar kirtok juōn dri kabwijrōk, im ba, kwon mōkōj im āñintok Maikeaia leo nejin Imla. 9 Ak kiñ in Israel im Jihoshapat rar jijōt ilo tron ko air, emwij airro kōnōk nuknuk in kiñ, im rar jijōt ilo juōn melaj iturin kejem in Sameria; im dri kanan otemjej rej drikanij imairro. 10 Im Zedekaia nejin Keneana e ar kōmōnmōn ñōn e drun ko jen māl, im e ba, Ein drein Jeova ej ba, Kin men kein kwo naj jibellok ro dri Siria, mae ien re joko. 11 Im ein drein an ro dri kanan otemjej drikanij, im re ba, Kwon wōnlōllok ñōn Remot-giliad, im jeramōn: bwe-Jeova e naj ketōk e na ilo pein kiñ.

12 Im dri jilik eo e ar ilen kirtok Maikeaia, e ar konono ñōn e, im e ba, Lo nan ko an ro dri kanan re ba emōn ñōn kiñ eo kin juōn wōt un: kin men in, ij akwelap, am in nan en einwōt juōn iair, im kwon konono emōn. 13 Im Maikeaia e ar ba, Einwōt Jeova e mour, jabrewōt eo aō Anij e naj ba, eñin I naj konono. 14 Im ke emwij an itok ñōn iben kiñ eo, kiñ eo e ar ba ñōn e, Maikeaia, kimin ilok ñōn Remot-giliad im tōrinae, ak in berwōt ke? Inem e ar ba, Kwon wōnlōllok im jeramōn: im naj ketōk ir na ilo peōm. 15 Im kiñ eo e ar ba ñōn e, Jete alen aō jiroñ yuk bwe kwon konono ñōn iō mol wōt ilo etan Jeova? 16 Im e ar ba, I ar lo aolepen Israel re jibiliklok ilo tol ko, einwōt sip ko ejelok air seperd: im Jeova e ar ba, Rein ejelok air iroi, ren jeblaktok, jabrewōt iair, ñōn mweo imōn ilo ainemōn. 17 Im kiñ in Israel e ar ba ñōn Jihoshapat, I ar jab ba ñōn yuk ke e jamin drikanij

emōn kin ña, a nana wōt? 18 Im Maikēaia e ar ba, inem komin roñjake nan jen Jeova: I ar lo Jeova ej jījōt ion tron eo An, im aolepen jar eo ilōñ rej jutōk i anbijmaroñōn im i anmiñin. 19 Im Jeova e ar ba, Wōn eo e naj karel Ehab kiñ in Israel, bwe en wōnliñlok im buñ i Remot-giliad? Im juōn e ar konono ilo juōn wāwen, im bar juōn ilo wāwen juōn. 20 Im juōn jītōb e ar item jutōk iman Jeova im e ba, I naj karel e. Im Jeova e ba ñōn e, Kin ta? 21 Im e ba, I naj ilok im I naj juōn jītōb in riōp i loñin dri kanan otemjej an. Im e ar ba, Kwo naj karel e, im naj anjo kake: kwon ilok im kōmōn ein drein. 22 Inem, lo, Jeova e ar likit juōn jītōb in riōp i loñin rein dri kanan ro am; im Jeova e ar konono nana kin kwe.

23 Inem Zedekaia nejin Keneana e arduaktok, im ubrare jiben Maikēaia, im e ba, Ilo ial ōt Jītōb ōn Jeova e ar ilok jen ña bwe En konono ñōn yuk? 24 Im Maikēaia e ar ba, Kwo naj lo ilo ran eo ñe kwo naj dreloñ ilo rum eo eolap in tilekek. 25 Im kiñ in Israel e ar ba, Komin bōk Maikēaia, im āñinlok e ñōn Amon iroiñ in jikin kwelok eo, im ñōn Joash nejin kiñ: 26 im komin ba, Ein drein kiñ eo ej ba, Komin likit lein ilo prison, im najirik e kin bred in jorran, im dren in jorran mae ien eo I naj jeblak ilo ainemōn. 27 Im Maikēaia e ba, Elañe kwo naj jeblaktok ilo ainemōn, Jeova e ar jab kokononoik iō. Im e ar ba, Komin roñjake, kom dri ailiñ ko, kom otemjej.

28 Ein drein kiñ in Israel im Jihoshapat kiñ in Juda rar wōnliñlok ñōn Remot-giliad. 29 Im kiñ in Israel e ar ba ñōn Jihoshapat, Ña I naj kejakilkil iō, inem ilem tōrinae: a kwe, kwon kōnōk nuknuk in kiñ ne am. Ein drein kiñ in Israel e ar kejakilkil e; im rar ilem tōrinae. 30 Ak kiñ in Siria e ar jiroñ kapen ro in jariot ko an, im ba, Komin jab tōrinaek ro redrik ak ro relap, a kiñ in Israel wōt. 31 Im ein drein ke kapen ro an jariot ko rar lo Jihoshapat, rar ba,

Ekiñ in Israel. Kin men in rar oktōk im tōrinaek e: a Jihoshapat e ar la-mij, im Jeova e ar jibōñ e: im Anij e ar karel ir in ilok jen e. 32 Im ke kapen ro in jariot ko rar lo bwe e jab kiñ in Israel, rar jeblaklok jen air lukworkwore. 33 Im juōn eman e ar kiele libon eo an bōjik, im e ar lil kiñ in Israel ilo kōtan balle ko; kin men in e ar ba ñōn eo e ar lale jariot eo, Kwon kejale peōm, im bōklok iō jen jar in tōrinae: bwe ña I kanuij kwōt. 34 Im elaplok wōt tōrinae ran eo: ijoke, kiñ in Israel e ar jutōk ilo jariot eo an nae ro dri Siria mae jota; im ke e nañin tulok al, e ar mij.

19 Im Jihoshapat kiñ in Juda e ar jeblaktok ñōn mweo imōn ilo ainemōn ñōn Jerusalem. 2 Im Jihu nejin Hanenai dri lolo eo, e ar ilen wōnmae, im e ba ñōn kiñ Jihoshapat, Emōn ke am jibōñ ro re nana im yokwe ro rej kijirāte Jeova? Kin men in illu ej iom jen iman Jeova. 3 Mekarta, ar lo jet men ko remōn ilo kwe, bwe kwar jolok Ashira ko jen enin, im kwar kabin buruōm in kabukot Anij.

4 Im Jihoshapat e ar jokwe i Jerusalem: im e ar drioiñlok ñōn armij ro jen Bier-shiba ñōn ene utiej in Ipre-im, im kejeblaktok ir ñōn Jeova, Anij an ro jimair. 5 Im e ar likit ro dri ekajet ilo jikin kwelok ko otemjej re bin in Juda, kaju iair, 6 im e ar ba ñōn ro dri ekajet, Komin kalomōnlok-jen ta eo komij kōmōne: bwe komij ekajet jab ñōn armij ro, a ñōn Jeova: im Ej ibemi ilo ekajet. 7 Kin men in mijōk Jeova en ber iomi; komin lale mōk im kōmōne: bwe ejelok bwir iben Jeova aruij Anij, ak kabwiloklok mej, ak bōk wōnan kōmōn nana.

8 Bar juōn, ilo Jerusalem Jihoshapat e ar likit jet ian ro dri Livai im pris ro, im ian jiōb ro an imōn ro jimair an Israel, ñōn ekajet an Jeova, im kin akwaii ko. Im rar jeblaktok ñōn Jerusalem. 9 Im e ar jiroñ ir im ba, Ein drein ami kōmōn ilo mijōk Jeova, im kin buruōmi e wāppen. 10 Im ñe jabrewōt akwaii e naj itok ñōn

kom jen ro jeōmi im jātōmi rej jokwe ilo jikin kwelok ko air, ikōtan bōtōk-tōk im bōtōktōk, ikōtan kien im nan in jiroñ, nan in kaiñ im nan in kabuñ-jar ko, kom naj kowe ir, bwe en ejelok rueir ñōn Jeova, im illu en itok iomi im ion ro jeōmi im jātōmi: komin kōmōn men in im e naj ejelok ruōmi. 11 Im lo, Ameraia pris elap ej iomi ilo men ko otemjej an Jeova; im Zebadaia, nejin Ishmeel, iroiñ eo jen imōn Juda ilo men otemjej an kiñ: bareinwōt ro dri Livai re naj dri kabwijrōk imami. Komin beran ilo ami kōmōne im Jeova en ber iben ro remōn.

20 Im elikin men in ro nejin Moab, im ro nejin Amon, im ibeir jet ian ro dri Amon, rar itok nae Jihoshapat in tōrinae. 2 Inem jet rar itok im kennanek Jihoshapat, im ba, Juōn jar elap ej itok nae yuk jen Siria i lomalo jabuweo: im lo, rej i Hezezon-temar, (eñeo Engedai). 3 Im Jihoshapat e mijōk, im e ar kaiur e im bukot Jeova; im e ar kwalok juōn jītlok ilo aolepen Juda. 4 Im Juda e ar kweloktok, in kabukot jibōñ jen Jeova: jen jikin kwelok otemjej in Juda rar iten bukot Jeova.

5 Im Jihoshapat e ar jutōk ilo jar eo jaran Juda im Jerusalem, ilo imōn Jeova, iman worwor eo ekāl: 6 im e ar ba, O Jeova Anij an ro jemem, Kwekwo jab Anij in lōñ ko ke? Kwo jab kiñ ion ailiñ otemjej an ro dri ene ko ke? im ilo peōm kajur im maroñ, inem ejelok e maroñ in jumae Yuk. 7 Kwe O amuij Anij, Kwar jab kadrioijslok ro dri enin iman ro drom Israel ke, im lelok e ñōn inen Ebrean jeram ñōn in drio? 8 Im rar jokwe iloan, im rar kalek juōn imōn kwo-jarjar iloan ñōn etōm, im ba, 9 Elañe jorran ej itok iom, jāji, ekajet, ak mij e nana, ak ñita, kim naj jutōk iman mwin, im imam, (bwe etōm ej ilo mwin), im kir ñōn Kwe ilo amuij jorran, im Kwo naj eoroñ im lomorem. 10 Im kiō, lo, ro nejin Amon im Moab im tol Sier, ro Kwar jab kōtlok bwe Israel en tōrinaek ir, ke rar drioijslok jen Ijpt, a rar jeorlok jen ir,

im jab kokkure ir; 11 Kwon lo ekij-kan rej nawōnam, im iten jolok kim jen enin am, eo Kwar letok ñōn kim men in jolit. 12 O amuij Anij, Kwo jamin ekajete ir ke? bwe ejelok amuij maroñ nae jar in elap rej itok nae kim; im kim jaje ta eo kimin kōmōne: a mejem rej ñōn Kwe. 13 Im aclepen Juda rar jutōk iman Jeova, im ibeir ajiri ro, im limaro beleir, im ro nejir.

14 Inem ion Jahezaiel nejin Zekaraia, nejin Beneaia, nejin Jeiel, nejin Mattanaia, dri Livai, ian ro nejin Esap, ar itok Jitōb òn Jeova i bwiljin jar eo; 15 im e ar ba, Komin roñjake, kom dri Juda otemjej, im dri jokwe i Jerusalem, im kwe kiñ Jihoshapat: Ein drein Jeova e ba ñōn kom, Komin jab mijōk, im jab lelñōñ kin jar in elap: bwe tōrinae in e jab ami, a an Anij. 16 Ilju komin wōnlōllok nae ir: lo rej wōnliñtok ilo ial in wōnliñ ñōn Ziz; im kom naj lo ir i jemlokōn komlōl eo, iman ene jemaren Jeruel. 17 E naj ejelok unin ami iri ilo tōrinae in: komin berwōt im jutōk, im lo lomor an Jeova ibemi, O Juda im Jerusalem; komin jab mijōk im jab lelñōñ; ilju komin drioijslok nae ir; bwe Jeova ej ibemi. 18 Im Jihoshapat e ar barikrik ñōn brii: im aolepen Juda im ro dri Jerusalem rar buñbero iman Jeova, im kabuñ ñōn Jeova. 19 Im ro dri Livai, ian ro nejin ro dri Kohat im ian ro nejin ro dri Kora, rar jutōk im nebar Jeova, Anij in Israel, kin ainikeir e kanuij lap.

20 Im rar jerkak ke e jibōñ wōt, im drioijslok ilo ene jemaren in Tekoa: im ke rej drioijslok, Jihoshapat e ar jutōk im ba, Komin roñjake iō, O Juda, im kom ro dri Jerusalem: komin liki Jeova ami Anij, ein drein naj kabin kom; komin liki dri kanan ro An, inem kom naj jerammōn. 21 Im ke emwij an bebe iben armij ro, e ar kålet ro re naj al ñōn Jeova, im nebar ilo lajrōk e kwojarjar, ilo air drioijslok iman jar in tōrinae, im ba, Komin kamolol Jeova; bwe tiriamokake eo an ej ber ñōn in drio.

22 Im ke rej jino air al im nebar Jeova e ar likit ro dri kebao nae ro nejin Amon, Moab, im tol Sier, ro rar itok nae Juda; im ar mōn ir. 23 Bwe ro nejin Amon im Moab rar jutōk nae ro dri jokwe i Sier, im kanuij mōn ir im kokkure ir; im ke emwij air mōn ro dri jokwe i Sier, jabrewōt iair rej jibōñ kokkure dron.

24 Im ke dri Juda rar itok ñōn imōn bar eo in ene jemaren, rar reilok ion jar eo; im lo, ubōn armij rej ion brij, im ejelok juōn e ar ko. 25 Im ke Jihoshapat im ro dron rar item bōk men in rakim jen ir, rar lo ibeir elōñ mweiuk, inōk ko re aurōk, ko rar rakimi ñōn ir mōke, elōñ jen air maroñ bōklok: im rar rakim wōt iomin jilu ran, bwe elōñ. 26 Im ilo ran eo ken kemen rar kwelok i komlōl Beraka: bwe ijo rar kamōñōnōik Jeova: kin men in etan jikin eo, komlōl im Beraka ñōn ranin. 27 Inem rar jeblaktok im bar ilok ñōn Jerusalem, aolepen dri Juda im Jerusalem, im Jihoshapat imair, kin lōñliñ: bwe Jeova e ar kalōñliñ ir ion ro rar kijirāte ir. 28 Im rar itok ñōn Jerusalem, im ibeir salteri ko im arp ko, ñōn imōn Jeova. 29 Im mijōk e ar ion ailiñ ko in ene ko otemjej, ke rar roñjake bwe Jeova e ar tōrinaek ro dri kijirāte Israel. 30 Ein drein ailiñ an Jihoshapat ej ainemōn: bwe an Anij e ar lelok ñōn e kakije iturin.

31 Im ¹Jihoshapat e ar kiñ ion Juda: riūtōn jilñoul lailim yiō ke e ar jinc in kiñ; im e ar kiñ iomin roñoul lailim yiō i Jerusalem: im etan jinen Azuba, nejin Shilhai. 32 Im e ar etetal ilo ial an Esa jemen, im e ar jab jeorlok jen e, im kōmōn men eo emōn iman mejem Jeova. 33 Ijoke, e ar jab bōklok jikin ko re utiej; im armij re jañin kar kabin burueir ñōn Anij an ro jimair. 34 A kōmōn ko jet an Jihoshapat, ko mokta im ko eliktata, lo, emwij jeje ilo bwebwenato an Jihu nejin Hane-nai, eo e ar likit e ilo buk in kiñ ro kiñ in Israel.

35 Im ¹elikin men in Jihoshapat kiñ in Juda e ar koba iben Ehazaia kiñ in Israel; eo e ar kōmōn nana wōt: 36 im e ar koba iben bwe ren kōmōnmōn wa ko in ilok ñōn Tarshish; im rar kōmōnmōn wa ko i Izion-giber. 37 Inem Iliezar nejin Dodevahu jen Maresha e ar drikanij nae Jihoshapat, im e ba, Kin am koba iben Ehazaia, Jeova e ar kokkure men in kōmōn ko am. Im e rup wa ko, ein drein re jab maroñ in ilok ñōn Tarshish.

21 Im ²Jihoshapat e ar kiki iben ro jiman, im rar kalibwin e iben ro jiman ilo jikin kwelok an David; im Jehoram, nejin, e ar kiñ im binej jenkwōn. 2 Im eor jein im jātin, ro nejin Jihoshapat: Azaraia, im Jehaiel, im Zekaraia, im Azaraia, im Maikael, im Shepetaia; rein otemjej ro nejin Jihoshapat kiñ in Israel. 3 Im elap an jemeir lelok ñōn ir silver, im gold, im men ko re aurōk, kab jikin kwelok re bin i Juda: a ailiñ eo e ar lelok ñōn Jehoram bwe e manjien. 4 A ke Jehoram e ar jino bōk ailiñ an jemen, im e ar mōke kakajur e, e ar mōn kiñ jāji ro jein im jātin otemjej, im bareinwōt jet ian iroi ro in Israel. 5 Ridtōn Jehoram ke e ar jino an kiñ jilñoul ruo yiō; im e ar kiñ iomin dualitōk yiō i Jerusalem. 6 Im e ar etetal ilo ial an kiñ ro in Israel, einwōt dri imōn Ehab; bwe lio belen nejin Ehab, im e ar kōmōn men ko re nana iman mejen Jeova. 7 Mekarta, Jeova e jab kōnan kokkure imōn David, kin bujen eo E ar kōmōn iben David, im kin An kalimur in lelok ñōn e im ñōn ro nejin juōn lamp ien otemjej.

8 Ilo ran ko an, Idōm e ar kabata nae Juda, im rar mōke kōmōn juōn kiñ ioir. 9 Inem Jehoram e ar elālok, im iben kapen ro an im jariot ko. Im e ar jerkak ilo boñ, im mōn ro dri Idōm ro rar kabol e, im kapen ro in jariot ko. 10 Ein drein Idōm e ar kabata nae Juda ñōn ranin; inem Libna e ar kabata nae e ien eo wōt, kir an illok jen Jeova, Anij an ro jiman.

11 Bar juōn, e ar kōmōn jikin ko re utiej ilo tol ko in Juda, im e ar kōmōn bwe ro dri Jerusalem ren lūñ, im e ar kejebwābweik Juda. 12 Im e ar itok juōn jeje jen Ilaija dri kanan, im e ba, Ein drein Jeova Anij an Devid jemōm Ej ba, Kin am jab etetal ilo ial ko an Jihoshapat, jemōm, im ilo ial ko an Esa kiñ in Juda; 13 a kwar etal ilo ial an kiñ ro i Israel, im kwar kōmōn bwe Juda im ro dri Jerusalem ren lūñ, einwōt imōn Ehab e ar kōmōne, im bareinwōt kwar mōn ro jeōm im jātōm ian imōn jemōm, ro remōn jen yuk: 14 lo, Jeova e naj dreñlokwe ro drom, ro nejōm, im limaro beleōm, im men ko am otemjej, kin jorran elap; 15 im ibōm e naj juōn nañinmij e nana i lojiōm, mae ien mōjñōl ko am re naj wutlok kin nañinmij eo ran im ran.

16 Im ¹Jeova e ar biuktōke buruen ro dri Pilistia nae Jehoram, im ro dri Arebia rej ber iurin ro dri Itiopia: 17 im rar wōnlñitok nae Juda, im rar rupe im dreloñ, im bōklok mweuik otemjej rar loi ilo imōn kiñ, im ro nejin, im limaro belen; ein drein ejelok nejin man e ar berwōt iben; a Jihoahaz wōt, eo eriktata ian ro nejin.

18 Im elikin men kein otemjej Jeova e ar mōn e i lojien kin juōn nañinmij e nana wōt. 19 Im ein drein tokelik, jemlokōn ruo yiō, mōjñōl ko an rar wutlok kin nañinmij eo an, im e mij kin nañinmij re nana. Im ro dron rar jab kōmōn juōn kijeek ñōn e, einwōt kijeek ko rar kōmōn ñōn ro jiman. 20 E ridtōn jilñoul ruo yiō ke e ar jino in kiñ, im e ar kiñ ilo Jerusalem iomin drualitōk yiō: im ejelok buromōj ke ej ilok; im rar kalibwin e ilo jikin kwelok an Devid, a jab ilo lūp ko lūpōn kiñ ro.

22 ²Im ro dri Jerusalem rar koutiej Ehazaia nejin eriktata bwe en kiñ im binej jenkwōn; bwe jar an armij ro rar itok iben ro dri Arebia ñōn kamp eo, rar mōn ir otemjej re ridtolok. Ein drein Ehazaia nejin Jehoram kiñ in Juda e ar kiñ. 2 Ridtōn Ehazaia eñoul ruo yiō ke e ar jino

an kiñ; im e ar kiñ iomin juōn yiō i Jerusalem; im etan jinen Atalaia, lio nejin Omrai. 3 E ar bareinwōt etetal ilo ial ko an imōn Ehab; bwe jinen ej an dri bebe in kōmōn nana. 4 Im e ar kōmōn nana iman mejen Jeova, einwōt imōn Ehab; bwe ir an dri bebe elikin an jemen mij, ñōn kokkure e. 5 Bareinwōt e ar etal ilo air bebe, im e ar ilok iben Jehoram kiñ in Israel in tōrinaek Hazael kiñ in Siria i Remot-giliad: im dri Siria rar kakinijnij Joram. 6 Im e ar jeblaktok bwe ren kauk e i Jezriel kin kinij ko kinjen i Rema, ke e ar tōrinaek Hazael kiñ in Siria. Im Azaraia nejin Jehoram kiñ in Juda e ar wōnlōl lok in lo Jehoram nejin Ehab i Jezriel, bwe e nañinmij.

7 ¹Ak jorran eo an Ehazaia jen Anij, kin an ilok ñōn iben Joram. bwe ke e ar itok, e ar drioielok iben Jehoram nae Jihu nejin Nimshai, eo Jeova e ar kabit e bwe en bukwelok imōn Ehab. 8 Im ein drein ke Jihu ej kōmōn ekajet ion imōn Ehab, e ar lo iroi ro in Juda, im ro nejin ro jein im jātin Ehazaia, rej korijer ñōn Ehazaia, im e ar mōn ir. 9 Im e ar kabukot Ehazaia, im rar jibwe, (ke ej tilekek i Sameria), im rar bōktok e ñōn iben Jihu, im mōn e; im rar kalibwin e, bwe rej ba, Leo nejin Jihoahapat, eo e ar bukot Jeova kin aolepen buruen. Im imōn Ehazaia ejelok an kajur in drebij ailiñ eo.

10 ²A ke Atalaia e ar lo an nejin mij, e ar jerkak im kokkure ro nejin kij otemjej ian imōn Juda. 11 A Jihoshebeat, lio nejin kiñ eo, e ar bōk Joash nejin Ehazaia, im kwotelok jen iben ro nejin kiñ, ro emwij mōn ir, im likit e kab dri kakajiriri eo an ilo juōn bo. Ein drein Jihoshebeat, lio nejin kiñ Jehoram, lio belen Jihoiada pris eo, (bwe e jein im jātin Ehazaia), e ar noje jen Atalaia, inem e ar jab mōn e. 12 Im e ar tilekek ibeir ilo imōn Anij jiljino yiō: im Atalaia e ar liroi ion eneo.

23 ³Im ilo yiō eo ken ka jiljilim juōn Jihoiada e ar mōke kaka-

jur e, im e ar bōk kapen ro in buki ko, Azaraia nejin Jehoram, im Ishmeel nejin Jehohenan, im Azaraia nejin Obed, im Measeia nejin Adaia, Elishepat, nejin Zikrai, na ilo juōn bujen. 2 Im rar itoitōk ilo Juda, im kokweloktok ro dri Livai jen jikin kwelok otemjej in Juda, im jiōb ro an imōn ro jimair an Israel, im rar itok ñōn Jerusalem. 3 Im aolepen jar eo rar kōmōn bujen iben kiñ eo ilo imōn Anij. Im e ar ba ñōn ir, Lo, leo nejin kiñ ej iroiĵ einwōt Jeova e ar konono kin ro nejin Devid. 4 Eñin men eo kom naj komōne: juōn mōtōn jilu iami, ro rej dreloñ ilo ran in Sabat, ian pris ro im ro dri Livai, re naj dri lali kejem ko; 5 im juōn mōtōn jilu re naj ber iturin imōn kiñ; im juōn mōtōn jilu iturin kejem in loñtōn: im armij otemjej re naj illoan worwor ko in imōn Jeova. 6 A ejelok en dreloñ ilo imōn Jeova, a pris ro wōt im ro rej jerbal ian ro dri Livai; re naj dreloñ bwe re kwojarjar: a armij otemjej ren kejbārok nan in jiroñ jen Jeova. 7 Im ro dri Livai re naj kabol kiñ eo, jabrewōt armij ken tōrinae ko an ilo pein; im jabrewōt ej dreloñ ilo mweo, ren mōn e; im komin ber iben kiñ eo ñe ej dreloñtok im ñe ej drioijlok.

8 Ein drein ro dri Livai im aolepen Juda rar kōmōn ekar ñōn nan in jiroñ an Jihoiada pris eo: im jabrewōt iair rar bōk armij ro an, ro ren dreloñtok im drioijlok ilo ran in Sabat: bwe Jihoiada pris eo e jab kōtlok lajrōk ko. 9 Im Jihoiada pris eo e ar lelok ñōn kapen ro in buki ko mōri ko, im ken tōrak ko, im likipijñōk ko, re kar an kiñ Devid im ber ilo imōn Anij. 10 Im e ar karōk armij otemjej, jabrewōt armij ken tōrinae ilo pein, jen turin anbijmaroñōn mweo ñōn turin anmiñin mweo, ebak lokatok im mweo, im kabol kiñ eo. 11 Im rar kadrioiĵtok nejin kiñ eo im likit bokrōnat eo ion, im lelok ñōn e nan in kalimur eo, im kōmōne kiñ: im Jihoiada im ro nejin rar kabit e: im re ba, En mour wōt kiñ eo!

12 Im ke Atalaia e ar roñjake aini-

ken armij rar etōr im nebar kiñ eo, e ar itok ñōn armij ro ilo imōn Jeova: 13 im e ar reilok, im lo, kiñ eo ej jutōk iturin jur eo an ebake kejem, im kapen ro im jilil ko rebak kiñ eo; im armij otemjej dri eneo rar lōñliñ im jilil; ro dri al bareinwōt rar kajōñjōñ ion ken kajōñjōn ko, im tel al in nebar. Inem Atalaia e ar kekel nuknuk ko an, im ba, Bata! bata! 14 Im Jihoiada pris eo e ar kadrioiĵtok kapen ro in buki ko emwij likit ir ion jar in tōrinae, im e ba ñōn ir, Komin kadrioiĵlok e ikōtan lajrōk ko, im jabrewōt eo ej lore ren mōn e kin jāji: bwe pris eo e ba, Komin jab mōn e illoan imōn Jeova. 15 Ein drein rar na ialin; im e ar ilok ñōn iturin kejem in ors in imōn kiñ; im rar mōn e ijo.

16 Im Jihoiada e ar kōmōn bujen ikōtan, im armij otemjej, im kiñ eo, bwe ren armij an Jeova. 17 Im armij otemjej rar ilok ñōn mweo imōn Beal, im rupi lokatok ko an im men in e ko an ilo mōtōn ko, im mōn Matan, pris an Beal iman lokatok ko. 18 Im Jihoiada e ar likit jerbal ko in imōn Jeova iomin pein pris ro im ro dri Livai, ro Devid e ar kijibliklik ilo imōn Jeova, bwe ren katok kin katok kijeek ko an Jeova, einwōt emwij jeje ilo kien Moses, im rej lōñliñ im al ekar ñōn nan in jiroñ an Devid. 19 Im e ar likit ro dri lali kejem ko in imōn Jeova, bwe ejelok eo e jab erreo kin jabrewōt en dreloñ. 20 Im e ar bōk kapen ro in buki ko, im iroiĵ rōn, im ro rej ion armij ro, im armij otemjej dri eneo, im rar bōk-lōltok kiñ eo jen imōn Jeova: im rar itok ilo kejem eo eutieĵ ñōn imōn kiñ, im likit kiñ eo ion tron in ailñ eo. 21 Ein drein armij otemjej dri eneo rar lōñliñ, im jikin kwelok eo ej ainemōn. Im emwij mōn Atalaia kin jāji.

24 ¹ Ridtōn Joash jiljilimjuōn yiō ke ej jino an kiñ; im e ar kiñ iomin eñoul yiō i Jerusalem: im etan jinen Zibia, jen Bier-shiba. 2 Im Joash e ar kōmōn men ko remōn

iman mejen Jeova ran otəmjej an Jihoiada pris. 8 Im Jihoiada e ar bök fñon e ruo belen; im e ar keutak ro nej-in man in kōra.

4 Im elikin men in Joash e ar lem-nok en kōkāl mweo imōn Jeova. 5 Im e ar kokweloktok pris ro im ro dri Livai, im ba fñon ir, Komin drioij-lok fñon jikin kwelok ko in Juda, im aintok jen dri Israel otemjej mōnni in kōkāl imōn ami Anij jen yiō fñon yiō; im komin kaiur kom kake. Ijoke, ro dri Livai re jab kaiur ir. 6 Im kiñ eo e ar kirtok Jihoiada eo e utiej, im ba fñon e, Etke kwar jab jiroñ ro dri Livai bwe ren bōktok jen Juda im Jerusalem, owōj an Moses kori-jeran Jeova, im an jar an Israel, fñon imōn kalimur eo? 7 Bwe ro nej-in Atalaia, kōra eo e nana, rar rupe imōn Anij; im bar juōn, rar lelok fñon Beal ko men otemjej men in lelok in imōn Jeova.

8 Ein drein kiñ eo e ar jiroñ, inem rar kōmōnmōn juōn dipdip, im likit e ilikin kejem in imōn Jeova. 9 Im rar kwalok juōn nan in jiroñ ilo aolepen Juda im Jerusalem, bwe ren bōktok fñon Jeova owōj eo Moses kori-jeran Anij e ar likit ion Israel ilo ene jemaren. 10 Im iroi-j otemjej im armij otemjej rar lōñliñ im bōktok im jolok na ilo dipdip eo mae ien rej kamwijlok. 11 Im ein drein ilo ien eo ke rar bōktok dipdip eo fñon ro dri kabwijrōk an kiñ, kin pein ro dri Livai, im ke rar lo bwe elōñ mōnni, dri jeje an kiñ eo im dri kabwijrōk an pris elap rar item kamāt jen kobōn dipdip eo, im bōke, im bar bōklok e fñon jikin. Ein drein air kōmōn ran im ran, im rar aintok elōñ mōnni. 12 Im kiñ eo im Jihoiada, rar lilok fñon ro rar kōmōn jerbal eo ilo imōn Jeova: im rar kajerbal ro dri jerbali dreka im ro dri jerbali alal bwe ren kōkāl mōn Jeova, im bareinwōt ro rej jerbal ilo māl im jinibōrōrō bwe ren kōkāl imōn Jeova. 13 Ein drein ro dri jerbal rar jerbal wōt, im jerbal in kōkāl e ar wōnmanlok ilo peir, im rar kajutōk imōn Anij ekar fñon wāwen, im kabine. 14 Im ke

rar kajemlok e, rar bōktok bwen mōnni eo fñon iman kiñ eo im Jihoiada, im rar kōmōnmōn jen e jābi ko fñon imōn Jeova, jābi ko fñon kori-jer kaki im katok, im jibun ko, im jābi ko gold im silver. Im rar lelok katok kijeek ko ilo imōn Jeova, ien otemjej, ran otemjej an Jihoiada.

15 A Jihoiada e ridtolok wōt im elōñ ran ko an, inem e mij. Ridtōn jibu-ki jilñoul yiō ke e mij. 16 Im rar kalibwin e ilo jikin kwelok an Devid iben kiñ ro, kin an kar kōmōn emōn fñon Israel, im fñon Anij in mweo imōn. 17 Ak elikin an Jihoiada mij, iroi-j ro in Juda rar item barikrik fñon kiñ eo. Inem kiñ eo e ar eoroñ ir. 18 Im rar illok jen imōn Jeova, Anij an ro jimair, im rar kori-jer fñon Ashira ko im ekjōp ko; im illu e ar itok ion Juda im Jerusalem kin nana in rueir. 19 Ijoke, E ar jilkinlok ro dri kanan fñon ir, bwe ren bar kejeblaktok ir fñon Jeova; im rar drikanij jumae ir, a re makoko in eoroñ.

20 Im Jitōb ōn Anij e ar itok fñon Zekaraia nej-in Jihoiada pris eo; im e ar jutōk ilōñin armij ro, im e ba fñon ir, Ein drein Anij ej ba, Etke komij kokkure kien ko an Jeova, bwe kom ban jerammōn? kin ami illok jen Jeova, E ar bareinwōt illok jen kom. 21 Im rar kabata nae e, im rar kare e kin dreka, ke kiñ eo ej jiroñ ir, ilo worwor an imōn Jeova. 22 Ein drein Joash kiñ eo e ar jab keme-mej joi-j eo Jihoiada jemen e ar kwalok fñon e, a e ar mōn leo nej-in. Im ke e mij, e ba, Jeova en loe im nawō-nan kake.

23 Im ein drein ilo jemlokōn yiō eo, jar in tōrinae an ro dri Siria rar wōnliñtok nae e: im rar itok fñon Juda im Jerusalem, im rar mōn iroi-j otemjej jen iben armij ro, im jilkinlok men in rakim jen ibeir fñon kiñ in Damaskōs. 24 Bwe jar an ro dri Siria rar itok, im eiet wōt armij ro; im Jeova e ar ketōk juōn jar in tōrinae e kanuij lap na ilo peir, kin air illok jen Jeova Anij an ro jimair. Ein drein air kōmōn ekajet ion Joash.

25 Im ke emwij air illok jen iben, (bwe rar likit e nañinmij wôt jirik), ro dri korijeran rar kabata nae e kin bôtôktôkin ro nejin Jihoiada pris eo, im rar môn e ion aowej eo an, inem e mij; im rar kalibwin e ilo jikin kwe-lok an Devid a rar jab kalibwin e ilo lûp ko lûpôn kiñ ro. 26 Im rein ro rar kabata nae e: Zebad nejin Shimmeat lio dri Amon, im Jehozebad nejin Shimrit lio dri Moab. 27 A kin ro nejin, im ine elap ion, im air kô-kâl mweo imôn Anij, lo emwij jeje ilo buk in kemeleleik buk in kiñ ro. Im Amazaia nejin e ar kiñ im binej jenkwôn.

25 ¹Amazaia e ar ridtôn roñoul lailim yiô ke e jino an kiñ; im e ar kiñ iomin roñoul druatimjuôn yiô i Jerusalem: im etan jinen Jihoadan, jen Jerusalem. 2 Im e ar kômôn emôn iman mejen Jeova, a jab kin an wäppen buruen. 3 A ke emwij kabinlok ailiñ eo ñôn e, e ar môn ro dri korijeran, ro rar môn kiñ eo jemen. 4 A e ar jab môn ro nejir, a e ar kômôn ekar ñôn nan eo emwij jeje ilo kien ilo buk in Moses, einwôt Jeova e ar jiroñ, im ba, ²Ro jemeir re jamin mij kin ro nejir, im ro nejir re jamin mij kin ro jemeir: a jabrewôt armij e naj mij kin bwir eo an.

5 Bar juôn, Amazaia e ar kokwe-loktok ro dri Juda, im kilajrök ir ekar ñôn mo ko imôn ro jimair, iomin kapen ro in tausan ko im kapen ro in buki ko, aolepen Juda im Benjamin: im e ar bwini ir otemjej jen roñoul yiô im jima, im e ar lo jilu buki tausan armij emwij kalet ir, ro re maroñ in ilen tōrinae, re maroñ in kwotōke mōri im likipijñōk. 6 Bareinwôt e ar kajerbal jibuki tausan armij re beran im kajur jen Israel kin jibuki talent silver. 7 A juôn armij òn Anij e ar itok ñôn iben, im e ba, O kwe kiñ, kwon jab likit bwe jar in tōrinae jen Israel en ilok ibōmlok: bwe Jeova e jab iben Israel, iben ro nejin Ipream otemjej. 8 A elañe kwo kōnan ilok, kwon beran, kwon kajur ñôn tōrinae eo; Anij e naj jolōllok

kom iman ro dri kijirāte kom; bwe iben Anij kajur in jibōñ, im kajur in jolōllok. 9 Im Amazaia e ar ba ñôn armij eo òn Anij, A in it kin jibuki talent ko emwij aō lelok ñôn jar in tōrinae an Israel? Im armij eo òn Anij e ar uak, Jeova e maroñ in lewōj e kanuij lōñ jen men kein. 10 Inem Amazaia e ar kejenolok jar in tōrinae eo e ar itok ñôn iben jen Ipream, bwe ren bar jeblaklok ñôn jikir: kin men in e kanuij bwil air illu nae Juda, im rar jeblaklok ñôn jikir kin illu elap. 11 Inem Amazaia e beranlok, im tellok ro dron, im ilok ñôn komlōl Jättōk, im e ar mōn ian ro nejin Sier joñoul tausan. 12 Im joñoul tausan ro nejin Juda rar āñinlok ir im re mour, im rar tellok ir ñôn jabōn dreka eo, im jolōllok ir jen jabōn dreka eo, inem rar ekababe aolepeir. 13 A dri tōrinae ro Amazaia e ar kejeblaktok ir bwe ren jab ilok iben ñôn tōrinae eo, rar tōrinaek jikin kwelok ko an Juda, jen Sameria ñôn Bet-horon, im mōn jilu tausan iair, im bōk elōñ men in rakim.

14 Ein drein elikin an Amazaia itok jen an mōn ro dri Idōm, ¹e ar bōktok ekjōp ko an ro nejin Sier, im kajutōk ir bwe ren anij ro an, im barikrik imair, im tile kaijurjur ñôn ir. 15 Kin men in e bwil illu an Jeova nae Amazaia, im E ar jilkinlok ñôn iben, juôn dri kanan, im e ar ba ñôn e, Etke kwar kabukot anij ro an juôn ailiñ, im rar jab kōtlok armij ro air jen peōm? 16 Im ein drein ke e ar konono iben, kiñ eo e ar ba ñôn e, Kim ar kōmōn yuk dri bebe an kiñ ke? emwij; bwe etke ren mōn juk? Inem dri kanan eo ej ikōñ, im e ba, I jela Anij e ar bebe in mōn yuk, kin am kōmōn men in, im kwar jab eo-roñ aō bebe.

17 ²Inem Amazaia e ar bebe kake, im jiliklok ñôn Joash, nejin Jihoa-haz, nejin Jihu, kiñ in Israel, im e ba, Kwon itok im jenro jelmae dron. 18 Im Joash kiñ in Israel e ar jiliklok ñôn Amazaia kiñ in Juda, im e ba, ³Mār kuj eo e ar ber i Lebanon e ar

jilkinlok ñōn wijki aik eo e ar ber i Lebanon, im e ba, Kwon lelok lio ne-jōm bwe en belen leo nejiō: inem juōn kiru e awia ej ilo Lebanon, e ar elā im jure mār kuj eo. 19 Kwoj ba, Lo, kwar mōn Idōm: im buruōm ej koutiej yuk in jualōñlōñ: kwon ber-wōt i kabijuknōm; etke kwoj owa-juij ñōn jorran bwe kwon buñ, kwe im Juda ibōm?

20 A Amazaia e jab kōnan eoroñ e; bwe men eo jen Anij, bwe En kōt-lok ir na ilo pein ro dri kijirāte ir, kin air kabukot anij ro an Idōm. 21 Ein drein Joash kiñ in Israel e ar wōnliñ-lok; im irro Amazaia rar jelmae dron i Bet-shimesh, eo an Juda. 22 Im dri Juda rar jab bōk anjo jen Israel; im rar ko jabrewōt armij ñōn mweo imōn. 23 Im Joash, kiñ in Israel, e ar bōk Amazaia kiñ in Juda, nejin Joash, nejin Jihoahaz, i Bet-shimesh, im āñinlok e ñōn Jerusalem, im e ar rupe worwor in Jerusalem jen kejem in Ipreim ñōn kejem eo i bōul, ābuki kubit. 24 Im e ar bōk aolepen gold im silver, im jābi otemjej rar loi ilo imōn Anij iben ¹Obed-idom, im mweik ko ilo mweo imōn kiñ, ro dri kamol bareinwōt, im e ar jeblaktok ñōn Sameria.

25 ² Im Amazaia nejin Joash kiñ in Juda e ar mour wōt elikin Joash nejin Jihoahaz kiñ in Israel, joñoul lailim yiō. 26 Ak jerbal ko jet an Amazaia, ko mokta im eliktata, lo, ar jab jeje ilo buk in kiñ ro in Juda im Israel ke? 27 Ak jen ien eo ke Amazaia e ar jeorlok jen an lor Jeova, rar kabata nae e i Jerusalem; im e ar ko ñōn Lekish; a rar lukworkwor e ñōn Lekish, im mōn e ijo. 28 Im rar bōktok e ion ors ko, im rar kalibwin e iben ro jiman ilo jikin kwelok an Juda.

26 Inem dri ailiñ otemjej rar bōk Uzzaia, ridtōn jōnoul jiljino yiō, im kōmōn e kiñ in binej jenkwōn jemen, Amazaia. 2 Im e ar kalek Ilot, im kejeblaktok e ñōn Juda, elikin an kiñ eo kiki iben ro jiman. 3 Ridtōn Uzzaia joñoul jiljino yiō ke e

jino an kiñ; e ar kiñ iomin limñoul ruo yiō i Jerusalem: im etan jinen Jekilaia jen Jerusalem. 4 Im e ar kōmōn men ko re jime iman mejen Jecva, ekar ñōn aolepen men ko jemen, Amazaia, e ar kōmōne. 5 Im e ar kabukot wōt Anij ilo ran ko an Zekaraia, eo e ar jela kin vison eo an Anij; im iomin ien an bukot Jeova, Anij e ar kejerammōn e.

6 Im e ar driojlok im tōrinaek ro dri Pilistia, im e ar rupe worwor in Gath, im worwor in Jabne, im worwor in Ashdod: im e ar kalek jikin kwelok ilo ailiñ in Ashdod, im iolapen ro dri Pilistia. 7 Im Anij e ar jibōñ e nae ro dri Pilistia im nae ro dri Arebia ro rar jokwe i Gur-beal, im ro dri Meun. 8 Im ro dri Amon rar owōjlok ñōn Uzzaia: im etan e ar buñbuñlok ñōn mejāti in Ijpt; bwe e kanuij kajurlok. 9 Bar juōn, Uzzaia e ar kalek mo ko imōn bar i Jerusalem i kejem iturin bōul eo, im i kejem in komlōl, im ijo worwor eo ej oktōk, im kabin ir. 10 Im e ar kalek mo ko imōn bar ilo ene jemaren, im jekjek elōñ aibij dreka, bwe elōñ an kiru; bareinwōt i ene etā, im i ene emōn biken: im iben, eor dri lale jikin kallip im bwil in grep ilo tol ko, im ilo jikin kallip ko remōn: bwe mijlokin kallip. 11 Bareinwōt iben Uzzaia juōn jar in tōrinae, rar ilen tōrinae ilo jar ko redrik, ekar ñōn orair ke emwij bwine ir kin Jeiel dri jeje eo, im Measeia dri kabwijrōk, iomin pein Hanenaia juōn ian kapen ro an kiñ eo. 12 Im aolepen oran jiōb ro an imōn ro jimar, armij re beran im kajur, ruo tausan jiljino buki. 13 Im iomin peir juōn jar in tōrinae, jilu buki jiljilimjuōn tausan limabuki, rar tōrinae kin kajur e kanuij lap, im jibōñ kiñ eo nae ro dri kijirāte. 14 Im Uzzaia e ar kapojōk ñōn ir, ñōn aolepen jar in tōrinae eo, likipijñōk ko, im mōri ko, im ken kōrape bōrair, im ken tōrak, im libon ko, im dreka in bwot. 15 Im e ar kōmōnmōn ilo Jerusalem ken tōrinae ko, ro dri kabel rar kine, bwe ren ber ion imōn bar ko im ion worwor ko, in kiele kake mōri im dreka ko relap.

Im etan e buñbuñ ñōn ijo etolok : bwe ar kanuij jibōñ e mae ien e kajur wōt.

16 A ke e kajur, e utiejlok buruen, inem e ar kōmōn nana, im e ar bwir nae Jeova an Anij; bwe e ar dreloñ iloan tempel an Jeova bwe en kōkaijurjur ion lokatok in kaijurjur eo.

17 Im Azaraia pris eo e dreloñ ilokōn lok, im iben drualitōkñoul pris an Jeova, armij re beran wōt: 18 im rar jumae Uzzaia kiñ eo, im re ba ñōn e, E jab kwonam kōkaijurjur ñōn Jeova, Uzzaia, a kwonan pris ro nejin Aron, ro emwij kokwojarjar ir ñōn kōkaijurjur: kwon drioijslok jen jikin kwojarjar eo; bwe kwo bwir: im e jamin men in nebar yuk jen Jeova Anij. 19 Inem Uzzaia ej illu; im juōn senser ilo pein in kōkaijurjur kake; im ilo ien an illu ñōn pris ro, 1 nañinmij in leper e ar walok ilo dremōn iman pris ro ilo imōn Jeova iturin lokatok in kaijurjur. 20 Im Azaraia pris elap, im pris otemjej, rar reilok ñōn e, im lo, eor nañinmij in leper ilo dremōn, im rar mōkōj in kadrioijslok e jen ijo: aet e ar kaiur e in ilok, kin ke Jeova e ar mōn e. 21

2 Im Uzzaia kiñ eo, dri leper ñōn ran eo e mij, im e ar jokwe ilo juōn im mōke ian, bwe e dri leper; im emwij bōprae an dreloñ ilo imōn Jeova: im Jotam nejin, e ar ion imōn kiñ, im e ar ekajete ro dri eneo. 22 Ak jerbal ko jet an Uzzaia, ko mokta im eliktata, Aiseia dri kanan, nejin Emoz, e ar je. 23 Ein drein Uzzaia e ar kiki iben ro jiman; im rar kalibwin e iben ro jiman, ilo wuliej eo an kiñ ro; bwe re ba, E dri leper: im Jotam nejin e ar kiñ im binej jenkwōn.

27 3 Jotam e ar ridtōn roñoul lailim yiō ke e ar jino an kiñ; im e ar kiñ iomin joñoul jiljino yiō i Jerusalem: im etan jinen Jirusha nejin Zedok. 2 Im e ar kōmōn men ko re jime iman mejen Jeova, ekar ñōn aolepen men eo Uzzaia jemen e ar kōmōne. Mekarta, e ar jab dreloñ ilo tempel an Jeova. Im dri ailiñ eo rar kōmōn nana wōt. 3 E ar kalek kejem eo e utiej an imōn Jeova, im ion

worwor in Opel elap an kalek. 4 Bar juōn, e ar kalek jikin kwelok ilo ene utiej in Juda, im ilo jikin wijki ko e ar kalek me ko im imōn bar ko. 5 Bareinwōt e ar tōrinaek kiñ an re nejin Amon, im bōk anjo jen ir. Im ro nejin Amon rar lelok ñōn e ilo yiō eo wōt jibuki talent silver, im joñoul tausan joñok in wit, im joñoul tausan an barli. Ein drein ro nejin Amon rar lelok ñōn e yiō eo ken ka ruo, bareinwōt ilo yiō eo ken ka jilu. 6 Ein drein Jotam e ar kajurlok, bwe e ar kajime ial ko an iman Jeova an Anij. 7 Ak jerbal ko jet an Jotam, im tōrinae ko otemjej an, lo emwij jeje ilo buk in kiñ ro an Israel im Juda. 8 E ridtōn roñoul lailim yiō ke e ar jino an kiñ, im e ar kiñ iomin joñoul jiljino yiō i Jerusalem. 9 Im Jotam e ar kiki iben ro jiman, im rar kalibwin e ilo jikin kwelok an Devid: im Ehaz, leo nejin, e ar kiñ im binej jenkwōn.

28 1 Ehaz e ar ridtōn roñoul yiō ke e ar jino in kiñ: im e ar kiñ iomin joñoul jiljino yiō i Jerusalem: im e ar jab kōmōn men ko re jime iman mejen Jeova, einwōt Devid jemen; 2 a e ar etetal ilo ial ko an kiñ ro in Israel, im e ar bareinwōt kōmōnmōn men in e unlok ko ñōn Beal ko. 3 Bar juōn, e ar kōkaijurjur ilo komlōl in nejin Hinnom, im e ar tili ro nejin ilo kijeek, ekar ñōn men in jōjōik an ro dri ailiñ ko Jeova e kar jolok jen iman ro nejin Israel. 4 Im e ar katok im kōkaijurjur ilo jikin ko re utiej, im ion tol ko, im iomin jabrewōt wijki e māroro.

5 Kin men in 2 Jeova an Anij e ar ketōk e na ilo pein kiñ in Siria; im rar mōn e, im āñinlok ian ro dron juōn jar elap jaran ro dri jebokwe, im bōktoke ñōn Damaskōs. Im ar bareinwōt ketōk e na ilo pein kiñ in Israel, eo e ar mōn e, im elap air mōn e. 6 Bwe Pika nejin Remalaia e ar mōn ilo Juda jibuki roñoul tausan ilo juōn ran, ir otemjej armij re beran; kin air illok jen Jeova, Anij an ro jimair. 7 Im Zikrai, juōn armij e kajur jen

Ipream, e ar mōn Measeia nejin kiñ eo, im Azrikam iroiñ in mweo, im Elkena eo ijillockin kiñ eo.

8 Im ¹ro nejin Israel rar āñinlok ro dri jebokwe ian ro jeir im jātir rubuki tausan, kōra ro, ro nejir man im kōra, im bareinwōt bōklok men in rakim elap jen ibeir, im rar bōktok men in rakim ko ñōn Sameria. 9 A juōn dri kanan an Jeova e ar ber ijo etan Oded: im e ar drioijlok in wōnmae jar in tōrinae eo e ar itok ñōn Sameria, im e ba ñōn ir, Lo, bwe Jeova Anij an ro jimami, E ar illu iben Juda, E ar ketōk ir na ilo peōmi, im kom ar mōn ir kin juōn illu e ar tōbarlok lōñ ko. 10 Im kiō komij bebe in ketōk ro nejin Juda im Jerusalem dri korijerōmi man im kōra: a e jab ibemi wōt bwir ko ami nae Jeova Anij eo ami ke? 11 Inem komin eoroñ iō, im kejeblaklok ro dri jebokwe, ro kom ar kejebokweik ir ian ro jeōmi im jātōmi; bwe illu e bwil jen Jeova ej iomi. 12 Inem jet ian jiōb ro an ro nejin Ipream, Azaraia nejin Johenan, Berikaia nejin Meshillemot, im Jehizkaia nejin Shallum, im Amasa nejin Hadlai, rar jutōk jumae ro rar itok jen tōrinae eo, 13 im re ba ñōn ir, Kom jamin bōktok ro dri jebokwe ñōn ijin: bwe men eo komij lemnok e naj bōktok ioer juōn bwir nae Jeova, im korlok jerawiwi ko ar im bwir ko ar; bwe elap aruij bwir im eor illu e bwil ion Israel. 14 Ein drein ro dri tōrinae rar likit ro dri jebokwe im men in rakim eo iman iroiñ rōn im iman aolepen jar eo. 15 Im armij ro emwij kwalok etair rar jutōk, im bōk ro dri jebokwe, im kin men in rakim rar kanuknuk ir otemjej re kelwan iair, im kalitlit ir, im naballin neir, im lelok ñōn ir kijeir im limeir, im kabit ir, im bōklok ion ass ko ro otemjej re mōjino iair, im bōktok ir ñōn Jeriko, jikin kwelok in wijk pam ko, ñōn iben ro jeir im jātir: inem rar jeblak ñōn Sameria.

16 Im ilo ien eo kiñ Ehaz e ar jilkinlok ñōn kiñ in Assiria bwe en jibōñ e. 17 Bwe ro dri Idōm rar bar

item mōn Juda, im rar bōklok jet dri jebokwe. 18 Bareinwōt ro dri Pillitia rar tōrinaek jikin kwelok ko ilo ene etā, ilo mōtōn Juda irōk, im rar bōk Bet-shimesh, im Aijalon, im Gederot, im Soko, kab jikin ko wujen, im Timna kab jikin ko wujen, Gimzo bareinwōt kab jikin ko wujen: im rar jokwe ie. 19 Bwe Jeova e ar kanuij kōtaik Juda, kin Ehaz kiñ in Israel; bwe e ar jerawiwi wōt im kanuij bwir nae Jeova. 20 Im Tilgat-pilniser kiñ in Assiria e ar itok ñōn iben, im kejorran e, a e ar jab kakajur e. 21 Bwe Ehaz e ar bōk jimōtōn jen ilo imōn Jeova, im jen ilo imōn kiñ, im jen mo ko imōn iroiñ ro, im lelok ñōn kiñ in Assiria, a e jab jibōñ e.

22 Im ilo ien an jorran e ar kalaplok an bwir nae Jeova, eñin kiñ Ehaz. 23 Bwe e ar katok ñōn anij ro an Damaskōs, eo e ar mōn e; im e ba, Kin an anij ro an kiñ ro in Siria jibōñ ir, kin men in I naj katok ñōn ir bweren jibōñ iō. A rar kokkure e im aolepen Israel. 24 Im Ehaz e ar kokweloktok jābi ko an imōn Anij, im tibririk jābi ko an imōn Anij, im kili aor ko an imōn Jeova; im e ar kōmōnmōn ñōn e lokatok ko ilo jabrewōt kābon in ial ko i Jerusalem. 25 Im ilo jabrewōt jikin kwelok in Juda e ar kōmōn jikin ko re utiej in kōkaijurrur ñōn anij ro jet, im e ar kakitōtōik Jeova ñōn illu, Anij an ro jimair. 26 Ak jerbal ko jet an, im ial ko an otemjej, ko mokta im ko eliktata, lo emwij jeje ilo buk in kiñ ro in Juda im Israel. 27 Im Ehaz e ar kiki iben ro jimair, im rar kalibwin e ilo jikin kwelok eo, ilo Jerusalem; bwe rar jab bōktok e ñōn lūpōn kiñ ro in Israel: im Hezeakaia nejin e ar kiñ im binej jenkwōn.

29 ¹ Hezeakaia e ar jino an kiñ ke ridtōn roñoul lailim yiō; im e ar kiñ iomin roñoul druatimjuōn yiō i Jerusalem: im etan jinen Abaija, lio nejin Zekaraia. 2 Im e ar kōmōn men ko re jime iman mejen Jeova, ekar ñōn aolepen men ko Devid jemen e ar kōmōni. 3 Ilo yiō eo mokta in

an kiñ, ilo aliñ eo mokta, e ar kabellok aor ko an imōn Jeova im kōkāl ir. 4 Im e ar kadreloñtok pris ro, im ro dri Livai, im kokweloktok ir ilo jikin eo e rābōkbōk i rear, 5 im e ar ba ñōn ir, Komin eoroñ iō, kom dri Livai, im mōke kokwojarjar kom, im kokwojarjar imōn Jeova, Anij an ro jimami, im bōklok etton ko jen jikin kwojarjar. 6 Bwe ro jemer rar bwir, im rar kōmōn nana iman mejen Jeova aruij Anij, im rar illok jen E, im rar jeorlok mejeir jen jikin jokwe an Jeova, im oktōklik jen E. 7 Im rar kili aor ko in portiko eo, im kwuni lamp ko, im rar jab kōkaijurjur ak katok kin katok kijeek ko ilo jikin kwojarjar ñōn Anij in Israel. 8 Kin men in illu an Jeova e ar ber ion Juda im Jerusalem, im E ar ketōk ir ñōn joto jotōk, im bwe ren men in bwilōñ, im men in jōjōik, einwōt komij lo kin mejōmi. 9 Bwe lo, ro jemer rar buñ kin jāji eo, im ro nejir man im kōra rej dri jebokwe kin men in. 10 Inem ej ilo buruō bwe in kōmōn juōn bujen iben Jeova, Anij in Israel, bwe illu eo An e bwil en jeorlok jen kij. 11 Kom, ro nejiō, komin jab jowōn kiō; bwe emwij an Jeova kālet kom bwe komin jutōk iman, bwe komin jermal ñōn E, im bwe komin dri korijeran, im kōkaijurjur.

12 Inem dri Livai rar jutōk, Mehat nejin Amesai, im Joel nejin Azaraia, ian ro nejin dri Kohat; im ian ro nejin Mirerai, Kish nejin Abdai, im Azaraia nejin Jehalelel; im ian ro nejin Gershon, Joa nejin Zima, im Iden nejin Joa; 13 im ian ro nejin Elzezan, Shimrai im Jeuel; im ian ro nejin Esap, Zekaraia im Mattanaia; 14 im ian ro nejin Himan, Jehuel im Shimeai; im ian ro nejin Jedutun, Shemeaia im Uzaiel. 15 Im rar kokweloktok ro jeir im jātir, im mōke kokwojarjar ir, im dreloñ, ekar ñōn kien kiñ eo kin nan ko jen Jeova, im karreoik imōn Jeova. 16 Im pris ro rar dreloñ ilo alen jab eo iloan imōn Jeova, im karreoik e, im bōkinabijtok brij eo rar loe ilo tempel in Jeova ñōn worwor eo an imōn Jeova. Im

ro dri Livai rar bōk e im ineklok e ñōn wea Kidron. 17 Ak rar jino ilo ran eo mokta in aliñ eo mokta bwe ren kokwojarjar, im ilo ran eo ken ka drualitōk in aliñ eo rar tōbrōk portiko eo an Jeova; im rar kokwojarjar imōn Jeova ilo drualitōk ran; im ilo ran eo ken ka joñoul jiljino in aliñ eo mokta rar kejemlok e. 18 Im rar dreloñlok ñōn iben Hezeakaia kiñ eo ilo mweo imōn, im re ba, Kim ar karreoik aolepen imōn Jeova, im lokatok in katok kijeek, iben jābi ko an otemjej, im tebel in bred in kalikar, im jābi otemjej an. 19 Bar juōn, jābi otemjej ko kiñ Ehaz e ar julok ilo an bwir ke e ar kiñ, kim ar kapojōk im kokwojarjari; im lo, rej iman lokatok an Jeova.

20 Inem Hezeakaia kiñ eo e ar jerrak ke e jiboñ wōt, im kokweloktok iroi ro in jikin kwelok eo, im wōnliñlok ñōn imōn Jeova. 21 Im rar bōktok jiljilimjuōn kau koman, im jiljilimjuōn sip koman, im jiljilimjuōn lam, im jiljilimjuōn got koman, ken katok kin jerawiwi an aliñ eo im kin jikin kwojarjar im kin Juda. Im e ar jiroñ pris ro nejin Aron bwe ren katok kaki ion lokatok in Jeova. 22 Ein drein rar mōn kau koman ko, im pris ro rar bōk bōtōktōkir, im kabūtūktūki ion lokatok eo; rar mōn lam ko bareinwōt im kabūtūktūk kin bōtōktōkir ion lokatok eo. 23 Im rar kadruaktok got koman ko, ko ñōn katok kin jerawiwi, iman kiñ eo im jar eo; im rar likit peir ioir: 24 im pris ro rar mōni, im rar kōmōn katok kin jerawiwi kin bōtōktōkir ion lokatok eo, im kōmōn kilājrokok ñōn aolepen Israel; bwe kiñ eo e ar jiroñ bwe katok kijeek ko, im katok jerawiwi, ren ñōn aolopen Israel.

25 Im e ar ¹likit ro dri Livai ilo imōn Jeova, im ibeir simbal ko im salteri ko, im arp ko, ekar ñōn kien Devid, bareinwōt kien Gad dri loio an kiñ eo, im an Netan dri kanan eo; bwe nan in jiroñ eo jen Jeova kin dri kanan ro An. 26 Im dri Livai rar jutōk, im ibeir ken kajōñjōñ ko an

Devid, im pris ro, im ibeir jilil ko. 27 Im Hezekaia e ar jiroñ bwe ren katok kin katok kijeek ion lokatok eo. Im ke e jino katok kijeek eo, e ar jino bareinwõt al ññ Jeova, im jilil ko kab ken kajññjñ ko an Devid kiñ in Israel. 28 Im aolepen jar eo rar kabuñ, im ro dri al rar al wõt, im ro dri ilil rar uk jilil; aolepen men kein rar stal wõt mae ien kamwijlok katok kijeek.

29 Im ke rar kamwijlok air katok, 1 kiñ eo im ro otemjej rej ber iben ijo rar barikrik im kabuñ. 30 Bar juñ, Hezekaia kiñ eo im iroiñ ro rar jiroñ ro dri Livai bwe ren al al in nebar ko ññ Jeova kin nan ko an Devid, im Esap dri lolo eo. Im rar al al in nebar ko kin lõñliñ, im rar mōjir kin bōrair im kabuñ.

31 Inem Hezekaia e ar uak im ba, 2 Kiō kom ar mōke kokwojarjar kom ññ Jeova; komin druaktok im bōktok katok ko, im jurtak in kamolol ko ilo imñ Jeova. Im jar eo rar bōktok iloa, katok ko im jurtak in kamolol ko; im jabrewõt ro rar kōnan ilo burueir rar bōktok katok kijeek ko. 32 Im oran katok kijeek ko jar eo rar bōktok jiljilimjuññoul kau koman, jibuki sip koman, im rubuki lam: ir kein otemjej rej ññ katok kijeek ññ Jeova. 33 Im men ko men in lelok, jiljino buki ox im jilu tausan sip. 34 A pris ro re jab bwe, inem re ban jōjen kilir men in katok kijeek otemjej; kin men in ro jeir im jātir, dri Livai, rar jibōñ ir, mae ien emwij jerbaleo, im mae ien an pris ro mōke kokwojarjar ir; bwe dri Livai rar wāppenlok ilo burueir bwe ren mōke kokwojarjar ir jen pris ro. 35 Im bareinwõt katok kijeek ko relōñ, im kioeo in katok ainemōn ko, im jurtak in irak ko ññ jabrewõt katok kijeek. Ein drein air kilājrok jerbaleo in imñ Jeova. 36 Im Hezekaia e ar lõñliñ, kab armij otemjej, kin men ko Anij e ar kapojōk ññ armij ro: bwe e mōkōj air kōmōn men in.

30 Im Hezekaia e ar jiliklok ññ aolepen Israel im Juda, im e ar

jeje letter ko bareinwõt ññ Ipreim im Menassa, bwe ren itok ññ imñ Jeova i Jerusalem, in lale men in kijone ññ Jeova, Anij in Israel. 2 Bwe emwij an kiñ eo, im iroiñ ro, im aolepen jar eo ilo Jerusalem, bebe bwe ren lale men in kijone, ilo aliñ eo ken ka ruo. 3 Bwe re ban lale ilo ien eo, bwe e jab bwe pris ro rar mōke kokwojarjar ir, im bareinwõt armij ro rar jab kweloktok i Jerusalem. 4 Im men in e jime iman mejen kiñ eo im aolepen jar eo. 5 Ein drein rar kōmōn juñ kien in kwalok nan eo ilo aolepen Israel, jen Bier-shiba ññ Dan, bwe ren iten lale men in kijone ññ Jeova, Anij in Israel, i Jerusalem: bwe e jab lõñ ro rar lale einwõt emwij jeje kake. 6 Ein drein ro dri jilik rar ilok im bōklok letter ko jen kiñ eo im iroiñ ro, im aolepen Israel im Juda, im ekar ññ kien kiñ eo, im re ba, Kom ro nejin Israel, komin bar oktōk ññ Jeova, Anij an Ebream, Aisak, im Israel, bwe En jeblaktok ññ ro mātōn iri iami emwij air ko jen pein kiñ ro in Assiria. 7 Im komin jab einwõt ro jememi, im einwõt ro jeōmi im jātōmi, ro rar bwir nae Jeova, Anij an ro jimar, inem E ar lelok ir ññ kokkure, einwõt komij lo. 8 Inem komin jab benawia, einwõt ro jeōmi; a komin lelok kom ññ Jeova, im dreloñlok ilo jikin kwojarjar eo An, eo E ar kokwojarjar e ññ in drio, im komin korijer ññ Jeova ami Anij, bwe illu e bwil eo An en jeorlok jen kom. 9 Bwe elañe kom bar oktōk ññ Jeova, ro jeōmi im jātōmi im ro nejōmi re naj lo tiriamo iman ro rar kejebokweik ir, im re naj jeblaktok ilo enin: bwe Jeova ami Anij e joij im Ej tiriamokake, im E jamin kejeorlok mejen jen kom, elañe komij bar jeblaklok ññ E.

10 Ein drein ro dri jilik rar ilok jen jikin kwelok ññ jikin kwelok ilujen ene in Ipreim im Menassa, im ññ Zebulun: a rar tōñkake im kajirere kake ir. 11 Mekarta, jet ian Asher im Menassa im Zebulun rar mōke kōtaik ir, im rar itok ññ Jerusalem. 12 Bareinwõt pein Anij e ar itok ion

Juda bwe En lelok ñōn ir juōn wōt burueir, in bokake kien kiñ eo im kien iroiĵ ro kin nan jen Jeova.

13 Im elōñ armij rar kweloktok i Jerusalem, in lale kwoĵkwoĵ in bred e jab uwe, ilo aliñ ken ka ruo, juōn jar e kanuij lap. 14 Im rar jerkak im bōklok lokatok ko rej ilo Jerusale-
 m, im bareinwōt lokatok in kōkai-
 jurjur otemjej, rar bōklok ir, im julok ilo wea Kidron. 15 Im rar mōn men in kijone ilo ran eo ken ka joñoul emen ilo aliñ eo ken ka ruo : im pris ro im ro dri Livai rar jok, im mōke kokwojarjar ir, im bōktok katok kijeek ko na ilo imōn Jeova. 16 Im rar jutōk ilo jikir ekar ñōn lājrok eo air, ekar ñōn kien Moses armij ōn Anij : pris ro rar kabūtūktūk dran eo emwij air bōk e jen pein ro dri Livai. 17 Bwe elōñ ilo jar eo re jañin mōke kokwojarjar ir : kin men in ro dri Livai rar lale jerbal in mōn men in kijone ko ñōn jabrewōt eo e jaberreo, bwe ren kokwojarjar ir ñōn Jeova. 18 Bwe elōñ ian armij rōn, aet elōñ ro dri Ipream, im Menassa, im Issakar, im Zebulun, rar jab mōke karreoik ir, ijoke rar mōña men in kijone ein juōn jen eo emwij jeje kake. Bwe Hezeakaia e ar jar kin ir, im e ba, Jeova eo emōn En jolok bwir an jabrewōt eo 19 ej kabin buruen in kabukot Anij, Jeova, Anij an ro jiman, meñe e jab erreo ekar ñōn karreo eo an jikin kwojarjar. 20 Im Jeova e ar eoroñ Hezeakaia, im kaejmour armij ro. 21 Im ro nejin Israel rej ber i Jerusalem rar lale kwoĵkwoĵ in bred e jab uwe, iomin jiljilimjuōn ran kin lōñliñ elap ; im ro dri Livai im pris ro rar nebar Jeova ran otemjej, im al iben ken kajōñjōñ elap ainikeir ñōn Jeova. 22 Im Hezeakaia e ar konono joij ñōn dri Livai otemjej emōn air jela kin jerbal ñōn Jeova. Ein drein rar mōña ilo kwoĵkwoĵ eo iomin ran ko jiljilimjuōn, im katok kin men in katok ainemōn ko, im kwalok burueir ñōn Jeova Anij an ro jimair.

23 Im aolepen jar eo ¹ rar bebe in

lale bar jiljilimjuōn ran ; im rar lale bar jiljilimjuōn ran kin lōñliñ. 24 Bwe Hezeakaia kiñ in Juda e ar lelok ñōn jar eo men in katok ko, juōn taus-
 san kau koman im jiljilimjuōn taus-
 sip ; im iroiĵ ro rar lelok ñōn jar eo juōn taus-
 san kau koman im joñoul
 taus-
 sip : im elōñ ian pris ro rar mōke kokwojarjar ir. 25 Im aolepen jar an Juda, kab pris ro im ro dri Li-
 vai, im aolepen jar eo e ar itok jen Israel, im ro dri itoitōk rar itok jen ilo ene in Israel, im rar jokwe ilo Juda, rar lōñliñ. 26 Ein drein elap lōñliñ ilo Jerusalem ; bwe jen ien Solo-
 mon nejin Devid kiñ in Israel, e ar ejelok einwōt i Jerusalem. 27 Inem pris ro im ro dri Livai rar jutōk im kamōnōnōik armij ro ; im emwij eoroñ ainikeir, im jar eo air e ar wōnliñtok ñōn jikin kwojarjar eo An, aet ñōn lōñ.

31 A ke emwij an kōmōn aolepen men kein, dri Israel otemjej rar ber ijo, rej ilok ñōn jikin kwelok ko in Juda, im ruprupi jur ko, im juokwe Ashira ko, im ruplōllok jikin ko re utiej im lokatok ko i aolepen Juda im Benjamin, ilo Ipream barein-
 wōt im Menassa, mae ien emwij air kokkure aolepeir. Inem ro nejin Is-
 rael otemjej rar jeblaklok, jabrewōt armij ñōn mweo imōn, ilo jikin kwelok ko air.

2 Im Hezeakaia e ar karōk lajrōk ko an pris ro im ro dri Livai ekar ñōn lajrōk ko air, jabrewōt armij ekar ñōn jerbal eo an, pris ro kab ro dri Livai, ñōn katok kijeek ko, im jur-
 tak in ainemōn ko, bwe ren korijer, im kamolol, im nebar ilo kejem ko in kamp an Jeova. 3 E ar bareinwōt na kien kwonan kiñ eo jen mweiuk ko an, ñōn katok kijeek ko, ir kein ñōn katok kijeek ke e jiboñ im jota, im katok kijeek ko ñōn Sabat ko, im ñōn aliñ ko rekāl, im ñōn kwoĵkwoĵ ko emwij likiti, einwōt jeje ilo kien Jeova. 4 Bar juōn, e ar jiroñ armij ro rar jokwe ilo Jerusalem bwe ren lelok kij an pris ro im ro dri Livai, bwe ren maroñ in mōke lelok ir ñōn kien Jeova. 5 Im ke kien eo e ar

berijōke, ro nejin Israel rar lelok elōñ an jomōkōj in korn, wain ekāl, im hōnni, im jen aolepen orlok an jikin kallip ko; im rar bōktok elōñ mōtōn joñoul in men ko otemjej. 6 Im ro nejin Israel im Juda rar jokwe ilo jikin kwelok ko in Juda, rej bareinwōt bōktok mōtōn joñoul an ox ko im sip ko, im mōtōn joñoul an men ko emwij lelok rar kokwojarjar ir ñōn Jeova air Anij. im rar likiti ilo ejoi ko. 7 Im ilo aliñ eo ken ka jilu rar jino in kōmōn loñtōn ejoi ko, im kamwijlok ilo aliñ eo ken ka jiljilimuñ. 8 Im ke Hezeakaia im iroi ro rar item lo ejoi ko, rar item kamōnōñōk Jeova, im Israel, ro dron. 9 Inem Hezeakaia e ar kajitōk iben pris ro im ro dri Livai kin ejoi ko. 10 Im Azaraia pris eo elap, jen imōn Zedok, e ar uak e im ba, Jen ien eo ke armij rar jino in bōktok jurtak ko ñōn iloan imōn Jeova, kim ar mōña im māt, im elōñ ej berwōt; bwe Jeova e ar kejerammōn ro dri ailiñ An; im men in elap, wēn.

11 Inem Hezeakaia e ar jiroñ bwe ren kapoj rum ko ilo imōn Jeova; im rar kapoji: 12 im rar bōktok na iloan, jurtak ko, im mōtōn joñoul ko, im men ko men in lelok, im tiljek kake. Im Konenaia dri Livai e ar iroi ioir, im ijillokin Shimeai jātin, 13 im Jehaiel, Azazaia, im Nehat, im Esahel, im Jerimot, im Jozabad, im Ilaiel, im Ishmekaia, im Mehat, im Beneaia, rar dri lale iomin pein Konenaia im Shimeai, kin kien Hezeakaia kiñ, im Azaraia iroi ion imōn Anij. 14 Im Kore nejin Imna dri Livai, dri lale kejem eo i rear, e ar ion jurtak ko kin kōnan ñōn Anij, bwe en kijibliklok jurtak ko an Jeova, im men ko re kwojarjar otem kwojarjar. 15 Im ijillokin Iden, im Miniamin, im Jeshua, im Shemaia, im Amaraia, im Shekenaia, ilo jikin kwelok ko an pris ro, im jermal ko air kin tiljek, bwe ren lelok ñōn ro jeir im jātir kin lajrōk ko, ñōn ro re utiej einwōt ñōn ro rettā: 16 eor jen ro rar bwini ir kin ebeben ko, man rōn, jen ridtōn jilu yīō im jima, ir otemjej rar dre-

loñtok iloan imōn Jeova, einwōt jermal in jabrewōt ran e ar aikwij, ñōn korijer ilo jermal ko air ekar ñōn lajrōk ko air; 17 im ro emwij bwini ir kin ebeben ko an pris ro ekar ñōn mo ko imōn ro jimair, im ro dri Livai jen ridtōn joñoul yīō im jima, ilo jermal ko air kin lajrōk ko air; 18 im ro emwij bwini ir kin ebeben in ro nejir, limaro beleir, im ro nejir man im kōra, ilo bwiljin aolepen jar eo: bwe ilo air jerbale men in tiljek, rar mōke kokwojarjar ir ilo men in kwojarjar. 19 Bareinwōt ñōn ro nejin Aron pris ro, rar ber ilo jikin kallip ko iturin jikin kwelok ko air, ilo jabrewōt jikin kwelok, eor armij emwij kir ir kin etair, bwe ren lelok mōtōn ko ñōn man ro otemjej ian pris ro, im ñōn ir otemjej ar bwini ir kin ebeben ian ro dri Livai.

20 Im ein drein an Hezeakaia kōmōn ilo aolepen Juda; im e ar kōmōn men eo emōn im jime im tiljek iman Jeova an Anij. 21 Im ilo jermal otemjej e ar jino ilo jermal ñōn imōn Anij, im ilo kien eo, im ilo nan in jiroñ ko, bwe en kabukot an Anij, e ar kōmōne kin aolepen buruen, im e ar jerammōn.

32 ¹ Elikin men kein, im tiljek in, Senakerib kiñ in Assiria, e ar itok, im dreloñ ilo Juda, im nitbwili jikin kwelok ko rebin, im lemno e naj bōki. 2 Im ke Hezeakaia e ar lo an Senakerib itok, im bwe ej bebe in tōrinaek Jerusalem, 3 e ar bebe iben iroi ro an im armij ro an re kajar bwe ren bōprae dren ko jen unin dren ko elikin jikin kwelok eo: im rar jibōñ e. 4 Ein drein elōñ armij rar kweloktok, im rar binej unin dren otemjej, im wea eo ej torlok ilujen eneo, im re ba, Etke kiñ ro in Assiria ren iten lo elōñ dren? 5 Im e heranlok, im e ar kalek aolepen worwor eo, emwij ruplōllok e mokta, im e ar ejiliñlok e ñōn imōn bar ko, im worwor eo juōn elikin, im e ar kakajur Millo ilo jikin kwelok an Devid, im e ar kōmōnmōn ken tōrinae ko im likipijñōk ko relōñ. 6 Im e ar li-

kit kapen in tōrinae ion armij ro, im kokweloktok ir nōn iben ilo jikin eo e rābōkbōk iturin kejem in jikin kwe-lok eo, im e ar konono nōn burueir, im ba, 7 Komin kajur im beran, komin jab mijōk ak lelfōn kin kiñ in Assiria eo, ak kin aolepen jar eo iben: bwe Juōn iber elap jen eo iben: 8 iben, juōn pā kōniek; a iber Jeova aruij Anij bwe En jibōñ kij, im tōrinaek keitak ko ar. Im armij rar jutōk ion nan ko an Hezeakaia kiñ in Juda.

9 Elikin men in Senakerib kiñ in Assiria e ar jilkinlok ro dri korijeran nōn Jerusalem, (kiō e ar ber iman Lekish im aolepen kajur eo an iben), nōn iben Hezeakaia kiñ in Juda, im nōn dri Juda otemjej re beran i Jerusalem, im e ba, 10 Ein drein Senakerib kiñ in Assiria ej ba, Ta eo komij liki im berwōt ilo nitbwili i Jerusalem? 11 ¹Hezeakaia e jab karel kom, in lelok kom nōn mij kin nita im kin maro, im ej ba, Jeova ar Anij e naj lomoren kij jen ilo pein kiñ in Assiria ke? 12 Hezeakaia in e jab eo e ar bōklok jikin ko re utiej An, im lokatok ko An, im jiroñ Juda im Jerusalem, im ba, Kom naj kabuñ iman juōn wōt lokatok, im ion kom naj kōkaijurjur ke? 13 Kom jab jela ta eo kimro jema ar kōmōn nōn dri ailiñ otemjej i ene ko ke? Anij ro an ro dri ailiñ in ene ko rar maroñ im lomoren eneo air jen ilo peiō ke? 14 Wōn eo ian anij otemjej an dri ailiñ ko ro jema e ar kanuij kokkuri, e maroñ in lomoren ro dri ailiñ an jen peiō, inem ami Anij en maroñ in lomoremi jen peiō ke? 15 Inem Hezeakaia en jab mone kom, ak karel kom ilo wāwen in, im komin jab tōmak e; bwe ejelok anij in jabrewōt ailiñ e ar maroñ in lomoren ro dri ailiñ an jen peiō: e nañin riklok ami Anij naj maroñ in lomoren kom jen peiō!

16 Im ro dri korijeran rar kalōñlok air konono nae Jeova Anij, im nae Hezeakaia dri korijeran. 17 E ar bar-einwōt jeje letter ko in kajirere kake Jeova Anij in Israel, im konono nae

E, im e ba, Einwōt anij ro in ene ko, rar ban lomoren dri ailiñ ro air jen peiō, ein drein Anij an Hezeakaia E jamin lomoren ro dri ailiñ an jen peiō. 18 Im rar lamij kin ainikeir elap ilo kajin Ju nōn ro dri Jerusalem rar ber ion worwor eo, bwe ren kem-jōk ir, im kamōk ir; bwe ir ren bōk jikin kwelok eo. 19 Im rar konono kin Anij in Jerusalem einwōt anij ro an ro dri ailiñ ko an lōl in, ko iltan pein armij.

20 Im Hezeakaia kiñ eo, im Aiseia dri kanan eo nejin Emoz, rar jar kin men in, im kir nōn lōñ ko. 21 Im Jeova e ar jilkinlok juōn enjel, eo e ar mōn ro dri kajur im dri beran otemjej, im ro dri tel im kapen ro, ilo kamp an kiñ in Assiria. Ein drein e ar jeblak im jok wōt nōn eneo an. Im ke e ar dreloñtok ilo tempel in anij eo an, ro rar itok jen kabinjien rar mōn e na ijo kin jāji. 22 Ein drein Jeova e ar lomoren Hezeakaia im ro dri Jerusalem jen pein Senakerib kiñ in Assiria, im jen pein armij ro otemjej jet, im tellok ir ijoko jabrewōt. 23 Im elōñ rar bōktok jurtak ko nōn Jeova nōn Jerusalem, im men ko re aurōk nōn Hezeakaia kiñ in Juda: inem ar koutieje iman mejen ro dri ailiñ otemjej jen ien eo.

24 ¹Ilo ran ko Hezeakaia e ar nañin-mij wōt jirik: im e ar jar nōn Jeova: im E ar konono iben, im lelok nōn e juōn kakōle. 25 A Hezeakaia e ar jab bar lelok ekar nōn men ko emwij jibōñ e kake; bwe e utiej buruen: kin men in eor illu e ar ber ion in ion Juda im Jerusalem. 26 Mekarta, Hezeakaia e ar mōke kōtaik e kin jua in buruen, e im ro dri Jerusalem, inem illu jen Jeova e ar jab buñōt ir ilo ran ko an Hezeakaia.

27 Im iben Hezeakaia elōñ mweiuk im nebar: im e ar kōmōnmōn nōn e jikin mweiuk ko nōn silver, im nōn gold, im nōn dreka re aurōk, im nōn spais ko, im nōn likipijñōk ko, im nōr jābi ko remōn jabrewōt wāwen; 28 mo ko imōn kejbārok orlok in korn im oil bareinwōt; im mo ko nōn jab-

rewōt wāwen kiru, im bwij ko iloan worwor ko. 29 Bar juōn, e ar kōmōnmōn nōn e jikin kwelok ko, im elōñ bwijin sip im got im kau, bwe Anij e ar lelōk nōn e elōñ mweiuk. 30 Hezekaia im eo e ar bareinwōt binej unin dren ko ilo Gaihon, im katorilōltok jime wōt iturin jikin kwelok an Devid i kabilūñ. Im Hezekaia e ar jerammōn ilo jerbal otemjej an. 31 Ijoke, ilo men eo an ro dri keañ jen iroi ro i Babilon, rar jilkinlok nōn iben bwe ren kajitōk kin men in bwilōñ eo emwij kōmōne ilo eneo, Anij e ar likit e, bwe En melejoñ e, bwe En jela aolepen men ko ilo bu-ruen.

32 Ak jerbal ko jet an Hezekaia, im men ko remōn e ar kōmōni, loemwij jeje ilo vison an Aiseia nejin Emoz, ilo buk in kiñ ro an Juda im Israel. 33 Im Hezekaia e ar kiki iben ro jiman, im rar kalibwin e ijo e utiejlok ilo lūp ko an ro nejin Devid: im aolepen Juda im ro dri Jerusalem rar nebar e ke e mij. Im Menassa nejin e ar kiñ im binej jenkwōn.

33 Ridtōn ¹Menassa joñoul ruo yiō ke e jino an kiñ; im e ar kiñ iomin limñoul lailim yiō i Jerusa-le:n. 2 Im e ar kōmōn nana iman mejen Jeova, einwōt men in jōjōik ko an ro dri ailiñ ko Jeova e kar kadri-oijlok ir jen iman ro nejin Israel. 3 Bwe e ar bar kalek jikin kore utiej Hezekaia jemen e ar rupilōllok; im e ar kōmōnmōn lokatok ko nōn Beal ro, im e ar kōmōnmōn Ashira ko, im e ar kabuñ nōn aolepen jaran lōñ ko, im korijer nōn ir. 4 Im e ar kalek lokatok ko iman mejen Jeova, ijo Jeova e kar ba kake, Ilo Jerusalem eta e naj ber nōn in drio. 5 Im e ar kalek lokatok ko nōn aolepen jaran lōñ ko iloan worwor ko ruo in imōn Jeova. 6 E ar bareinwōt kōmōn bwe ro nejin ren dribuk kijeek eo ilo komlōl in nejin Hinnom: im e ar kōmōn rojōk, im bubu, im marmir, im kōmao iben ro jītōb rar ber ibeir, im iben anij ro: e ar kōmōn elōñ nana iman mejen Jeova, im kaillu E. 7 Im e ar

likit men in e jekjek in ekjōp eo emwij an kōmōne, iloan imōn Anij, ijo Anij e ar ba kake nōn Devid im nōn Solomon nejin, Iloan mwin, im ilo Jerusalem, eo I ar kålet e jen bwijin Israel otemjej, I naj likit eta nōn in drio: 8 im I jamin bar kamōkit neen Israel jen eneo I ar lelōk nōn ro jimami, elañe rej lale im kōmōn men ko otemjej I ar jiroñ ir, aolepen kien eo im men in kaiñi ko im men in jiroñ ko emwij lelōk kin Moses. 9 Im Menassa e ar karel Juda im ro dri Jerusalem, inem rar kōmōn nana elap jen ro dri ailiñ ko Jeova e ar kokkure ir iman ro nejin Israel.

10 Im Jeova ej konono nōn Menassa, im nōn ro dri ailiñ An; a rar jab eoroñ E. 11 Kin men in Jeova e ar āñintok ioir kapen ro in jar an kiñ in Assiria, ro rar bōk Menassa ilo tomere ko, im lukwoj e kin fetter ko, im bōklok e nōn Babilon. 12 Im ke e ar ber ilo jorran, e ar akwelap nōn Jeova Anij eo an, im kanuij kōtaik e mōke iman Anij an ro jemen. 13 Im e ar jar nōn E; im E ar tiriamokake e, im eoroñ an akwelap, im bar bōk-tok e nōn Jerusalem iloan ailiñ eo an. Inem Menassa e jela bwe Jeova e Anij.

14 Ak elikin men in e ar kalek juōn worwor ilikin jikin kwelok an Devid, i kabilūñ jen Gaihon, i komlōl eo, aet nōn dreloñ in kejem in iik ko: im e ar kabol Opel kake, im kanuij koutieje: im e ar likit kapen re beran ilo jikin kwelok otemjej in Juda eor air worwor. 15 Im e ar bōklok anij ro drua, im ekjōp eo jen iloan imōn Jeova, im lokatok ko otemjej emwij an kōmōnmōni ilo tol an imōn Jeova, im i Jerusalem, im julok na ilikin jikin kwelok eo. 16 Im e ar kalek lokatok eo an Jeova, im e ar katok ion men in katok ko ainemōn im kamolol, im e ar jiroñ Juda bwe rer korijer nōn Jeova Anij in Israel. 17 Ijoke, armij rar katok wōt ilo jikin ko re utiej, a nōn Jeova air Anij wōt.

18 Ak jerbal ko jet an Menassa, im jar eo an nōn Anij eo an, im nan

ko an ro dri lolo, ko rar konono ññon e ilo etan Jeova, Anij in Israel, lo, emwij jeje iben jermal ko an kiñ ro in Israel. 19 Jar eo an bareinwõt, im ekijkan Anij e ar tiriamokake e, im aolepen an jerawiwi im bwir eo an, im jikin ko ijo e ar kōmōn jikin ko re utiej ie, im kajutōk Ashira im men in e ko jekjek, mokta jen an mōke kōtaik e: lo emwij jeje ilo bwebwenato an dri lolo eo. 20 Ein drein Menassa e ar kiki iben ro jiman, in rar kalibwin e ilo mweo imōn: im Amon nejin e ar kiñ im binej jenkwōn.

21 Ridtōn Amon roñoul ruo yiō ke e ar jino an kiñ; im e ar kiñ iomin ruo yiō i Jerusalem. 22 Im e ar kōmōn nana iman mejen Jeova, einwõt Menassa jemen: im Amon e ar katok ññon men in e jekjek otemjej Menassa jemen e kar kōmōnmōni, im e ar korijer ññon ir. 23 Im e ar jab mōke kōtaik e iman Jeova, einwõt Menassa jemen e kar mōke kōtaik e; a Amon in e ar kalaplok wõt an bwir. 24 Im ro dri korijeran rar kabata nae e, im mōn e iloan mweo imōn. 25 A ro dri eneo rar mōn ir otemjej re kar kabata nae kiñ Amon: im ro dri eneo rar kōmōn Josaia nejin bwe en kiñ im binej jenkwōn.

34 Ridtōn ¹Josaia drualitōk yiō ke e ar jino an kiñ; im e ar kiñ iomin jilñoul juōn yiō i Jerusalem. 2 Im e ar kōmōn men eo e jime iman mejen Jeova, im e ar etetal ilo ial ko an Devid jemen, im jab jeorlok ññon anbijmaroññon ak anmiñin. 3 Bwe ilo yiō eo ken ka drualitōk an kiñ, ke emōn drer, e ar jino in kabukot Anij an Devid jemen; im ilo yiō eo ken ka joñoul ruo e ar jino in karreolok Juda im Jerusalem jen jikin ko re utiej, im Ashira ko, im men in e ko jekjek, im men in e ko unlok. 4 Im rar rupilōllok lokatok ko an Beal ro iman mejen; im men in e einwõt al rar ber ilōñir e ar juokwi; im Ashira ko im men in e ko jekjek im men in e ko re unlok, e ar rupi, im kōprakilikili, im jeore ion lūp ko lūpōn ro rar katok ññon ir. 5 Im e ar tili dri ko

drin pris ro ion lokatok ko air, im karreolok Juda im Jerusalem. 6 Im ein drein an kōmōn ilo jikin kwelok ko an Menassa im Ipream im Simeon, im ññon Naptalai, kin ilil ko air. 7 Im e ar rupilōllok lokatok ko, im kōprakilikili Ashira ko im men in e ko jekjek, im juokwe men in e einwõt al otemjej ilo aolepen ene in Israel, im jeb-laklok ññon Jerusalem.

8 ¹Ak ilo yiō eo ken ka joñoul drualitōk ke ej kiñ, ke emwij an karreolok eneo im mweo, e ar jilkinlok Shepan nejin Azalaia, im Measeia dri lale jikin kwelok eo, im Joa nejin Joehaz dri jeje, bwe ren kōkāl mweo imōn Jeova an Anij. 9 Im rar itok ññon iben Hilkaia pris eo elap, im lelok ññon e mōnni eo ar bōktok e na iloan imōn Anij, eo ro dri Livai, ro dri lale kejem, rar aini jen pein Menassa im Ipream, im jen aolepen dri Israel ro jet, im jen aolepen Juda im Benjamin, im jen ro dri Jerusalem. 10 Im rar likiti na ilo pein ro dri jermal ro rar lale imōn Jeova; im ro dri jermal ro rar jermal ilo imōn Jeova rar lelok bwe ren karbin im kōkāl mweo; 11 rar lelok e ññon ro dri jerbale alal im ro dri jekjek, bwe ren wiaik dreka ko jekjek, im wijki ko ññon kēn kobaik ko, im ññon kōmōnmōn alal ko ññon mo ko kiñ ro in Juda rar kokkure. 12 Im armij ro re tiljek ilo jermal eo: im ro dri lale ir, Jehat im Obedaia, dri Livai, ian ro nejin Mirerai; im Zekaraia im Mishullam, ian ro nejin ro dri Kohat, bwe ren kōmōn e wõt; im bar jet ian ro dri Livai, ir otemjej re kabel kin ken kajōñjōñ ko. 13 Bar-einwõt rar lali ro dri inene, im bikbikri ro otemjej rej jermal ilo jabrewõt wāwen korijer: im ian ro dri Livai eor dri jeje, im dri kabwijrōk, im dri lale kejem.

14 Im ke rar bōktok mōnni eo emwij kar bōktok ilo imōn Jeova, Hilkaia pris eo e ar lo buk in kien Jeova letok kin Moses. 15 Im Hilkaia e ar uak im ba ññon Shepan dri jeje, I ar lo buk in kien eo ilo imōn Jeova. Im Hilkaia e ar lelok buk eo ññon

Shepan. 16 Im Shepan e ar bōklok buk eo ñōn kiñ eo, im bareinwōt kennanek kiñ eo, im e ba, Aolepen men ko ar lelok ñōn ro dri korijerōm, rej kōmōn wōt. 17 Im rar lutōklok mōnni eo ar loi ilo imōn Jeova, im lelok e ñōn ro dri lale, im ñōn ro dri jerbal. 18 Im Shepan dri jeje eo e ar kennanek kiñ eo im ba, Hilkaia, pris eo, e ar letok juōn buk. Im Shepan e ar konono kake iman kiñ eo. 19 Im ke kiñ eo e ar roñjake nan ko in kien, e ar kekel nuknuk ko an. 20 Im kiñ eo e ar jiroñ Hilkaia, im Ehaikam nejin Shepan, im Abdon nejin Maika, im Shepan dri jeje, im Eseaia korijeran kiñ eo, im e ba, 21 Komin ilok, kajitōk iben Jeova kin ña, im kin ro rej berwōt ilo Israel im ilo Juda, kin nan ko an buk eo ar loe; bwe elap illu an Jeova emwij lutōktok ioer, kin an ro jemer jab bokake nan jen Jeova, im kōmōn ekar ñōn men otemjej emwij jeje ilo buk in.

22 Ein drein Hilkaia, im ro emwij an kiñ eo jiroñ ir, rar ilok ñōn iben Hulda dri kanan, lio belen Shallum nejin Tokat, nejin Hasra, dri lale rum in nuknuk ko, (ak e ar jokwe ilo Jerusalem ilo mōtōn ken ka ruo); im ein drein rar konono ñōn e. 23 Im e ar ba ñōn ir, Ein drein Jeova Anij in Israel ej ba: Komin kennanek armij eo e ar jilkintok kom ñōn iba, 24 Ein drein Jeova ej ba, Lo I naj bōktok nana ion jikin in, im ion ro otemjej rej jokwe ie, aet nan in jerata otemjej jeje ilo buk eo rar konono kake iman kiñ in Juda. 25 Kin ke rar illok jen Ña, im kōkaijurjur ñōn anij ro jet, bwe ren kaillu Iō kin jerbal otemjej in peir: kin men in Ij lutōklok Aō illu ion jikin in im jamin kwune. 26 A ñōn kiñ in Juda eo, eo e ar jilkintok kom in kajitōk iben Jeova, ein drein kom naj ba ñōn e, Ein drein Jeova Anij in Israel ej ba: Kin nan ko kwar roñjake, 27 kin an biruru buruōm, im kwar kōtaik yuk iman Anij, ke kwar roñjake nan ko An nae jikin in, im nae ro rej jokwe ie, im kwar kōtaik yuk imaō, im kwar kekel nuknuk ko am, im kwar jōñ imaō: I

ar bareinwōt eoroñ yuk, Jeova ej ba. 28 Lo, I naj kobaik yuk ñōn iben ro jimam, im re naj kalibwin yuk ilo ainemōn, im kwo jamin lo aolepen nana I naj bōktok ion jikin in, im ion ro rej jokwe ie. Im rar bar bōklok nan ñōn iben kiñ eo.

29 ¹ Inem kiñ eo e ar jilkinlok im kokweloktok ridto ro otemjej in Juda im Jerusalem. 30 Im kiñ eo e ar wōnliñlok ñōn mweo imōn Jeova, im iben ro dri Juda otemjej im ro dri Jerusalem, im pris ro, im ro dri Livai, im armij otemjej ro re ridto im ro redrik: im e ar konono i lojiliñir nan ko otemjej ilo buk in bujen eo ar lo e ilo imōn Jeova. 31 Im kiñ eo e ar jutōk ilo jikin, im e ar kōmōn juōn bujen iman Jeova, bwe en etal ilokōn Jeova, im bwe en bokake kien ko An, im nan in kennan ko An, im nan in kaiñi ko An, kin aolepen huruen, im aolepen an, im kōmōn einwōt nan ko in bujen eo emwij jeje ilo buk in. 32 Im e ar komon bwe ro otemjej ar lo ir i Jerusalem im Benjamin ren jutōk ñōn e. Im ro dri Jerusalem rar kōmōn ekar ñōn bujen eo an Anij, Anij an ro jimair. 33 Im Josaia e ar bōklok men in jōjōik ko otemjej jen ene ko otemjej iben ro nejin Israel, im e ar kōmōn bwe ir otemjej ar lo ir ilo Israel ren korijer, aet korijer ñōn Jeova air Anij. Iomin ran ko an otemjej rar jab illok jen air lore Jeova, Anij an ro jimair.

35 Im Josaia e ² ar lale juōn men in kijone ñōn Jeova i Jerusalem: im rar mōn men in kijone eo ilo ran eo ken ka joñoul emen in aliñ eo mokta. 2 Im e ar likit pris ro ilo jerbal ko air, im kabaran ir ñōn jerbal in imōn Jeova. 3 Im e ar ba ñōn ro dri Livai rej katakin aolepen Israel, ro re kwojarjar ñōn Jeova, Komin likit dipdip eo e kwojarjar ilo mweo Solomon nejin Devid kiñ in Israel e ar kalek e; e jamin bar or ine ion aierami. Kiō komin korijer ñōn Jeova ami Anij, im ñōn ro dron Israel: 4 im komin kebobo kom ekar ñōn mo ko imōn ro jimami kin lajrōk ko ami,

einwõt jeje eo an Devid kiñ in Israel, im einwõt jeje an Solomon nejin. 5 Im komin jutök ilo jikin eo e kwojarjar ekar ñõn lajrök ko an mo ko imõn ro jemen ro jeõmi im jätõmi ro nejin armij rõn, im ñõn jabrewõt en juõn mõtõn imõn jemen ro dri Livai. 6 Im komin mõn men in kijone, im mõke kokwojarjar kom, im kapojök ñõn ro jeõmi im jätõmi, im kõmõn ekar ñõn naç eo an Jeova kin Moses.

7 Im Josaia e ar lelok ñõn ro nejin armij, jen bwijn lam ko im kon in got ko, ir otemjej ñõn katok in kijone ko, ñõn aolepeir rej ber ijo, ñõn bwinbwin oran jilñoul tausan, im jilu tausan kau koman, ir kein jen mweiuk ko mweien kiñ eo. 8 Im iroi ro an rar lelok juõn jurtak in kõnan ñõn armij ro, im ñõn ro dri Livai. Hilkaia im Zekaraia im Jehaiel, iroi ro ilo imõn Anij, rar lelok ñõn pris ro jurtak in kijone ruo tausan jiljino buki kau ko redrik, im jilu buki ox. 9 Konenaia bar-einwõt, im Shemeaia im Netanel ro jen im jätin, im Hashebaia im Jeaiel im Jozebad, re utiej ian ro dri Livai, rar lelok ñõn ro dri Livai jurtak in kijone, lailim tausan kau ko redrik, im limabuki ox.

10 Ein drein ar kapojök jerbal eo, im pris ro rar jutök ilo jikir, im ro dri Livai kin lajrök ko air, ekar ñõn kien kiñ eo. 11 Im rar mõn men in kijone eo, im pris ro rar kabütüktük bõtöktök eo rar bök jen peir, im ro dri Livai rar jojen kilir. 12 Im rar böklok katok kijeek ko, bwe ren lilok ekar ñõn lajrök in mo ko imõn ro jemen bwij ko, bwe ren katok ñõn Jeova, einwõt jeje ilo buk in Moses. Im ein drein air kõmõn kin ox ko. 13 Im rar umum men in kijone eo kin kijeek ekar ñõn kien: jurtak rokwojarjar rar kõmät ilo pot ko, im ilo kaldron ko, im ilo pan ko, im böklok mōkōj ñõn ro nejin armij ro otemjej. 14 Im tokelik rar mōke kapojök ñõn ir, im ñõn pris ro, bwe pris ro nejin Aron rar ailbaro in katok kin katok kijeek ko im kioeo, ñõn boñ: kin men in ro dri Livai rar mōke kapojök ñõn ir, im ñõn pris ro

nejin Aron. 15 Im ro dri al, ro nejin Esap, rar ber ilo jikir ekar ñõn kien Devid, im Esap, im Himan, im Jedutun dri lolo an kiñ eo: im ro dri lale kejem rar ber iturin kejem ko otemjej: ejelok unin air ilok jen jerbal eo air: bwe ro jeir im jätir, dri Livai, rar kapojök ñõn ir.

16 Ein drein air kapojök aolepen jerbal eo ñõn Jeova ilo ran eo, bwe ren lale kijone, im bwe ren katok kin katok kijeek ko ion lokatok an Jeova, ekar ñõn kien kiñ Josaia. 17 Im ro nejin Israel rar ber ijo, rar lale kijone ilo ien eo, im kwojkwoj in bred e jab uwe iomin jiljilimjuõn ran. 18 Im ejelok kijone einwõt ar lale ilo Israel jen ran ko an Samuel dri kanaan; im ejelok ian kiñ ro in Israel rar lale juõn kijone einwõt eo Josaia e ar lale, kab pris ro, im ro dri Livai, im ir otemjej dri Juda im dri Israel re ber ijo, im ro dri jokwe i Jerusalem. 19 Ilo yiõ eo ken ka joñoul dualitök an Josaia kiñ rar lale kijone in.

20 Elikin men in, ke emwij an Josaia kapojök tempel eo, Niko, kiñ in Ijpt, e ar wõnliñlen tōrinae i Karke-mish iturin Upretis: im Josaia e dri-oijlok im jumae e. 21 A e ar jilkinlok ro dri jilik ñõn iben, im ba, Ta eo ibõm im iba, kwe kiñ in Juda? I jab iten abjök yuk ranin, a nae mw eo ij tōrinaek e; im Anij e ar jiroñ iõ bwe in kijorur: kwon jab owajuij ñõn Anij, bwe En jab mōn yuk. 22 Ijoke, Josaia e jab kõnan kajeor mejen jen e, a e ar mōke kejakilkil e, bwe en tōrinaek e, im jab eoroñ nan ko an Niko jen loñin Anij, im e ar iten tōrinaek e ilo komlöl in Megiddo. 23 Im ro dri libon rar kiele ñõn kiñ Josaia; im kiñ eo e ar ba ñõn ro dri korijeran, Komin bōklok iõ, bwe I kanuij kwõt. 24 Ein drein ro dri korijeran rar bōk e jen jariat eo, im likit e ilo jariat eo ken ka ruo iben, im bōktok e ñõn Jerusalem; im e mij, im rar kalibwin e ilo lūp ko lūpõn ro jiman. Im dri Juda im Jerusalem otemjej rar jōñõt Josaia. 25 Im Je-

remaia e ar jōñōt Josaia : im ro dri al, man im kōra otemjej rar konono kin Josaia ilo air liājlo ko ñōn ranin : im rar kōmōne juōn kien ilo Israel : im lo, emwij air jeje ilo liājlo ko. 26 Ak jerbal ko jet an Josaia, im kōmōn ko an remōn, ekar ñōn eo emwij jeje ilo kien Jeova, 27 im jerbal ko an, ko mokta im eliktata, lo, emwij jeje ilo buk an kiñ ro in Israel im Juda.

36 ¹ Inem ro dri eneo rar bōk Jihoahaz, nejin Josaia, im kōmōne kiñ in binej jenkwōn jemen i Jerusalem. 2 Ridtōn Jihoahaz roñoul jilu yiō ke ej jino an kiñ ; im e ar kiñ iomin jilu aliñ i Jerusalem. 3 Im kiñ in Ijpt e ar kōtaik e i Jerusalem, im ar jiroñ bwe eneo en lelok ñōn e jibuki talent silver, im juōn talent gold. 4 Im kiñ in Ijpt e ar kōmōn Ilaiekim jātin kiñ ion Juda im Jerusalem, im likit etan Jihoiakim. Im Niko e ar bōk Joahaz jein, im bōklok e ñōn Ijpt.

5 Ridtōn Jihoiakim roñoul lailim yiō ke e jino an kiñ : im e ar kiñ iomin joñoul juōn yiō i Jerusalem : im e ar kōmōn nana iman mejen Jeova an Anij. 6 Nebukadnezzar kiñ in Babilon e ar wonliñtok nae e, im lukwoj e kin tomere ko, im bōklok e ñōn Babilon. 7 Nebukadnezzar e ar bareinwōt bōklok jen jābi ko an imōn Jeova ñōn Babilon, im likiti ilo tempel eo an i Babilon. 8 Ak kōmōn ko jet an Jihoiakim, im men in jōjōik ko e ar kōmōni, im men eo emwij lo nae e, lo, emwij jeje ilo buk an kiñ ro in Juda im Israel ; im Jihoiakin nejin e ar kiñ im binej jenkwōn.

9 ² Ridtōn Jihoiakin dualitōk yiō ke e jino an kiñ : im e ar kiñ iomin jilu aliñ im joñoul ran i Jerusalem : im e ar kōmōn nana iman mejen Jeova. 10 Im ilo yiō ej itok, kiñ Nebukadnezzar e ar jilkinlok, im bōktok e ñōn iben, ñōn Babilon, im iben jābi ko remōn jen imōn Jeova, im e ar kōmōn Zedekaia jein, kiñ ion Juda im Jerusalem.

11 ³ Ridtōn Zedekaia roñoul juōn

yiō ke ej jino an kiñ ; im e ar kiñ iomin joñoul juōn yiō i Jerusalem. 12 Im e ar kōmōn nana iman mejen Jeova an Anij ; e ar jab mōke kōtaik e iman Jeremaia dri kanan eo ej konono jen loñin Jeova. 13 Im e ar bareinwōt kabata nae Nebukadnezzar, eo e kar kanōjniñ ñōn e kin Anij ; a e ar kakiññiñ kenwan im kabin buruen jen an oktōk ñōn Jeova Anij in Israel. 14 Bar juōn, ro re utiej ian pris ro, im armij ro, rar kanuij bwir einwōt men in jōjōik ko an ro dri aliñ ko ; im rar katton mweo imōn Jeova eo E ar kokwojarjar e i Jerusalem. 15 Im Jeova Anij an ro jimair, E ar jilkinlok ñōn ibeir kin dri jilik ro An, im E ar kaiur E im jilkinlok ir, kin An tiriamokake ro dron, im jikin jokwe eo An : 16 a rej kajirere kake ro dri jilik jen Anij, im kejekron nan ko An, im kitōtōkake ro An dri jilik, mae ien illu an Jeova e ar walok nae ro dron, im ejelok men in jibōñ ir.

17 ¹ Kin men in E ar bōktok ioir kiñ an ro dri Kaldi, eo e ar mōn man ro air emōn drer kin jāji iloan mweo imweir e kwojarjar, im e ar jab tiriamokake air man ak kōra emōn drer, lōlap ak eo uōn kolan bōran ; E ar lelok ir otemjej na ilo pein. 18 Im jābi otemjej an imōn Anij, ko relap im redrik, im mweiuk ko mweien imōn Jeova, mweien kiñ eo, im an iroiñ ro an, men kein otemjej e ar bōklok ñōn Babilon. 19 Im rar tile imōn Anij, im ruprupe worwor in Jerusalem, im tili mo ko imōn iroiñ otemjej kin kijeek, im kokkure jābi ko an remōn otemjej. 20 Im ro rar ko jen jāji, e ar bōklok ir ñōn Babilon ; im rar dri korijeran, im korijeran ro nejin mae ien kiñ an aliñ in Pōrsia : 21 bwe en kajejit nan jen Jeova kin loñin Jeremaia, mae ien eneo e ar mōnōnō kin Sabat ko an : bwe iomin ien an einwōt ene jemaren e ar lare ran in Sabat, bwe en kajejit jiljilimjuōñoul yiō.

22 ² Ak ilo yiō eo mokta an Sairōs kiñ in Pōrsia, bwe nan jen Jeova kin

loñin Jeremaia en jejit wõt, Jeova e
 ar biuktōk jitōb eo an Sairōs kiñ in
 Pōrsia, inem e ar kwalok juōn nan ilo
 aolepen ailiñ eo an, im jeje bareinwõt,
 im e ba, 23 Ein drein Sairōs kiñ in
 Pōrsia ej ba, Jeova Anij in lōñ ko E

ar letok ñōn iō ailiñ otemjej in lōl:
 im E ar jiroñ iō bwe in kalek ñōn E
 juōn im i Jerusalem, eo ilo Juda.
 Jabrewōt eo ej ibemi ian ro dri ailiñ
 An otemjej, Jeova Anij eo an En
 iben, im en wōnliñlok wõt.

BUK IN EZRA

1 ¹Ak ilo yiō eo mokta an Sairōs kiñ in Pōrsia, bwe en jejit nan jen Jeova kin loñin Jeremaia, Jeova e ar biuktōk jītōb an Sairōs kiñ in Pōrsia, inem e ar ²kwalok juōn nan ilo ailiñ eo an, im likit e ilo jeje, im e ba, **2** Ein drein Sairōs kiñ in Pōrsia ej ba, Jeova Anij in lōñ ko, E ar letok ailiñ otemjej in lōl; im E ar jiroñ iō bwe in kalek nōn E juōn im i Jerusalem, ej ilo Juda. **3** Jabrewōt ej ibemi ian ro dron otemjej, an Anij en iben, im en wōnliñlok nōn Jerusalem, ej ilo Juda, im kalek mweo imōn Jeova, Anij in Israel, (ej Anij), Eo ej ilo Jerusalem. **4** Im jabrewōt eo ej berwōt, ilo jabrewōt jikin ej itoitōk ie, armij in jikin eo ren jibōñ e kin silver, kin gold, im kin mweuik ko, im kin kiru ko, en orlok jen jurtak in kōnan nōn mweo imōn Anij eo ej ilo Jerusalem.

5 Inem e loetōk jiōb ro an imōn ro jīmair an Juda im Benjamin, im pris ro, im ro dri Livai, ir otemjej Anij e ar biuktōki air, bwe ren ilen kalek mweo imōn Jeova eo ej ilo Jerusalem. **6** Im ro dri turir otemjej rar ³kakajur peir kin jābi silver, kin gold, kin mweuik ko, im kin kiru ko, im kin men ko re aurōk, eo eorlok jen aolepen air kōnan. **7** Bar-einwōt Sairōs kiñ eo, e ar kadrioi-jtok jābi ko an imōn Jeova, ko Nebukadnezzar e ar bōkitok jen Jerusalem, ko e ar likiti ilo imōn anij ro an; **8** ir kein Sairōs kiñ in Pōrsia e ar bōkitok kin pein Mitredat, dri lale mweuik, im bwine ir na ilo pein Sheshbazar, iroi in Juda. **9** Im eñin orair: jilñoul platter gold, juōn tausan platter silver, roñoul druatiimjuōn bōkbōk, **10** jilñoul bol gold, bol in silver wāwen eo ken ka ruo ābuki joñoul, im jābi ko jet juōn tausan. **11** Jābi otemjej gold

im silver lailim tausan ābuki. Ir kein otemjej Sheshbazar e ar bōkliñtok, ke e ar bōkliñtok ro dri jebokwe jen Babilon nōn Jerusalem.

2 ¹Ak rein ro nejin dri mōtōn eneo, ro rar wōnliñlok ian dri jebokwe emwij bōkliñlok ir, ro Nebukadnezzar kiñ in Babilon e ar bōklok ir nōn Babilon, im rar jeblaklok nōn Jerusalem im Juda, jabrewōt nōn jikin kwelok eo an; **2** ro rar itok iben Zirubbabel, Jeshua, Nihemaia, Sieraia, Rielaia, Mordekai, Bilshan, Mispar, Bigvai, Rihum, Beana.

Oran man ro iair ro dri Israel: **3** Ro nejin Perosh, ruo tausan jibuki jiljilimjuōnñoul ruo. **4** Ro nejin Shepetai, jilu buki jiljilimjuōnñoul ruo. **5** Ro nejin Era jiljilimjuōn buki jiljilimjuōnñoul lailim. **6** Ro nejin Pehatmoab, ian ro nejin Jeshua im Joab, ruo tausan dualitōk buki joñoul ruo. **7** Ro nejin Ilam, juōn tausan rubuki limñoul emen. **8** Ro nejin Zattu, druatiimjuōn buki eñoul lailim. **9** Ro nejin Zakkai, jiljilimjuōn buki jiljinoñoul. **10** Ro nejin Benai, jiljino buki eñoul ruo. **11** Ro nejin Bibai, jiljino buki roñoul jilu. **12** Ro nejin Azgad, juōn tausan rubuki roñoul ruo. **13** Ro nejin Adonai kam, jiljino buki jiljinoñoul jiljino. **14** Ro nejin Bigvai, ruo tausan limñoul jiljino. **15** Ro nejin Edin, ābuki limñoul emen. **16** Ro nejin Eter, an Hezeakaia, druatiimjuōnñoul dualitōk. **17** Ro nejin Bizai, jilu buki roñoul jilu. **18** Ro nejin Jora, jibuki roñoul ruo. **19** Ro nejin Hashum, rubuki roñoul jilu. **20** Ro nejin Gibar, druatiimjuōnñoul lailim. **21** Ro nejin Betleem, jibuki roñoul jilu. **22** Armij in Nitopa, limñoul jiljino. **23** Armij dri Anatot, jibuki roñoul dualitōk. **24** Ro nejin Azmevet, eñoul ruo. **25** Ro nejin Kiriath-

erim, Kipaira, im Bierot, jiljilimjuōn buki eñoul jilu. 26 Ro nejin Rema im Gibia, jiljino buki roñoul juōn. 27 Ro dri Mikmas, jibuki roñoul ruo. 28 Ro dri Betel im Eai, rubuki roñoul jilu. 29 Ro nejin Nibo, limñoul ruo. 30 Ro nejin Magbish, jibuki limñoul jiljino. 31 Ro nejin Ilam eo juōn, juōn tausan rubuki limñoul emen. 32 Ro nejin Herim, jilu buki roñoul. 33 Ro nejin Lod, Hedid, im Ono, jiljilimjuōn buki roñoul lailim. 34 Ro nejin Jeriko, jilu buki eñoul lailim. 35 Ro nejin Senea, jilu tausan jiljino buki jilñoul.

36 Pris ro: ro nejin Jedaia, an imōn Jeshua, druatimjuōn buki jiljilimjuōnñoul jilu. 37 Ro nejin Immer, juōn tausan limñoul ruo. 38 Ro nejin Pashur, juōn tausan rubuki eñoul jiljilimjuōn. 39 Ro nejin Herim, juōn tausan joñoul jiljilimjuōn.

40 Ro dri Livai: ro nejin Jeshua im Kadmaiel, ian ro nejin Hodavaia, jiljilimjuōnñoul emen. 41 Ro dri al: ro nejin Esap, jibuki roñoul drualitōk. 42 Ro nejin ro dri lale kejem: ro nejin Shallum, ro nejin Ider, ro nejin Talmon, ro nejin Akkub, ro nejin Hataita, ro nejin Shobai, ir otemjej jibuki jilñoul druatimjuōn.

43 Ro dri Netinim: ro nejin Ziha, ro nejin Hasupa, ro nejin Tabeot, 44 ro nejin Kiros, ro nejin Sieha, ro nejin Pedon, 45 ro nejin Lebena, ro nejin Hageba, ro nejin Akkub, 46 ro nejin Hegab, ro nejin Shamlai, ro nejin Henan, 47 ro nejin Gidel, ro nejin Gehar, ro nejin Reaia, 48 ro nejin Rizin, ro nejin Nikoda, ro nejin Gazam, 49 ro nejin Uzza, ro nejin Pesia, ro nejin Bisai, 50 ro nejin Asna, ro nejin Miunim, ro nejin Nepaisim, 51 ro nejin Bakkub, ro nejin Hakupa, ro nejin Harhur, 52 ro nejin Bazlut, ro nejin Mehaida, ro nejin Harsha, 53 ro nejin Barkos, ro nejin Sisira, ro nejin Tima, 54 ro nejin Nezaia, ro nejin Hataipa.

55 Ro nejin ro dri korijeran Solomon: ro nejin Sotai, ro nejin Hasopiret, ro nejin Piruda, 56 ro nejin Jeala, ro nejin Darkon, ro nejin Gidel, 57 ro nejin Shepetaia, ro nejin

Hattil, ro nejin Pokeret-hazibeim, ro nejin Emai. 58 Dri Netinim otemjej, im ro nejin ro dri korijeran Solomon, jilu buki drualitōkñoul ruo.

59 Im rein ro rar wōnlñlok jen Tel-mila, Tel-harsha, Kerub, Adan, im Immer: a re ban kalikar mo ko imōn ro jimair, im ineir, elañe re dri Israel ke jab ke: 60 ro nejin Dilaia, ro nejin Tobaia, ro nejin Nikoda, jiljino buki limñoul ruo. 61 Im ian ro nejin pris ro: ro nejin Hebaia, ro nejin Hakkoz, ro nejin Barzillai, eo e ar bōk lio belen jen limaro nejin Barzillai dri Giliad, im e ar naetan einwōt etair. 62 Rein rar kabukot air jeje iben ro emwij bwine ir ekar ñōn eben ko, a rar jab loi: kin men in rej lemnok re jab kwojarjar im rar likit ir jen jerbal in pris. 63 Im iroiñ eo e ar ba ñōn ir, ren jab mōña jen men ko rokwojarjar otem kwojarjar mae ien an jutōk juōn pris im iben Urim im Tumim.

64 Aolepen jar eo otemjej eñoul ruo tausan jilu buki jiljinoñoul, 65 eorlok jen ro dri korijerair man im kōra, im ir rein jiljilimjuōn tausan jilu buki jilñoul jiljilimjuōn: im ibeir rubuki dri al man im kōra. 66 Ors ko air jiljilimjuōn buki jilñoul jiljino; mul ko air, rubuki eñoul lailim; 67 kamel ko air, ābuki jilñoul lailim; ass ko air, jiljino tausan jiljilimjuōn buki roñoul.

68 Im jet ian jiōb ro an imōn ro jimair, ke rar itok ñōn mwēo imōn Jeova ej ilo Jerusalem, rar lelok kin air kōnan ñōn imōn Anij bwe ren kalek e ijo jikin: 69 rar lelok ekar ñōn air maroñ na ilo dipdip eo nien mōnni jiljinoñoul juōn tausan derik gold, im lailim tausan paun silver, im jibuki nuknuk ko an pris.

70 Ein drein pris ro, im ro dri Livai, im jet ian armij rōn, im ro dri al, im ro dri lale kejem, im dri Netinim, rar jokwe ilo jikin kwelok ko air, im ro dri Israel otemjej ilo jikin kwelok ko air.

3 ¹ Im ke e mottok aliñ eo ken ka jiljilimjuōn, im ro nejin Israel rar

ber ilo jikin kwelok ko air, armij rar kweloktok einwõt juõn armij ñõn Jerusalem. 2 Inem e jutõk Jeshua nejin Jozedak, im ro jein im jätin pris ro, im Zirubbabel nejin Shialtiel, im ro jein im jätin, im rar kalek lokatok an Anij in Israel, in katok kin men in katok ion, einwõt ar jeje ilo kien Moses armij õn Anij. 3 Im rar likit lokatok eo ion loñtõn; bwe rar mijõk kin ro dri ene ko: im rar katok kin katok kijeek ion ñõn Jeova, aet katok kijeek ko ke e jiboñ im jota. 4 Im rar lale kwojkwoj in imõn kaberk, einwõt ar jeje, im lelok katok kijeek ko ran otemjej ekar ñõn oran, einwõt kien eo, ekar ñõn jerbalk an jabrewõt ran; 5 im tokelik katok kijeek ien otemjej, im jurtak ko in aliñ ko rekāl, im in kwojkwoj otemjej an Jeova emwij kokwojarjar e, im an jabrewõt eo e ar kōnan in lelok jurtak in kōnan ñõn Jeova. 6 Jen ran eo mokta in aliñ eo ken ka jiljilim-juõn rar jino in lelok katok kijeek ko ñõn Jeova: a loñtõn tempel an Jeova re jañin likit e. 7 Rar bareinwõt lelok mõnni ñõn ro dri jerbali dreka ko, im ñõn ro dri jerbali alal ko; im kijeir im limeir, im oil, ñõn ro dri Saidon, im ñõn ro dri Tair, bwe ren bõktok wijki aik jen Lebanon ñõn lomalo eo, ñõn Joppa, ekar ñõn men in lelok ibeir jen Sairõs kiñ in Põrsia.

8 Ak ilo yiõ eo ken ka ruo in air itok ñõn imõn Anij i Jerusalem, ilo aliñ eo ken ka ruo, Zirubbabel nejin Shialtiel, im Jeshua nejin Jozedak, im ro jet ian ro jeir im jätir pris ro im ro dri Livai, im ir otemjej rar itok jen jebokwe eo ñõn Jerusalem, rar jiroñ ro dri Livai, ro roñoul yiõ im jima, bwe ren lale jerbalk an Jeova. 9 Inem e ar jutok Jeshua, im iben ro nejin im ro jein im jätin, Kadmiel im ro nejin, ro nejin Juda, einwõt juõn, bwe ren lale ro dri jerbalk ilo imõn Anij: ro nejin Henedad, im ibeir ro nejir im ro jeir im jätir ro dri Livai. 10 Im ke ro dri kal rar likit loñtõn tempel eo an Jeova, rar kajutõk pris ro ilo nuknuk ko air im ibeir jilil ko, an ro dri Livai ro nejin Esap im sim-

bal ko ibeir, bwe ren nebar Jeova, ekar ñõn kien Devid kiñ in Israel. 11 Im rar al ñõn dron ilo air nebar im kamolol Jeova, im re ba, Bwe Ej emõn, bwe tiriamokake eo An ej berwõt in drio ñõn Israel. Im armij otemjej rar lamij kin ainiken elap, ke rar nebar Jeova, bwe emwij likit loñtõn mweco imõn Jeova. 12 A elõñ ian pris ro im ro dri Livai im jiõb ro an imõn ro jimair, ridtorõn ro re kar lo mweco mokta, ke rar kōmõn loñtõn mwin iman mejeir, rar jõñ kin ainiken elap; im elõñ rar kalaplok air lamij kin air lōñliñ. 13 Ein drein armij re ban kili ainiken lamij in lōñliñ jen ainiken jõñ an armij ro; bwe armij rar lamij kin lamij elap, im rar roñ ainiken ijo etolok.

4 A ke ro dri kijiräte Juda im Benjamin rej roñ bwe ro nejin jebokwe eo rej kalek juõn tempel ñõn Jeova, Anij in Israel; 2 inem rar kebaktok ñõn Zirubbabel, im ñõn jiõb ro an imõn ro jimair, im ba ñõn ir, Kimin kalek ibemi; bwe kimuij kabukot ami Anij, einwõt bar kom; im kim katok ñõn E jen ran ko an Isar-hadon kiñ in Assiria, eo e ar bõktok kim ñõn ijin. 3 A Zirubbabel, im Jeshua, im ro jet ian jiõb ro an imõn ro jimair in Israel, rar ba ñõn ir, Ejelok ami jerbalk ibem in kalek juõn im ñõn am Anij; a kim mõke wõt naj kalek ñõn Jeova, Anij in Israel, einwõt kiñ Sairõs, kiñ in Põrsia e ar jiroñ kim. 4 Inem ro dri eneo rar kamõjinoik pein ro dri Juda, im kejjorran ir ilo air kalek, 5 im kejjerbalk ro dri bebe nae ir, bwe ren bõprae air kōmõn, ran otemjej an Sairõs kiñ in Põrsia, ñõn ien eo an Daraiõs kiñ in Põrsia. 6 Im ilo ien an Ehasuirõs kiñ, ilo jinoin an iroi j rar jeje juõn nan in kinaklok nae ro dri Juda im Jerusalem.

7 Im ilo ran ko an Artaxerxes, Bishlam, Mitredat, Tabiel, im ro jet ian ro jeran, rar jeje lok ñõn Artaxerxes kiñ in Põrsia: im rar jeje letter eo ilo kajin Siria, im likit e ilo nan in Siria. 8 Rihom dri bebe eo, im Shimshai dri jeje rar jeje juõn letter nae Jerusalem ñõn Artaxerxes ilo

wāwen in: 9 ien eo Rihom dri bebe eo, im Shimshai dri jeje eo, im ro jet jerair, ro dri Dinai, im ro dri Aparsak, ro dri Tarpel, ro dri Apars, ro dri Arkiv, ro dri Babilon, ro dri Shushan, ro dri Dihai, ro dri Ilam, 10 im ro jet ian ro dri ailiñ, ro Osnapar dri utiej im emōn e kar āñintok ir, im likit ir ilo jikin kwelok Sameria, im ilo ene ko jet i River jabueo, im ein drein.

11 Eñin letter eo rar jilkinlok ñōn Artaxerxes kiñ eo: Ro dri korijerōm armij i River jabueo, im ein drein. 12 Kwe kiñ kwon jela, ro dri Ju, ro rar wōnliñtok jen kwe rar itok ñōn ibem ñōn Jerusalem; rej kalek wōt jikin kwelok eo e kabata im e nana, im rar kamwijlok worwor ko an, im kōkāl loñtōk ko. 13 Kwe kiñ, kwon jela kiō, bwe, elañe rej kalek jikin kwelok in, im kamwijlok worwor ko an, re jamin owōjlok, ak molentōk ñōn kwe, im tokjen e naj men in jorran ñōn kiñ ro. 14 Inem bwe kimij mōña salt jen imōn kiñ ne, im e jab ekar ñōn kim bwe kimin lo men in kananaik kiñ ne, kin men in kim ar jilkinwoj im kajelaik kiñ ne; 15 bwe ren kabuk ilo buk in jeje ko an ro jimam, im jela bwe jikin kwelok in ej juōn jikin kwelok e kabata wōt, im ej kejjorran kiñ ro im bukwōn ko, im rar kabata iloan ilo ien ko lok; kin men eo ar kejebeplok jikin kwelok eo. 16 Kimij kajelaik kiñ ne bwe elañe rej kalek jikin kwelok eo, im kamwijlok worwor ko an, inem kin men kein e naj ejelok am kij i River jabueo.

17 Inem kiñ eo e ar jilkinlok nan in uak ñōn Rihom iroiñ an dri bebe ro, im ñōn Shimshai dri jeje eo, im ro jet ian ro jerair rej jokwe i Sameria, im ilo ene ko jet i River jabueo: Aine-mōn, im ein drein. 18 Letter eo kom ar jilkinlok ñōn ibem, ¹ar konono alikar imaō. 19 Im I ar jiroñ, im rar kabukot im lo bwe jikin kwelok in jen ien etto e ar tōrinaek kiñ ro, im rar kabuñ bata iloan. 20 ²Bar-einwōt e kar o kiñ re kajur ion

Jerusalem, rar iroiñ ion aolepen eneo i River jabueo, im rar owōjlok ñōn ir. 21 Inem komin kōmōn juōn kien bwe en jokwōr armij rein, im ren jab kalek jikin kwelok eo, mae ien aō naj kōmōn juōn kien kake. 22 Im komin lale im kate kom kake: etke nana en waloktok in kejjorran kiñ ro?

23 Im ke rar konono ilo letter in jen Artaxerxes iman Rihom, im Shimshai dri jeje eo, im ro jerair, rar mōkōjlok ñōn Jerusalem ñōn iben dri Ju ro, im bōprae ir kin air kajur. 24 Inem e jokwōr jerbal in mweo imōn Anij eo i Jerusalem: im e bwijrōk mae yiō eo ken ka ruo in an Daraiōs kiñ in Pōrsia.

5 Ak ro dri kanan, ¹Haggeai dri kanan eo, im ²Zekaraia nejin Iddo, rar drikanij ñōn dri Ju ro rar ber i Juda im Jerusalem; ilo etan Anij in Israel rar drikanij ñōn ir. 2 Inem re loetōk Zirubbabel nejin Shialtiel, im Jeshua nejin Jozedak, im rar jino in kalek imōn Anij ej i Jerusalem; im ibeir ro dri kanan an Anij im rej jibōñ ir. 3 Ilo ien eo e ar itok ñōn ibeir Tatenai, iroiñ eo i River jabueo, im Shitar-bozinai, im ro jerair, im re ba ñōn ir, Wōn e ar lewoj kien bwe komin kalek mwin, im kamwijlok worwor in? 4 Inem kim ar kennanek ir ilo wāwen in, etan armij ro rej kōmōne mwin. 5 A mejen air Anij e ar ber ion ridto ro an dri Ju ro, im rar jab bōprae ir, mae ien men in e naj itok ñōn Daraiōs, im juōn nan in uak e naj jeblaktok ilo juōn letter.

6 Eñin letter eo Tatenai, iroiñ eo i River jabueo, im Shitar-bozinai, im ro jerair ro dri Aparsak, ro rar ber i River jabueo, rar jilkinlok ñōn Daraiōs kiñ eo; 7 rar jilkinlok juōn letter ñōn e, im ein drein jeje iloan: Ñōn Daraiōs kiñ, ainemōn otemjej. 8 Kwe kiñ kwon jela wōt, kim ar dreloñlok na ilo ailiñ in Juda, ñōn mweo imōn Anij laplap eo, im emwij kalek e jen dreka ko relap, im alal ko ilo turin ko; im jerbal in ej wōnmanlok wōt kin air lale, im e jerammōn ilo peir. 9 Inem

kim ar kajitōk iben ridto ro, im ba ñōn ir, Wōn eo e ar lewoj kien in kalek mwin, im kamwijlok worwor in. 10 Kim ar bareinwōt kajitōk ibeir kin etair, in kajelaik yuk, bwe kimin maroñ in jeje etan ro air iroi. 11 Im rar uak ñōn kim, Kim dri korijeran Anij in lōñ im lōl, im kimij kalek mweo emwij kar kalek e elōñ yiō e motelok, eo juōn kiñ elap in Israel e ar kalek im kamwijlok. 12 A elikin an ro jimam kar kaillu Anij in lōñ ko, e ar letok ir na ilo pein Nebukadnezzar kiñ in Babilon, dri Kaldia eo, im e ar kejebeplik mwin im bōklok armij ro ñōn Babilon. 13 A ilo yiō eo mokta an Sairōs kiñ in Babilon, Sairōs e ar kōmōn juōn kien bwe ren kalek mwin imōn Anij. 14 Im bareinwōt jābi ko gold im silver jen mweo imōn Anij, ko Nebukadnezzar e ar bōki jen iloan tempel eo e ar ber i Jerusalem, im bōktok na iloan tempel in Babilon, ir kein Sairōs kiñ e ar bōk jen tempel in Babilon, im e ar lelok ñōn juōn armij etan Sheshbazar, eo e ar kairoij e; 15 im e ar ba ñōn e, Kwon bōk jābi kein, komin ilok, im likiti ilo tempel eo i Jerusalem, im ren kalek imōn Anij i jikin. 16 Inem Sheshbazar in e ar itok, im kōmōn loñtōk ko loñtōn mweo imōn Anij i Jerusalem, im jen ien eo im ñōn ien in rej kalek e, a re jañin kamwijlok e. 17 Inem elañe men in emōn iben kiñ ne, ren kabukot iloan mweo imōn mweiuk an kiñ eo i Babilon, elañe ein drein ke jab ke, im Sairōs e ar kōmōn kien in kalek mwin imōn Anij i Jerusalem; im kiñ ne en jilkintok ankil an kin men in.

6 Inem Daraiōs kiñ eo e ar kōmōn juōn kien, im rar¹ kabukot ilo imōn buk ko, im ijo emwij likit mweiuk i Babilon. 2 Im ar lo i Akmita, ilo imōn iroi eo ej ilo ailiñ in Midia, juōn limlim, im iloan ar jeje nan in: 3 Ilo yiō eo mokta an Sairōs kiñ, Sairōs kiñ eo, e ar kōmōn juōn kien; Kin mweo imōn Anij i Jerusalem, ren kalek mweo, ijo rej katok men in katok ie, im ren likit loñtōn ko re kajur; utiejen

en jiljinoñoul kubit, im drilpen jiljinoñoul kubit; 4 kin jilu lajrōk in dreka relap, im juōn lajrōk in alal ko rekāl; im ren lelok wōnan men kein jen imōn kiñ. 5 Im bareinwōt jābi ko gold im silver jen imōn Anij, ko Nebukadnezzar e ar bōktok jen tempel eo i Jerusalem, im e ar bōktok ñōn Babilon, ir kein ren karōki, im bar bōkilok ñōn Jerusalem, jabrewōt iair ñōn jikin; im kwo naj likiti iloan imōn Anij.

6 Inem kwe Tatenai, iroi i River jabueo, Shitar-bozinai, im ro jerami dri Aparsak, komeo i River jabueo, komin ber im toane ijo; 7 komin jab kamōkit jermal eo ilo mweo imōn Anij; iroi eo an dri Ju im ridto ro ian dri Ju ro, ren kalek mweo imōn Anij ilo jikin. 8 Bar juōn, ij kōmōn juōn kien kin ta eo komin kōmōne ñōn ridto rein ian ro dri Ju ñōn kalek mweo imōn Anij: jen mweiuk ko an kiñ, jen men in owōj i River jabueo, ren niknik in lelok ñōn armij rein wōnan jermal eo, bwe ren jab wunrōk. 9 Im men ko rej aikwij, kau koman emōn drer, im sip koman ko, im lam ko, men in katok ñōn Anij in lōñ ko, bareinwōt wit, salt, wañ im oil, ekar ñōn nan jen pris ro rej i Jerusalem, ren lelok men kein ñōn ir, ran im ran, im jamin likjōp kake; 10 bwe ren maroñ in katok men in katok ko eno nemeir ñōn Anij in lōñ ko, im jar kin kiñ eo im ro nejin bwe ren mour wōt. 11 Bareinwōt emwij aō naki, bwe jabrewōt eo e naj ukot nan in, ren kōtep juōn tur jen mweo imōn, im ren leliñlok e im kabin e na ion; im mweo imōn en ejoi in menoknok kin men in; 12 im Anij eo e ar kōmōn bwe etan en ber ijo, En jolōllok kiñ im dri ailiñ otemjej re naj kōtellok peir in ukot kien in, im kokkure mweo imōn Anij ej i Jerusalem. Ña Daraiōs I ar kōmōn juōn kien; ren kate ir in kōmōne.

13 Inem Tatenai, iroi eo i River jabueo, Shitar-bozinai, im ro jerair, kin ke Daraiōs kiñ e ar jiliklok, rar kate ir im kōmōn einwōt. 14 Im ridto ro ian ro dri Ju rar kalek im jerammōn, kin drikanij an Haggeai dri

kanan im Zekaraia nejin Iddo. Im rar kalek e im kamwij, ekar nōn kien Anij in Israel, im ekar nōn kien Sairōs, im Daraiōs, im Artaxerxes kiñ in Pōrsia. 15 Im mwīn e ar mwij ilo ran eo ken ka jilu in aliñ Edar, eo ilo yīō eo ken ka jiljino in an Daraiōs kiñ.

16 Im ro nejin Israel, pris ro im ro dri Livai, im ro jet ian ro nejin jebokwe eo, rar ¹lale ien elok mwīn kin lōñliñ. 17 Im rar katok ilo air elok mwīn imōn Anij, jibuki kau koman, rubuki sip koman, ekar nōn oran bwij ko bwijin Israel. 18 Im rar likit pris ro ilo lajrōk ko air, im ro dri Livai ilo lajrōk ko air, nōn jermal in Anij, eo i Jerusalem; einwōt jeje ilo buk an Moses.

19 Im ro nejin jebokwe rar lale men in kijone ilo ran eo ken ka joñoul emen in aliñ eo mokta. 20 Bwe emwij an pris ro mōke kokwojarjar ir iben dron: ir otemjej rereo; im rar mōn men in kijone nōn ro nejin jebokwe otemjej, im nōn pris ro im ro jeir im jātir, im nōn ir mōke. 21 Im ro nejin Israel ro rar bar itok jen jebokwe eo, im ro otemjej rar mōke kejenelok ir jen etton eo an ro dri aliñ ko i eneo, bwe ren bukot Jeova, Anij in Israel, rar mōña, 22 im rar lale kwojkwoj in bred e jab uwe iomin jiljilimjuōn ran kin lōñliñ: bwe Jeova e ar kalōñliñ ir, im E ar ukot buruen kiñ in Assiria nōn ir, in kakajur peir ilo jermal in imōn Anij, Anij in Israel.

²Ak elikin men kein, ilo ien an 7 Artaxerxes kiñ in Pōrsia, Ezra nejin Sireaia, nejin Azaraia, nejin Hilkaia, 2 nejin Shallum, nejin Zedok, nejin Ehaitub, 3 nejin Ameraia, nejin Azaraia, nejin Mireiot, 4 nejin Zirahaia, nejin Uzzai, nejin Bukkai, 5 nejin Abishua, nejin Pinehas, nejin Iliezar, nejin Aron pris eo elap—6 Ezra in e ar wōñliñlok jen Babilon. Im e juōn dri jeje e kanbil ilo kien Moses, eo Jeova, Anij in Israel, e ar letok; im kiñ eo e ar elok nōn e men otemjej e ar kajitōk kake, einwōt

pein Jeova an Anij e ar ber ion. 7 Im jet ian ro nejin Israel rar wōñliñlok, im ian pris ro, im ro dri Livai, im ro dri al, im ro dri lale kejem, im ro dri Netinim, nōn Jerusalem, ilo yīō eo ken ka jiljilimjuōn an Artaxerxes kiñ. 8 Im e ar itok nōn Jerusalem ilo aliñ eo ken ka lailim, ilo yīō eo ken ka jiljilimjuōn an kiñ eo. 9 Bwe ilo ran eo mokta in aliñ eo mokta e ar jino wōñliñlok jen Babilon; im ilo ran eo mokta ilo aliñ eo ken ka lailim e ar itok nōn Jerusalem, ekar nōn pein Anij emōn ion. 10 Bwe Ezra e ar kabin buruen in kabukot kien Jeova, im bwe en kōmōne, im bwe en katakin Israel kien ko im kabuñ jar ko.

11 Ak eñin letter eo kiñ Artaxerxes e ar elok nōn Ezra pris eo, dri jeje, dri jeje nan ko an kien ko an Jeova, im nan in kaiñi ko An nōn Israel: 12 Artaxerxes, kiñ in kiñ ro, nōn Ezra pris eo, dri jeje kien Anij in lōñ ko e wāppen, im ein drein. 13 Na ij kōmōn juōn kien, bwe ir otemjej ian armij ro dri Israel, im pris ro air im ro dri Livai, ilo aliñ in aō, re kōnan ilok nōn Jerusalem, ren ilok ibōmlok. 14 Bwe emwij jilkinlok yuk kin kiñ im kin dri bebe ro an jiljilimjuōn, bwe kwon kajitōk kin Juda im Jerusalem, ekar nōn kien am Anij eo ilo peōm, 15 im bwe kwon bōklok silver im gold, eo kiñ im dri bebe ro an rar mōñōnō in elok nōn Anij in Israel, Eo mweo imōn ilo Jerusalem, 16 im aolepen silver im gold kwo naj loi ilo aolepen aliñ in Babilon, kab jurtak in mōñōnō an armij ro, im an pris ro, re mōñōnō in elok nōn mweo imōn air Anij eo i Jerusalem; 17 kin men in kwon kate yuk im wiaik kin mōnni in, kau koman ko, sip koman ko, lam ko, kab air jurtak flauo im air jurtak in irak, im kwo naj lilok nōn lokatok eo in imōn ami Anij eo i Jerusalem. 18 Im jabrewōt eo emōn ibōm im iben ro jeōm in jātōm bwe komin kōmōn kin bwen silver im gold eo, men in komin kōmōne ekar nōn ankil an ami Anij. 19 Im jābi ko emwij liwoj nōn jermal in imōn ami Anij, kwon lilok

iman Anij in Jerusalem. 20 Im jabrewōt eo kom naj aikwij nōn mweo imōn am Anij, eo kwo naj kōnan in lelok, kwon lelok jen imōn mweiuk an kiñ. 21 Im ña, aet ña Artaxerxes kiñ, ij kōmōn juōn kien nōn dri lale mweiuk otemjej rej i River jabueo, bwe jabrewōt eo Ezra pris eo, dri jeje in kien Anij in lōñ ko, e naj kajitōk ibemi, komin kate kom im kōmōne, 22 nōn jibuki talent silver, im nōn jibuki joñon wit, im nōn jibuki bath wain, im nōn jibuki bath oil, im salt im jab ba ie driten. 23 Jabrewōt eo emwij na kien e kin Anij in lōñ ko, ren kōmōn ein drein nōn mweo imōn Anij in lōñ ko; bwe etke en or illu nae ailiñ in kiñ im lōmaro nejin? 24 Bar juōn, kim kajelaik kom, bwe kin jabrewōt ian pris ro im ro dri Livai, ro dri al, ro dri lale kejem, ro dri Netinim, ak ro dri korijeran mweo imōn Anij, e jamin melim in likit ioir owōj, ak molentōk. 25 Im kwe Ezra, kin meletlet jen am Anij ej ilo peōm, kwon kōmōn iroi ro im ro dri ekajet, re naj ekajeti dri ailiñ otemjej rej ber i River jabueo, ir otemjej re jela kien ko an am Anij; im kwon katakin eo e jab jela kake. 26 Im jabrewōt eo e jab kōnan bokake kien am Anij, im kien kiñ, ren kōmōn ekajet ion im owōn kake, elañe nōn mij, ak nōn kadrioiĵlok, ak nōn bōk mweiuk ko mweien, ak nōn jolok e na ilo prison.

27 Emōnōnō wōt Jeova Anij an ro jimar, Eo e ar likit na ilo buruen kiñ eo men eo einwōt in, bwe en kaibuĵuij imōn Jeova ilo Jerusalem; 28 im E ar letok nōn iō tiriamokake iman kiñ eo, im ro an dri bebe, im iman iroi ro otemjej an. Im I ar kajurlok einwōt pein emōn an Jeova aō Anij ej ber iō, im I ar kokweloktok jen Israel armij re utiej bwe ren wōnliñlok iba lok.

8 Ak ir rein jiōb ro an imōn ro jimar, im eñin nan in ebeben an ro rar wōnliñlok iba lok jen Babilon, ilo ien Artaxerxes kiñ: 2 ian ro nejin Pinehas, Gershom. Ian ro nejin Itamar, Daniel. Ian ro nejin Devid,

Hattush. 3 Ian ro nejin Shekenai, ian ro nejin Perosh, Zekaraia; im iben rar bwine ir kin ebeben ian man rōn jibuki limñoul. 4 Ian ro nejin Pehat-moab, Eliehoenai nejin Ziraia; im iben rubuki man ro. 5 Ian ro nejin Shekenai, nejin Jehaziel; im iben jilu buki man. 6 Im ian ro nejin Edin, Ibed nejin Jonetan; im iben limñoul man. 7 Im ian ro nejin Ilam, Jeshai nejin Atalaia; im iben jiljilimjuōnñoul man. 8 Im ian ro nejin Shepetaia, Zebadaia nejin Maikael; im iben dualitōkñoul man. 9 Ian ro nejin Joab, Obedai nejin Jehaiel; im iben rubuki joñoul dualitōk man. 10 Ian ro nejin Shelomit, nejin Josipaia; im iben jibuki jiljinoñoul man. 11 Im ian ro nejin Bibai, Zekaraia nejin Bibai; im iben roñoul dualitōk man. 12 Im ian ro nejin Azgad, Johehan nejin Hakketan; im iben jibuki joñoul man. 13 Im ian ro nejin Adonaikam, ro reliktata; im ir kein etair: Elipelet, Jiuel, im Shimaia; im ibeir jiljinoñoul man. 14 Im ian ro nejin Bigvai, Utai im Zabbud; im ibeir jiljilimjuōnñoul man.

15 Im I ar kokweloktok ir nōn river eo ej torlok nōn Ehava; im kim ar kamp ijo iomin jilu ran: im I ar lale armij ro, im pris ro, im I ar lo ibeir ejelok ian ro dri Livai. 16 Inem I ar āninintok Iliezar, Eriel, Shimaia, Elnetan, im Jerib, im Elnetan, im Netan, im Zekaraia, im Mishulam, armij reutiej: bareinwōt Joierib, im Elnetan, ro dri kaki. 17 Im I ar jilkinlok ir nōn Iddo, eo e utiej ilo jikin Kasipia: im I ar kennanek ir ta eo ren ba nōn Iddo, im ro jein im jāt in dri Netinim, ilo jikin eo Kasipia, bwe ren āñintok nōn ibem ro dri jerbai i mweo imōn am Anij. 18 Im einwōt pein emōn an am Anij iom, rar āñintok nōn ibem juōn armij dri meletlet, ian ro nejin Malai, nejin Livai, nejin Israel; im Sherebaia, im iben ro nejin man im ro jein im jāt in joñoul dualitōk: 19 im Hashebaia, im iben Jeshai ian ro nejin Mirerai, ro jein im jāt in im ro nejin man, roñoul; 20 im ian ro dri Netinim, ro

Devid im iroi ro rar lelok ñōn ro dri Livai dri korijerair, rubuki roñoul dri Netinim : emwij kwalok etair otemjej.

21 Inem I ar kwalok juōn jitlok ijo, i river eo Ehava, bwe kimin mōke kōtaik kim iman am Anij, im bukot jen E juōn ial e jime ñōn kim, im ñōn ajiri ro nejem, im ñōn aolepen mweiuk ko mweiem. 22 Bwe I ar jok in kajitōk iben kiñ eo kin juōn jar in tōrinae im ro dri uwe ion ors bwe ren jibōñ kim nae ro dri kijirāt ilo ial eo, bwe emwij am konono ñōn kiñ eo, im ba, Pein am Anij ej ion ro otemjej rej bukot E, ñōn emōn; a kajur im illu eo An ej nae ro otemjej rej illok jen E. 23 Ein drein kim ar jitlok im akwelap ñōn Anij kin men in: im E ar kejerammōn kim kake.

24 Inem I ar kejenolok joñoul ruo re utiej ian pris ro, aet Sherebaia, Hashebaia, im ibeir joñoul ro jeir im jātir, 25 im I ar paun ñōn ir silver eo im gold eo, im jābi ko, aet jurtak eo ñōn mweo imōn am Anij, ko kiñ eo, im dri bebe ro an, im iroi ro an, im aolepen Israel rej ber ijo rar lelok: 26 I ar paun na ilo peir jiljino buki limñoul talent silver, im jābi ko silver jibuki talent; gold jibuki talent; 27 im roñoul bol gold, juōn tausan derik; im ruo jābi jinibōrōrō remōn im jatōltil, re aurōk einwōt gold. 28 Im I ar ba ñōn ir, Kom kwojarjar ñōn Jeova, im jābi ko rokwojarjar: im silver eo im gold eo juōn jurtak kin kōnan ñōn Jeova Anij an ro jimami. 29 Komin ekil, im lali ñōn ter eo kom naj paun ir iman ro re utiej ian pris ro im ro dri Livai, im iroi ro an mo ko imōn ro jimair in Israel i Jerusalem, ilo mōjab ko in mweo imōn Jeova. 30 Ein drein pris ro im ro dri Livai rar bōk joñon erro an silver im gold eo, im jābi ko, in bōklok ñōn Jerusalem ñōn imōn am Anij.

31 Inem kim ar ilok jen river eo Ehava ilo joñoul ruo ran in aliñ eo mokta, in ilok ñōn Jerusalem: im pein am Anij e ar ber iom, im E ar lomo-

rem jen pein dri kijirāt eo im dri kejar eo ilo ial. 32 Im kim ar itok ñōn Jerusalem, im ber ie iomin jilu ran. 33 Im ilo ran eo ken kemen rar paun silver im gold im jābi ko ilo mweo imōn am Anij, na ilo pein Meretot nejin Uraia pris eo, (im iben Iliezar nejin Pinehas: im ibeir Jozebad nejin Jeshua, im Nodaia nejin Binuai, ro dri Livai)—34 aolepen kin bwinbwin im paun: im ar je aolepen paun ien eo.

35 Ro nejin jebokwe, ro rar itok jen air ber ilo ene ko jet, rar lelok katok kijeek, ñōn Anij in Israel, joñoul ruo kau koman kin aolepen Israel, druatinjuōnñoul jiljino sip koman, jiljilimjuōnñoul jiljilimjuōn lam, joñoul ruo got koman ñōn katok jerawiwi: ir kein otemjej katok kijeek ñōn Jeova. 36 Im rar lelok nan ko jen kiñ ñōn setrap ro an kiñ eo, im ñōn iroi ro i River jabueo; inem rar jibōñlok armij ro im mweo imōn Anij.

9 A ke emwij kōmōn men kein, iroi ro rar druaktok ñōn iba, im re ba, Armij ro dri Israel, im pris ro im ro dri Livai rar jab² kejenolok ir jen ro dri aliñ ko, im rej kōmōn ekar ñōn men in jōjōik ko air, aet an ro dri Kenean, ro dri Het, ro dri Periz, ro dri Jibus, ro dri Amon, ro dri Moab, ro dri Ijīpt, im ro dri Amor. 2 Bwe rar bōk ian ro nejir kōra ñōn ir im ñōn ro nejir man, inem ine e kwojarjar e ar koba iben ro dri aliñ ko: aet pein bwirōk ro im iroi ro rar tel ilo bwir in. 3 Im ke I ar roñ men in I ar kekel nuknuk ko im kobe eo aō, im tumi kolan bōra im kworeak, im I ar jījōt im elap aō bwilōñ kake. 4 Inem rar kweloktok ñōn iba jabrewōt eo e wuririr kin nan ko jen Anij in Israel, kin bwir eo an dri jebokwe: im I ar jījōt wōt im bwilōñ ñōn ter eo ke rej katok in jota.

5 Ilo ien katok ke e jota I ar jerkak jen aō kōtaik iō, im nuknuk ko aō im kobe eo emwij kekel; im I ar bukwelōlō, im erlokwe peiō ñōn Jeova aō Anij; 6 im I ar ba, O aō Anij, ña I jok im banliklik in reiliñwoj ñōn

Kwe aō Anij; bwe bwir ko am re utiejlok jen bōram, im ruem e ar edreklok nōn lōn ko. 7 Jen ran ko an ro jimame kanuij lap ruem nōn ranin; im kin jerawiwi ko am ar ketōk kim, kiñ ro am, im pris ro am nōn pein kiñ ro in ene ko, nōn jāji, nōn jebokwe, im nōn rakimi, im nōn jok in mejem, einwōt ranin. 8 Im kiō iomin jirik ien emwij kwaloktok joi jen Jeova am Anij, bwe En likit jet wōt dri ko, im bwe En lelok juōn drila ilo jikin kwojarjar eo An, bwe am Anij en maroñ in kemramlok mejem, im ilo am kurekake E ar letok jirik mour. 9 Bwe kim dri korijer; mekarta am Anij e ar jab illok jen kim ilo am kurekake, a E ar kwalok nōn kim tiriamokake iman mejen kiñ ro in Pōrsia, bwe ren letok nōn kim jirik mour, bwe kimin kajutōk mweo imōn am Anij, im bwe kimin kōkāl men in jebeplok ko an, im letok nōn kim juōn worwor i Juda im Jerusalem. 10 Im kiō, O amuij Anij, ta eo kimin ba elikin men in? bwe kim ar illok jen kien ko Am, 11 ko Kwar jiroñ kin ro dri korijerōm dri kanan, im ba, Eneo komij ilok nōn e bwe komin bōk e, juōn ene etton kin etton an dri ailiñ ko, kin air men in jōjōik, ko rar kobrōk e jen jabōn nōn jabōn kin air etton; 12 inem komin jab lelok limaro nejōmi nōn man ro nejir, ak bōk kōra ro nejir nōn lōmaro nejōmi, im komin jab bukot air ainemōn ak jerammōn nōn in drio; bwe komin kajur, im bwe komin mōña men ko remōn jen eneo, im likit e men in jolit nōn ro nejōmi nōn in drio. 13 Im elikin aolepen men ko rej itok iom kin kōmōn ko am re nana, im kin ruem elap, bwe Kwe am Anij Kwar kejjorran kim erik jen ruōn bwir ko am, im Kwar letok nōn kim mōtōn einwōt in, 14 kimin bar kokkure kien ko Am, im belele iben dri ailiñ ro rej kōmōn men in jōjōik kein ke? Kwo jamin illu nōn kim, nōn ter eo Kwar kokkure kim, inem e naj ejelok mōtōn berwōt, ak ro dri ko ke? 15 O Jeova, Anij in Israel, Kwe kwo wānik wōt; bwe emkij likit kim juōn mōtōn

dri ko, einwōt ranin; lo kimij imam ilo am bwir: bwe ejelok e maroñ in jutōk imam kin men in.

10 A ke Ezra ej jar im ukwelok, im ej jōñ im buñbero iman mweo imōn Anij, e ar kweloktok nōn iben jen Israel, juōn jar e kanuij lap ian man ro im kōra im ajiri; bwe armij ro re kanuij jōñ. 2 Im Shekenaia nejin Jehaiel, juōn ian ro nejin Ilam, e ar uak im ba nōn Ezra, Kim ar bwir nae amuij Anij, im kim ar belele iben kōra ro re drua maijet ian ro dri ailiñ in enin: ijoke, eor kejjatrikrik nōn Israel kin men in. 3 Inem kiō kimin kōmōn juōn bujen iben amuij Anij in jolok limaro belem otemjej, im ro emwij lotak jen ir, ekar nōn bebe an aō iroi, im an ro rej wuririr kin kien amuij Anij; im ren kōmōn men in ekar nōn kien. 4 Kwon jerkak; bwe men in kwonam, im kimij ibōm: kwon beran in kōmōne.

5 Inem Ezra e ar jerkak, im e ar kōmōn bwe ro re utiej ian pris ro, ro dri Livai, im aolepen Israel, ren kanōjni j bwe ren kōmōn ekar nōn nan in. Ein drein rej kanōjni j. 6 Inem Ezra e ar jerkak jen imōn Anij, im e ar dreloñ ilo mōjabeo an Jihohehanan nejin Ilaeshib: im ke e ar itok nōn ijo, e ar jab mōña bred, ak irak dren; bwe e ar jōñōt bwir eo an ro dri jebokwe. 7 Im rar kwaloklok nōn ro nejin jebokwe otemjej i Juda im Jerusalem, bwe ren kweloktok nōn Jerusalem: 8 im ro re jamin itok ilo jilu ran, ekar nōn bebe an iroi ro im ridto ro, aolepen mweiuk ko mweien en joko jen e, im naj kijbil e jen jar an ro dri jebokwe.

9 Inem ro dri Juda im ro dri Benjamin otemjej rar kweloktok nōn Jerusalem ilo ran ko jilu: (e kar aliñ eo ken ka druatin juōn, im ran eo ken ka roñoul in aliñ eo); im armij otemjej rar jijōt ilo jikin eo e rābōkbōk iman imōn Anij, im rej wuririr kin men in im kin wut eo elap. 10 Im Ezra pris eo e ar jutōk, im ba nōn ir, Kom ar bwir, im kom ar belek kōra ro drua, im kalaplok ruōn Israel.

11 Kin men in komin ukwelok nōn Jeova, Anij an ro jimam, im kōmōn ankil An; im komin kijbil kom jen armij ro dri ailīn in, im jen kōra ro drua. 12 Inem aolepen jar eo rar uak im ba kin ainikeir elap, Einwōt am ba kin kim, ein drein kimin kōmōni. 13 A armij ro relōn wōt, im ien in ien elōn wut, im kim ban jutōk inabij: im men in e jab jerbal in juōn im men ran; bwe elap am bwir kin men in. 14 Iroj ro am ren jutōk kin aolepen jar in, im ro rej ber ilo jikin kwelok ko am im emwij air belek kōra ro drua ren itok ilo ien ko rej bebe kake, im ibeir ridto ro an jabrewōt jikin kwelok, im ro air dri eka-jet, mae ien jeorlok illu e bwil an amuij Anij jen kim, mae ien e jemlok men in. 15 Jonetan wōt nejin Esahel im Jazaia nejin Tikva rar jutōk im jumae men in: im Mishullam im Shabitai dri Livai rar jibōn ir.

16 Im ein drein an ro nejin jebokwe kōmōn. Im Ezra pris eo, iben jībō ro an imōn ro jimair, ekar nōn mo ko imōn ro jimair, im ir otemjej kin etair, emwij kamōkelok iair; im rar jījōt ran eo mokta ilo aliñ eo ken ka joñoul bwe ren lale men in. 17 Im rar kamwijlok kin man otemjej rar belek kōra ro drua ilo ran eo mokta ilo aliñ eo mokta.

18 Im ian ro nejin pris ro rar belek kōra ro drua rar lo ian ro nejin Jeshua, nejin Jozedak, im ro jein im jātīn, Measaia, im Iliezar, im Jerib, im Gedelaia. 19 Im rar letok peir bwe ren jolok limaro beleir; im bwe eor rueir rar lelok juōn sip koman jen bwij eo kin rueir. 20 Im ian ro nejin Immer: Hanenai im Zebadaia. 21 Im ian ro nejin Herim: Measeaia, im Ilaija, im Shimeaia, im Jehaiel,

im Uzzaia. 22 Im ian ro nejin Pashur: Ilioinai, Measeia, Ishmeel, Netanel, Jozebad, im Elesia.

23 Im ian ro dri Livai: Jozebad, im Shimeai, im Kilaia (eo Kelaita), Peteaia, Juda, im Iliezar.

24 Im ian ro dri al: Ilaieshib. Im ian ro dri lale kejem: Shallum, im Tileim, im Urai.

25 Im ian Israel: ian ro nejin Perosh: Remaia, im Izzaia, im Malkaija, im Mijemin, im Iliezar, im Malkaija, im Beneia. 26 Im ian ro nejin Ilam: Mattanaia, Zekaraia im Jihaiel, im Abdai, im Jerimot, im Ilaija. 27 Im ian ro nejin Zattu: Ilioinai, Ilaieshib, Mattanaia, im Jerimot, im Zebad, im Ezaiza. 28 Im ian ro nejin Bibai: Jihohenan, Hanenaia, Zabbai, Atlai. 29 Im ian ro nejin Benai: Mishullam, Malluk, im Adaia, im Jashub, im Shial, Jerimot. 30 Im ian ro nejin Pehat-moab: Adna, im Kilal, Beneia, Measeia, Mattanaia, Bizalel, im Binai, im Menassa. 31 Im ian ro nejin Herim: Iliezar, Isshaija Malkaija, Shemeaia, Shimeon, 32 Benjamin, Malluk, Shemeraia. 33 Ian ro nejin Hashum: Mattanaia, Mattata, Zebad, Elipelet, Jeremai, Menassa, Shimeai. 34 Ian ro nejin Benai: Meadai, Amram, im Uel, 35 Beneia, Bedeia, Kelluai, 36 Vanaia, Meremot, Ilaieshib, 37 Mattanaia, Mattenai, im Jeasu, 38 im Benai, im Binuai, Shimeai. 39 im Shelemaia, im Netan, im Adaia, 40 Maknadibai, Sheshai, Sharai, 41 Azerel, im Shelemaia, Shemeraia, 42 Shallum, Ameraia, Josep. 43 Ian ro nejin Nibo: Jeaiel, Mattataia, Zebad, Zebina, Iddo, im Joel, Beneia. 44 Rein otemjej rar bōk limaro beleir ro drua; im iben jet ian ro beleir emwij air keutak ro nejir.

BUK IN NIHIMAIA

1 Nan ko an ¹ Nihimaia nejin Hakekelaia.

Ak ilo aliñ Kislev, ilo yiō eo ken ka roñoul, ke I ar ber i ² Shushan, mweo imōn iroi, **2** im Hanenai, juōn ian ro jeiō im jātiō, e ar itok, e im jet eman jen Juda; im I ar kajitōk ibeir kin dri Ju ro, ro mātōn iri ro re berwōt jen jebokwe eo, im kin Jerusalem. **3** Im re ba nōn iō, Ro mātōn iri rej berwōt jen jebokwe eo ilo eneo, rej ilo jorran elap im ilo kinak: emwij rupelōllok worwor an Jerusalem, im tile aor ko an kin kijeek.

4 Im ke emwij aō roñjake nan kein, ³ I ar jijōt im jōñ, im I ar liāj-lol iomin jet ran; im I ar jitlok im jar iman mejen Anij in lōñ ko, **5** im I ar ba, Ij akwelap nōn Kwe, O Jeova, Anij in lōñ ko, Anij laplap im dri kemjōk, Ej lale bujen im tiriamokake iben ro rej yokwe im bokake kien ko An: **6** im kiō lojiliñōm en roñjake, im mejōm ren bello, bwe Kwon maroñ in roñ jar eo aō korijerōm, eo ij jar kake imam ien in, ran im boñ, kin ro nejin Israel ro korijerōm, ke ij kwalok bwir ko an ro nejin Israel, kim ar bwir kake nae Yuk. Aet, ña im imōn jema kim ar bwir: **7** kim ar kōmōn men ko re kanuij nana nae Yuk, im kim ar jab bokake kien ko, ak nan in kaiñi ko, ak kabuñjar ko, Kwar jiroñ dri korijerōm Moses kake. **8** Ij akwelap nōn Kwe, Kwon keme-mej nan eo Kwar jiroñ dri korijerōm Moses, im ba, Elañe kom naj bwir, I naj kijibliklok kom nōn ijo etolok i bwiljin ro dri ailiñ ko: **9** a elañe komij jeblaktok nōn iba, im bokake kien ko Aō, im kōmōni, meñe ro emwij jolok ir rej ber ilo mōtōn lōñ ko retoloktata, I naj kokweloktok ir jen ijo, im I naj āñintok ir nōn jikin eo emwij Aō kălet e, im kōmōn bwe eta

en jokwe ie. **10** Ak rein ro dri korijerōm, im ro dri ailiñ Am, ro Kwar lo-moren ir kin Am kajur elap, im kin peōm e kajur. **11** O Iroi, ij akwelap nōn Yuk, lojiliñōm en roñjake jar an dri korijerōm, im bareinwōt jar an ro jet dri korijerōm, ro rej mōnōnō in mijōk etōm: im ij akwelap bwe Kwon kejerammōn ña korijerōm ranin, im lelok nōn e joiy iman mejen armij in.

2 Ak ña I ar dri ititōk nōn kiñ eo. **1** Im ilo aliñ Naisan, ilo yiō eo ken ka roñoul an Artaxerxes kiñ, ke eor wain iman, I ar kwotōke wain eo im lelok nōn kiñ eo. Ak mokta I kin jab buromōj iman mejen. **2** Im kiñ eo e ar ba nōn iō, Etke kwoj mejen buromōj bwe kwo jab nañinmij? men in wōt buromōj ilo buruōm. Inem I ar kanuij lelñōñ. **3** Im I ar ba nōn kiñ eo, Kiñ eo en mour nōn in drio: etke in jab buromōj ke jikin kwelok eo, jikin lūp ko lūpōn ro jema, ej men in jebeplok, im emwij tile acr ko an kin kijeek? **4** Inem kiñ eo e ar ba nōn iō, Ta eo kwoj kajitōk? ¹ Ein drein I ar kajitōk nōn Anij in lōñ ko. **5** Inem I ar ba nōn kiñ eo, Elañe ej emōn iben kiñ ne, im elañe I ar lo joiy iman mejōm, bwe kwon jilkinlok iō nōn Juda, nōn jikin kwelok ko an lūpōn ro jema, bwe in kalek e. **6** Im kiñ eo e ar ba nōn iō, (liroi eo e ar bareinwōt jijōt iturin), Ie toñ am naj joko? im kwo naj jeblaktok ñāt? Ein drein e ar emōn iben kiñ eo bwe en jilkinlok iō; im I ar kajejit nōn e juōn ien. **7** Bar juōn, I ar ba nōn kiñ eo, Elañe emōn iben kiñ ne, ren letok letter ko nōn iroi ro i River jabueo, bwe ren kamelim aō driblok mae ien I naj tōbar Juda; **8** im juōn letter nōn Esap dri lale wijki an kiñ, bwe en letok wijki ko nōn kōmōnmōn alal ko nōn aor ko in me eo ekar nōn

¹ Jap. 10. 1. ² Est. 1. 2. ³ Ezra 9. 3.

¹ Jap. 1. 4.

mweo, im ñôn worwor in jikin kwe-lok eo, im ñôn mweo imō eo I naj dreloñ iloan. Im kiñ eo e ar letok ñôn iō, ekar ñôn pein aō Anij emōn loō.

9 Inem I ar itok ñôn iben iroi ro i River jabueo, im lelok ñôn ir letter ko jen kiñ eo. Ak kiñ eo e ar jilkinlok ibalok kapen ro in jar in tōrinae im ro dri uwe ion ors. 10 Im ke Sanbalat dri Horon, im Tobaia dri korijer, dri Amon, rar roñjake, e ar kanuij kaburomōj ir, bwe juōn eman e ar iten kabukot jerammōn an ro nejin Israel. 11 Ein drein I ar itok ñôn Jerusalem, im ber ie iomin jiluran. 12 Im I ar jerkak ilo boñ, ña im jet armij iba reit wōt, im I ar jab kennanek jabrewōt armij ta eo aō Anij e ar likit ilo buruō bwe in kōmōn ñôn Jerusalem; im ejelok kiru iba, a kiru eo wōt I ar uwe ion. 13 Im I ar drioi jlok ilo boñ ilo aor in komlōl, aet ñôn aibij in jakol, im ñôn aor in toeōk, im I ar aluij worwor ko an Jerusalem, emwij ruprupe, im aor ko an re joko kin kijeek. 14 Inem I ar wōnmanlok ñôn aor in unin dren, im ñôn lwe an kiñ: a ejelok jikin kiru eo aō bwe en etal ie. 15 Inem I ar wōnliñlok ilo boñ iturin wea eo, im aluij worwor eo: im I ar oktōk im dreloñ ilo aor in komlōl, im ein drein jeblaktok. 16 Im iroi ro re jaje I ar ejrot; im I jañin kennanek dri Ju ro, ak pris ro, ak ro dri utiej, ak iroi rōn, ak ro jet ro rar kōmōn jerbaleo.

17 Inem I ar ba ñôn ir, Komij lo wōt jerata eo ar, ¹ ekijkan Jerusalem ej men in jebeplot, im aor ko an re joko kin kijeek: komin itok jen kalek worwor an Jerusalem, bwe jen jab bar men in kinak. 18 Im I ar kennanek ir bwe pein aō Anij emōn ej ber ioō, bareinwōt nan ko jen kiñ eo im e ar ba ñôn iō. Im re ba, Jen loetōk im kalek. Ein drein rej kaka-jur peir ñôn jerbaleo emōn. 19 A ke Sanbalat dri Horon, im Tobaia dri korijer, dri Amon, im Gishem dri Arebia, rar roñjake, ² rar etōñ im

kajirere kake kim, im kejekron kim, im ba, Ta men in komij kōmōne? komij kabata nae kiñ eo ke? 20 Inem I ar uak ir, im ba ñôn ir, Anij in lōñ ko, E naj kejerammōn kim, kin men in, kim ro dri korijeran naj jutōk im kalek: a ejelok ami kij, ak kwonami, ak men in ememej ilo Jerusalem.

3 Inem Ilaieshib pris eo elap, e ar jutōk iben ro jein im jatin pris ro, im rar kalek aor in sip; rar kokwojarjar e, im kajutōk aor ko an; ñôn imōn ebar an Hamia rar kokwojarjar e, ñôn imōn ebar an Hananel. 2 Im ebak ñôn ir armij jen Jeriko rar kalek. Im ebak ñôn ir Zakkur nejin Imrai e ar kalek.

3 Im ro nejin Hasinea rar kalek ¹ kejem in iik; rar likit alal ko an, im kajutōk aor ko an, ken kili ko an, im alal ko ken kabine. 4 Im ebak ñôn ir Merimot nejin Uraia nejin Hakkoz e ar kōkāl. Im ebak ñôn ir Mishullam nejin Berekaia, nejin Meshizebel e ar kōkāl. Im ebak ñôn ir Zedok nejin Beana e ar kōkāl. 5 Im ebak ñôn ir dri Tekoa rar kōkāl: a ro re utiej iair rar jab likit kenwair ñôn jerbaleo an iroi eo air.

6 Im kejem eo e mor Joieda nejin Pasia im Mishullam nejin Bisodia rar kōkāl; rar likit alal ko an, im kajutōk aor ko an, im ken kili ko an im alal ko ken kabine. 7 Im ebak ñôn ir Miletaia dri Gibeon, im Jedon dri Mironot, armij dri Gibeon, im ro dri Mizpa, rar ebake tron an iroi i River jabueo, rar kōkāl. 8 Im ebak ñôn e Uzaiel nejin Harhaia, dri jerbaleo gold, e ar kōkāl. Im ebak ñôn e Hanenaia juōn ian ro dri kōmōn men ko re ñōj e ar kōkāl, im rar kabine Jerusalem ñôn worwor eo e rābōkbōk. 9 Im ebak ñôn ir Ripeia nejin Hur e ar kōkāl, iroi ion jibilkwōn bukwōn Jerusalem. 10 Im ebak ñôn ir Jidaia nejin Harumap e ar kōkāl ikijen mweo imōn. Im ebak ñôn e Hattush nejin Hashabnia e ar kōkāl. 11 Malkaija nejin Herim, im Hashub nejin Pehat-moab, rar kōkāl bar juōn mōtōn, im imōn ebar an ubaj

ko. 12 Im ebak ñōn e Shallum nejn Halohesh e ar kōkāl, iroiḡ ion jibilkwōn bukwōn Jerusalem, e im limaro nejn.

13 ¹ Kejem in komlōl Henun e ar kalek e, im ro dri Zenoa; rar kalek e, im kajutōk aor ko an, ken kili ko an, im alal ko ken kabine, im juōn tausan kubit an worwor eo ñōn aor in toeōk.

14 Im kejem in toeōk Malkaija nejn Rikabe e ar kōkāl, e iroiḡ in bukwōn Bet-hakirem; e ar kalek e, im kajutōk aor ko an, ken kili ko an, im alal ko ken kabine.

15 Im Shallum nejn Kolhozi, iroiḡ in bukwōn Mizpa, e ar kōkāl ² kejem in unin dren eo; e ar kōkāle, im imwe, im kajutōk aor ko an, ken kili ko an, im alal ko ken kabine, im worwor iturin lwe Shila ebake jikin kallip an kiñ, ñōn ken uwe ko rar wōnlōllok jen jikin kwelok an Devid. 16 Im ilokōnlok, Nihimaia nejn Azbuk, iroiḡ ion jibilkwōn bukwōn Bet-zur, e ar kōkāl, ñōn jikin kwelok ikijen lūp ko lūpōn Devid, im ñōn lwe eo emwij kōmōne, im ñōn mweo imōn armij ro re kajur. 17 Im ilokōnlok, ro dri Livai rar kōkāl, Rihum nejn Benai. Ebak ñōn e Hashebaia, iroiḡ in jibilkwōn bukwōn Kiaila e ar kōkāle, ñōn bukwōn eo an. 18 Ilokōnlok, ro jeir im jātir rar kōkāl, Bavei nejn Henedad, iroiḡ in jibilkwōn bukwōn Kiaila. 19 Im ebak ñōn e Izer nejn Jeshua iroiḡ ion Mizpa, e ar kōkāl bar juōn mōtōn, ikijen ial liñlok ñōn imōn ken tōrinae ko i bōul in worwor eo. 20 Ilokōnlok, Beruk nejn Zabai e ar niknik in kōkāl bar juōn mōtōn, jen bōul in worwor eo ñōn aor in mweo imōn Ilaieshib pris eo elap. 21 Ilokōnlok, Merimot nejn Uraia, nejn Hakkoz e ar kōkāl bar juōn mōtōn jen aor in imōn Ilaieshib ñōn jabōn imōn Ilaieshib. 22 Im ilokōnlok, pris ro rar kōkāl, armij jen ene biken wōt juōn. 23 Ilokairlok, Benjamin im Hasshub rar kōkāl ikijen mweo imweir. Ilokairlok, Azaraia nejn Measeia nejn Anenaia e ar kōkāl iturin mweo imōn. 24 Ilo-

kōnlok, Binuai nejn Henedad e ar kōkāl bar juōn mōtōn jen imōn Azaraia ñōn bōul in worwor eo, im imōn jabōn. 25 Pelai nejn Uzai e ar kōkāl ikijen bōul in worwor eo, im imōn bar eo ej jen imōn kiñ eo ilōñ, eo ej iturin jikin dri tōrinae rej dri lale. Ilokōnlok, Pedeia nejn Perosh e ar kōkāl. 26 (Ak ro dri Netinim rar jokwe i Opel, ñōn jikin eo ikijen aor in dren i rear, im imōn bar ej jutōk iman.) 27 Ilokōnlok, ro dri Tekoa rar kōkāl bar juōn mōtōn, ikijen imōn bar elap eo ej jutōk iman, im ñōn worwor in Opel.

28 Pris ro rar kōkāl ¹ ilōñin kejem in ors ko, jabrewōt eo ikijen mweo imōn. 29 Ilokairlok, Zedok nejn Immer e ar kōkāl ikijen mweo imōn. Im ilokōnlok, Shemaia nejn Shekenaia, dri lale kejem i rear e ar kōkāl. 30 Ilokōnlok, Hanenaia nejn Shemaia, e ar kōkāl, im Henun nejn Zelap ken ka jiljullo, bar juōn mōtōn. Ilokōnlok, Mishullam nejn Berekaia e ar kōkāl ikijen mōjabeo an. 31 Ilokōnlok, Malkaija juōn ian ro dri jerbali gold, e ar kōkāl ñōn imōn ro dri Netinim, im an ro dri wia, ikijen kejem Hamipkad, im ñōn ialliñlok an jabōn. 32 Im ikōtan ialliñlok an jabōn im kejem in sip, ro dri jerbali gold im ro dri wia rar kōkāl.

4 A ke ² Sanbalat e ar roñjake bwe kimij kalek worwor eo, ej illu, im e kanuij bwil, im e ar kajirere kake dri Ju ro. 2 Im e ar konono iman ro jein im jātin im jar in tōrinae an Sameria, im e ba, ³ Dri Ju rein, dri ban, rej it? re naj kabin jikir ke? re naj katok ke? re naj kajemlok ilo juōn ran ke? re naj kōkāl dreka ko jen ejoiḡ ko in menoknok, ke emwij tile ke? 3 Ak Tobaia dri Amon e ar ber iturin, im e ar ba, Men ko rej kaleki, elañe juōn kiru fox e naj wōnliñlok e naj ruplōllok air worwor dreka. 4 Kwon roñjake, O amuij Anij: bwe rej kejekron kim: im Kwon kejeorlik air kinak ion bōrair, im lelok ir men in rakim ilo enen dri jebokwe; 5 im jab kalibubu air jerawiwi, im

¹ Jap. 2. 13. ² Jap. 2. 17.

³ Kifi 11. 16. ² Jap. 2. 10. ³ Ezra 4. 9, 10.

jab jeor air bwir jen imam: bwe rar kakitōtōik Yuk iman ro dri kalek. 6 Ein drein kim ar kalek worwor eo: im emwij kobaik aolepen worwor eo ñōn jibilkwōn utiejē: bwe armij re mōnōnō in jerbal.

7 A ke Sanbalat, im Tobaia, im ro dri Arebia, im ro dri Amon, im ro dri Ashdod, rar roñjake bwe jerbal in kōkāl worwor ko in Jerusalem e ar wōnmanlok wōt, bwe rar jino in binej roñ ko ilo worwor, re kanuij illu; 8 im i otemjej rar bebe iben dron bwe ren item tōrinaek Jerusalem, in kōmōn airwaro iloan. 9 A kim ar jar ñōn amuij Anij, im likit jet dri kejar ran im boñ, kin ir. 10 Im Juda e ar ba, Kajur an ro dri inene e jokolok, im elōñ menoknok; ein drein kim jab maroñ in kalek worwor eo. 11 Im ro dri kijirāte kim rar ba, Re jamin jela, ak lo, mae ien am dreloñ i bwiljir, im mōn ir, im kōmōn bwe jerbal eo en bwijrōk. 12 Im ein drein ke ro dri Ju, ro rar jokwe iturir rar itok, re ba ñōn kim joñoul alen, jen jikir otemjej, Emōn komin jeblaktok ñōn ibem. 13 Kin men in I ar likit ilo jikin ko re etātata elikin worwor eo i jikin ko re alikar, armij ro ekar ñōn ro nukir im ibeir jāji ko air, im mōri ko air, im libon ko air. 14 Im I ar reilok, im jutōk, im ba ñōn iroi ro, im ñōn armij ro jet, Komin jab mi-jōk ir: komin kememej Iroi eo ej lap im dri kaleñōñ, im komin tōrinae kin ro jeōmi im jātōmi, ro nejōmi man im kōra, limaro belemi, im mo ko im-wemi.

15 Im ke ro dri kijirāte kim rar roñjake bwe kim jela men eo, im ¹Anij e ar kōmōn air bebe men in bwebwe, kim ar jeblaklok, kim otemjej ñōn worwor eo, jabrewōt ñōn jerbal eo an. 16 Im jen ien eo, jibilkwōn ro dri korijera rar jerbal wōt, im jibilkwōn iair rar kapjeri mōri ko, likipijñōk ko, im libon ko, im kobe ko ken tōrak: im iroi ro rar ber elikin aolepen imōn Juda. 17 Ro rar kalek worwor eo im ro rar kwotōke ine ko; jabrewōt iair e ar jerbal kin

juōn pein im kin pein eo juōn e ar bōk ken tōrinae eo an; 18 im ro dri kalek, jabrewōt iair e ar kañōrñōr e kin jāji, im ein drein ej kalek. Im eo ej jilil ej ituriō. 19 Im I ar ba ñōn ro re utiej im ñōn iroi ro im ro jet ian armij rōn, Jerbal in elap im bin, im kim melo jen dron ion worwor: 20 ilo jabrewōt jikin kom naj roñjake ainiken jilil, komin kweloktok ijo ñōn kim; ar Anij e naj tōrinae kin kij.

21 Ein drein kim ar jerbal wōt: im jibilkwōn iair rar kapjere mōri ko jen rantak ñōn ien walok iju ko. 22 Ein drein ien eo I ar ba ñōn armij ro, Jabrewōt iami im dri korijeran en jokwe iloan Jerusalem, bwe ilo boñ ren dri bar kij, im ren jerbal ilo ran. 23 Ein drein ña, im ro jeiō im jātīō, im ro dri korijera, im armij dri bar rej lor ña, ejelok juōn iar e ar wutik nuknuk ko an, jabrewōt iar e ar ilok ñōn dren im ken tōrinae eo an iben.

5 Ien eo e ¹ar walok juōn keroro elap jen armij ro im limaro beleir nae ro jeir im jātir dri Ja ro. 2 Bwe jet re ba, Kim, kab ro nejem man im kōra, kim lōñ: kimin bōk korn bwe kimin mōña im mour. 3 Bar jet re bareinwōt ba, Kimij lelok jikin kallip ko am men in kamol am muri, im bwil in grep ko am, im mo ko im-wem: kimin bōk korn, bwe ien ñita. 4 Bareinwōt eor re ba, Kim ar muri kin mōnni in owōjlok ñōn kiñ eo, kin jikin kallip ko am im kin bwil in grep ko am. 5 A kiō kōniekem ej einwōt kōniekin ro jeim im jātīm, ro nejem einwōt ro nejir: im lo, kimij kōtaik ñōn kurekake ro nejem man im kōra bwe ren korijer, im jet ian ro nejem kōra rej jebokwe kiō: im kim jab maroñ in bōprae; bwe jikin kallip ko am im bwil in grep ko am rej iben armij ro jet.

6 Im I ar kanuij illu ke I ar roñjake air lamij kin nan kein. 7 Inem I ar bebe ilo buruō, im I ar akwail iben ro dri utiej im iroi ro rōn, im I ar ba ñōn ir, Komij bōk jimair, jabrewōt

eo jen jein im jätin. Im I ar kokweloktok juōn jar elap nae ir. 8 Im I ar ba ñōn ir, Kim, einwōt am maroñ kim ar lomoren ro jeim im jätim dri Ju ro, emwij wiakake ir ñōn dri ailiñ ko; im kom kōnan wiakake ro jeōmi im jätōmi ke, im ren wiakake ir ñōn kij ke? Inem rej kejeklokjen, im jab lo juōn wōt nan. 9 Bareinwōt I ar ba, Men eo komij kōmōne e jab emōn: e jab emōn ami etetal ilo mijōk Anij eo ar, kin kinak eo an ro dri ailiñ ko dri kijirāte kij ke? 10 Im ein drein, ña im ro jeio im jätio im ro dri korijera, kimij lelok ñōn ir mōnni im korn ilo muri kemem. Ij akwelap ñōn kom bwe jen likit aruij bōk jima in. 11 Komin kejeblak ñōn ir, ij akwelap ibemi, ranin, jikin kallip ko air, bwil in grep ko air, air worwor in oliv, im mo ko imweir, im juōn mōtōn jibuki mōtōn mōnni, im korn, im wain ekāl, im oil, komij bōk jen ibeir. 12 Inem re ba, kim naj kejeblaki, im jamin bar kajitōk ibeir; ein drein kim naj kōmōn, einwōt kwar ba. Inem I ar kirtok pris ro, im bōk kanōjniy ibeir bwe ren kōmōn ekar ñōn kalimur in. 13 Bar juōn, I ar bikbikri nuknuk ko aō, im I ar ba, Ein drein Anij en kamōkit jen mweo imōn, im jen jermal eo an, jabrewōt armij e jab kejbārok kalimur in; ein drein ren kamōkit e im lutōklok e. Im aolepen jar eo re ba, Amen, im rar nebar Jeova. Im armij ro rar kōmōn ekar ñōn kalimur in.

14 Bar juōn, jen ien eo ke ar likit io iroi jioir ilo enen Juda, jen yiō eo ken ka roñoul ñōn yiō eo ken ka jilñoul ruo an Artaxerxes kiñ, iomin joñoul ruo yiō, ña im ro jeio im jätio kim ar jab mōña bred an iroi jio. 15 A ro mokta jen ña rar likit ine ko ion armij rōn, im rar bōk jen ir bred im wain, kab eñoul shekel silver: aet ro korijerair rar iroi jio armij rōn: a e jab ein drein aō kōmōn, kin aō mijōk Anij. 16 Aet, bareinwōt, I ar niknik ilo jermal in worwor in, im kim ar jab wiaik jabrewōt wāto: im emwij kokweloktok ro dri korijera otemjej ñōn jermal eo. 17 Bar

juōn, ilo tebel eo aō, jen ian dri Ju im iroi jio rōn, jibuki limñoul armij, eorlok jen ro rar itok ñōn ibem jen iben ro dri ailiñ ko iturem. 18 Ak men ko rar kapojōk ñōn juōn ran, juōn ox im jiljino sip men in kålet: bareinwōt rar kapojōk bao ko ñōn io, im juōn alen ilo joñoul ran wain wāwen otemjej: mekarta, kin men kein otemjej I ar jab kajitōk bred an iroi jio, bwe men in jebokwe e ar erro ion armij rein. 19 O aō Anij kwon kememej ñōn io, kin emōn, men ko otemjej I ar kōmōni ñōn armij rein.

6 Ak ke rar kennanek Sanbalat, im Tobaia, im Gishem dri Arebia, im ro jet dri kijirāti kim bwe emwij aō kalek worwor eo, im ejelok ettal ej berwōt, (meñe ien eo I jañin kar kajutōk aor ko ilo kejem ko), 2 inem Sanbalat im Gishem rar jiliktok ñōn io, im re ba, Kwon itok, im jen ion dron ilo juōn ian jikin kwelok ko i melan Ono. A rar bebe in kōmōn nana ñōn io. 3 Im I ar jilkinlok ñōn ibeir ro dri jilik, im re ba, Ña ij kōmōn juōn jermal elap, inem I ban wōn-lōlwoj: etke en jokwor jermal in ke ij likite im wōnlōllok ñōn ibemi? 4 Im emen alen air jilkintok ñōn iba einwōt in, im ein drein aō uak ir. 5 Inem Sanbalat e ar jilkintok ñōn iba dri korijeran alen ken ka lailim, im juōn letter e bellok ilo pein, 6 im iloan emwij jeje, Re ba iben ro dri ailiñ ko, im Gashmu e ba, bwe kwe im dri Ju ro komij lemnek in kabata: kin men in kwoj kalek worwor ne: im kwo kōnan kiñ ioir, ekar ñōn nan kein. 7 Im bareinwōt kwar jiroñ ro dri kanan bwe ren kwalok kin kwe i Jerusalem, im re ba, juōn kiñ i Juda: inem re naj kennanek kiñ eo ekar ñōn nan kein. Kin men in, kwon itok im jen bebe iben dron. 8 Inem I ar jiliklok ñōn e, im ba, Ar jab kōmōn men ko einwōt kwar ba, a kwoj kine jen buruōm wōt. 9 Bwe re kōnan kemjōk kim, im re ba, Peir re naj mōjinolok jen jermal eo, bwe ren jab kōmōne. A kiō, O Anij, kwon kakajur pā kā peio.

10 Im I ar dreloñ ilo imōn Sheme-

aia nejin Dileaia nejin Mihetebel, ¹im emwij kile; im e ar ba, Jen wōnmae dron ilo imōn Anij, iloan tempel eo, im jen kili aor ko in tempel: bwe re naj iten mōn yuk; aet ilo bofi re naj iten mōn yuk. 11 Im I ar ba, Emōn ke juōn einwōt ña en ko? im wōn eo ej einwōt ña en kōnan dreloñ iloan tempel eo bwe en kejbārok an mou? I jamin drelōn. 12 Im I ar kili, im lo bwe Anij e ar jab jilkintok e: a e ar kwalok drikanij in nae iō, im Tobaia im Sanbalat rar kejerbal e. 13 Kin men in ar kejerbal e, bwe in mijōk, im kōmōn ein drein, im bwir, im bwe en ibeir men ko ren maroñ in konono nana kake, im ren maroñ in kinaklok iō. 14 O aō Anij, kwon kememej Tobaia im Sanbalat ekar ñōn jerbal kein air, im bareinwōt lio dri kanan Noedaia, im dri kanan ro jet, rar kōnan kemjōk iō.

15 Ein drein ar ²kamwijlok worwor eo ilo roñoul lailim ran, ilo aliñ Ilul, iomin limñoul ruo ran. 16 Im ke ro dri kikirāte kim otemej rar roñjake, inem ro dri ailiñ ko iturem re mijōk, im emwij kōtaik ir ilo mejeir; bwe rar lo bwe am Anij e ar kōmōnmōn jerbal in. 17 Bar juōn, ilo ran ko, iroi ro in Juda rar jilkinlok elōñ letter ñōn Tobaia, im letter ko jen Tobaia rar itok ñōn ibeir. 18 Bwe elōñ i Juda emwij air kanōjniñ ñōn e, kin ke e ar belek lio nejin Shekenaia nejin Era; im Jihohenan, nejin, e ar bōk lio nejin Mishullam, nejin Berekaia, bwe en belen. 19 Bar einwōt rar konono kin kōmōn ko an remōn imaō, im kwalok aō in nan ñōn e. Im Tobaia e ar jilkintok letter ko in kemjōk iō.

7 A ke ³emwij kalek worwor eo, im I ar kajutōk aor ko, im ar kālet ro dri lale kejem im ro dri al, im ro dri Livai, 2 inem I ar lelok ñōn leo jātiō Hanenai, im Hanenaia iroi in me eo, bwe en lale Jerusalem, bwe e armij e tiljek, im elap an mijōk Anij jen elōñ armij. 3 Im I ar ba ñōn ir, Ren jab kablok aor in Jerusalem mae ien e loliñ al; im ke rej bar e

wōt im lale, ren kili aor ko im komin kabini; im komin kōmōn mmij ko ian ro dri Jerusalem, jabrewōt ilo mmij eo an, im jabrewōt en ikijen mweo imōn. 4 A jikin kwelok eo e katbwil; im reit armij iloan, im re jañin kalek mo ko.

5 Im aō Anij e ar likit ilo buruō bwe in kokweloktok ro dri utiej, im iroi ro, bwe ren bwine ir kīn ebeben ko. Im I ar lo buk in ebeben eo an ro rar wōnliñtok mokta, im I ar lo jeje in iloan: 6 ¹Rein ro nejin bukwōn eo, ro rar wōnliñlok jen jebokwe eo an ro emwij bōklok ir, ro Nebukadnezzar kiñ in Babilone ar bōklok ir, im rar jeb-laktok ñōn Jerusalem im Juda, jabrewōt iair ñōn jikin kwelok eo an; 7 ro rar itok iben Zirubabbel, Jeshua, Nihimaia, Azaraia, Reamaia, Nehemani, Mordikai, Bilshan, Misperet, Bigvai, Nihum, Beana.

Oran man rōn ian ro dri Israel: 8 Ro nejin Perosh, ruo tausan jibuki jiljilimjuōñoul ruo. 9 Ro nejin Shepetaia, jilu buki jiljilimjuōñoul ruo. 10 Ro nejin Era, jiljino buki limñoul ruo. 11 Ro nejin Pehat-moab, ian ro nejin Jeshua nejin Joab, ruo tausan drualitōk buki joñoul drualitōk. 12 Ro nejin Ilam, juōn tausan rubuki limñoul emen. 13 Ro nejin Zetu, drualitōk buki eñoul lailim. 14 Ro nejin Zakkai, jiljilimjuōn buki jiljinoñoul. 15 Ro nejin Binuai, jiljino buki eñoul drualitōk. 16 Ro nejin Bibai, jiljino buki roñoul drualitōk. 17 Ro nejin Azgad, ruo tausan jilu buki roñoul ruo. 18 Ro nejin Adonai-kam, jiljino buki jiljinoñoul jiljilimjuōn. 19 Ro nejin Bigvai, ruo tausan jiljilinoñoul jiljilimjuōn. 20 Ro nejin Edin, jiljino buki limñoul lailim. 21 Ro nejin Eter, jen Hezekaia, druatimjuōñoul drualitōk. 22 Ro nejin Hashum, jilu buki roñoul drualitōk. 23 Ro nejin Bizai, jilu buki roñoul emen. 24 Ro nejin Herip, jibuki joñoul ruo. 25 Ro nejin Gibeon, drualitōkñoul lailim. 26 Armij jen Betleem im Nitopa, jibuki drualitōkñoul drualitōk. 27 Armij jen Ana-

tot, jibuki roñoul drualitōk. 28 Armij jen Bet-azmevet, eñoul ruo. 29 Armij jen Kiriati-jerim, Kipaira, im Bierot, jiljilimjuōn buki eñoul jilu. 30 Armij jen Rema im Giba, jiljino buki roñoul juōn. 31 Armij jen Mikmas, jibuki roñoul ruo. 32 Armij jen Betel im Eai, jibuki roñoul jilu. 33 Armij jen Nibo eo juōn, limñoul ruo. 34 Ro nejin Ilam eo juōn, juōn tausan rubuki limñoul emen. 35 Ro nejin Herim, jilu buki roñoul. 36 Ro nejin Jeriko, jilu buki eñoul lailim. 37 Ro nejin Lod, Hedid, in Ono, jiljilimjuōn buki roñoul juōn. 38 Ro nejin Sinea, jilu tausan druatimjuōn buki jilñoul.

39 Pris ro : ro nejin Jidaia, jen imōn Jeshua, druatimjuōn buki jiljilimjuōnñoul jilu. 40 Ro nejin Immer, juōn tausan limñoul ruo. 41 Ro nejin Pashur, juōn tausan rubuki eñoul jiljilimjuōn. 42 Ro nejin Herim, juōn tausan joñoul jiljilimjuōn.

43 Ro dri Livai : ro nejin Jeshua, jen Kadmaiel, ian ro nejin Hodiva, jiljilimjuōnñoul emen. 44 Ro dri al : ro nejin Esap, jibuki eñoul drualitōk. 45 Ro dri lale kejem : ro nejin Shallum, ro nejin Eter, ro nejin Talmon, ro nejin Akkub, ro nejin Hataita, ro nejin Shobai, jibuki jilñoul drualitōk.

46 Ro dri Netinim : ro nejin Zaiha, ro nejin Hasupa, ro nejin Tabeot, 47 ro nejin Kiros, ro nejin Saia, ro nejin Pedon, 48 ro nejin Lebena, ro nejin Hageba, ro nejin Salmeai, 49 ro nejin Henan, ro nejin Gidel, ro nejin Gehar, 50 ro nejin Rieaia, ro nejin Rizin, ro nejin Nikoda, 51 ro nejin Gezam, ro nejin Uzza, ro nejin Pesia, 52 ro nejin Bisai, ro nejin Miunim, ro nejin Nipusesim, 53 ro nejin Bakbuk, ro nejin Hakupa, ro nejin Harhur, 54 ro nejin Bazlit, ro nejin Mihida, ro nejin Harsha, 55 ro nejin Barkos, ro nejin Sisira, ro nejin Tima, 56 ro nejin Nizaia, ro nejin Hatipa.

57 Ro nejin ro dri korijeran Solomon : ro nejin Sotai, ro nejin Sopiret, ro nejin Piraia, 58 ro nejin Jeala, ro nejin Darkon, ro nejin Gidel, 59 ro

nejin Shepetaia, ro nejin Hatil, ro nejin Pokeret-hazibeim, ro nejin Amon. 60 Dri Netinim otemjej, im ro nejin ro dri korijeran Solomon, jilu buki druatimjuōnñoul ruo.

61 Im rein ro rar wōnliñtok jen Tel-mila, Tel-harsha, Kirub, Adon, im Immer; a re ban kwalok mo ko imōn ro jimair, ak ineir, elañe ir dri Israel ke jab ke: 62 Ro nejin Dilaia, ro nejin Tobaia, ro nejin Nikoda, jiljino buki eñoul ruo. 63 Im pris ro : ro nejin Hobai, ro nejin Hakkoz, ro nejin Barzillai, eo e ar bōk lio belen jen limaro nejin Barzillai dri Giliad, im naetan ekar ñōn etair. 64 Rein rar bukot air jeje iben ro rar bwine ir kin ebeben, a rar jab loe : kin men in rej lemnok re jab erreō im jolok ir jen air pris. 65 Im iroi j eo e ar ba ñōn ir, ren jab mōña jen men ko re kwojarjar otem kwojarjar mae ien an jutōk juōn pris im Urim im Tumim iben.

66 Aolepen jar eo otemjelok, eñoul ruo tausan jilu buki jiljinoñoul, 67 eorlok jen ro dri korijerair man im kōra, im orair jiljilimjuōn tausan jilu buki jilñoul jiljilimjuōn : im ibeir rubuki eñoul lailim dri al man im kōra. 68 Im ors ko air jiljilimjuōn buki jilñoul jiljino : mul ko air rubuki eñoul lailim : 69 kamel ko air, ābuki jilñoul lailim; ass ko air, jiljino tausan jiljilimjuōn buki roñoul.

70 Im jet ian jiōb ro an imōn ro jimair rar lelok ñōn jerbal eo. Iroi j eo e ar lelok ñōn jikin mōnni, roñoul tausan derik gold, limñoul besōn, limabuki jilñoul nuknuk in pris. 71 Im jet ian jiōb ro an imōn ro jimair rar lelok na ilo jikin mōnni an jerbal eo, roñoul tausan derik gold, im ruo tausan rubuki paun in silver. 72 Im men in lelok an ro jet ian armij rōn roñoul tausan derik gold, ruo tausan paun in silver, im jiljinoñoul jiljilimjuōn nuknuk in pris.

73 Ein drein pris ro, im ro dri lale kejem, im ro dri al, jet ian armij rōn, im ro dri Netinim, im aolepen dri Israel, rar jokwe ilo jikin kwelok ko air.

Im ke e ar itok aliñ eo ken ka jiljilimjuõn, ro nejin Israel rej ber ilo jikin kwelok ko air. 1 Im armij otemjej rar kweloktok, einwõt juõn armij, ilo jikin eo e rãbõkbõk eo iman kejem in dren: im re ba ñõn 1 Ezra dri jeje eo, bwe en bõktok buk in kien Moses, eo Moses e ar jiroñ Israel. 2 Im Ezra, pris eo, e ar bõktok kien eo iman jar eo, man im kõra, im ro otemjej re maroñ in roñjake im melele, ilo ran eo ken ka juõn in aliñ eo ken ka jiljilimjuõn. 3 Im e ar konono iloan iman jikin eo e rãbõkbõk eo iman kejem in dren, jen jiboñ ñõn raelip, iman mejen man ro im kõra ro, im ro otemjej re maroñ in melele: im lojiliñin armij otemjej rar jõmjõme buk in kien eo. 4 Im Ezra, dri jeje eo, e ar jutõk ilo juõn jikin e utiej rar kõmõnmõn jen ra ko ñõn men in; im iturin, rar jutõk Mattitaia, im Shima, im Aneia, im Uraia, im Hilkaia, im Measiaia, i anbijmaroñõn; im i anmiñin, Pedeia, im Misheel, im Malkaija, im Hashum, im Hashbadena, Zekaraia, im Mishulam. 5 Im Ezra e ar kablok buk eo iman mejen armij otemjej, (bwe e utiej jen armij otemjej); im ke e ar kablok e, armij otemjej rar jutõk. 6 Im Ezra e ar kamõnõnõik Jeova, Anij laplap. Im armij otemjej rar uak, Amen, Amen, im re kwotõke peir: im rar mõiir kin bõrair, im kabuñ ñõn Anij im buñbero. 7 Bar juõn, Jeshua, im Benai, im Sherebaia, Jemin, Akub, Shabetai, Hodaia, Measiaia, Kilaia, Azaraia, Jozebad, Henan, Pilaia, im ro dri Livai, rar kajelaik armij rõn kin kien: im armij ro rar jutõk ilo jikir. 8 Im rar konono ilo buk eo, ilo kien Anij, alikar: im rar kemeleleik e, inem rar melele kake.

9 Im Nihimaia, eo 2 ej iroi, im Ezra 3 pris eo im dri jeje, im ro dri Livai ro rar katakin armij rõn, re ba ñõn armij otemjej, Ranin e kwojarjar ñõn Jeova ami Anij; komin jab liãjlol ak jõñ. Bwe armij otemjej re jõñ ke rar roñjake nan ko an kien.

10 Inem e ar ba ñõn ir, Komin etetal, mõña men ko re mātõk, im irak men ko re tõñõl, im jilkinlok mōtõn ko ñõn eo ar jañin kapojõk ñõn e: bwe ranin e kwojarjar ñõn aruij Anij: im komin jab buronõj; bwe lõñliñ in Jeova ej ami kajur. 11 Ein drein ro dri Livai rar kõkãjeklokjen armij otemjej, im re ba, Komin ikõñ, bwe ranin e kwojarjar: komin jab buromõj. 12 Im armij otemjej rar etetal wõt bwe ren mõña im irak, im jilkinlok mōtõn ko, im bwe ren kõmõn lõñliñ elap, bwe rar melele nan ko emwij kwalok ñõn ir.

13 Im ilo ran eo ken ka ruo rar kokweloktok jiõb ro an imõn ro jimair an armij otemjej, pris ro, im ro dri Livai, ñõn iben Ezra dri jeje eo, bwe ren eoroñ nan ko in kien. 14 Im rar lo jeje ilo kien, ekijkan Jeova e ar jiroñ kin Moses, bwe ro nejin Israel ren jokwe ilo imõn kabero ko ilo aliñ eo ken ka jiljilimjuõn; 15 im bwe ren kwalok im kabuñbuñlok ilo jikin kwelok otemjej air, im ilo Jerusalem, im ba, Komin ilok ñõn tol eo, im bõktok ran oliv, im ran oliv e awia, im ran mirtel, im ran pam, im ran wijki ko re bukwelip, bwe ren kõmõnmõn kake imõn kabero ko, einwõt emwij je. 16 Ein drein armij rar drioielok im bõktok, im kõmõnmõn ñõn ir mõke mo ko imõn kabero, jabrewõt ion kejenwan mweo imõn, im ilo worwor ko, im ilo worwor ko an imõn Anij, im ilo jikin e rãbõkbõk in kejem in dren, im ilo jikin e rãbõkbõk in kejem in Ipreim. 17 Im aolepen jar an ro rar jeblaktok jen jebokwe eo rej kõmõnmõn imõn kabero ko, im jokwe ilo imõn kabero ko: bwe jen ran ko an Joshua nejin Nun, ñõn ran eo, ro nejin Israel rar jab kõmõn einwõt. Im eor lõñliñ e kanuij lap. 18 Bar juõn, ran im ran, jen ran eo mokta ñõn ran eo eliktata, e ar konono ilo buk in kien Anij. Im rar lale kwojkwoj eo iomin jiljilimjuõn ran: im ilo ran eo ken ka drualitõk, juõn kwelok e kwojarjar, ekar ñõn kien eo.

9 Ak ilo ran eo ken ka roñoul emen in aliñ in, ro nejin Israel rar kwe-

lok kin jitlok, im kin nuknuk eklep iren, im brij ioir. 2 Im ro inen Israel rar mōke kejenolok ir jen ro drua otemjej, im rej jutōk im kwalok jera-wiwi ko air iman ro jimair. 3 Im rar jutōk wōt ilo jikir, im rar konono ilo buk in kien Jeova, air Anij, juōn mōtōn emen ran: im bar juōn mōtōn emen rar ukwelok ibeir im kabuñ ñōn Jeova air Anij. 4 Ien eo Jeshua, Benai, Kadmaiel, Shebenaia, Bunai, Sherebaia, Benai, im Kenenai, rar jutōk ilo ken uwe an ro dri Livai, im rar kir kin ainikeir elap ñōn Jeova air Anij.

5 Inem ro dri Livai, Jeshua, im Kadmaiel, im Benai, Hashabneia, Sherebaia, Hodaia, Shebenaia, im Petehaia, re ba, Komin jutōk im kamōññōñik Jeova ami Anij jen in drio ñōn in drio; im en mōññōñ wōt etōm e aibujij, eo koutiej e jen aolepen kamōññōñ im nebar. 6 Kwe Jeova, aet, Kwe wōt; Kwar kōmōñ-mōñ lōñ, lōñ in lōñ ko, im aolepen jar eo an, lōl im men ko ion, lometo ko im aolep ej ilo ir, im Kwoj kejbārok ir otemjej: im jaran lōñ ej kabuñ ñōn Kwe. 7 Kwe Jeova Anij eo, Kwar kālet Ebram, im āñiñintok e jen Ur an dri Kaldia, im lelok ñōn e etan Ebrean, 8 im Kwar lo bwe buruen e tiljek imam, im Kwar kōmōñ juōn bujen iben in lelok enen dri Kenean, dri Het, dri Amor, im dri Periz, im dri Jibus, im dri Girgas, in lelok ñōn inen, im Kwar kamol am in nan; bwe Kwe kwo wānik.

9 Im ¹ Kwar lo jorran an ro jimam ilo Ijipt, im eoroñ air kir iturin Lomalo Ekilmir, 10 im Kwar kwalok kakōle ko im men in bwilōñ ko ion Pero, im ion ro dri korijeran otemjej, im ion armij otemjej dri eneo an: bwe Kwar jela air kōmōñ nae ir kin jua, im Kwar kabuñbuñ etōm einwōt ilo ranin. 11 Im Kwar kijbil lomalo imair, im rar etal ilujen lojit einwōt ion ene e mōra; im ro rar lukwor-kwor ir Kwar julok na ilo mulōl ko, einwōt juōn dreka iloan dren ko relap. 12 Bar juōn, kin juōn jur

kōro Kwar tel ir ilo ran; im kin jur kijeek ilo boñ, bwe en kemramlok ir ilo ial eo ren ilok ielok. 13 Barein-wōt Kwar wōnlōltok ilo tol Sainai, im konono ibeir jen lōñ, im lelok ñōn ir kabuñjar ko re jime, im kien ko re mol, nan in kaiñi in kien ko remōn. 14 Im Kwar kajelaik ir kin Sabat eo Am e kwojarjar, im jiroñ ir kien ko, im nan in kaiñi ko, im juōn kien kin Moses dri korijerōm, 15 im Kwar lelok ñōn ir bred jen lōñ kin air kwuli, im bōktok dren ñōn ir jen dreka ilo air maro, im jiroñ ir bwe ren dreloñ im bōk eneo Kwar kanōjni bwe Kwon lelok ñōn ir.

16 A ir im ro jiman, e kar utiej burueir, ¹ im rar kakijñiñi kenwair, im jab eoroñ kien ko Am, 17 im re makoko in bokake, im re jab keme-mej men in bwilōñ ko Kwar kōmōñ ilo bwiljir, a re kakijñiñi kenwair, im ilo air kabata rar kālet juōn kapen bwe ren jeblaklok ñōn air jebokwe. A Kwe juōn Anij e mōññōñ in jolok bwir, Kwo joiy im tiriamokake, im ibōm elōñ yokwe, inem Kwar jab illok jen ibeir. 18 Aet, ke rar kōmōñmōñ ñōn ir juōn kon in kau unlok, im ba, Eñin am Anij eo e ar āñintok yuk jen Ijipt, im emwij air kōmōñ men in kakitōtō ko relap; 19 mekarta, Kwe ilo Am tiriamokake relōñ Kwar jab illok jen ibeir ilo ene jemaren eo; jur kōro e ar jab illok jen ir ilo ran bwe en tel ir ilo ial; ak jur kijeek ilo boñ, bwe en kemramlok ir, im bakajen ial ijo ren ilok ielok. 20 Kwar bareinwōt lelok Am Jitōb emōn bwe En katakin ir, im jab drebij Am manna jen loñir, im Kwar lelok ñōn ir dren kin air maro. 21 Aet, iomin eñoul yiō Kwar lale ir ilo ene jemaren, im ejelok air aikwij: nuknuk ko air re jab morlok, im e jab bōjlok neir. 22 Bar juōn, Kwar lelok ñōn ir ailiñ in kiñ ko im armij ro, men ko Kwar azejlok ñōn ir ekar ñōn bukwōn ko air: ein drein rar bōk enen Zaion, aet, enen kiñ in Heshbon, im enen Og kiñ in Beshan. 23 Kwar bareinwōt korlok nejir einwōt iju ko ilōñ,

im Kwar kadrelōftok ir na ilo eneo Kwar ba kake nōn ro jimair, bwe ren dreloñ in bōke. 24 Ein drein ro nejir rar dreloñ im bōk eneo, im Kwar kōtaik imair ro dri eneo, ro dri Kenean, im lelok na ilo peir, kiñ ro air bareinwōt, im ro dri ene ko, bwe ren kōmōn nōn ir einwōt air kōnan. 25 Im rar bōk jikin kwelok ko eor air me, im juōn enimōn, im bōk mo ko re obrōk kin men otemjej remōn, aibij dreka ko emwij jeki, bwil in grepko, worwor in oliv ko, im elōñ wijki eor leir: inem re mōña im remāt, im re mātōk, im rar lōñliñ wōt kin Am joij elap.

26 Ijoke, ¹rar kiblia, im kabata nae Yuk, im elkure kiōm, im mōn ro Am dri kanan, ro rar kowe ir bwe ren bar ukot ir nōn Kwe, im rar kōmōn men ko men in kakitōtō. 27 Kin men in Kwar ketok ir na ilo pein ro dri kijirāte ir, ro rar kejjorran ir, im ilo ien air jorran, ke rar kir nōn Kwe, kwar eoroñ jen lōñ ko: im ekar nōn Am tiriamokake relōñ Kwar lelok nōn ir ro dri lomor, ro rar lomor ir jen pein ro dri kijirāte ir. 28 A elikin air lo kakije, rar bar kōmōn nana imam; kin men in Kwar likit ir na ilo pein ro air dri kijirāt, inem rar iroiñ ioir: a ke rar jeblaktok im kir nōn Kwe, Kwar eoroñ jen lōñ: im elōñ alen Am lomor ir ekar nōn tiriamokake ko Am; 29 im Kwar kwalok nae ir, bwe Kwon maroñ in bar bōktok ir nōn kiōm. Ijoke rar jerbalerro nōn ro jet, im jab eoroñ kien ko Am, a re bwir nae kabuñjar ko Am, (ko elañe juōn armij ej kōmōni, enajmour), im rar kijenik aierair, im kakijñiñi kenwair, im re jab kōnan eoroñ. 30 A iomin elōñ yō Kwar mōke kaberber Yuk kake ir, im kwalok nae ir kin Jitōb eo Am ilo dri kanan ro Am: a re jab kōnan eoroñ: kin men in Kwar ketōk ir na ilo pein ro dri ene ko. 31 Mekarta, ilo tiriamokake ko Am relōñ Kwar jab kanuij kokkure ir ak illok jen ir: bwe Kwe juōn Anij e joij im tiriamokake.

32 Inem, amuij Anij, Eo elap, E

kajur, im Anij dri kaleññoñ, Eo ej kejbārok bujen im tiriamokake, Kwon jab likit e erik, aolepen jorran eo e aritok iom, ion kiñ ro am, ion iroiñ ro am, im ion pris ro am, im ion dri kanan ro am, im ion ro jimam, im ion ro drom otemjej, jen ien kiñ ro in Assiria nōn ranin. 33 Ijoke, Kweo kwoj wānik ilo men otemjej e ar itok iom; bwe Kwar kōmōn mol, a kim ar kōmōn nana: 34 ak kiñ ro am, iroiñ ro am, pris ro am, ak ro jimam rar jab lale kiōm, ak eoroñ nan in kaiñi ko Am, im nan ko nan in kennan Kwar kennan nae ir kake. 35 Bwe rar jab korijer nōn Kwe ilo air ailiñ, im ilo Am joij elap Kwar lelok nōn ir, im ilo eneo elap im enimōn Kwar lelok imair, im rar jab jeorlok jen kōmōn ko air im re nana. 36 Lo, kim ro dri korijer ranin, im kin eneo Kwar lelok nōn ro jimam bwe ren mōña leen im men ko an remōn, lo kim dri korijer na ie. 37 Im ej lelok elōñ orlok nōn kiñ ro Kwar likit iom kin jerawiwī ko am; bareinwōt eor air kajur ion enbwinem, im ion kiru ko am, einwōt air kōnan, im kim ber ilo iñtan elap. 38 Mekarta, kin aolepen men in kimij kōmōn juōn bujen emol, im jeje; im iroiñ ro am, ro dri Livai am, im pris ro am, rej sil nōn e.

10 Ak rein ro ¹rar sil: Nihimaia iroiñ eo, nejin Hakelaia, im Zedekaia, 2 Sireaia, Azaraia, Jeremaia, 3 Pashur, Ameraia, Malkaija, 4 Hat-tush, Shebenaia, Maluk, 5 Herim, Merimot, Obedaija, 6 Daniel, Gineton, Beruk, 7 Mishullam, Ebaija, Mijemin, 8 Meazaia, Bilgeai, Shimaia; rein pris ro. 9 Im ro dri Livai: rein, Jeshua nejin Azenaia, Binuai ian ro nejin Henedad, Kadmaiel; 10 im ro jeir im jātir, Shebenaia, Hodaia, Kelaita, Pelaia, Henan, 11 Maika, Rihob, Hashebaia, 12 Zakur, Sherebaia, Shebenaia, 13 Hodaia, Benai, Benainu. 14 Iroiñ ro an armij rōn: Perosh, Pehat-moab, Ilam, Zattu, Benai, 15 Bunai, Azgad, Bibai, 16 Adonaija, Bigvai, Edin, 17 Eter, Hezekaija, Azur, 18 Hodaia, Hash-

um, Bizai, 19 Herip, Anatot, No-beai, 20 Magpaiash, Mishullam, Hezir, 21 Mishizebel, Zedok, Jadua, 22 Peletaia, Henan, Enaia, 23 Hoshia, Hanenaia, Hashub, 24 Halohesh Pilha, Shobek, 25 Rihum, Hashabna, Measeaia, 26 im Ehaia, Henan, Enan, 27 Maluk, Herim, Beana.

28 Im ro jet ian armij ro, pris ro, ro dri Livai, ro dri lale kejem, ro dri al, ro dri Netinim, im ir otemjej rar mōke kejenolok ir jen ro dri ene ko nōn kien Anij, limaro beleir, ro nejir man im kōra, jabrewōt eo eor jela im melele iben; 29 rar koba iben ro jeir im jātir, iroi ro air, im dreloñ ilo juōn kanōjnij, ñe re jab etetal ilo kien Anij, eo emwij lelok kin Moses, korijeran Anij, im bwe kimin lale im kōmōn kien otemjej an Jeova am Anij, im kabuñjar ko An im nan in kaiñi ko An; 30 im bwe kimin jab lelok ro nejōm kōra nōn ro dri ailiñ, ak bōk ro nejir kōra nōn ro nejem man; 31 im elañe ro dri ene in rej bōktok mweuik ko ak korn ilo ran in Sabat bwe ren wiakake, kim jamin wiaik jen ir ilo Sabat, ak ilo juōn ran e kwojarjar: im kim naj kōtlok yiō eo ken ka jiljilimjuōn, im jab kabukot aolepen muri.

32 Bareinwōt kim ar kōmōn kien ko nōn kim, bwe kimin lelok ilo yiō otemjej juōn mōtōn jilu shekel, nōn jerbal an amuij Anij; 33 nōn bred in kalikar, im nōn jurtak in flauo ien otemjej, im nōn katok kijeek ien otemjej, nōn Sabat ko, nōn aliñ ko rekāl, nōn kwojkwōj ko men in likit, im nōn men ko re kwojarjar, im nōn katok kin bwir ko in kōmōn kilājrok nōn Israel, im nōn jerbal otemjej in imōn am Anij. 34 Im kim ar bukot kin kakōle, pris ro, ro dri Livai, im kajur rōn, kin kani in jurtak, bwe kimin bōktok iloan imōn am Anij, ekar nōn mo ko imōn ro jimam; ilo ien ko emwij likiti, yiō otemjej, im tile ion lokatok an Jeova am Anij, einwōt jeje ilo kien eo; 35 im bwe kimin bōktok jomōkōj in leen brij ko am, im jomōkōj in leen jabrewōt wāwen wijki ko, yiō otemjej, nōn imōn

Jeova; 36 bareinwōt manjen ian ro nejem, im ian kiru ko am, einwōt jeje ilo kien, im ko rej lotak mokta jen kau ko am im sip ko am, bwe kimin bōktok nōn imōn am Anij, nōn pris ro rej korijer ilo imōn am Anij: 37 im bwe kimin bōktok jomōkōj in flauo eo am, im jurtak jebōke ko am, im leen jabrewōt wāwen wijki, wain ekāl im oil, nōn pris ro, ilo rum ko in imōn am Anij; im mōtōn joñoul ko jen brij eo am nōn ro dri Livai; bwe ro dri Livai rej bōk mōtōn joñoul ko ilo jikin kwelok otemjej in am kallip. 38 Im pris eo nejin Aron e naj ber iben ro dri Livai, ñe ro dri Livai re naj bōk mōtōn joñoul ko: im ro dri Livai re naj bōkliñtok mōtōn joñoul eo in mōtōn joñoul ko nōn imōn am Anij, nōn rum ko iloan imōn mweuik ko. 39 Bwe ro nejin Israel im no nejin Livai re naj bōktok jurtak baur in korn, im wain ekāl, im oil, nōn rum ko, ijo jābi ko an imōn kwojarjar rej ber ie, im pris ro rej korijer, im ro dri lale kejem, im ro dri al: im kim jamin illok jen mweo imōn am Anij.

11 Im ¹iroi ro an armij rōn rar jokwe i Jerusalem: im armij ro jet rar bukot kin kakōle ko, in āñintok juōn ian joñoul bwe en jokwe ilo Jerusalem, jikin kwelok eo e kwojarjar, im druatimjuōn mōtōn ko ilo jikin kwelok ko jet. 2 Im armij ro rar kamōnōnōik armij otemjej ro rar kōnan mōke lelok ir bwe ren jokwe ilo Jerusalem.

3 Ak rein ro re utiej in bukwōn eo ro rar jokwe i Jerusalem: a ilo jikin kwelok ko in Juda, jabrewōt eo e ar jokwe ilo bukwōn eo an ilo jikin kwelok ko air, Israel, pris ro, ro dri Livai, ro dri Netinim, im ro nejin ro dri korijeran Solomon. 4 Im i Jerusalem rar jokwe jet ian ro nejin Juda, im ian ro nejin Benjamin. Ian ro nejin Juda: Ateaia nejin Uzzaia, nejzin Zekaraia, nejzin Ameraia, nejzin Shepetaia, nejzin Mehalelel, ian ro nejzin Pirez; 5 im Measiaia nejzin Beruk, nejzin Kol-hoze, nejzin Hezezaia, nejzin

Adeaiā, nejin Joierib, nejin Zekaraia, nejin dri Shailo eo. 6 Ro nejin Pirez otemjej rar jokwe i Jerusalem ābuki jiljinoñoul drualitōk ro re beran im kajur.

7 Im rein ro nejin Benjamin: Salu, nejin Mishullam, nejin Joed, nejin Pedeaia, nejin Koleaia, nejin Meaeia, nejin Itaiel, nejin Jesheaia. 8 Im ijillokin Gabeai, Salai, druatimjuōn buki roñoul drualitōk. 9 Im Joel nejin Zikrai ej dri lale ir; im Juda nejin Hasinua e ar ken ka ruo ion jikin kwelok eo.

10 Ian pris ro: Jedeaiā nejin Joierib, Jekin, 11 Sireaiā nejin Hilkaia, nejin Mishullam, nejin Zedok, nejin Mireiot, nejin Ehaitub, iroi jion mweo imōn Anij, 12 im ro jeir im jātir rar kōmōn jerbal in mweo, drualitōk buki roñoul ruo; im Edeaiā nejin Jehoram, nejin Pilelaia, nejin Amzai, nejin Zekaraia, nejin Pashur, nejin Malkaija, 13 im ro jein im jātīn, jīōb ro an imōn ro jimair, rubuki eñoul ruo; im Amashseai nejin Azerel, nejin Azai, nejin Meshilemot, nejin Immer, 14 im ro jeir im jātīr, armij re beran im kajur, jibuki roñoul drualitōk. Im eo dri lale ir Zabdaiel, nejin Hagedolim.

15 Im ian ro dri Livai: Shemeaiā nejin Hashub, nejin Azraikam, nejin Hashebaia, nejin Bunai; 16 im Shabita im Jozebad, ian ro re utiej dri Livai, rej dri lale jerbal eo inabij an mweo imōn Anij; 17 im Mattanaia nejin Maika, nejin Zabdai, nejin Esap, eo lukuwōn in jino kamolol ilo jar, im Bakbukaia, eo ken ka ruo iben ro jein im jātīn; im Abda nejin Shazua, nejin Gelal, nejin Jedutun. 18 Aolepen dri Livai ilo jikin kwelok eo e kwojarjar, rubuki drualitōkñoul emen.

19 Bar juōn, ro dri lale kejem, Akub, Talmon, im ro jeir im jātīr, ro rar bar kejem ko, jibuki jiljilimjuōnñoul ruo. 20 Im dri Israel ro jet, ian pris ro, ro dri Livai, rej ber ilo jikin kwelok otemjej an Juda, jabrewōt ilo men in jolit eo an. 21 A ro dri Netinim rar jokwe i Opel: im

Zaiha im Gishpa rar ion ro dri Netinim.

22 Eo lukuwōn ro dri Livai i Jerusalem Uzai nejin Benai, nejin Hashebaia, nejin Mattanaia, nejin Maika, ian ro nejin Esap, ro dri al, ion jerbal in mweo imōn Anij. 23 Bwe juōn kien jen kiñ eo kin ir, im juōn men in kapoj ñōn ro dri al, ekar ñōn aikwi an jabrewōt ran. 24 Im Petehaia nejin Meshizebel, ian ro nejin Zira nejin Juda, e ar rajitōk kiñ eo ilo men otemjej kin armij ro.

25 Im kin jikin kwelok ko redrik, im jikin kallip ko air, jet ian ro nejin Juda rar jokwe ilo Kiriāt-arba im jikin kwelok ko wujen, ilo Daibon im jikin kwelok ko wujen, im ilo Jekabzeel im jikin kwelok ko wujen, 26 im ilo Jeshua, im ilo Moleda, im Bepilet, 27 im ilo Hezar-shual, im ilo Bier-shiba im jikin kwelok ko wujen, 28 im ilo Ziklag, im ilo Mikona im ilo jikin kwelok ko wujen, 29 im ilo Enrimon, im ilo Zora, im ilo Jarmut, 30 Zenoa, Adulam, im jikin kwelok ko wujen, Lekish im jikin kallip ko an, Azika im jikin kwelok ko wujen. Ein drein rar kamp jen Bier-shiba ñōn komlōl in Hinom. 31 Ro nejin Benjamin bareinwōt rar jokwe jen Giba im etal, im Mikmash im Eaija, im i Betel im jikin kwelok ko wujen, 32 i Anatot, Nob, Anenaia, 33 Hezor, Rema, Giteim, 34 Hedid, Ziboim, Nibalat, 35 Lod, im Ono, komlōl eo an ro dri mejerik. 36 Im ian ro dri Livai, jet lājrok in Juda rar koba iben Benjamin.

12 Ak rein pris ro im ro dri Livai ro rar wōnliñlok iben Zirubabel nejin Shialtiel, im Jeshua: Sireaiā, Jeremaia, Ezra, 2 Ameraia, Maluk, Hatush, 3 Shekenaia, Rihum, Merimot, 4 Iddo, Gineto, Ebaija, 5 Mijamin, Meadaia, Bilga, 6 Shemeia, im Joierib, Jedeaiā, 7 Salu, Amok, Hilkaia, Jedeaiā. Rein lukuwōn pris ro im ro jeir im jātīr ilo ran ko an Jeshua.

8 Bar juōn, ro dri Livai: Jeshua, Binuai, Kadmaiel, Sherebaia, Juda, im Mattanaia, eo ion kamolol ec, e

im ro jein im jätin. 9 Bareinwöt Bakkukaia im Uno, ro jeir im jätir, rej ikiyeir ekar nōn jerbal ko air. 10 Im Jeshua e ar keutak Joiekim, im Joiekim e ar keutak Ilaieshib, im Ilaieshib e ar keutak Joiada, 11 im Joiada e ar keutak Jonetan, im Jonetan e ar keutak Jadua.

12 Im ilo ran ko an Joiekim eor pris, jiōb ro an imōn ro jimair: an Sireaia, Mireaia; an Jeremaia, Hanenaia; 13 an Ezra, Mishullam; an Ameraia, Jihohenan; 14 an Malukai, Jonetan; an Shebenaia, Josep; 15 an Herim, Adna; an Mireiot, Helkai; 16 an Iddo, Zekaraia; an Gineton, Mishullam; 17 an Ebaija, Zikrai; an Miniemim, an Moedaia, Piltai; 18 an Bilga, Shamua; an Shemaia, Jihonetan; 19 im an Joierib, Mattenai; an Jedeiaia, Uzzai; 20 an Salleai, Kaleai; an Amok, Iber; 21 an Hilkai, Hashebaia; an Jedeiaia, Netanel.

22 Kin ro dri Livai, ilo ran ko an Ilaieshib, Joiada, im Johenan, im Jadua, ar jeje jiōb ro an imōn ro jimair; bareinwöt, pris ro, ilo ien eo an Daraiōs dri Pōrsia kiñ. 23 Ro nejin Livai, jiōb ro an imōn ro jimair, ar jeje ir ilo buk in bwebwenato eo, aet nōn ran ko an Johenan nejin Ilaieshib. 24 Im iroi j ro ian ro dri Livai: Hashebaia, Sherebaia, im Jeshua nejin Kadmaiel, iben ro jeir im jätir ikiyeir, bwe ren nebar im kamolol, ekar nōn kien Devid, armij in Anij, rej mmij ebak nōn dron. 25 Mattanaia, im Bakkukaia, Obedaia, Mishullam, Talmon, Akub, dri lale kejem rej kiljake mo ko imōn mweiuk iturin kejem ko. 26 Rein ilo ran ko an Joiekim nejin Jeshua, nejin Joze-dak, im ilo ran ko an Nihimaia iroi j eo, im ilo ran ko an Ezra pris im dri jeje.

27 Im ilo ien lelok worwor in Jerusalem rar kabukot ro dri Livai jen ijoko otemjej jikir, im āñintok ir nōn Jerusalem, bwe ren lale lelok eo kin lōñliñ, im kin kamolol ko, im kin al, kin simbal ko, kab salteri ko, im arp ko. 28 Im ro nejin ro dri al rar

kweloktok, jen eneo emōn biken iturin Jerusalem, im jen jikin kwelok ko an ro dri Nitopa; 29 bareinwöt jen Bet-gilgal, im jen jikin kallip ko an Giba im Azmevet: bwe ro dri al rar kalek nōn ir jikin kwelok ko redrik iturin Jerusalem. 30 Im pris ro im ro dri Livai rar mōke kokwo-jarjar ir; im rar kokwojarjar armij ro, im kejem ko, im worwor eo.

31 Inem I ar telliñlok iroi j ro in Juda ion worwor eo, im I ar likit ruo jar ko relap rar kamolol im etal ilo jepkālōn; im juōn iair e ar etetal i anbijmaroñōn worwor eo im kaioklok kejem in toeōk; 32 im ro rar lor ir, Hosheaia, im jibilkwōn ian iroi j ro in Juda, 33 im Azaraia, Ezra, im Mishullam, 34 Juda im Benjamin, im Shemeaia, im Jeremaia, 35 im jet ian ro nejin pris ro kin jilil ko: Zekaraia nejin Jonetan, nejin Shemeaia, nejin Mattanaia, nejin Maiekaia, nejin Zakur, nejin Esap: 36 im ro jein im jätin, Shemeaia, im Azerel, Milelai, Gilelai, Meai, Netanel, im Juda, Hanenai, ibeir ken kajōñjōñ ko an Devid armij eo ar Anij; im Ezra dri jeje e ar imair. 37 Im iturin kejem in unin dren, im jime wōt imair, rar wōnliñlok kin ken uwe ko in jikin kwelok an Devid, i jikin wōnliñlok ion worwor, ilōñin mw eo imōn Devid, nōn kejem in dren i rear.

38 Im jar eo juōn ian ro dri kamolol rar etal in wōnmae ir, im ña I ar lore, im iba jibilkwōn armij ro, ion worwor eo, ilōñin imōn bar eo iturin ubaj ko, nōn worwor eo e rābōkbōk, 39 im ilōñin kejem in Ipreim, im iturin kejem in etto, im iturin kejem in iik, im imōn bar an Hanenel, im imōn bar an Hamia, im nōn kejem in sip: im rar bwijrōk ilo kejem in ro dri bar. 40 Ein drein rej jutōk jar ko ruo ian ro dri kamolol iloan imōn Anij, im ña, im jibilkwōn ian iroi j ro iba; 41 im pris ro, Ilaiekim, Measiaia, Miniamin, Maiekaia, Elioinai, Zekaraia, im Hanenaia, jilil ko ibeir; 42 im Measiaia, Shemeaia, im Iliezar, im Uzzai, im Jihohenan, im Malkaija, im Ilam, im Izer. Im ro dri

al rar koutiej air al, iben Jezrehaia, air dri tel. 43 Im rar katok kin men in katok ko relōñ ran eo, im rar lōñliñ; bwe Anij e ar kōmōn bwe ren lōñliñ elap: im kōra ro bareinwōt im ro nejir rar lōñliñ: inem lōñliñ an Jerusalem rar roñjake nōn ijo etolok.

44 Im ilo ran eo rar kălet jet armij dri lale rum in mweiuk ko, nōn jurtak ko in jebōk, im jomōkōj ko, mōtōn joñoul ko, bwe ren aini na ie, ekar nōn jikin kallip ko in jikin kwelok ko, mōtōn ko ekar nōn kien nōn pris ro im ro dri Livai: bwe Juda e ar lōñliñ kin pris ro im ro dri Livai ro rar jutōk. 45 Im rar lale jerbal an air Anij, im jerbal in karreo, im ein drein ar kōmōn ro dri al im ro dri lale kejem, ekar nōn kien Devid, im an Solomon, nejin. 46 Bwe ilo ran ko an Devid im Esap ilo ien ko etto e kar juōn iroiñ an ro dri al, im al ko kin nebar im kamolol nōn Anij. 47 Im aolepen Israel ilo ran ko an Zirubabbel, im ilo ran ko an Nihimaia, rar lelok mōtōn ko an ro dri al im ro dri lale kejem, einwōt ekar nōn jabrewōt ran: im rar likit mōke ian, mōtōn eo nōn ro dri Livai: im ro dri Livai rar kamōkelok ian mōtōn eo nōn ro nejin Aron.

13 Ilo ran eo rar konono ilo buk in Moses im karoñjake armij rōn; im iloan ar lo jeje in, bwe ¹juōn dri Amon ak juōn dri Moab e jamin dreloñ na ilo jar an Anij nōn in drio, 2 kin ke rar jab wōnmae ro nejin Israel kin bred im dren, a rar kajerbal Beleam nae ir bwe en kol ir: mekarta, am Anij e ar ukot jerata eo nōn jerammōn. 3 Im ke emwij air roñjake kien eo, rar kejenolok jen Israel aolepen jar eo rej drel aj in dren.

4 Ak mokta jen ien in, Ilaieshib, pris eo, ²emwij likit e bwe en lali rum ko an mweo imōn am Anij, im e ar koba iben Tobaia, 5 e ar kapojōk nōn e juōn rum elap, ijo ilo ien ko mokta rar likit jurtak flauo ko, kaijurjur, im jābi ko, im mōtōn ko joñoul in korn, im wain ekāl, im oil eo,

men ko ekar nōn kien rar lilok nōn ro dri Livai, im ro dri al, im ro dri lale kejem: im katok in jebōke ko nōn pris ro. 6 Ak iomin aolepen ien in, I ar jab ber i Jerusalem; bwe ilo yiō eo ken ka jilñoul ruo an Artaxerxes kiñ in Babilon, I ar ilok nōn iben kiñ eo: im elikin jet ran I ar kajitōk iben kiñ eo bwe in bar ilok, 7 im I ar itok nōn Jerusalem, im I ar jela kin nana eo Ilaieshib e ar kōmōn kin Tobaia, kin an kapoj nōn e juōn rum ilo worwor ko in mweo imōn Anij. 8 Im men in e ar kanuij kaburomōj iō: kin men in I ar jolok jen rum eo men ko otemjej an Tobaia mweien im. 9 Inem I ar jiroñ, im rar karreoik rum ko: im I ar bar bōktok nōn ijo jābi ko an imōn Anij, im jurtak flauo ko, im kaijurjur eo.

10 Im I ar lo bwe ar jab lelok ¹nōn ro dri Livai kij ko air; inem ro dri Livai im ro dri al, ro rar kōmōn jerbal eo, rar ko jabrewōt armij nōn jikin kallip eo an. 11 Inem I ar akwaili iroiñ ro, im I ar ba, Etker rar ilok jen mweo imōn Anij? Im I ar kejeblaktok ir, im likit ir ilo jikir. 12 Inem aolepen Juda rar bōktok aolepen mōtōn joñoul, mōtōn lorn, im wain ekāl, im oil, nōn jikin mweiuk ko. 13 Im I ar kōmōn ro dri lale mweiuk ion jikin mweiuk, Shelimaia pris eo, im Zedok dri jeje, im ian ro dri Livai, Pedeaia: im ijillokir, Henan nejin Zakur, nejin Mattanaia; bwe e alikarlōk air tiljek, im jerbal eo air bwe ren ajejlōk nōn ro jeir im jātir. 14 Kwon kememej iō, O aō Anij, kin men in, im jab jeorlok jerbal ko remōn I ar kōmōni nōn mweo imōn aō Anij, im kin kabuñjar ko an.

15 Ilo ran ko I ar lo ilo Juda jet armij rej juri ken joniōk wain ko ²ilo ran in Sabat, im rej kadrelōñtok tir in jikin kallip ko, im likiti ion ass ko; im ein drein wain, grep ko, im fig ko, im jabrewōt wāwen inek ko, rar bōktok na ilo Jerusalem ilo ran in Sabat: inem I ar kennan nae ir ilo ran eo ke rar wiakake ekōn ko. 16 Bareinwōt jet dri Tair re jokwe iloan, rar bōk-

tok iik, im men in wia kaju wāweir, im wiakake ilo ran in Sabat nōn ro nejn Juda, im ilo Jerusalem. 17 Inem I ar akwaili ro dri utiej in Juda, im ba nōn ir, Ta nana in komij kōmōne im kokkure ran in Sabat? 18 Ro jimami rar jab kōmōn ein drein ke, im Anije ar jab bōktok aolepen nana in ibeir, im ion jikin kwelok in ke? Ijoke, komij bōktok illu elaplok ion Israel kin ami kokkure ran in Sabat.

19 Im ¹ ein drein ke e ar jino in marok ilo kejem ko an Jerusalem mokta jen Sabat, I ar jiroñ bwe ren kili aor ko, im I ar jiroñ bwe ren jab kabel-loki mae jemlokōn Sabat: im I ar likit jet ian ro dri korijera ion kejem ko, bwe ren jab bōktok iloan jabrewōt ine ilo ran in Sabat. 20 Ein drein ro dri wia kin mweiuk wāwen otemjej, rar jiboñōn ilikin Jerusalem juōn ak ruo alen. 21 Inem I ar kenan nae ir, im ba nōn ir, Etke komij jiboñōn ilikin worwor eo? elañe kom naj bar kōmōn ein drein I naj likit peiō iomi. Jen ien eo re jañin bar itok ilo ran in Sabat. 22 Im I ar jiroñ ro dri Livai bwe ren mōke karreoik ir, im ren item lale kejem ko, in kokwojarjar ran in Sabat. Kwon kememej nōn iō, O aō Anij, men in bareinwōt, im tiriamokake iō ekar nōn Am joij elap.

23 Ilo ran ko I ar lo dri Ju ro

¹ rar belek kōra ro jen Ashdod, jen Amon, im jen Moab: 24 im ro nejir rar konono jimōtōn ilo kajin Ashdod, im re ban konono ilo kajin Ju, a ekar nōn kajin jabrewōt ailīñ. 25 Im I ar akwaili ir, im kole ir, im ubrare jet iair, im tōmi kolan bōrair, im kōmōn bwe ren kanōjnij kin Anij, im ba, Komin jab lelok nejōmi kōra nōn ro nejir man, ak bōk ro nejir kōra nōn ro nejōmi man, ak nōn kom mōke. 26 Solomon kiñ in Israel e ar jab bwir kin men kein ke? a iben elōñ kiñ ejelok iair einwōt, im Anij e ar yokwe e, im Anij e ar kōmōn e kiñ ion aolepen Israel: ijoke, kōra ro drua rar kokkure. 27 Inem kimin eoroñ kom in kōmōn aolepen nana in, im bwir nae ar Anij im belek kōra ro drua ke?

28 Inem juōn ian ro nejn Joiada, nejn Ilaieshib pris eo elap, e ar belek lio nejn Sanbalat dri Horon: kin men in I ar kokōk e jen iba. 29 Kwon kememej ir, O aō Anij, kin air kana-naik jerbal in pris, im bujen in pris, im an ro dri Livai.

30 ¹ Ein drein I ar karreoik ir jen ro drua otemjej, im I ar likit kien ko nōn pris ro im nōn ro dri Livai, jabrewōt ilo jerbal eo an; 31 im kin jurtak kani ilo ien ko ar likiti, im kin jomōkōj ko. ² Kwon kememej iō, O aō Anij, nōn emōn.

¹ Liv. 28. 32.

¹ Jap. 10. 30. ² eon 14. 22

BUK IN ESTER

1 Ak ilo ran ko an ¹Ehasuirōs, (e in Ehasuirōs eo e ar kiñ ²jen India im nōn Itiopia, ion ³jibuki roñoul emen bukōn), 2 ilo ran ko ke kiñ Ehasuirōs e ar jijōt ion tron in kiñ eo an, eo e ar ber i ⁴Shushan mweo imōn kiñ, 3 ilo yiō eo ken ka jilu an kiñ, e ar kōmōn juōn kwojkwoj nōn iroi ro an im ro dri korijeran; im kajur an Pōrsia im Midia, bwirōk ro im iroi ro in bukōn ko rar ber iman: **4** ke e ar kwalok mweiuk ko in ailiñ eo e aibujui, im men in nebar an lijiklok, iom in elōñ ran, aet jibuki drualitōkñoul ran. **5** Im ke e jemlok ran kein, kiñ eo e ar kōmōn juon kwojkwoj nōn armij otemjej rej ber i Shushan imōn kiñ eo, ro rettā im ro re utiej, iom in jiljilimjuōn ran, iloan worwor in jikin kallip in mweo imōn kiñ. **6** Eor nuknuk in toto re mouj im re māroro, im blu, emwij lukwōji kin to linen ko remōn im re eōij, nōn luko silver ko im jur ajaj ko: aowej ko gold im silver rar ber ion er ajaj e kilmir, im mār, im mouj, im kilmej. **7** Im rar lelok nōn ir limeir ilo jābi ko gold, (jābi ko elōñ wāweir), im elōñ wain tellokin kiñ, ekar nōn draepe an kiñ. **8** Im air irak ekar nōn kien; ejelok e maroñ in kamakoko: bwe ein drein kiñ eo e ar jiroñ ro dri korijeran ilo mweo imōn, ren kōmōn einwōt jabrewōt e kōnan.

9 Bareinwōt Vashtai, liroi eo, e ar kōmōn juōn kwojkwoj nōn kōra ro ilo imōn kiñ eo an kiñ Ehasuirōs. **10** Ilo ran eo ken ka jiljilimjuōn, ke buruen kiñ eo e mōnōnō kin wain, e ar jiroñ Mihuman, Bizta, Harbona, Bigta, im Ebagta, Zitar, im Karkas, lōmaro jiljilimjuōn dri lale rum in kiki im rar korijer iman mejen Ehasuirōs, kiñ eo, **11** bwe ren āñintok Vashtai, liroi eo, iman kiñ eo, im iben bokrōnat in kiñ,

bwe en kwalok an dreo nōn a. re im iroi ro; bwe e dreo ilo aluij e. **12** A liroi Vashtai e ar makoko in dreloñ ekar nōn kien kiñ, eo emwij an ro dri lale rum im kiki ba: kin meñ in kiñ eo e kanuij illu, im illu eo an e ar bwil iloan.

13 Inem kiñ eo e ar ba nōn ro dri kanbil, ro re jela ien ko, (bwe ein drein mōntin kiñ nōn ro otemjej re jela kien im ekajet: **14** im ijilokin, Karshina, Shitar, Admeta, Tarshish, Mires, Marsina, im Mimukan, iroi ro jiljilimjuōn in Midia im Pōrsia, ro rej lo mejen kiñ, im jijōt mokta ilo ailiñ eo), **15** Ta eo jen kōmōn nōn liroi eo, Vashtai, ekar nōn kien, kin an kejekron nan in jiroñ an kiñ Ehasuirōs kin ro dri lale rum im kiki? **16** Im Mimukan e ar uak iman kiñ eo im iroi ro, Vashtai e ar jab kōmōn nana nōn kiñ ne wōt, a bareinwōt nōn iroi otemjej, im nōn ro dri ailiñ otemjej rej ilo bukōn otemjej an kiñ Ehasuirōs. **17** Bwe kōmōn in an liroi eo e naj buñbuñlok nōn kōra otemjej, bwe ren kejekron lōmaro beleir, ñe re naj ba, Kiñ Ehasuirōs e ar jiroñ Vashtai, liroi, bwe ren kadreloñ e nōn iman mejen, a e ar jab itok. **18** Im ranin liroi ro in Pōrsia im Midia ro rar roñjake kin kōmōn an liroi eo, re naj ba einwōt nōn iroi otemjej an kiñ ne. Ein drein e naj walok elōñ kejekron im illu. **19** Elañe emōn iben kiñ ne, en walok juōn kien in kiñ jen e, im ren jeje iben kien ko an ro dri Pōrsia im dri Midia, ¹bwe ren jab ukote, bwe Vashtai en jamin bar itok iman mejen kiñ Ehasuirōs: im kiñ ne en lelok an liroi nōn bar juōn emōn jen e. **20** Im ñe kien kiñ ne, eo e naj kōmōn e, e naj buñbuñlok ilujen aolepen ailiñ eo an, (bwe elap wōt), limaro beleir otemjej re naj lelok nōn beleir

¹ Ezra 4. 6. ² Jap. 8. 9. ³ Jap. 9. 80. ⁴ Nih. 1. 1.

¹ Jap. 8. 8; Dan. 6. 8.

nebar, ñōn ro rettā im ro re utiej. 21 Im nan eo e ar kabuñburuen kiñ eo im iroiĵ rōn; im kiñ eo e ar kōmōn ekar ñōn nan an Mimukan: 22 inem e ar jilkinlok letter ko ¹ñōn bukwōn otemjej an kiñ eo, ñōn jabrewōt bukwōn ekar ñōn jeje eo an, im ñōn ro dri ailiñ otemjej ekar ñōn jeje eo air, bwe jabrewōt man en iroiĵ ilo mweo imōn, im en konono ekar ñōn kajin ro dri ailiñ an.

2 Elikin men kein, ke emwij kaine-mōn kiñ Ehasuirōs, e ar kememej Vashtai, im men eo e ar kōmōn e, im kien eo emwij kōmōne nae e. 2 Inem ro dri korijeran kiñ eo, ro rar jerbal ñōn e, re ba, Ren kabukottok ñōn kiñ eo virĵin ro re dreo: 3 im kiñ ne en naetan ro dri kabwĵrōk ilo bukwōn otemjej in ailiñ eo an, bwe ren kokweloktok virĵin ro re dreo otemjej ñōn Shushan imōn kiñ eo, ñōn mweo imōn kōra rōn, ñōn iben Higeai, dri lale bo in kiki an kiñ, eo ej lali kōra ro; im ren lelok ñōn ir air men ko ken karreo; 4 im virĵin eo ej kapuñburuen kiñ eo en liroiĵ im binej jenkwōn Vashtai. Im men eo e ar emōn iben kiñ eo: im ein drein an kōmōne.

5 Juōn dri Ju e ar ber i Shushan imōn kiñ eo, etan ²Mordikeai, nejin Jeir, nejin Shimeai, nejin Kish, juōn dri Benjamin, 6 eo emwij bōklok jen Jerusalem iben ro dri jebokwe ar bōklok iben Jekonaia, kiñ in Juda, ro Nebukadnezzar kiñ in Babilon e ar bōklok ir. 7 Im e ar kakajiririik Hadasa, eñin Ester, nejin alap eo an: bwe ejelok jemen ak jinen, im jiroñ eo e dreo: im ke e mij jemen im jinen, Mordikeai e ar bōk e nejin.

8 Ein drein ke ar roñjake kien kiñ eo im nan in kañi eo an, im ke emwij kokweloktok elōñ jiroñ i Shushan imōn kiñ eo, ñōn ro Higeai ej lali ir, inem ar bōklok Ester iloan imōn kiñ, ñōn iben Higeai, dri lali kōra rōn. 9 Im jiroñ eo e ar lijinkin ilo buruen kiñ eo, im e ar joij ñōn e; im e mōkōj an lelok ñōn e men ko men in lijindrikrik, im mōtōn ko an, im jiljilim-

juōn jiroñ ro ekar bwe ren ber iben, jen iloan mweo imōn kiñ: im e ar kamōkit lio im jiroñ ro an ñōn jikin emōn tata ilo mweo imōn kōra ro. 10 Ester e jañin kwalok ro dri ailiñ an ak ro bwĵin: bwe Mordikeai e ar jiroñ e bwe en jab kwalok e. 11 Im Mordikeai e ar etetal ran otemjej iman worwor in imōn kōra, in jela ekijkan an Ester ber, im ta eo e naj walok ñōn e.

12 A ke e ar itok ien an juōn jiroñ dreloñ ñōn iben Ehasuirōs, elikin air kōmōn ñōn e ekar ñōn kien kōra rōn, joñoul ruo aliñ (bwe ein drein ar kamwijlok ran ko ran in lijindrikrik ir, jiljino aliñ kin oil im mōrr, im jiljino aliñ kin ñōj ko im kin men ko ñōn lijindrikrik kōra ro), 13 inem ein drein jiroñ eo e ar dreloñ ñōn iben kiñ eo: jabrewōt men eo e kōnan, rar lelok ñōn e bwe en bōklok ibenlok jen imōn kōra ro ñōn imōn kiñ. 14 Ke e jota e ar ilok, im ran eo ilju e ar jeb-iaktok ñōn mweo ken ka ruo an kōra rōn, ñōn iben ro Sheashgaz ej lale ir, eo ej lale konkubain ro an kiñ eo: re jamin kir etan, bwe en bar dreloñ ñōn iben kiñ eo, elañe e jab buñburuen kake. 15 Ak ke ien an Ester, nejin Abaiheil, alap an Mordikeai, eo e ar bōk e nejin, e ar itok bwe en ilok ñōn iben kiñ eo, e ar jab kajitōk elaplok jen men ko Higeai, dri lale bo an kiñ, e ar lelok. Im Ester e ar kabuñburuen ro otemjej rar kalimjek e.

16 Ein drein rar bōklok Ester ñōn iben kiñ Ehasuirōs iloan mweo imōn kiñ ilo aliñ eo ken ka joñoul, eo aliñ Tibet, ilo yiō eo ken ka jiljilimjuōn in an kiñ. 17 Im kiñ eo e ar yokwe Ester jen kōra otemjej, im elaplok an bōk joij im mol iman mejen, jen virĵin ro jet; inem e ar likit bokrōnat ion hōran, im kōmōn e liroiĵ bwe en binej jenkwōn Vashtai. 18 Inem kiñ eo e ar kōmōn juōn kwojkwoj elap ñōn iroiĵ ro an otemjej im ro dri korijeran, kwojkwoj kin Ester; im e ar kōmōn men in kōtlok ñōn bukwōn ko, im lelok jurtak ko, tellokin pein kiñ eo.

19 Im ke virjin ro rar kweloktok alen ken ka ruo, ien eo Mordikeai ej jijōt ilo kejem in kiñ eo. 20 Ester e jañin kwalok ro an dri ailiñ ak ro bwijin, einwōt Mordikeai e ar jiroñ e: bwe Ester e ar bokake nan in jiroñ jen Mordikeai, einwōt ke e ar kakajiririik e. 21 Ilo ran ko, ke Mordikeai ej jijōt ilo kejem an kiñ eo, ruo ian ro dri lale bo an kiñ, Bigtan im Tires, ian ro dri lale kejem, rar illu, im bukot bwe ren likit peir ion kiñ Ehasuirōs. 22 Im Mordikeai e ar jela kake, im e ar kwalok e ñōn Ester liroi; im Ester e ar kennanek kiñ eo ilo etan Mordikeai. 23 Im ke rar kabukot kin men in elañe emol ke jab ke, im rar lo bwe e mol, rar totoik lōmaro ilo juōn wijki: im rar jeje ilo buk in bwebwenato iman kiñ eo.

3 Elikin men kein kiñ Ehasuirōs e ar koutiej ¹Heman nejin Hamideta dri Egag, im lemanlok e, im likit ken jijōt eo an e utiej jen ko an iroi ro otemjej rar ber iben. 2 Im ro otemjej dri korijeran kiñ eo, rej ber iloan kejem in kiñ, rar barikrik im wujōke Heman: bwe ein drein kiñ eo e ar jiroñ kake. A Mordikeai e ar jab barikrik ak kabuñ ñōn e. 3 Inem ro dri korijeran kiñ eo, ro rar ber ilo kejem in kiñ, rar ba ñōn Mordikeai, Etke kwoj kokkure kien kiñ eo? 4 A ke rar konono ñōn e ran otemjej, im e ar jab eoroñ ir, rar kennanek Heman, bwe ren lo elañe men in an Mordikeai e naj bin: bwe emwij an kennanek ir bwe e dri Ju. 5 Im ke Heman e ar lo bwe Mordikeai e ar jab barikrik ak wujōke, inem Heman e obrōk kin illu. 6 A e ar drike ñe en likit pein ion Mordikeai wōt: bwe rar kajelaik e ro dri ailiñ an Mordikeai: kin men in e ar kabukot bwe en kokkure ro dri Ju otemjej rej ber ilo aolepen ailiñ eo an Ehasuirōs, aet ro dri ailiñ an Mordikeai.

7 Ilo aliñ eo mokta, eo aliñ Naisan, ilo yiō eo ken ka joñoul ruo an kiñ Ehasuirōs, rar kōmōn Pur, eñin kakōle, iman mejen Heman jen ran ñōn

ran, jen aliñ ñōn aliñ, ñōn aliñ eo ken ka ruo, eñin aliñ Edar. 8 Im Heman e ar ba ñōn kiñ Fhasuirōs, Juōn jar an ro dri ailiñ emwij air berijōke iben ro dri ailiñ ko ilo bukwōn otemjej in ailiñ eo am; im kien ko air rej ein juōn jen jabrewōt dri ailiñ. im re jab bokake kien ko an kiñ: kin men in e jab emōn ñōn kiñ ne bwe ren berwōt. 9 Elañe e buñburuen kiñ, en walok jeje bwe ren jebeplok: inem I naj lelok joñoul tausand talent silver na ilo pein ro rej lale men ko an kiñ, im bōk-tok e iloan jikin mweiuk ko an kiñ. 10 Im kiñ eo e ar bōk lukō eo an jen pein, im lelok ñōn Heman nejin Hamideta dri Egag, dri kijirāte ro dri Ju. 11 Im kiñ eo e ar ba ñōn Heman, Silver eo emwij lewoj ñōn kwe, im armij ro bareinwōt bwe kwon kōmōn ñōn ir einwōt emōn ibōm.

12 ¹Inem rar kirtok ro dri jeje ilo aliñ eo mokta, ilo ran eo ken ka joñoul jilu; im rar jeje ekar ñōn men ko otemjej Heman ej jiroñ kake ñōn iroi ro an kiñ eo, im ñōn iroi ilo jabrewōt bukwōn, im ñōn iroi ro an jabrewōt dri ailiñ ko, ñōn jabrewōt bukwōn ekar ñōn jeje eo an, im ñōn jabrewōt ailiñ ekar ñōn kajin eo an; ar jeje ilo etan kiñ Ehasuirōs, im sil kin kakōle eo an. 13 Im rar jilkinlok letter ko kin ro dri jilik ilo bukwōn otemjej an kiñ eo, bwe ren kokkure im mōn, im kōmōn bwe ren joko, dri Ju otemjej, ro remōn drer im ridto rōn, ajiri redrik im kōra ro, ilo juōn wōt ran, ran eo ken ka joñoul jilu in aliñ ken ka joñoul ruo, eo aliñ Edar, im bwe mweiuk ko air men in rakim. 14 Men in jeje eo, bwe kien eo en ilok ñōn jabrewōt bukwōn, ar kwalok ñōn ro dri ailiñ otemjej, bwe ren rerelok mae ran eo. 15 Ro dri jilik rar ilok im kakijorur kin kien kiñ eo, im ar kwalok kien eo ilo Shushan imōn kiñ eo. Inem kiñ eo im Heman rar jijōt bwe ren irak; a jikin kwelok Shushan e ar jebaruuj.

4 A ke Mordikeai e ²ar jela men otemjej emwij kōmōni, e ar kekel nuknuk ko an im kōnōk nuknuk ko

eklep iren iben brij in ubaj, im etalok ilujen jikin kwelok eo, im e ar jōñ kin ainiken elap im buromōj; 2 im e ar itok iman kejem in kiñ eo: bwe emo an jabrewōt dreloñ ilo kejem in kiñ ke ej kōnōk nuknuk ko eklep iren. 3 Im ilo jabrewōt bukwōn, ijo kien kiñ ej ilok ie, elap buromōj iben ro dri Ju, im jitlok, im jōñ, im liājlol; im elōñ rej babu ilo nuknuk eklep iren im brij in ubaj.

4 Im limaro dri korijeran Ester, im ro dri lale bo eo an, rar item kennanek e; im liroi j eo e kanuij burumōj: im e ar jilkinlok nuknuk ko in kanuknuk Mordikeai, im bwe en wutik nuknuk ko eklep iren jen e; a e jab bōke. 5 Inem Ester e ar kirtok Hetak, juōñ ian dri lale bo an kiñ eo, eo e ar likit e bwe en ber iben, im jiroñ e bwe en ilok nōñ iben Mordikeai, im jela ta men in, im etke ein drein. 6 Inem Hetak e ar drioi jlok nōñ iben Mordikeai nōñ jikin eo e rābōkbōk an jikin kwelok eo iman kejem in kiñ eo. 7 Im Mordikeai e ar kennanek e men otemjej rar walok nōñ e, im oran mōñni eo Heman e ar kalimur bwe e naj lelok nōñ jikin mweiuk ko an kiñ eo kin dri Ju ro, bwe ren kokkure ir. 8 Bareinwōt e ar lelok nōñ e jeje eo in kien emwij kwalok e ilo Shushan bwe ren kokkure ir, bwe en kwalok nōñ Ester, im bwe en ba nōñ e, im bwe en jiroñ e bwe en dreloñ nōñ iben kiñ eo, im akwelap nōñ e, im kajitōk iben kin ro an dri aliñ.

9 Im Hetak e ar item kennanek Ester nan ko an Mordikeai. 10 Inem Ester e ar konono nōñ Hetak, im lelok nōñ e juōñ nan nōñ Mordikeai, im e ba: 11 Ro otemjej dri korijeran kiñ eo, im ro dri bukwōn otemjej an kiñ eo re jela, bwe jabrewōt man ak kōra ej dreloñ nōñ iben kiñ eo nōñ worwor eo iloan, im jañin kirtok e, juōñ wōt kien nōñ e, ren mōn e, elañe kiñ eo e jab kōtellok nōñ e septer gold eo bwe en mour wōt: a ña, ar jab kirtok iō bwe in dreloñ nōñ iben kiñ eo iomin ran kein joñoul. 12 Im rar kennanek Mordikeai nan kein jen Ester.

13 Inem Mordikeai e ar jiroñ ir bwe ren uak nōñ Ester, Kwon jab lemnok ibōm bwe kwo naj mour wōt iloan mweo imōn kiñ ne elap jen dri Ju otemjej. 14 Bwe elañe kwoj kejeklokjen ilo ien in, inem jibōñ im lomor e naj walok nōñ dri Ju jen bar juōñ jikin, a kwe im imōn jemōm re naj joko: im wōn e jela ñe kwo ab kar itok nōñ am liroi j kin ien rōt in? 15 Inem Ester e ar jiroñ bwe ren uak nōñ Mordikeai, 16 Kwon ilok, kwon kokweloktok ro dri Ju otemjej rej ber i Shushan, im jitlok kin ña, im komin jab mōña ak irak ¹ iomin jilu ran, ran ak boñ: ña bareinwōt im limaro dri korijera kim naj bareinwōt jitlok; ein drein I naj dreloñ nōñ iben kiñ eo, e jab ekar nōñ kien: im elañe I joko, I joko. 17 Ein drein Mordikeai e ar ilok wōt im kōmōn ekar nōñ men otemjej Ester e ar jiroñ e kake.

5 Ak ilo ran eo ken ka jilu, Ester e ar kōnōk nuknuk ko an, nuknuk in liroi j, im ej jutōk ilo worwor eo iloan mweo imōn kiñ, ikijen imōn kiñ: im kiñ eo e ar jijōt ion tron in kiñ eo an ilo mweo imōn, ikijen kejem in mweo. 2 Im ein drein, ke kiñ eo e ar lo Ester, liroi j eo, ke ej jutōk ilo worwor eo, lio e ar lo joij iman mejen: im kiñ eo e ar kōtellok septer gold eo ej ber ilo pein. Ein drein Ester e ar kebaklok im uñir man septer eo. 3 Inem kiñ eo e ar ba nōñ e, Ta eo kwo kōnan, liroi j Ester, im ta am kajitōk? naj lewoj nōñ kwe elañe ² jibilkwōn aliñ in. 4 Inem Ester e ar ba, Elañe emōn iben kiñ ne, kiñ ne im Heman renro itok ranin nōñ kwojkwoj eo emwij aō kapojōk nōñ e.

5 Inem kiñ eo e ba, Komin lipjirjire Heman, bwe jen kōmōn einwōt Ester e ar ba. Ein drein kiñ eo im Heman rar itok nōñ kwojkwoj eo Ester e ar kapoje. 6 Im kiñ eo e ar ba nōñ Ester ilo kwojkwoj in wain eo, Ta eo kwoj kajitōk? im naj lewoj nōñ yuk: im ta am kōnan? elañe jibilkwōn aliñ in, naj kōmōne. 7 Inem

Ester e ar uak im ba, Aō kajitōk, im aō kōnan eñin, 8 Elañe I ar lo joi iman mejen kiñ ne, im elañe kiñ ne e mōnōnō in letok men eo ij kajitōk kake, im kōmōn einwōt I kōnan, ren itok kiñ im Heman nōn kwojkwoj eo I naj kapoj nōn ir, inem I naj kōmōn ilju einwōt kiñ ne e ar ba.

9 Inem Heman e ar drioielok ran eo, im e mōnōnō im lōñliñ buruen: a ke Heman e ar lo Mordikeai ilo kejem in kiñ, bwe ¹ e ar jab jutōk ak makōt-kit kin e, e ar obrōk kin illu nae Mordikeai. 10 Mekarta, Heman e ar kōkabwirbwir e, im ilok nōn kabijuknen; im e ar jiliklok im āñintok ro jeran im Ziresh lio belen. 11 Im Heman e ar kennanek ir kin aibujuij an mweiuk ko an im oran ro nejn, im men otemjej kiñ eo e ar koutiej e kake, im ekijkan e ar lemanlok e jen iroi ro im ro dri korijeran kiñ. 12 Bareinwōt Heman e ar ba, Aet, Ester liroi eo e ar jab likit jabrewōt armij bwe en itok iben kiñ nōn kwojkwoj eo e ar kapoje, a ña wōt; im ilju bareinwōt emwij an jiroñ iō iben kiñ eo. 13 A ejelok tokjen iba aolepen men kein toñ aō lo Mordikeai dri Ju jijōt ilo kejem in kiñ eo. 14 Inem Ziresh lio belen im ro jeran otemjej re ba nōn e, Ren kōmōn juōn wijki, utiejn limñoul kubit, im ñe e jiboñ kwon kajitōk iben kiñ eo bwe ren totoik Mordikeai ion: inem kwon mōnōnō in ilok iben kiñ eo nōn kwojkwoj eo. Im men eo e ar kabuñburuen Heman: im e ar ba bwe ren kōmōn wijki eo.

6 Boñin eo kiñ eo e ban kiki; im e ar jiroñ bwe ren bōktok buk in jeje bwebwenato ko, im ar konono kake iman kiñ eo. 2 Im ar lo bwe emwij jeje kin an ² Mordikeai kennanek kin Bigtan im Tiresh, ruo ian ro dri lale bo eo an kiñ eo, ian ro rar lale kejem, ro rar bukot bwe ren likit peir ion kiñ Ehasuirōs. 3 Im kiñ eo e ar ba, Rar koutiej ak wujōke Mordikeai kin men in ke? Inem ro dri korijeran kiñ eo, ro rar jerbal nōn e, re ba, Ejelok men rar kōmōn nōn e. 4 Im kiñ eo e ar ba, Wōn inabij? Ak He-

man e ar dreloñ ilo worwor jab eo bwe en kajitōk iben kiñ eo bwe en totoik Mordikeai ilo wijki eo e ar kapoje nōn e. 5 Im ro dri korijeran kiñ eo re ba nōn e, Lo, Heman ej jutōk inabij. Im kiñ eo e ar ba, En dreloñtok. 6 Ein drein Heman e ar dreloñ. Im kiñ eo e ar ba nōn e, Ta ren kōmōn nōn armij eo kiñ eo e mōnōnō in wujōke? Ak Heman e ar ba ilo buruen, Wōn eo elaplok an kiñ eo kōnan wujōke jen ña? 7 Im Heman e ar ba nōn kiñ eo, Kin armij eo kiñ ej mōnōnō in wujōke, 8 ren bōktok nuknuk ko an kiñ, ko kiñ ej kōnōk e ran kein, im ¹ ors eo kiñ ne e kōnan uwe ion, im bokrōnat an kiñ rej likit ion bōran: 9 im ren lelok nuknuk ko im ors eo ilo pein juōn ian iroi ro an kiñ re utiejtata, bwe en kaibujuij armij eo kiñ ne ej mōnōnō in wujōke, im likit e bwe en uwe ion ors ilo ial ilujen jikin kwelok in, im en kwalok iman, Ein drein naj kōmōn nōn armij eo kiñ ej mōnōnō in wujōke.

10 Inem kiñ e ar ba nōn Heman, Kwon kaiur yuk, im bōk nuknuk ko, im ors eo, einwōt kwar ba, im kōmōn ein drein nōn Mordikeai, dri Ju, eo ej jijōt ilo kejem an kiñ; en ejelok eberir ian men ko kwar konono kake. 11 Inem Heman e ar bōk nuknuk ko im ors eo, im kaibujuij Mordikeai, im kōmōn bwe en uwe ion ors ilo ial ilujen jikin kwelok eo, im e ar kwalok iman, Ein drein naj kōmōn nōn armij eo kiñ ej mōnōnō in wujōke. 12 Im Mordikeai e ar bar itok nōn kejem in kiñ, a Heman e ar jarōplok nōn mweo imōn, ej jōñ im emwij kalibubu bōran. 13 Inem Heman e ar bwebwenato nōn Ziresh lio belen, im nōn ro jeran otemjej, men ko otemjej rar walok nōn e. Inem ro an dri meletlet im Ziresh, lio belen, rar ba nōn e, Elañe Mordikeai eo kwar jino in buñ iman, ej jen ine an dri Ju, kwo jamin bōk anjo ion, a emol kwo naj buñ iman. 14 Ke rej konono wōt iben, ro dri lale bo an kiñ eo rar itok, im kaiur ir in āñinlok Heman nōn kwojkwoj eo Ester e ar kapoje.

7 Ein drein kiñ eo im Heman rar itok in kwojkwoj iben Ester liroiñ eo. **2** Im kiñ eo e ar bar ba ññ Ester ilo ran eo ken ka ruo ilo kwojkwoj in wain, Ta eo kwoj kajitōk, liroiñ Ester? im naj lewoj ññ yuk: im ta am kōnan jen ña? ññ ¹jibilkwōn in ailiñ in naj kōmōn e. **3** Inem Ester, liroiñ, e ar uak im ba, Elañe I ar lo joij iman mejōm, O kiñ, im elañe ej kabuñburuen kiñ ne, ren letok aō mabur kin aō kajitōk, im ro aō dri ailiñ kin aō kōnan jen kwe: **4** bwe emwij wiakake kim, ña im ro aō dri ailiñ, bwe ren kokkure, im mōn, im kejebeplok kim. Elañe rej wiakake kim dri korijer man im kōra, I naj kar ikōñ, meñe dri kijirāt eo e jamin maroñ in nawōnan kiñ eo kin jerata eo an. **5** Inem kiñ Ehasuirōs e ar kono no im ba ññ Ester, Wōn eo, im ej ber ia, eo ej beran in lemnok ilo buruen bwe en kōmōn ein drein? **6** Im Ester e ar ba, Juōn dri kijirāt im dri juma, aet Heman in dri nana. Inem Heman e mijōk iman kiñ eo im liroiñ eo. **7** Im kiñ eo e ar jerkak ilo an ilu, jen kwojkwoj in wain, im drioiñlok ilo jikin kallip an imōn iroiñ eo: im Heman e ar jutōk im kajitōk an mour jen Ester, liroiñ eo; bwe e ar lo bwe kiñ eo ej lemnok in kōmōn nana ññ e. **8** Inem kiñ eo e ar jeblak jen jikin kallip an mweo ññ jikin kwojkwoj in wain; im emwij an Heman buñ ion aowej ijo Ester e ar ber ie. Inem kiñ eo e ar ba, E naj kananaik liroiñ eo imaō iloan mwīn ke? Ke nan in e ar ilok jen loñn kiñ eo, rar kalibubuturin mejen Heman. **9** Inem Harbona, juōn ian ro dri lale bo an kiñ, ro rej ber iman kiñ eo, e ar ba, Kwon lale bareinwōt wijki eo limñoul kubit utiejen eo Heman e ar kōmōne ññ Mordikeai, eo e ar kennan emōn kin kiñ, ej jutōk wōt ilo imōn Heman. Im kiñ eo e ar ba, Komin totoik e ion. **10** ²Ein drein rar totoik Heman ion wijki eo e ar kapoje ññ Mordikeai. Inem e joko illu an kiñ eo.

8 Ilo ran eo kiñ Ehasuirōs e ar lelok imōn Heman dri kijirāte dri

Ju ro, ññ Ester, liroiñ eo. Im Mordikeai e ar itok ññ iman mejen kiñ: bwe Ester e ar kwalok karkarin ññ e. **2** Im kiñ eo e ar wutik luk eo an, emwij an bōk e jen Heman, im lelok ññ Mordikeai. Inem Ester e ar likit Mordikeai ion imōn Heman.

3 Im Ester e ar bar konono iman kiñ eo, im buñbero i neen, im akwelap ññ e, im jōñ, bwe en jolok nana an Heman dri Egag, bebe eo e ar beik nae ro dri Ju. **4** Inem kiñ eo e arkōtellok ññ Ester septer gold eo. Ein drein Ester e ar jerkak im jutōk iman mejen kiñ eo. **5** Im e ar ba, Elañe ej kabuñburuen kiñ, im elañe I ar lo joij iman mejen, im men eo e jime iman mejen, ren jeje in ukot¹ letter ko an Heman, nejñ Hamideta dri Egag, eo e ar kine, ke e ar jeje ññ kokkure dri Ju otemjej rej ber ilo bukwōn otemjej an kiñ ne: **6** bwe ekijkan in maroñ in kaberber iō in lo nana eo e naj itok ion ro aō dri ailiñ? ak ekijkan aō maroñ in kaberber iō in lo air kokkure ro nuku? **7** Inem kiñ Ehasuirōs e ar ba ññ Ester, liroiñ eo, im ññ Mordikeai dri Ju, Lo I ar lelok ññ Ester imōn Heman, im rar totoik e ilo wijki eo, kin an likit pein ion dri Ju ro. **8** Komin bareinwōt jejelok ññ dri Ju ro einwōt ami kōnan, ilo etan kiñ, im komin sil e kin luk eo an kiñ: bwe jeje eo emwij je ilo etan kiñ, im sil kin luk eo an kiñ, ejelok armij e maroñ in ukot e.

9 ²Inem rar kirtok ro dri jeje an kiñ ien eo, ilo aliñ eo ken ka jilu, eo aliñ Sivan, ilo ran eo ken ka roñoul jilu: im ar jeje ekar ññ men otemjej Mordikeai e ar jiroñ ro dri Ju, im ññ iroiñ ro in bukwōn ko rej jen India ññ Itiopia, jibuki roñoul jiljilimjuōn bukwōn, ññ jabrewōt bukwōn ekar ññ jeje eo an, im ññ jabrewōt aliñ ekar ññ kajin eo an, im ññ ro dri Ju ekar ññ jeje eo air im ekar ññ kajin eo air. **10** Im e ar jeje ilo etan kiñ Ehasuirōs, im sil e kin luk eo an kin, im e ar jilkinlok letter ko kin ro dri jilik ion ors ko, rej ilok ion kiru ko re mōkōj, ko rej jerbal ññ kiñ eo, mul

ko im kamel emōn drer: 11 ilo ir kiñ e ar lelok ñōn ro dri Ju ilo jabrewōt jikin kwelok bwe ren kweloklok, im jutōk kin air mour, bwe ren kokkure im mōn, im kōmōn bwe ren joko, aolepen kajur an ro dri ailiñ im bukwōn ko re kōnan mōn ir, ajiri ro air, im kōra rōn, im bwe ren bōk mweiuk ko air men in rakim, 12 ilo juōn wōt ran ilo bukwōn otemjej an kiñ Ehasuirōs, ilo ran eo ken ka joñoul jilu in aliñ eo ken ka joñoul ruo, eo aliñ Eḏar. 13 Jeje eo bwe ren kwalok kien ilo jabrewōt bukwōn, ar jejelok ñōn ro dri ailiñ otemjej, im bwe ro dri Ju ren pojōk ilo ran eo bwe ren kwi ion ro dri kijirāte ir. 14 Ein drein ro dri jilik rar uwe ion kiru kore mōkōj rej jerbal ñōn kiñ eo, rar ilok, im kien kiñ eo e ar kakijorur im kaiur ir: im ar kwalok kien eo ilo Shushan, imōn kiñ eo.

15 Im Mordikeai e ar drioielok jen imōn kiñ eo, im ej kōnōk nuknuk ko in kiñ, blu im mouj, im iben juōn bokrōnat gold elap, im juōn kobe linen kworairik im eōij: im jikin kwelok Shushan e ar lamij im mōnōnō. 16 Ro dri Ju rar lo maram im mōnōnō, im lōñliñ im nebar. 17 Im ilo jabrewōt bukwōn, im ilo jikin kwelok otemjej, ijo jabrewōt nan in jiroñ im kien kiñ e ar itok ie, iben ro dri Ju, eor lōñliñ im mōnōnō, im kwojkwōj im juōn ran emōn. Im elōñ jen ro dri ailiñ ko in eneo rar erom dri Ju: bwe mijōk ro dri Ju e ar buñ ioir.

9 Ak ¹ ilo aliñ eo ken ka joñoul ruo, eo aliñ Eḏar, ilo ran eo ken ka joñoul jilu, ke ebak ien kamoli kien kiñ eo im nan in kaiñi eo an, ilo ran eo ke ro dri kijirāte dri Ju ro rej kōtōmene in iroi j ioir, (meñe emwij ukot e im ein juōn, im dri Ju ro rej iroi j ion ro dri kijirāte ir), 2 ro dri Ju rar kweloktok ilo jikin kwelok ko air ilujen bukwōn otemjej an kiñ Ehasuirōs, bwe ren likit peir ion ro otemjej rej kabukot bwe ren mōn ir: im ejelok e maroñ in jumae ir; bwe mijōk ir e ar buñ ion ro dri ailiñ otemjelok. 3 Im iroi j otemjej in bukwōn ko, im

iroi j ro, im ro rar lale jerbal ko an kiñ eo, rar jibōñ dri Ju ro; bwe mijōk Mordikeai e ar buñ ioir. 4 Bwe Mordikeai e ar lap ilo mweo imōn kiñ eo, im bwe dretin e ar berijōke ilo bukwōn otemjej; bwe armij eo, Mordikeai, e ar wōnmanlok ilo an laplok. 5 Im ro dri Ju rar mōn ro dri kijirāte ir otemjej kin jāji, im kin mōn im kokkure, im rar kōmōn einwōt air kōnan ñōn ro dri kijirāte ir. 6 Im i Shushan imōn kiñ eo, dri Ju rar mōn im kokkure limabuki armij. 7 Im Parshandeta, im Dalpon, im Aspeta, 8 im Poreta, im Adelia, im Arideta, 9 im Parmashta, im Ariseai, im Arideai, im Vaizeta, 10 lōmarein joñoul nejin Heman, nejin Hamideta, dri kijirāte dri Ju ro, rar mōn ir; a re jab likit peir ion men in rakim eo.

11 Ilo ran eo ar bōktok iman kiñ eo oran ro emwij mōn ir ilo Shushan imōn kiñ eo. 12 Im kiñ eo e ar ba ñōn Ester, liroi j eo, Ro dri Ju rar mōn im kokkure limabuki armij i Shushan imōn kiñ, im lōmaro joñoul nejin Heman; inem rar kōmōn ta ilo bukwōn ko jet an kiñ? Kiō ta am kajitōk? im naj lewoj ñōn yuk: e bar or ke am kōnan? im naj kōmōne. 13 Inem Ester e ar ba, Elañe e buñburuen kiñ ne, ren lelok ñōn ro dri Ju rej ber i Shushan bwe ren kōmōn ilju einwōt kien ranin, im ren totoik lōmaro joñoul nejin Heman ilo wijki. 14 Im kiñ e ar jiroñ bwe en ein drein air kōmōn: im ar kwalok juōn kien i Shushan, im rar totoik lōmaro joñoul nejin Heman. 15 Im ro dri Ju rar ber i Shushan rar kweloktok ilo ran eo ken ka joñoul emen bareinwōt in aliñ Eḏar, im rar mōn jilu buki armij i Shushan: a re jab likit peir ion men in rakim eo. 16 Im dri Ju ro jet ilo bukwōn ko an kiñ rar kweloktok, im jutōk kin air mour, im bōk kaki je jen ro dri kijirāte ir, im rar mōn ian ro rej drike ir, jiljilim-juōñioul lailim tausana, a re jab likit peir ion men in rakim eo.

17 Ar kōmōn men in ilo ran eo ¹ ken ka joñoul jilu in aliñ Eḏar: im ilo ran

eo ken ka joñoul emen rar kakije, im kōmōn juōn ran in kwojkwoj im lōñliñ. 18 A dri Ju ro i Shushan rar kweloktok ilo ran eo ken ka joñoul jilu, im ilo ran eo ken ka joñoul emen an aliñ eo: im ilo ran eo ken ka joñoul lailim rar kakije, im kōmōn juōn ran in kwojkwoj im lōñliñ. 19 Kin men in dri Ju ro in jikin kwelok ko redrik, im ro rej jokwe ilo jikin kwelok ko ejelok air worwor, rej kōmōn ran eo ken ka joñoul emen ilo aliñ Edar juōn ran in lōñliñ im kwojkwoj, im ran emōn, im ien jilkinlok mōtōn ko ñōn dron.

20 Im Mordikeai e ar jeje nan kein, im jilkinlok letter ko ñōn dri Ju otemjej rej ber ilo bukwōn otemjej an kiñ Ehasuirōs, ko rebak im ko retolok, 21 im jiroñ ir bwe ren lale ran eo ken ka joñoul emen in aliñ Edar, im ran eo ken ka joñoul lailim, ilo yīō otemjej, 22 einwōt ran ko dri Ju ro rar kakiĵeik ir jen ro dri kijirāte ir, im aliñ eo emwij ukot e jen buromōj ñōn lōñliñ ibeir, im jilkinlok mōtōn ko ñōn dron, im men in lelok ñōn dri jeramel. 23 Im dri Ju ro rar kajeoñ in kōmōn einwōt air jino in kōmōn, im einwōt Mordikeai e ar jejelok ñōn ir; 24 bwe Heman nejin Hamideta, dri Egag, dri kijirāte dri Ju otemjej, e ar bebe nae ro dri Ju in kakkure ir, im e ar kōmōn Pur, eñin kakōle eo, bwe en kakkure ir, im mōn ir; 25 a ke rar kwalok men in ñōn kiñ eo, e ar jiroñ kin letter ko bwe bebe eo an e nana, emwij an bebe nae ro dri Ju, en jeblaklok ion bōran, im bwe ren totoik e im lōmaro nejin ion juōn wijki.

26 Kin men eo rar naetan ran ko Purim, einwōt etan Pur. Bareinwōt

kin nan otemjej in letter in, im men eo emwij air loe, im eo e ar itok ioir, 27 dri Ju ro rar likit e, im bōk ioir im ion ineir, im ion ro otemjej rej koha ibeir, bwe en jab likjōp, a re naj lale ran ko ruo ekar ñōn jeje kake, im ekar ñōn ien eo emwij kajejiti, yīō otemjej; 28 im re naj kememej ran ko ilo ebeben otemjej, nukin otemjej, bukwōn otemjej, im jabrewōt jikin kwelok: im ran kein ran in Purim ren edrep wōt iben dri Ju ro, ak kememeji en jab joko jen ineir.

29 Inem Ester liroiĵ eo, nejin Abaiheil, im Mordikeai, dri Ju, rar jeje kin wāwen iroiĵ in kabin letter in ken ka ruo in Purim. 30 Im e ar jilkinlok letter ko ñōn dri Ju otemjej, ¹ñōn bukwōn ko jibuki roñoul jiljilimjuōn in ailiñ an Ehasuirōs, im na iben nan ko in ainemōn im mol, 31 bwe en kabin nan kein an Purim ilo ien ko emwij bakajeir, einwōt Mordikeai dri Ju, im Ester, liroiĵ eo, rar jiroñ ir, im einwōt air kaiñi ñōn ir moke im ñōn ro ineir, ilo men in jitlok ko im lamij eo air. 32 Im kien Ester e ar kabin men kein an Purim: im emwij jeje ilo juōn buk.

10 Im kiñ Ehasuirōs e ar likit owōj ion eneo, im ion ailiñ ko in lometo. 2 In men in kōmōn ko an, kajur im maroñ eo an, im aolepen bwebwenato kin utiejen Mordikeai, eo kiñ eo e ar lemanlok e ñōn e, ar jab jeje ilo buk ko buk in bwebwenato an kiñ ro in Midia im Pōrsia ke? 3 Bwe Mordikeai e ar ²ijillokin kiñ Ehasuirōs, im e utiej iben dri Ju, jitenburu iben ro jeir im jātir relōñ, im e ar ³kabukot emōn ñōn ro an dri ailiñ, im konono ainemōn ñōn inen otemjej.

¹ Jap. 1. 1. ² Jen. 41. 43, 44. ³ Nih. 2. 10.